

**NINTH MIZORAM LEGISLATIVE ASSEMBLY  
(FOURTH SESSION CUM BUDGET SESSION)**

**LIST OF BUSINESS**

FOR FOURTEENTH SITTING ON THURSDAY, THE 20<sup>th</sup> MARCH, 2025  
(Time 10:30 A.M to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**NOTICE BY A MEMBER**

2. **PU ROBERT ROMAWIA ROYTE** to bring to notice of the House (for 5 minutes) as allowed under Rule 335 of the Rules of Procedure and Conduct of Business in Mizoram Legislative Assembly, “Phuldungsei khuaa mi 85 Ration Card paihsak an neih leh theih nana rawtna.”

**LAYING OF PAPERS**

3. **PU LALDUHOMA**, Hon. Chief Minister to lay on the Table of the House a copy each of the following :
- i) Finance Accounts, 2023–2024 Volume-I in respect of Government of Mizoram.
- ii) Finance Accounts, 2023–2024 Volume-II in respect of Government of Mizoram.
- iii) Appropriation Accounts, 2023 – 2024 in respect of Government of Mizoram.
4. **PU F. RODINGLIANA**, Minister to lay on the Table of the House a copy of “The Mizoram Electricity Regulatory Commission adoption of the Joint Electricity Regulatory Commission for Manipur and Mizoram (Standard of Performance for Distribution and Transmission Licensees) Regulations, 2014, Order 2024, (First Amendment) Regulations, 2024.”

**FINANCIAL BUSINESS**

***Discussion and Voting on Demands***

5. **PU F. RODINGLIANA**, Minister to submit the following to the Vote of the House on 20.03.2025(Thursday).

<b>Demand No.</b>	<b>Purpose</b>	<b>Amount</b>	<i>Demands for Grants page No.</i>
<b>18</b>	Printing & Stationery	12,45,23,000.00	212-216
<b>39</b>	Power & Electricity	9,80,08,59,000.00	454-465
<b>40</b>	Commerce & Industries	60,77,42,000.00	466-484
<b>TOTAL</b>		<b>10,53,31,24,000.00</b>	

6. **PU LALDUHOMA**, Hon. Chief Minister to submit the following to the Vote of the House on 20.03.2025(Thursday).

<b>Demand No.</b>	<b>Purpose</b>	<b>Amount</b>	<i>Demands for Grants page No.</i>
<b>1</b>	Legislative Assembly	39,46,70,000.00	1-7
<b>2</b>	Governor	30,80,000.00	8-13
<b>3</b>	Council of Ministers	8,42,67,000.00	14-20
<b>4</b>	Law & Judicial	69,94,78,000.00	21-43
<b>5</b>	Vigilance	8,01,50,000.00	44-51
<b>9</b>	Finance	40,33,43,32,000.00	66-89
<b>11</b>	Secretariat Administration	1,36,55,11,000.00	94-97
<b>14</b>	Planning & Programme Implementation	4,73,75,09,000.00	106-118
<b>15</b>	General Administration	1,06,00,17,000.00	119-161
<b>TOTAL</b>		<b>48,75,90,14,000.00</b>	

**LEGISLATIVE BUSINESS**

*Bills for introduction, consideration and passing*

7. **PU LALDUHOMA**, Hon. Chief Minister to beg leave of the House to introduce “The Mizoram Appropriation (Demand for Grants 2025-2026) Bill, 2025.”

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

VANLALTHANTLINGI  
Commissioner & Secretary

\*\*\*\*\*

**SPEAKER** : “Dik taka lalin ro a rel chuan ram a phuisui a, Thamna a lak chuan ram a chhe thin”.

- Thufingte 29:4

### **QUESTIONS & ANSWERS**

**Starred Question No. 221 - Kanhmun to Damcherra Lei dawh chungchang.**

Zawhna Neitu: Pu Robert Romawia Royte, Hachhek Bialtu.

**PU ROBERT ROMAWIA ROYTE:** Pu Speaker, ka lawm e. Starred Question No. 221, PWD Minister zahawm tak chhan atan: -

“Kanhmun - Damcherra Lei dawh hi engtika zawh tur nge?”

**SPEAKER** : Chhang turin PWD changtu Minister zahawm tak Pu Vanlalhlana ilo sawm ang.

**PU VANLALHLANA, MINISTER:** Pu Speaker, ka lawm e. Member zahawm tak Pu Robert Romawia Royte chhanna chu hei hi a ni e: -

“Kanhmun to Damcherra inkara lei dawh hi Dt. 31.6.2025-a zawh tura ruahman a ni.” Tih a ni e. Ka lawm e.

**SPEAKER** : Zawhbelhna heng member zahawmtakte hnen atang hian kan la ang –

1. Pu Lalmuanpuia Punte;
2. Pu K. Hrahmo;
3. Pu V. Malsawmtluanga.

**PU LALMUANPUIA PUNTE** : Pu Speaker, ka lawm e. Ka Zawhbelhna chu –

i) Khawruhlian - E. Phaileng kawng, kawng lian lak, double lane-a a laih ni si, a tawn tawn Aizawl lam leh lam E. Phaileng chhaklam laih zawm ni bawk silo hi laih zawm tumna a awm em?

ii) Pu Jeje-a nena kan bial ve ve S. Chawngtui - N. Vanlaiphai kawng chhe lutuk hi min siamthatsak thei ang em?

**PU K. HRAHMO** : Pu Speaker, ka Zawhbelhna chu –

i) Lawngtlai - Siaha via Ferry lei dawh hi tender a ni tawh em?

ii) Tender ni ta se, thlan fel a ni tawh em?

iii) Tu nge contractor?

iv) Amount engzat nge?

**PU V. MALSAWMTLUANGA:** Pu Speaker, ka Zawhbelhna chu –

i) Tun dinhmunah PWD in lei eng zat nge a enkawl?

ii) Lengtekai lei hi engnge tunah a dinhmun?

iii) Pangzawl – Lungmawi, Mat lei ka bial ami khi min dawh sak thei ang em?

**SPEAKER** : Chhang turin, a changtu Minister Pu Vanlalhlana ilo sawm ang.

**PU VANLALHLANA, MINISTER:** Pu Speaker, Zawhbelhna hmasa ber Pu Lalmuanpuia zawhna kha –Phaileng leh Khawruhlian inkar kawng laih zau lai bik chutiang a awm ka va hre mai lo em.

Pu Hrahmo zawhbelhna kha, Lawngtlai - Siaha Tuipui Ferry hi rei tak lei dawh a ni lo a, marboat-in motor-te pawh a phur kai thin a ni. Tun sorkar hnuaiah hian lei dawh a ni dawn a detail project report te pawh buatsaih vek a ni tawh a. Mahse, tender erawh chu koh a la ni lo. Chuvangin, he lei pawimawh tak hi siam tur a ni.

Tin, Pu Malsawmtluanga'n lei dawh zat a zawhna kha chu, a exact kha chu 120 vel awm niin ka hria a; number kha a sual thui vakin ka ring lo. Kan lei te hi a tlangpuiin RCC lei te, pre-stressed concrete te, bailey bridge te, buck stressed te, steel plate girder te, thing phel lei te a ni hlawm a, a quality a inang lo hlawm khawp mai. Tin, lui lian thenkhat ah hi chuan lei hi dawh deuh vek a ni tawh a, hmabak erawh chu kan la nei nual a. Langkaih te, Mat te, Tlawng te, Tuivai te, Chhintuipui te, Chepte te leh, lui te deuh fur laia kal kai theih si loh amaherawhchu, thal laia awlsam taka han kal kai theih si hi kan ngah em em mai a.

Tin, Tlawng Lei, Lengtekai ami khu Mizoram-a kan neih ah chuan a la dangdai ber a; India ramah pawh khutiang lei khu chu a la awm vak lo a ni. A technology khu a danglam angreng a, a chungah kaih kula chumi chuan lei kha a khai a, leiah a inngat deuh bawk si a. Chutianga Lei dangdai chu a ni a; North East ah phei chuan a awmchhun ala ni hial a. A satute hi Podder Company, Delhi an ni a. Vawikhat trial an nei tawh a, an hlawhchham hlauh mai a, an hmanruate pawh chhia a awm nual a. Nimin piah maiah khan trial an nei leh a, hlawhtling turah an in ngai a. Amaherawhchu, eng emaw sual neuh neuh a la awm a, kan la peih dawn lo deuh ni te pawhin a lang a. Chu chu kan neih len pawl a ni a, crore 40 man. Kan Lei ah chuan a la to deuh ber awm e.

Tin, Mat Lei hi tunah a pahnihna dawh mek a ni a, kan la peih lo deuh a. Tin, hmannah Tuivai Lei, Manipur nena kan inpawhna Lei pawimawh em em a ni a, chu chu kan CM-in a han hawng a, mipui pawh an hlim khawp mai. Manipur atang pawhin mi tam tak chu lei hawn witness tur chuan an lo kal a. Khilai chhehvel Mizoram leh Manipur a mite pawh an hlim khawp mai. Kha kha ka chhan theih chu a niawm mang e.

**PU K. HRAHMO :** Pu Speaker, ka zawhbelhna kha Lawngtlai - Saiha Lei dawh kha a amount engzat nge tih a ni a. Hei hi ka zawhna chhan tak chu, 'hei hi sanction a ni tawh a, restricted tender-a kalpui mek a ni' tih kha ka thu hriat dan a ni a. A amount tal kha min hrih thei em?

**PU VANLALHLANA, MINISTER:** A amount kha ka hre mai lo.

**SPEAKER :** Ni e. Kan sawi fo thin angin, zawhbelhna hi chu engnge an zawh dawn hriat hi a har khawp mai a. A minister te tan pawh an lo inring chiah lo ve thei a. Khangah khan member-te kan inhrethiam hram hram dawn nia.

**Starred Question No. 222 - Health-worker chungchang.**  
Zawhna Neitu - Pu Lalchhuanthanga, Aizawl South-II Bialtu.

**PU LALCHHUANTHANGA:** Pu Speaker ka lawm e. Starred Question No. 222 - Health & Family Welfare Department Minister zahawm tak chhan atan -

- a) Sorkar-in thingtlang mipuite tan Sub-Centre hrang hrangah thawktu tur Health Worker lak belh tumna a nei em? (Pu Speaker, helaia ‘thingtlang’ tih hi tihsual palh a ni ang e; khawpui pawh a huam a ni.)
- b) Nei ni ta se, eng zat nge lak belh a tum?

**SPEAKER** : Chhang turin a changtu Minister Pi Lalrinpuii i lo sawm ang.

**PI LALRINPUII MINISTER:** Pu Speaker ka lawm e. South-II bialtu Pu Lalchhuanthanga zawhna ka chhanna chu –

- a) “Sub-Centre hrang hranga thawktu tur hian sorkarin Health Worker lakbelh tumna a nei a.
- b) Mi 100 lak belh tum a ni a. DP&AR lam phalna tunah kan nei tawh a, Finance lam phalna pawh nei thuai kan inbeisei a ni” tih a ni e.

**SPEAKER** : Aw le. Zawhbelhna heng membrete atang hian kan la ang –

1. Pu T. Lalhlimpuia,
2. Dr. K. Beichhua,
3. Pu Lalchhuanthanga,
4. Pu W. Chhuanawma.

**PU T. LALHLIMPUA:** Pu Speaker, ka lawm e. Health & Family Welfare Department Minister min chhan atan a ka zawhbelhna chu –

Tun sorkar hian Health Clinic Centre engzat nge a sak belh? A sak dan hi ka lo hmu ve a, Pu Speaker, a size a tein estimates pawh a lo tlem ang reng hle a, Bukte U hi a ni deuh berin ka hria a. Hei hi engtia hman tur nge; khawi atanga allocation pek nge a nih? Tun financial year ah hian em ni he hna hi pek a nih? tih te a ni e. Ka lawm e.

**DR. K. BEICHHUA:** Pu Speaker, ka zawhbelhna chu –

- i) Siaha Nursing School building hi Congress sorkar laia sak tan tawh kha a ni a, an la zo hlei thei lova. Hei hi sak zawm tumna a awm em?
- ii) Urban Health & Wellness Centre atan Meisatla VC ten ram an lei vek a, tunah pawh a luahman VC te pawhin theih ang tawkin an tichho zel a. He Health & Wellness building sak hi engtik atanga tan tum nge a nih?
- iii) Chhaolo PHC building hi a reiin, a tlabal tawh viau mai a. Hei hi sak tumna a awm em? Awm ta se, engtika tan tur nge?
- iv) Siaha District Hospital hi hospital senior-most zing ami a ni a. Tunah hian ICU run turin a khawl ventilator te, incubator leh thil dang dang pali chu run theihin kan neiin ka hria a, mahse manpower kan nei tlat lo mai a. Tunlai khawvelah chuan operation tih dawnin ICU back-up loh chuan tih ngam pawh a ni tawh lo a. Chuvangin, manpower min pe thei ang em?
- v) Pu Speaker, hmannah kan Minister zahawm tak Siaha-a a zin khan, ‘doctor kan lo pek belh ang che u’ a tiha kha, engtikah nge min pek belh ang?
- vi) CT scan, World Bank atanga CSR-a min tihsak tur kha lo thleng ta se, a room tur ruahmanna siam a ni tawh em? Pu Speaker, ka lawm e.

**PU LALCHHUANTHANGA:** Pu Speaker, ka zawhbelhna chu –

- i) Nurse GNM lak belh tumna a awm em?

ii) Tuna kan Health Clinic te, Sub-Centre te leh Wellness Centre te hi tihphuisui emaw, tihhmasawn tumna a awm em?

**PU W. CHHUANAWMA:** Pu Speaker, ka zawhbelhna chu –

- i) Specialist Doctor hi lakbelh tumna a awm em?
- ii) Awm ni se, engtikah nge ni ang?
- iii) Keini District thar Khawzawl te khian kan chang ve thei ang em?

**SPEAKER :** Aw le. A theih ang anga chhang turin Health Department changtu Minister Pi Lalrinpuii ilo sawm ang.

**PI LALRINPUII, MINISTER :** Pu Speaker, a hmasa berah chuan –

Pu T. Lalhlimpuia zawhbelhna - Health Clinic Centre hi kum 2023 a tang khan sak tan a lo ni tawh a, sorkarna kan lak khan 68 anga record a awm a; a hnu ah Mamit bialtu zahawm tak Pu Zira rawn sawibelh pahnih nen khan 70 sak zawh a lo ni tawh a. Tichuan, a bak zawng zawng kha kan han sa ta a. Estimates leh Plan hi kan sorkar hnua siam a ni lova, a amount pawh ₹2,90,000/- a ni a. Finance lam atangin deduct tur hrang hrangte an han deduct hnu ah ₹2,60,000/- chauh a lo ni ta a. A beitham em em a, a te em em a ni.

Tin, Pu Speaker, a remchan laiin helaia Legislator-te pawh kan inhriattir ni nghal se - kan han sa teuh tak nain function theih tak tak tur ni pawhin ka hre lova. Charge ka lak tirh khan kan en a, hemi sanction amount hi (ka hriatsual loh chuan) 8 crore leh tlem a ni a. Tichuan, Finance lama kan officer-te lengah ka sawm a. ‘Hemi a component hi tih danglam hram dan te a awm em; a tangkai vak dawn si lova, hetiang anga kan sak teuh hian IPS norm ang phei chuan kan run thei dawn lova, manpower kan pe thei dawn si lova, khawngaih takin min ngaihtuah sak rawh u’ ka ti a. Rei tak kha an han khal a, chutah chuan, ‘UC pek vek tawh a ni a, in sak vek a ngai; in sa lo a nih chuan, SASCI sum a ni a; rawn check thut te awm ta sela in che buai ang’ an ti a ni. Chutiang chu kan dinhmun chu a ni a.

Pu Beichhua zawhna - Siaha Nursing School kha keimah ngei pawhin ka tlawh bakah kan project monitoring team te kan va tir a. A sak te a lo tha phian a, a chhung te an lo la veng tha a. Tin, chhe lutuk te a la awm lova, la sak zawh loh hrim hrim a ni a. Sak zawhna tur kha Congress hunlai atangin sum an lo dil tawh thin a, pek hleitheit a nih loh avangin a uihawm em em a. Tun academic year thara kan run ngei theihna tura sak zawm turin monitoring committee te nen pawh kan sawi khawm tawh a ni.

Tin, Urban Health & Wellness Centre, Meisavaih kha, a fund kan dawng tawh a, a tan theih tep ang. Tin, Chhaolo PHC kha keimah ngei pawhin ka va hmu a, NABARD ah khan sak turin ka telh nghal a. Hei pawh hi sanction kan nei tawh a, sa thuai turah ngai ang.

Tin, Siaha Hospital ICU chungchang kha, Pu Speaker, tuna healthcare scheme kan tih thara damdawi-in zawng zawng tihchangtlunna turah hian ICU-a thawktu nurse lakna tur advertisement pawh kan chhuah tawh a, hei pawh hi kan run thei thuai turah kan ngai a ni. Tin, ‘doctor pek belh’ ka tih kha, MO pakhat kan pek belh dawn a ni.

Tin, ‘World Bank sum CSR atanga CT Scan leina tur’ a tih kha, a hresual deuh hlekin ka hria a. CSR ni lovin, MHSSP a tangin CT scan hi kan leisak dawn a, process mek a ni.

Tichuan, Pu Lalchhuanthanga zawhbelhna, nurse lakbelh chungchang kha, lak belh tumna a awm a. Tin, kan PHC zawng zawngte, Sub-Centre leh Health & Wellness te, District Hospital te leh ZMC te helaia Civil Hospital Aizawl te pawh hi kan tichangtlung vek dawn a, thawktu hrang hrang kan lak belh dawn a ni. Ka lawm e.

Tin, Pu W. Chhuanawma min zawhna specialist doctor chungchang kha, mi 9 kan la dawn a. Anni hi district thar te an ni baw k a, kan pek ve ngei chu ka beisei a ni. Ka lawm e.

**SPEAKER** : Aw le. zawhna dangah kan kal ang.

**Starred Question No. 223 - Work-Supervisors ruat chungchang.**

Zawhna neitu: Pu Robert Romawia Royte, Hachhek Bialtu.

**PU ROBERT ROMAWIA ROYTE:** Pu Speaker, ka lawm e.

Starred Question No. 223, H&FW Department Minister zahawm tak Pi Lalrinpuii chhanna atan -

- a) Health Department hian civil works hna thawk turin GST registration neilo Work Supervisor/manager ruat/thlan a nei em?
- b) A neih chuan, tute nge an niha, an hming leh veng nen?

**SPEAKER** : Chhang turin H&FW Department changtu Minister zahawm tak Pi Lalrinpuii ilo sawm ang u.

**PI LALRINPUII, MINISTER:** Pu Speaker, ka lawm e. Pu Robert Romawia Royte zawhna ka chhanna chu: -

H&FW Department hnuaiha hian civil works hnathawk turin GST registration neilo Work Supervisor/Manager ruat/thlan an awm a. Hei hi a nih a takah chuan Pu Speaker, 2023-a sorkar hmasain an rawn ruatsa kha an awm nual a, keini khan hna chhuak tawhsa an sem zawh siloh kan han sem ve khan GST pek tur tih kha office lamah hriattirna kan la neihloh avangin, chungho chu an pe lo baw k a, chung ho list chu nakinah ka lo pe dawn nia; ka nei vek a ni. Ka lawm e.

**SPEAKER** : Zawhbelhna kan la ang a -

1. Pu Rasik Mohan Chakma,
2. Pu Robert Romawia Royte (Zawhna Neitu),
3. Pi Baryl Vanneihsang,

**PU RASIK MOHAN CHAKMA:** Pu Speaker, ka lawm e. H&FW Department changtu Minister zahawm tak, Pi Lalrinpuii chhanna atana ka zawhbelh duh chu –

Borapansury Primary Health Center hi tunah function lovin a awm a, doctor pawh an awm lova. Hei hi engtik atangin nge a function theih ang? Tin, CADC-a PHC hi ‘PPP model-a enkawlin, H&FW Department-in kan la ang’ tih decision kha a awmna a rei tawh a, July 2019 khan a awm tawh a ni. Mahse, implement lohin tun thlengin a awm a. Hetiang khaw lian PHE pawh awm lova dah reng hi a pawh a. Chuvangin, hei hi a rang thei ang bera function tir dan a awm thei ang em?

**PU ROBERT ROMAWIA ROYTE:** Pu Speaker, ka lawm e. Ka zawhbelhna chu –

i) X-ray khawl rei tawh tak tak, fiah thei tawh lote kan bial chhunga hospital pawimawh tak tak Kawrthah hospital-ah te pawh khan an hmanglo thei bawk silo a. An x-ray thelh ang a, a nilo lai an zai palh te pawh a hlauhawm deuhin ka hria a. Hengte hi a hming hme in ka han sawi ang a - Kawrthah CSC-ah x-ray khawl tha zawk min pe thei ang em?

ii) Tin, Zawlnuam hospital-a x-ray tihna hmun tur Lab. building zawh tawh niin, x-ray khawl te pawh dah tawh a ni a. Mahse, a technician a awmlo leh thung a. Kan bial hi henglai velah hian kan la bai khawp mai a. H&FW Department Minister zahawm tak hi tan min lakpui turin ka ngen a. Hma min lakpui thuai thei ang em?

iii) Tin, Nurse leh thawktu dangte hmun tinah kan indaihlo a. Chutih mek lai chuan, kan area hi khawlum hmun, malaria tamna te a ni a, natna hrik dangah te pawh harsatna kan tawhna hmun a ni a; H&FW Department te pawh hian an hre khawpin ka hria a. Chuvang chuan, thawktu thar kan lak tur ang chi ah te hian kan area mi te hi lak hram dan a awm thei ang em?

A chhan chu, lum tuar thei lo hi an rawn awm hlei thei lo thin a, transfer an dil leh thuai thin a. A area mi ah qualified an awm tho a nih chuan, contractual nghet mang lova lak te an nih pheichuan, han duhsak ruk dan kha a awm thei ang em? Hei hi merit of the case niin ka hria a.

iv) Tin, a building tam zawk chu a tha a, kan health facilities hi. Chutiah lai chuan, la neih miah lohna hi kan nei nual mai a; Health-clinic center kan tih ang chi, sorkar hmasaa phuahchawp ang reng deuh, mamawhna awm si avanga kan neihna hmun kha 11 a awm a, khang kha chhonzawm zel a ni ta silo a. Khangah te khan arrangement eng emaw, medical attention chu kan mamawh vek a, khaw tinin, khaw te pawh ni se. Henga tan hian nurse lak theih dan te a awm em, building pui pui kan sa thei lo a nih pawhin?

v) Tin, Pu Speaker, ziakin ka lo rawt tho ang a; khang khaw 11 bikah khan kan H&FW Department leh kan H&FW Department Minister zahawm tak hian ruahmanna min siampui theih chuan 50:50 in an hlawh tur hi in contribute ang pawh ti se, ka MLA fund atanga tan lak ve hi ka duh a ni tih ka sawi lang duh deuh a. 50:50-a intum tawm turin health-workers emaw, health-nurse emaw kha ka biala khaw 11-ah min pui thei ang em? Ka lawm e.

**PI BARYL VANNEIHSANGI:** Pu Speaker, ka lawm e. H&FW Department changtu Minister zahawm tak chhan atan ka zawhbelhna chu: -

i) Mizoram Infant Mortality rate hi min hrilh thei em?

ii) HIV/AIDS vei zat hi khawngailhin min hrilh thei se?

iii) India ramah hian Mizoram hi State anga 'HIV/AIDS sanna ber' tih a ni thin a. chulaiah chuan kan teh dan te, kan test dan te a inang em, tia zawhna te pawh a awm thin a. 'Kan sang ber' kan tih fo hi, engtiang taka sang nge kan nih? Kan san ber chhan te leh a test dan te a sawi thei a nih chuan, a lawmawm ngawt ang.

**SPEAKER** : Zawhbelhna 3 kan la tawh a. A theih ang anga chhang turin H&FW Department changtu Minister zahawm tak, Pi Lalrinpui ilo sawm ang.

**PI LALRINPUII, MINISTER:** Pu Speaker, a hmasa berin Pu RM Chakma, Tuichawng bialtu min zawhna kha - Borapansury hi CADC khan 2019-ah Mizoram sorkarah an pelet tih hi ka vawikhat hriatna a ni a. Hetianga kan lo hre tawh a nih chuan, tihdan te pawh kan lo ngaituah ang tih kha ka sawitheih ni se.

Tichuan, Pu Robert Romawia Royte'n 'x-ray khawl rei tawh tak tak, fiah tawh lo' a tih te kha, hei, thlak te kan tum nual a, Kawrthah CHC pawh a awm tih ka chiang a. Tin, 'Zawlnuam x-ray building awmsa, technician neilo' tih kha, hei hi chu tuna technician kan lak thar turah hian a tih dan kan lo ngaihtuah ang a. Tin, Nurse leh thawktu dang indaihlohna te hi kan ngaipawimawh em em a, tuna kan han lak thar turah pawh, a bik takin hetiang malaria outbreak te, scrub typhus outbreak te, TB leh thil chi hrang hrang tamna hi kan ngaipawimawh a. Heng hi health official ho nen kan lo sawi ho ang a.

Tin, Health Clinic Center-te function theia dah hi a tha pawh kan ti em em a, ka bial chhungah te pawh khatiang ngaihtuahna kha ka lo sen mek a ni a. Kan dah vek theilo a nih chuan MLA fund atang te hian tihdan ngaihtuah mai ila kan ti a. Er. Ginzalala phei chuan nurse-te a lo chhawr tam em em a, mi 10 chuang amahin a lo chhawr a. Heng te pawh hi Pu Robert-a hian ama thahnemngaihna lo tan phawt ta se, ngaihtuah chhunzawm zel atana tih kha a thain ka hria a.

Tin, Pi Baryl Vanneihsang South III bialtu zawhna kha - IMR tih awmzia chu, 'Nau, nungdama piang 1000 zela thi zat' kha a ni a. Hetah hian Mizoramah chuan Sample Registration Survey (SRS) bulletin thar ber May, 2020-a tih chhuahah khan, Mizoram IMR rate hi 3 infant deaths per 1000 life births a ni a, India ramah kan hniam ber a, a lawmawm hle a. Chungah chuan hmanni lawka NITI Aayog atanga lo kal Dr. VK Paul pawh khan min congratulate a, kan la hre theuhin ka ring a.

Tin, HIV chungchangah hmanni lawkah meeting kan nei a. Pi Baryl-i pawh hian a vei em em a. Khatah khan, HIV positive January thla thlenga kan chhinchhiahah chuan, mi 32,287 niin ka hria a. Tin, India rama prevalence 0.2% anih lain, Mizoram chu 2.73% a ni. A let sawmin kan tam zawk a ni. Pu Speaker, ka lawm e.

**SPEAKER** : Aw le. Zawhna dangah kan kal ang a.

**Starred Question No. 224 - Health-worker ban chungchang.**  
Zawhna Neitu: Pu Robert Romawia Royte, Hachhek Bialtu.

**PU ROBERT ROMAWIA ROYTE:** Pu Speaker, Starred Question No. 224, kan Health & Family Welfare changtu Minister zahawm tak chhan atan:

“Sorkar hmasa ah mipui mamawhna avanga Health-workers/nurse a nghet lova thawk lai, tun sorkarin a ban takte kha eng zat nge an nih?” tih a ni a.

Pu Speaker, member dangte'n chance tha zawk an neih theih nan zawhbelhna ka ngah viau na a, ka zawhbelh lo mai ang e. Ka lawm e.

**SPEAKER** : A lawmawm e. Chhang turin Health & Family Welfare changtu Minister zahawm tak Pi Lalrinpuii ilo sawm ang.

**PI LALRINPUII, MINISTER:** Pu Speaker, Hachhek bialtu MLA Pu Robert-a ka chhanna chu –

Sorkar hmasain SEDP hnuai a nghet lova Health Worker & Staff Nurse a chhawr thin, SEDP sum awm tak loh avanga ban takte chu, Health Worker 265 leh Staff Nurse 30 an ni e.

**SPEAKER** : Zawhbelhna kan la ang: -

1. Pu K. Laldawngliana,
2. Pu H. Ginzalala,
3. Pi Prova Chakma,
4. Pu H. Lalzirliana.

**PU K. LALDAWNGLIANA:** Pu Speaker, ka lawm e. Health & Family Welfare Department Minister zahawm tak min chhan atan –

Sorkar hmasain Primary Health Centre (PHC) a upgrade 7-ah khan Kawnpui CHC kan tel ve avangin kan nghakhlel em em a, doctor leh nurse te lakbelh tur a ni tih kan hre bawk a. Khang an upgrade te kha Community Health Centre leh CHC angin engtikah nge function tir an nih ang?

**PU H. GINZALALA:** Pu Speaker, Hon'ble Health Minister-in min chhan atan –

- i) Non-practicing allowance hi tih tawp a ni tawh em? Anih loh chuan, engnge a chhan?
- ii) Rabung-ah doctor kan nei lova, engtik ah nge min pek theih ang?
- iii) Hnahlan leh Rabung-ah x-ray khawl kan nei lova. Hachhek lam pawhin an dil a; anni inpek chuan, keini lam pawh min pe ve ula. Pawisa kan nei ngang lo a nih chuan, MLA fund atangin zawi zawia tih chhoh ka tum a. Khatianga a nih kha chuan, Hachhek lam te pawh khan lo ti ve mai se a tha ang em?

**PI PROVA CHAKMA:** Pu Speaker, ka lawm e. Kan Health Minister zahawm takin a chhan atana ka duh chu –

Tlabung Hospital sak lai mek hi 10 bedded niin ka hria a, chu chu a dik em? Tuna hian 30 bedded nilai mek hi 10 bedded tia sawi a awm a. Chu chu a dik em?

**PU H. LALZIRLIANA:** Pu Speaker, ka lawm e. Ka zawhbelhna, Health Minister zahawm tak min chhan atan: -

- i) Mamit District Hospital 100 bedded, Power Finance Corporation atanga CSR kan hmuh hi hawn atangin kum khat chuang a ni ta a, hei hi engtikah nge function tir theih a nih ang? Kum khat hnuah pawh la tih theih loh em em hi a zia lo deuh em? Contractor kha pressurize a ngai anih chuan pressure tlang ta ila. Kha kha department-in kan ti ngam lo em ni? Hei hi a rang thei ang bera function tir kan va nghakhlel em.
- ii) Tuipuibari PHC hi engtikah nge a function theih ang?
- iii) Mamit District Hospital-ah hian Nurse an indaih lo khawp mai a, mi 18 bawr vel tunah an awm a. 30 bedded hospital ang a la ni a, tuna an function dan hi; IPHS norms-ah phei chuan 50% pawh awm lo ang an ni. Nurse lak turah hian he hospital hi min pe tel thei ang em?

**SPEAKER** : Aw le. A theih ang anga chhang turin Health & Family Welfare Department changtu Minister Pi Lalrinpuii ilo sawm ang.

**PI LALRINPUII, MINISTER:** Pu Speaker, Pu K. Laldawngliana, Tuirial bialtu min zawhna kha - Hei hi inthlan dawn tepa CHC-a puan kha a ni a, kum khat kan han zirchiang a, HR te kan nei lo nasa a, doctor lak tur NHM-ah pawh hian kan hmu tha hleithei lo a ni. Chuvang chuan, kan la function hleithei lo a. Tin, an cater azir te hian kan en a. Tunah hian kan rilru ah chuan Bungtlang South hi an cater a tam em em mai a, a lian a, tin, Tuipang hi a lian deuh bawk a. Heng hote hi a hmasa lamah han function tir thei ila kan ti a, tih dan tur hi kan ngaihtuah chho mek a ni.

Tichuan, Pu Ginzalala min zawhna NPA chungchang kha - NPA hi pay-a bet tlat, allowances chi khat anih avangin department-in a kan lo tihawp theih mai a ni lo a, Pu Speaker. Amaherawhchu, a dawng lo turte'n an dawn lohna turin tunah hian ruahmanna kan siam mek a. Chutih mek lai chuan, kan inbe reng a, MGDA-te nen pawh hian. 'Hetiang thu han chhuah un un ngai lo te pawh hian in titawp thei mai lo em ni?' tiin kan inzawt a. Tichuan, doctor ho hi thu an lo awih phian a, doctor 62 hian an NPA lak thin a kha an give up tawh a. MHS Rules, 2009-ah kha chuan doctor tumah private-a practice phal loh a nih avangin, NPA an lak phal a ni thung a ni. Chutiang chuan, atu angin hma kan lo chho zel ang a.

Tichuan, 'Rabung-a doctor dah' tih kha chu, dah thei tep tawh a NHM atangin. Tuna PHC hi kan dahkhah vek hnu ah specialist zir turin eng emawzat an inziak tling leh a. Kan ram in a mamawh si a, kan tir lo thei lova; NOC nei hmasa chiaah lo te pawh kha kan ram mamawhna avangin kan han tir chhuak leh a. Tin, ZMC graduate te pawh kha PG zir tura an inziah tlin leh deuh vek avangin, la changlo pali awm hi tunah hian NHM in a buaipui mek a, kan la thuai ang tih kha ka sawi duh a.

Tin, Hnahlan leh Rabung tea an mamawh x-ray khawl kha kan lo en zel ang a. Tuna kan lei tura hi bidder kan hmuh chhiat lutuk avangin khan kan bid tha leh ta a. Khang ho kan lei zawhah khan a tahtawlin MHSSP-ah khan kan dil zel ang a, kan ti zel dawn a ni.

Tin, Pi Prova Chakma min zawhna, 'Tlabung Hospital hi 10 bedded' tih kha, 30 bedded tur a ni a. Pathian zara kan dam chuan amah nen thla tharah khian a foundation stone lay turin Tlabung-ah te kan kal dawn a ni.

Tichuan, Pu Zira khan hemi district hospital 10 bedded hi a vei khawp a, mimal pawhin min hrilh zing tawh a. Hemi function tur hian contractor te ka ko tawh a, office lamah te, kan pressurize nasa em em a. Tunah hian min hand-over dawnin ka hria a, 'kan function thei thuai ang' tih hi ka chhanna a ni e. Pu Speaker, ka lawm e.

**SPEAKER** : Zawhna dangah kan kal ang a.

**Starred Question No. 225 - Kawng chungchang.**

Zawhna Neitu - Pu Lalrinsanga Ralte, Serlui Bialtu.

**PU LALRINSANGA RALTE:** Pu Speaker, ka lawm e. PWD Minister zahawm tak chhan atana ka zawhna chu –

“Serkan - Bagha Road kawng siamthat tumna a awm em?” tih a ni e.

**SPEAKER** : Chhang turin PWD changtu Minister Pu Vanlalhlana ilo sawm ang.

**PU VANLALHLANA, MINISTER:** Pu Speaker, Member zahawm tak Pu Lalrinsanga Ralte zawhna chhanna chu –

“Serkan - Bagha Road hi tunah hian siamthat mek a ni e” tih a ni e.

**SPEAKER** : Zawhbelhna kan la ang a –

1. Pu Lalrinsanga Ralte, Zawhna Neitu.
2. Pu Lalramliana Papua,
3. Pu C. Ngunlianbunga.

**PU LALRINSANGA RALTE:** Pu Speaker, ka zawhbelhna chu –

i) Saipum - North Hlimen kawng chhe zual lutuk, fur ruah a rawn tlaka motor a kal hleih theihlohna kha thawmthat zeuh zeuh a ni a. Tin, Saipum khawchhung te pawh black-top that a niin ka hria a, a lawmawm hle a. Hei hi term hmasa, hmasa leh Congress hunlaia siam a ni a; a rei deuh tawh a, a grade a tha a. Tin, Bagha pawhna kha kawng hnai te a ni a, a nihna tur ang takin siam a la ni lo deuhin a lang a. Side drain te pawh a awm mumal lo a, hei hi min chei that sak turin kan Minister hi ka ngen a.

ii) Tin, North Hlimen - Bunglum kawng hi laih chhuah tawh a ni a. Hei hi Builum Lui atanga Serlui zu pawh tura laih a ni a. Serkhan - Bagha Road-a khaw tam tak awmte tan District Headquarters, Kolasib dawr turin Serkhan tlangdunga rawn kual emaw, Bilkhawthlir, Saiphai lama rawn kual daih emawa Kolasib pan a ngai thin a. Khami titawp nan a vang tan zawngin North Hlimen atangin kawng laih tlang a ni a. Hei hi PWD hian min laksak thei ang em? PWD Department pawhin min rawn ensak tawh a. Hei hi chak zawkin ruahmanna min siam sakin, min cheibawl sak thei em?

**PU LALRAMLIANA PAPUIA:** Pu Speaker, ka zawhbelhna chu –

i) Lunglei South bial chhunga Mamte - Thlengang kawng resurfacing (black-top) hna thawh mekah hian km 1 vel chauh emawa Thlengang khua thleng dawn lo nia sawi awm hi a dik em? A dik a nih chuan, a laklawh hle mai a. A tlachawp deuh pawha ruahmanna siam belhin Thlengang thleng law law tur hian hma min laksak thei ang em, tun fur thlen hma hian?

ii) PMGSY IV atana proposal kan neih ang chi, a bik takin kawng, Lunglei South bial chhunga ruahmanna awmte, a list min pe thei ang em?

**PU C. NGUNLIANCHUNGA:** Pu Speaker, ka zawhbelhna chu –

NH 54 - 3rd IR Battalion, Thingkah approach road hi black-topping tih tumna a awm em? A awm chuan, engtikah nge hmalak tan a nih ang? A awm lo a nih chuan, eng nge a chhan?

Pu Speaker, tawi tein ka'n sawi belh lawk ang a. Ram neitute mi pahnih kha tihfel a nih loh avangin harsatna kan nei tih a ni a. A kawng hi tunah a kal reng tho a; black-top mai dan a awm lo em ni? A nih loh pawhin, hei, Lawngtlai-a kan awm ve lai, kum 15 dawn lai kal tawh ami a ni a. Hemi avanga harsatna a awm a nih chuan, Home Department nena chinfel dan a awm thei ang em? Pu Speaker, ka lawm e.

**SPEAKER** : Chhang turin, PWD Minister Pu Vanlalhlana ilo sawm ang.

**PU VANLALHLANA, MINISTER:** Pu Speaker, zawhna neitu Pu Lalrinsanga Ralte zawhna kha - Serkhan-Bagha road hi kawng pawimawh tak, Bagha kal tur phei chuan pumpel ang maia hnai a ni a. A kawng hi zau tak ni lem lo mahse, kawng tangkai tak a ni a. Hun eng emaw chen kha enkawlohin a awm a. Amaherawhchu, tunah hian a theih anga siamthain enkawl chhoh a ni a. North Hlimen - Builum kawng hi kawng thar ang deuh a ni a. Kolasib kal tur chuan Thingdawl, Kawnpui lamah kual vak lovin ngil taka pan phei theih a ni a. PWD pawhin a enkawl chho thei turah ka ngai a.

Tin, Pu Papua'n 'Lunglei South kawng, Mamte - Thlengang' a tih kha, a pawimawh khawp mai a, PMGSY proposed list ah a tel hmel a. Tin, Pu Nguna khan 'National Highway 54 - IR Battalion Quarters' a tiin ka hria a; hemi inkar pawh hi black-top tum a

ni ang chu. Aw, PWD kawng ni lovin, National Highway a ni a. Chumi panna chu i ti em ni kha? (**Pu C. Ngunlainchunga:** National Highway 54 - 3rd IR Battalion, tawi te, km 1 tih vel a ni ang.) Kan black top thei ang.

Tin, Lunglei South-a hmalakna tur hrang hrang kha a list kan pe thei ang. (*Interruption*) Aw; Thlengang thlenga kal turin a black top theih ang.

**SPEAKER** : Tunah zawhna dangah kan kal ang a.

**Starred Question No. 226 - Block Public Health Unit chungchang.**

Zawhna Neitu: Pu Lalchhuanthanga, Aizawl South-II Bialtu.

**PU LALCHHUANTHANGA:** Pu Speaker, Starred Question No. 226, Health & Family Welfare Department changtu Minister chhan atan –

- a) Sorkarin Block Public Health Unit (BPHU) engzat nge functional a neih?
- b) Functional Block Public Health Unit (BPHU) te hi neih belh tura ruahmanna a awm em?
- c) A awm a nih chuan, hmun eng zat ah nge neih belh tura ruahman a nih?

**SPEAKER** : A chhang turin, Health & Family Welfare Department changtu Minister Pi Lalrinpuii ilo sawm ang.

**PI LALRINPUII, MINISTER:** Pu Speaker, Pu Lalchhuanthanga Aizawl South -II Bialtu ka chhanna te chu –

- a) Sorkarin Block Public Health Unit (BPHU) functional 7 (pasarih) kan nei.
- b) Central atanga fund dawn dan azirin neih belh zel tum a ni.
- c) Central atanga fund dawn a nih chuan, hmun 14 dangah neih belha, a vaiin 21 nei tura ruahman a ni.

**SPEAKER** : Zawhbelhbna kan la ang a. A zawt turinin -

1. Pu Lalchhuanthanga, Zawhna Neitu,
2. Pu Jeje Lalpekhlua,
3. Pu C. Ngunlianchung.

**PU LALCHHUANTHANGA:** Pu Speaker, kan hriat angin nimin khan Universal Health Care Scheme tlangzarh a lo ni ta a. Hengah hian mipuiin kan hriat tur pawimawh deuh deuh te leh an ruahmanna te kan Health Minister hian min hrih thei ang em?

**PU JEJE LALPEKHLUA:** Pu Speaker, Health & Family Welfare Department changtu chhan atana ka zawhna chu -

- i) Mizoram sorkar hnuaiah doctor thawk zat min hrih thei em? Lak belh tumna a awm em?
- ii) Hnathial hi district ni ve tawhin, tunah hian dental doctor nei lovin kan awm mek a. Hei hi hnawhkhah tumna a awm em? Engtikah nge minrawn pek theih ang?
- iii) Pu Speaker, tunah hian ha phawi tur pawhin Lunglei tea kan kal a ngai a. Hemi chungchanghian a changtu Minister leh a department lam changtute pawhin min lo hriat sak tura ka duh chu, hospital-ah doctor an pawimawhna a sang em em a, mi zawng zawng pan tur an ni a. Doctor pakhat neihloh pawha kan tuar zia mai chu! Thingtlang khaw kil tin atangin anrawn pan khawm a. Hemi chungchanghian, post kan neih reng reng, a

bikin doctor lam pawh, post hnawhkhah a nih hma hi chuan min dah chhuah sak tawh lo turin he House zahawm tak kaltlangin ka'n ngen nghal a ni e. Pu Speaker, ka lawm e.

**PU C. NGUNLIANCHUNGA:** Pu Speaker, Bio-medical Waste Management Indicator System, Lawngtlai District hospital-a dah kha, hei RTI zawhnaah hian, 'A nih dan tur angin sanction a ni tawh em?' tih a ni a. 2024, March ah khan a pawisa pawh pek full vek a ni a, la sanction lo tih a ni a. Hetah hian tun sorkar thar hian hmalakna a nei em? Pu Speaker, a pawisa hi ₹1,15,89,375/- lai mai a ni a. Khatiang sanction lova awm maia kha; nge, 'a lo function tawh zawk' tih kha kan Minister zahawm tak ka zawt e. Ka lawm e.

**SPEAKER** : Aw le. A theih ang anga chhang turin Health & Family Welfare changtu Minister Pu Lalrinpuii ilo sawm ang.

**PI LALRINPUII, MINISTER:** Pu Speaker, zawhna neitu Pu Lalchhuanthanga zawhbelhna kha ka'n chhang hmasa ang a.

Mizoram Universal Health Care Scheme tih changtlunna atan hian Mizoram sorkar chu a inbuatsaih nasa em em a. Sorkar damdawi-in zawng zawnga thawktu indaihlohna chi hrang hrang la turin tunah hian advertisement kan chhuah tawh a.

Tin, nichinah khan ka chhan hmaih palh hlauh mai a. Pu Robert Romawia'n, 'a khaw mite duh sak bik a ni dawn em' a tih kha, advertisement copy ah pawh khan chiang takin a inziak a. A khaw mi thawk thei tur, transfer dil dil lo tur kha duh sak bik an ni dawn a ni. Tin, Mizoram-a doctor awm zat hi, an zavai chuan 622 an ni a. Chutah chuan, Mizoram Health Services-ah mi 363, ZMC ah mi 117, HNM ah 72, NAM (National Ayush Mission) ah mi 45, MSACS ah mi 25, Healthcare-ah mi 4. Chutah chuan, a thawk nghet leh nghetlo te nen khan an zavaiin mi 622 an awm a ni. Tichuan, lakbelh leh tumna a awm a, tunah pawh hian kan mamawh dan azirin consulting doctor tha, healthcare atana kan mamawhte pawh lak tum zel a ni.

Tin, dental doctor kha kan pe tawh a. Amaherawhchu, sawi ang khan kan naute'n an lo tisuah palh hlauh a, instruction pawh chiang takin ka pe a, 'Thawktu transfer reng rengin thlaktu awm lovin tumah release tawh suh u', ka ti a. Hnahthial ho hi an lo hrihlo nge ni; an lo release thawt thawt a. Tichuan, niminah khan dental doctor pahnih kan la leh tawh a. Tlabung-ah a thar a awm ang a, Tlabung-a awm kha a rawn chho dawn a ni. Tin, Pu C. Ngunlianchunga min zawhna hi kha chu ziakin ka lo hriattir dawn nia. Pu Speaker, ka lawm e.

**SPEAKER** : A lawmawm e. Tunah zawhna dangah kan kal ang.

**Starred Question No. 227 - Belkhai Road siam chungchang.**

Zawhna Neitu: Pu Robert Romawia Royte, Hachhek Bialtu.

**PU ROBERT ROMAWIA ROYTE:** Pu Speaker, ka lawm e. Starred Question No. 227 - Minister zahawm tak chhan atana ka zawhna chu hengte hi an ni e. –

- a) Belkhai Road siam nan SASCI atangin engzat nge sanction a nih?
- b) Sum lapse a awm em?
- c) A awm chuan, engzah nge lapse?

**SPEAKER** : Chhang turin PWD Minister changtu Pu Vanlalhlana ilo sawm ang.

**PU VANLALHLANA, MINISTER:** Pu Speaker, Starred Question No. 227, Pu Robert Romawia Royte zawhna chhanna chu –

- a) Belkhai Road siam nan SASCI atangin sum ₹3.6 crore (crore thum leh nuai sawmruk) sanction a ni e.
- b) Sum lapse a awm kan hre lo.
- c) 2 chhanna nen a inang.

**SPEAKER** : Zawhbelhna kan la ang a –

1. Pu Robert Romawia Royte (Zawhna neitu),
2. Pu H. Ginzalala,
3. Pu R. Rohmingliana.

**PU ROBERT ROMAWIA ROYTE:** Pu Speaker, ka lawm e. ‘Sum a lapse ta daih a’, tih hi sorkar tan hian a hrehawm viau em aw ka ti a. PWD kha chuan an hre lo thei tak tak a.

Kan hun lai khan Pu Speaker, Belkhai motor kawngin a tlawhpawh theih mang loh kha a tlawhpawh theih nan theih tawp kei pawhin ka chhuah ve a, nuai 360 sanction a ni tih pawh kha Minister zahawm tak pawh khan a sawi a, work order te pawh pek a ni a. Contractor ten a kawng pawh an lai a, an lai tha pawhin ka hria a. An laih hnu pawhin ka zuk kal a, an laih zawhah PCC-a chhun tur a ni a.

Kan thu hi a inanglo deuh thin a, kan Minister te leh kan official-te thleng pawh hian. Kan official-te, an hming leh an nihna pawh ka sawilo ang a. “Sir, a pawi khawp mai. 1st instalment bak hi kan hmu tawh dawn lo; chuvang chuan, a kawng laih tlang bak hi kan tithei rih dawnlo a ni” tiin min hrilh a ni. Chu chu PWD lama official-te min hrilh dan a ni a.

Tin, SASCI lamah chuan Finance Department hi nodal department a ni a. Kum 2023-24... (**Speaker:** A zawhnaah khan i cheng deuh teh ang,) Chuvang chuan, a lapse a nih chuan, ‘a lapse’ ti tlang mai ila, a thara tih that leh dan tur emaw, unpaid bills ang deuha claim leh dan tur te hi zawng tlang zawk ila.

Ka zawhna tak chu - 2023-24 1<sup>st</sup> instalment baka 2<sup>nd</sup> instalment lo kal talo hi, lapse lo ni se, a lo kal leh dawn em ni?

**PU H. GINZALALA:** Pu Speaker, Vapar - Murlen PMGSY kawng laih tawh a ni a. Amaherawhchu, tunah hian black-topping a tul tawh khawp mai a. Furah hian kan buai em em thin a, kan ration buhfai tak ngial pawh lak luh theih a ni thin lova. Chuvangin, Vapar - Murlen PMGSY kawng laih tawh hi black-topping min tih sak thei em?

**PU R. ROHMINGLIANA:** Pu Speaker, ka zawhbelhna

- i) Buarpui - Changpui Road hi min blacktop sak thei ang em?
- ii) A chhan Pu Speaker, tawi te han sawi ka duh chu - tun tuma kan session lai ngeiin Aizawl atangin ruang kan han inthlah liam phei a, Buarpui thleng bak an kal thei tlatlo mai a ni. Chuvangin, helai kawng pawimawh tak hi min tih sak thei ang em?

iii) Bolia leh Tuisenchhuah inkar lei dawh chim ta, mihring thi leh hliam eng emaw zat awmna kha PWD lei dawh a ni em? Helai Lei hi dawh that a la ni lova, PWD-in khawngaihin min dawh sak thei ang em? Pu Speaker, ka lawm e.

**SPEAKER** : A theih ang anga chhang turin kan PWD changtu Minister Pu Vanlalhlana ilo sawm ang.

**PU VANLALHLANA, MINISTER:** Pu Speaker, Pu Rohmingliana zawhna Bolia leh Luisenchhuah inkara kha PWD kawng a nih leh nih loh ka hre chiah lova. Amaherawhchu, mipuite tana pawimawh leh tangkai a nih chuan, kan en ang a, lei dawh dan te pawh chu kan ngaihtuah dawn nia.

Tin, Buarpui - Champui kawng blacktopping tih kha, Vapar - Murlen kawng nena chhang kawpin - PMGSY-IV ah hei hi chu proposal kan siam dawn a nia.

Tin, Pu Robert Romawia'n sum lapse leh lapse lo chungchang a sawi kha chu, inhnialna tawp theilo a ni mai a. Term hmasa, hun hmasa lamah te kha chuan banah te invauin, case lian tak kha a awm a, lapse leh lapse lo chungchangah khan.

Belkhai road siam nan SASCI sum atangin crore 3.6 crore sanction a ni a, khami mil khan pawisa expenditure sanction a awm a. Amaherawhchu, a leh peka lo kal tur awm lova beisei anih avangin, chhunzawm loh a ni ta a ni. Chu chu thenkhatin 'lapse' tia an vuah kha a ni ta a. A thenin 'a lapse' an ti a, a thenin 'a lapse lo' an ti ta a; kha kha chu inhnialna tawp thei lo a ni deuh ber mai a, Pu Speaker.

**SPEAKER** : Tikhan zawhna leh chhanna hun chu kan hmang zo ta a. Vawiinah hian thil awm zen zen lo 'Notice by a Member' kan ngaithla dawn a. Pu Robert Romawia Royte hian Rule No. 335 anga dilna rawn siamin, Rules of Procedure & Conduct of Mizoram Legislative Assembly-in a phalsak angin, notice pek a rawn dil a. A notice pek rawn dil chu,

"Phuldungsei khuaa mi 85 ration card paihsak an nih leh, an neih leh theih nana rawtna" tih a ni a. Minute 5 aia rei hun pek a rem dawn lova; minute 5-ah microphone cut a ni dawn a, kan hrethiam ang a. Tunah ilo sawm ang u.

### **NOTICE BY A MEMBER**

**PU ROBERT ROMAWIA ROYTE:** Pu Speaker, ka lawm hle mai, i sawi ang khan Phuldungsei khuaa mi 85 te ration card paihsak chungchanga statement siam min phalsak avangin ka lawm a. A point-a ka rawn ziah ang khan ka'n chhiar chhuak zung zung ang a.

1) Phuldungsei khua hi 1911-a Sailo Lal Hrangvunga hova an din a ni a, kum 114 lai a ni tawh a. Mei mit lovin Mizote'n kum 1911 atangin an la luah ngat ngat a. Mizoram-a Mizo khuaa kum upa pawl leh kum 100 chin zingah a tel ve a ni.

2) RCMS dan anga ration card neitu mi 85-te Aadhaar card nena online-a zawm tawh sa an ni a. Mamit district hi Aadhaar card online-a 100%-a zawm kim hmasa ber an ni nghe nghe a, chung zingah chuan an telve a ni.

3) Heng mi 85-te hi Tripura-in offline-in ration card a pek tho te kha an ni a. Ramri khuaa awm a nih avangin, Aadhaar card online Mizoram-ah zawma ration card pawh an la chung khan, Tripura hian an delete duh bik chuang lova, offline-in Tripura lamah hian a la kal reng niin hriat a ni a; chu chu official-a min hrih dan pawh a ni.

4) Mizoram sorkarin kum 2024, kumtir lam khan heng mi 85-te hi an ration card system atangin a delete a, heng hi a mimal hming nen an delete ni nen engkim a system-ah a lang a chu chu ka hriat veleh kan Hon'ble Chief Minister hnenah pawh ka kal a, an list nen khan ration card delete sak te kha engtinngan an neih leh theih dan a awm ang em tih te ka sawipui nghe nghe a ni.

Tichuan, ration card delete chungchangah hian thutang mak tak tak te a awm a, 'Software thar a rawn awm a, software tharah hian state danga ration card an neih chuan automatic-in software-in a delete a ni' tih te a awm a. RCMS hnuaiah hian ration card hi software-in a delete ngawt thei lova, mihringin delete a ngai a ni. Chuvang chuan, kum 2024-a mi 85, Mizoram mi hliir niin ka hria a, 'Mizo kut ngeia delete a ni; khawl hmanga delete a ni lo' tih kha ka sawi leh duh bawk a.

Tin, hetiang kan unaute'n harsatna khirh tak an neih lai hian, a inpuhmawh zawng leh a politics zawnga la lovin, 'engtinngan helai hi kan siamthat theih ang; engtinngan online-a ration card an neih leh theih ang' tih hi kan ngaihtuah tur niin ka hria a. Vawinah hian tumah indem tawh lo ila, kan Minister emaw, department officer-te emaw, staff te emaw, kan software khawihute emaw pawh dem a tha tawh lovin ka hria a. Thil kal dan mipuiin kan hre tawh a, he House pawh hian a hre tawh a. CM zahawmtak pawh a tira a hre hmasatu a nih angin sorkar hian ramri, very-strategic location-a Mizo awm te an ration card atanga delete-te hian ration card an neih leh theih dan tur hi 'engtin nge kan ngaihtuah ang' tih chungchangah hian rawtna te pawh ka'n nei a, chu chu ka'n dinchhuah chhan te pawh a ni a.

Pu Lalmuanpuia Punte rawtna ang khan –

1) Offline hian la pe rih phawt ila; tun December ah khan a tawp niin ka hria a, an han pek zawm kha.

2) Online-a an Aadhaar card nena zawm hi tunah chuan a theih mai tawh lo a ni. Online-a kan zawmna kha, a zawmtu zawk khan kan delete tak khut avang khan state dangah khan an zawm ta si a. Chuvang chuan, Mizoram lama ration card hi an neih leh theih nan sorkar chet a ngai ta a ni.

Tunah hian hemi ti tur hian tan ila ho ang u. Kei pawh bialtu MLA ka nih angin theihtawp ka chhuah ang... (*Chair Order angin microphone off sak a ni a..*)

**SPEAKER** : Aw le. Kan member khan dilna a rawn siam angin, minute 5 pek a ni a, minute 5 a hmang zo ta a. Kan Rules of Procedure Rule No. 314-in thuneihna min pek angin leh, Rule No. 377 of The Rules of Procedures and Conduct of Business, Lok Sabha-in, "Minister-in Statement siam a duh chuan, House-ah Speaker remtihna angin a sawi thei ang" tih a ni a.

Kan Minister, Food, Civil Supplies & Consumer Affairs changtuin sawi duh a nei a, kan sawm ang a. Ani pawh minute 5 aia tam sawi kha a rem bik lo tih erawh chu hria sela. Tunah ilo sawm ang.

**PU B. LALCHHANZOVA, MINISTER:** Pu Speaker, ka lawm e. Pu Robert Romawia, Hachhek bialtu MLA zahawm takin, Rule 335 hmanga Phuldungsei ration card chungchang a rawn sawi hi ka dinchhuahpui ve duh a, Mizoram mipuite'n thudik hria se ka duh a. Hetia Assembly House-a kan thusawi tur hi tukinah social media lamah MNYF Headquarters, Aizawl chuan dar 11:30 AM-ah "Assembly Session lo thlir ang u aw; thudik hriat a pawimawh" tih an chhuah chuai chuai mai a. Hei hi Assembly practice a ni em ka hre lova; thil mawi vak niin ka hre lo. Thudik lo hlir kha a rawn sawi bawk si a.

Pu Speaker, November Ni 27-28 khan Tripura ka zu thlawh a, Tripura Supply Minister pawhin ka awmnaah mi rawn tlawh a. Helai Phuldungsei chungchang sawi tum rilruin ka awm a; amaherawhchu, a sensitive em avangin ka sawi lang duh ta lova.

Theih tawpin hma kan la a, manual ration card pawh mi 85 tan chhungkaw 21 kan pe a. Pawn lerah kan sawi vak lo; khulaia an harsatna khu thil sensitive a nih avangin, heng Session-ah te hian sawi tam ka duh lova. Amaherawhchu, sawi chhuah a nih tak avangin. 'Manual ration card min pek theih chuan' an ti a. Theih tawp kan chhuah a, thla tin AAY quota angin kg 35 a thlawnin chhungkaw 21 hnenah kg 735 thla tin kan pe a ni. Tin, Pu Speaker, thudik kan sawi dawn a nih chuan, Tripura hian aadhar authentication RCMS hi an tihmasa zawk; an tih hmasak zawk avangin, a titlai zawk Mizoram kha kan buai ta a ni. Chu chu thudik a ni. Chuvang chuan, heng family 21, 85 members te hi Tripura-a in delete tura ngen an ni a, an in-delete duh mai rih lo nge, eng emaw chhan te pawh a awm a ni ang e. An tih rih loh avangin, keini chuan kan khua leh tui kan humhim nan manual ration card kan pe a ni. Chuvang chuan, 'Mizo kutin a delete' tih kha, tunlai technology hi kuta delete chi a ni lo. RCMS technology backup chak zawk, tha zawk Tripura-in an lo hman tak si avangin kan a ni a. India ram hrim hrimah hian ration card-ah tumah a awm kawp theih tawh loh. Chuvang chuan, kha dan kha tunah hian kan hmang ta a. Keini State hi, sorkar hmasa lam kha lo che chak zawk se chuan, heng hi a thlen ka ring lo a ni. Chuvang chuan, tu mihring mahin automatic-in ration card ah a in delete theih lova. Tuna ka han sawi chian duh zawk taka chu, Tripura lam hi keini aiin an lo che chak a, an ration card te pawh a paper ang ni tawh lovin, a card ang chi, smart card ang chiin anni chuan an nei thlap tawh a, chung te pawh chu tih chhoh kan duh a ni.

Pu Speaker, he thil hi thil sensitive ang reng deuh mai a ni a, ramri a awm kan Zohnahthlak te pawh State thenawmah leh Mizoram-a a ration card neih kawp a theih tawh loh tih laia kha kan hriat a thain ka ring a. Tin, NFSA Rules, 2015, chapter 9 (clause 6) hian, 'ration card hi residential proof leh identity proof ah hman loh tur' a tih avangin, voters ID hi a pawimawh em em a ni. Pu Speaker, hun min pek avangin ka lawm e.

**SPEAKER** : A lawmawm e. Debate a awm lo ang, sawiho tur pawh a ni lo a.

### **LAYING OF PAPERS:**

Business dang, Laying of papers ah kan kal ang a. Chief Minister zahawm tak Pu Lalduhoma'n heng -

- i) Finance Accounts, 2023 - 2024 Volume-I in respect of Government of Mizoram.
- ii) Finance Accounts, 2023 - 2024 Volume-II in respect of Government of Mizoram.
- iii) Appropriation Accounts, 2023 - 2024 in respect of Government of Mizoram.

te hi House dawhkanah rawn lay se.

**PU LALDUHOMA, CHIEF MINISTER:** Mr. Speaker Sir, with the recommendation of His Excellency the Governor of Mizoram and with your permission, I, hereby lay the following reports relating to the Government of Mizoram –

- i) Finance Accounts, 2023 - 2024 Volume-I in respect of Government of Mizoram.
- ii) Finance Accounts, 2023 - 2024 Volume-II in respect of Government of Mizoram.
- iii) Appropriation Accounts, 2023 - 2024 in respect of Government of Mizoram.

Thank you.

*(Chair thu angin a copy memberte hnenah sem a ni a.)*

**SPEAKER :** Kan chang kim em aw? Aw le. Laying of Paper pahnihna atan Pu F. Rodingliana, Minister zahawm takin heng -

- i) The Mizoram Electricity Regulatory Commission adoption of the Joint Electricity Regulatory Commission for Manipur and Mizoram (Standard of Performance for Distribution and Transmission Licensees) Regulations, 2014, Order 2024, (First Amendment) Regulation, 2024.
- ii) A statement of correction on the reply given on the 18th March, 2025 to Starred Question No. 777 which was transferred to Unstarred Question Ballot No. 155 asked by Pu C. Ngunlianchunga regarding Industrial Growth Centre, Luangmual. chungchang te hi House dawhkanah rawn lay se.

**PU F. RODINGLIANA, MINISTER:** Pu Speaker, Governor of Mizoram leh he House zahawm tak remtihngain heng –

- i) The Mizoram Electricity Regulatory Commission adoption of the Joint Electricity Regulatory Commission for Manipur and Mizoram (Standard of Performance for Distribution and Transmission Licensees) Regulations, 2014, Order 2024, (First Amendment) Regulation, 2024.
- ii) A statement of correction on the reply given on the 18th March, 2025 to Starred Question No. 777 which was transferred to Unstarred Question Ballot No. 155 asked by Pu C. Ngunlianchunga regarding Industrial Growth Centre, Luangmual. tihte hi he House zahawm takah hian ka rawn lay e.

*(Chair thu angin a copy memberte hnenah sem a ni a.)*

### **FINANCIAL BUSINESS**

**SPEAKER :** Tunah chuan, Financial Business ah kan kal ang a. Pu Lalduhoma, Chief Minister zahawm tak leh Pu F. Rodingliana, Minister zahawmtak te demand hi a rualin kan la ang a. Tunah Pu F. Rodingliana, Minister zahawmtakin House Dawhkanah a demand-te rawn lay turin leh sawiho atan rawn move nghal turin ilo sawm ang.

**PU F. RODINGLIANA, MINISTER:** Pu Speaker, Governor of Mizoram recommendation leh i phalnain, heng –

<b>Demand No.</b>	<b>Department</b>	<b>Amount in ₹</b>
<b>18</b>	Printing & Stationery	12,45,23,000.00
<b>39</b>	Power & Electricity	98,08,59,000.00
<b>40</b>	Commerce & Industry	60,77,42,000.00
<b>TOTAL</b>		<b>10,53,31,24,000.00</b>

te hi, kum 2025 - 2026 chhunga heng ka department chante inrebawlina tura hman atan he House zahawm takah hian ka rawn submit-in, sawiho turin ka rawn move nghal e.

(Chair thu angin a copy memberte hnenah sem a ni a.)

**SPEAKER** : Tunah chuan, kan Chief Minister zahawmtakin heng a demand-te hi House dawhkanah rawn laia, sawiho tura rawn move nghal turin ilo sawm ang -

Demand No.	Department	Amount in ₹
1	Legislative Assembly	39,46,70,000.00
2	Governor	30,80,000.00
3	Council of Ministers	8,42,67,000.00
4	Law & Judicial	69,94,78,000.00
5	Vigilance	81,50,000
9	Finance	40,33,43,32,000.00
11	Secretariat Administration	1,36,55,11,000.00
14	Planning & Programme Implementation	4,73,759,000.00
15	General Administration	1,06,17,000.00
<b>TOTAL</b>		<b>48,75,90,14,000.00</b>

te submit-in, sawiho tura rawn move nghal turin ilo sawm ang u.

**PU LALDUHOMA, CHIEF MINISTER** : Pu Speaker, Governor zahawm takin recommendation a siam ang leh i remtihain, heng –

Demand No.	Department	Amount in ₹
1	Legislative Assembly	39,46,70,000.00
2	Governor	30,80,000.00
3	Council of Ministers	8,42,67,000.00
4	Law & Judicial	69,94,78,000.00
5	Vigilance	81,50,000
9	Finance	40,33,43,32,000.00
11	Secretariat Administration	1,36,55,11,000.00
14	Planning & Programme Implementation	4,73,759,000.00
15	General Administration	1,06,17,000.00
<b>TOTAL</b>		<b>48,75,90,14,000.00</b>

te hi ka rawn submit a, ka rawn move nghal e.

(Chair thu angin a copy memberte hnenah sem a ni a.)

**SPEAKER** : Aw le. Kan Minister zahawm tak takte'n an demand-te rawn submit-in, sawiho turin an rawn move ta a, sawihona kan nei tan ang a. Minute 10 kan ti leh mai em ni ang? (House-in Minute 10 a remti a.) Aw le. Minute 10 kan ti ang a; Minute 8-ah warning bell kha kan rawn ti ri leh thin dawn nia.

Tunge sawi hmasa ang le? Member zahawm tak Lt. Col. Clement Lalhmingthanga ilo sawm ang.

**LT. COL. CLEMENT LALHMINGTHANGA:** Pu Speaker, vawiinah kan Minister zahawm takte pahnih - kan House Leader, Pu Lalduhoma leh Pu F. Rodingliana te demand kan discuss dawn a ni a. Demand Nos. 9 leh 14 leh 15 te kaikawpin, Finance atang hian ka'n tan ang a.

**Demand No. 9 - Finance Department:**

A hmasain, he Sorkar flagship programme - Hand-holding Policy pawimawh tak mai hi chuangchangah hian, kan thalaite, kutthemthiamna leh thiamna dang chi hrang hrang entrepreneurship lam te, zirna lam tea an hmasawn theihna leh anmahni kutkawiha eizawna tlak thiam thil angah te, ammahni inkhaidinna atana a bultanna tura he flagship programme pawimawh deuh mai din a ni hi a lawmawm ka ti a. Chuta tan chuan kan thailaite'n hma an lo lak vena tur atan, bul an lo tan theihna tur atan Sorkarin puihna Hand Holding Policy kaltlangin a rawn pe dawn a, heng hian mi tam tak tan hmasawna a rawn thlen dawn a ni.

Chutih rualin, Hand-holding policy sumin a thleng pha ve loa inhriate tan a aia tlem zawka bul tan theihna CM - Special Package ₹1 lakh thlenga tanpuina 1,00,000 a dawn theih dawn a, chung atan chuan tunah chak taka hma lak mek a ni a. Heng hi mipuite'n tangkai taka kan chhawr theih dawn avangin, finance changtu Chief Minister zahawm takin hma a rawn la hi a lawmawm ka ti a.

Tichuan, finance planning felfai tak a nih avangin (hei hi Power Department-ah ka rawn sawi tho ang a) electric bill ba tam tak kan rulh theihloh te tunah kan rul thei satliah mai ni lovin, a hun taka kan tih avanga rebate a nuaih za tel the meuh mai kan han la let thei te hi a sawiloh theihloh a.

Tichuan, e-office hi 'manpower multiplier' tih tein leh 'paperless work' tih te pawhin a sawi theih ang a; physical file movement avanga file kal vel mumal lo thin leh khawtlai thin te pumpelhna turin remhre tak maia e-office kan han tan chho te hi a ropui a. Tunah hian, heng avang hian paper works tam takin a tih tlem phah dawn a. Tichuan, mi tam takin an thawh thin kha tlem tein, effective zawk leh efficient zawkin a handle thei tawh dawn a. Heng a bench mark pawimawh lutuk 1088a ikan Sorkarin hma a rawn lakna hi faktlak a ni a.

**Demand No. 14 - Secretariat Admistration:**

Chutih rualin, Kai App leh Finance te hi engnge an inkungkaihna kan tih chuan, Sap thufingin "Time is money," a tih angin, hei hian hun management tha lutuk mai a rawn hring chhuak a. Office hour te, tunah pawh zingah office kal te, school kal te avanga motor che vel avanga traffic jam hun te pawh a lo hma tawh a, kha khan mipuite ah punctuality a rawn kai lut a. Sorkar-hnathawkte mai piah lamah mipui zawng zawng a hun takah kan khawsaka, hun kha dik taka manage a nih chuan "Time is money" a nih angin, pawisa khata tang khan kan khawl chhuak a, inremchenna leh pawisa a rawn thawk chhuak zel a ni, hun dik taka kan vawn chuan.

**Demand No. 14 - Planning & Programme Implementation:**

Pu Speaker, Assam Rifles sawnchhuah hi benchmark pawimawh lutuk mai a ni leh bawk a. A hma lama kan lo hriat thin angin an kelsa kannna belte nen an lo chhuak emaw kan tih thin kha, tunah chuan kelsa kan bel mai nilo, an atta kannna te nen an chhuak tawh ni. Chu chu, tunah zeldin thu ni hauh lovin, March Ni 15 khan Union Home Minister meuhin Assam Rifles te farewell (thlahna) a rawn hmanpui a nih kha; a thutak viau a ni, khalai kha.

Chutih rualin, PMJVK (Pradhan Mantri Jan Vikas Karyakram) hi Jan Vikas Karyakram a nih angin, he programme hi 'Socio-economic development of minor community' tih a ni a. Hei hian a focus ber chu, education, health leh skill development lam a ni a. He project

Jan Vikas Karyakram hi 'Public Development Programme' tihna a ni mai a, hetah hian tunah project thar 78 zet mai thehluh a ni a. Tin, DoNER (Development of North Eastern Region) ringawtah pawh hian Planning lam atangin project thar 43 kan thehluh a, tunah hian 4 zet sanction a rawn ni tawh bawk a ni. Tichuan Finance lama development chu sawi sen a ni lova.

**Demand No. 40 - Commerce & Industries Department:**

Heta han sawi lan ka duh chu, ka bial lam ah khianin brick (leirawhchan) Mizoram-in kum khat chhunga kan mamawh zat hi nuai 3500 vel nia chhut a ni. Hemi a chhutna basis of calculation hi chu ka bial lam Champhai-a an hman dan atanga rampum population han calculate-a kan tih kha a ni a, Champhai ringawta brick hman zat hi 2023-24 ah khan nuai 120 vel nia chhut a ni a. Mizoram pumpuiah hian brick siamna (brick factory) kan nei tlem em em a - Zopa Brick Factory, Kolasib te, Hillcone Factory, Kolasib te, NT Brick Factory, Champhai te leh Buannel Brick Factory, Champhai te anni mai a. Tichuan, Champhai brick factory pahnihte hi ka bial chhunga awm an ni a. Tichuan, Zoram puma factory pali kan neihte an dehchhuah khaikhawmin kumkhatah nuaih 50 ang vel chauh an siam chhuak a ni. Chutiang a nih laiin, kan mamawh chu nuai 3500 vel a ni ta ni. Tin, Silchar atanga kan lakluh hi 98.5% a nih laiin, Mizoram chhunga tharchhuah chu 1.5% chauh a ni.

Chutiang a nih avang chuan, heng kan factory-te develop-na tur kan minister hian hma min lakpui sela, Pu Speaker. Nikum lam khan a changtu minister pawhin Buannel Brick Factory, ka bial chhung a mi chu hman lo chung chungin min rawn hmuhpui a, ka lawm khawp mai a. Tin, Silchar atanga kan rawn lakchhuah te ai pawha a brick size a len zia leh a that bik zia te min rawn hmuhpui a ni. Tin, khilai hmunah khian cheng 18/- in pakhat an hralhchhuak a, Silchar atanga Champhai-a kan lakluh chu cheng 22/- te a lo ni a, a size te zawk, a quality chhe zawk kha.

**Demand No. 39 - Power & Electric Department:**

Tichuan, kan Power Minister hmalaknain tunah hian transformer thar 49 zet kan lei a. Tin, nichina kan sawi tak, tun hmaa electric bill kan bat nasa em em thin, a hun dik taka kan pek loh avanga a hmaa surcharge kan chawi thina kha, tun April 2024 atanga Feb. 2025 thleng a hun dik takah kan pek tawh avangin rebate nuai 165.696 kan dawng let tawh ta ni. Hei hi achievement ropui tak a ni bawk a.

Tin, PMSGMBY (Pradham Mantri Surya Ghar Muft Bijli Yojana), hei hi in tina tan free electric supply, kan PM-in policy challenging deuh mai a rawn nei a ni a. Hetah hian Mizoram chhungah pawh in 93 a zarzotu kan nei ve tawh a ni. Tichuan, electric power chhit tur kan leina ringawta nikum April 2024 atanga January 2025 thlenga kan pawisa sen crore 462.12 kan hman te sutkianna tur project kal mekah tuikhuah tur Tuirini 24 mW chu DPR pawh siam tawh a ni a, Tuivai 210 mW pawh hi DPR revise mek a ni bawk a ni. Chutihualin Tlawng, Lungleng bulah 120 mW tharchhuak thei tur pawh a DPR siam mek a ni bawk. Hengte hi kan Power Minister chaktak leh a department hmalakna chhuanawm tak tak te an ni.

Tichuan, kan Minister zahawm tak takte pahnih Demand-te hi tha ka ti a, ka thlawp e. Ka lawm e.

**SPEAKER** : Tunah kan Minister zahawm tak Pu T. Lalhlimpua i lo sawm ang.

**PU T. LALHLIMPUA:** Pu Speaker ka lawm e. Vawinah kan Minister Pu F. Rodinglana leh kan Chief Minister te Demand kan han sawi dawn a. A hmasain, kumin atan a Mizoram Legislative Assembly Session kan zawh niah hian hun remchang han hmanh tangkai lawk ila, kan mipuite hamthatna tur leh kan State hmasawna tur kan ngaihtuah a, thuthlukna te kan siam a. Vawinah hian rim taka kan inpekna a hlu ka ti hle a. He Session chhung zawng hian thil chi hrang hrang awmze nei kan sawiho a, chung zingah chuan sum ruahmanna te, policy siamthat te, Mizoram economy infrastructure te, social welfare program tihchak tumna hmalakna chi hrang hrangte a tel a. Budget kan pass tawh pawh kha sum leh pai mai ni lova, hmasawna kawnga kan road map, kan hmathlir lanna te pawh a ni a, Mizoram mipuite tana he House chhunga memberte kan inpekna tilangtu niin ka hria a ni.

Pu Speaker Demand, kan thlurbing lutuk lo ang a, ka rilrua awm leh vei zawngte han tarlan tel ka duh a.

**Demand No. 9 - Finance Department:**

Hei, Taxation hi Finance Department-ah a han luh takah chuan heti zawng hian han sawi ve ka duh a. Kumin 2024-2025 hian February thla thlenga chhiah tlingkhawm chu ka hriat danin ₹10,61,65,15,338 lai kha a ni a. Chung zingah chuan GST kha ₹8,58,18,48,856 niin, VAT hi ₹1,66,35,80,279 a ni a. Beisei danin kumkhat chhunga GST hi crore ₹1000/- deuh thaw a tlin chhoh theih beisei a ni a, heihi ruahmanna a awm niin ka hria a. Hetianga Finance Department in Taxation a han enkawl dawn takah chuan hmasawna tur hian taxation bik restructuring te pawh kan ram taxable capacity te, tax lak theihna hrang hrang en hian hmanhmawh a ngai hle tawhin ka hria a. Kan Finance Minister hian tun dinhmunah ah hian eng chen hi nge hma kan lak tawh tih kha windup hunah min chhang thei se. Hah takin buh kan ching a, a seng hunah buh sengna chang kan hriat loh chuan a pawh a, a seng dan tur leh a sengu tur strategy mumal tak kha kan neih a ngai a. Chungah chuan, a tul chuan tax encourage turin tax incentive han pek ang chi te pawh hi a tul ve em; target siam chin an tlin chuan, an thawhchhuah ve awl dan thlengin thil a awm em, tih te rilruah a awm a. Chungte chu ngaihtuahna han sen atan ka han tarlang ve zawk zawk a ni.

Tichuan Finance Department hnuai Taxation a luh hnu hian mi thenkhatin ‘Secretariat lamah file a kal muang sawt’ te pawh an rawn ti a. Hetah hian hna a chak zawk theihna turin Secretariat level ah hian Finance Department hnuai tax section a hranpa a siam a tha em tih kha, kan finance enkawltu kan Chief Minister ka zawhna ni pah se la; a tul a tih leh tih loh te pawh min han react thei sela ka duh a ni.

Tin, Mizoram mipuite rilruah hian chhiah hi phurrit-a ngaihna tam tak hi a la awmin ka hria a. Sorkarin ram mipuite enkawl na atana resource pawimawh tak a ni tih erawh kan hria a, kan chhungril erawh chuan a pawm thei thin lo a. Tuna hian kan state-own tax 90% chu revenue ah chhunluh a ni a. Kan awmna, kan Zoram hmasawna tur hian Mizoram mipuite pawh hian kan thawhkhawm bek bek a, ka tuk bek bek a ni tih hi waviina kan CM demand han sawina engah hian han tarlan ka duh a.

Tichuan, han ruahman ve ta ringawt ila, mipui bakah hian ram hruaitute, sorkar hnathawkte pawh hemi kawngah hian hma la ta ila; a bikin department hrang hrang chhiah lakna bungrua kan leiin GST registration nei ngei hnenah lei thin ila. Tax invoice te pawh la ngei ngei ila. Tichuan department-in contractor a chhawr, work contract a pekchhuahin Tax

Deduction at Sources (TDS) ngaipawimawh bawk ila. Chutiang chuan bungrua kan mamawhte pawh GST-a in register te hnenah ngei tax invoice kan lak hian chhiah awl ruk tur nasa takin a veng a, heng te pawh hi mumal zawka kan kal a tulin ka hria a ni.

**Demand No. 39 - Power & Electricity Department:**

Han tarlan ve zawk ka duh chu, Serlui B hydel project hi 12 mW a pe chhuakin ka hria a. Unit 3 a awm a, unit 2 hi eng emaw chen atang khan a thalo tih thawm a awm thin a. Chiang tak chuan ka hrelo nanging, vawiinah hian 4 mW chauh a pechhuak thei niin ka hria a. Sorkar hmasa khan a bungrua repair-na tur tam tak lei khawm tawh niin ka hria a, procurement eng emaw zat a awm a. Mahse, tun tuma a chhia ang hian, chungho chu a hman tlakloh a ni te pawhin a lang a. Hengte pawh hi sum neingung kan ni chiah lo nachungin, kan sorkar hian a thawm tha thei ang em tih kha, kan minister pawh ka'n zawt a ni.

Demand danga ka kai hmain, kan Health Minister Pi Lalrinpuii bial Leite khua saw chhim lama 'kan Baktawng' ve hi a ni a. Furniture tha hi Leite leh a chheh vel teak thing atangin an chhuah mawi thei hle a. A khaw mite hi an taimain, hetiang a eizawng hi 70% vel an ni a. Kan Minister ngenna angin workshop neitute hman turin electric transformer 100 kVA chu 200 kVA-a thlaksak an ni a. Vawiinah hian Leite lam an lawm hle a; kan minister-in a sawi thei si lova, Leite hovin, 'thlamuang takin tunah chuan hna kan thawk ri ruai ruai tawh e' an ti a. Chu chu vawiinah hian House hmaah lawmthu Pu Speaker, nangmah kaltlangin ka'n sawi duh a ni.

Tin, Kawmzawl - Theiriat line hi 10% GBS atangin kan hmu tep tih department hian an sawi a. Vawiinah hian hengte hi hmuh theih a ni ang em tih kha, kan minister hian min hrilh thei sela. Lunglei veng thenkhat load rit avanga shutdown tam tak awm, nikum session ah ka rawn tarlang tawh a; chungte chu sut kian a ni thei ang em? Hetiang anih chuan Theiriat via Sazaikawn line hi awlsam tea siam theih a nih hmel a, Lunglei-a eng harsatna eng emaw chen a phuhruk theih a rinawm a. Chu chu vawiin demand sawiah hian ngenna ka'n tarlang a ni.

**Demand No. 40 - Commerce & Industries Department:**

Commerce & Industries lamah hian Mizoram Industrial Policy hian hun rei tak industry neitute mamawh a fun kim tawk tawhloh avanga siamthatna 'Mizoram Industrial Policy, 2025' hman tan a lo ni ta a. Kum 20 chhung budget ah pawh awm mumal lovin, kuminah erawh chuan chutiang kawng chu zawh a lo ni chho ta a. Chunga hma laksaktu kan Minister chungah pawh lawmthu ka sawi a.

Tin, handloom ah hian kum hmasa lamah te hma kan sawn 1091 mem a. A chhan chu, sorkar hmasain thil tha tak a tih, vawiina han tarlan ve ka duh chu, Nilaini apianga hnam incheinaa kan inchei hian, he hnam incheina hi a promote 1091 mem mai a. Tin, kan Kut leh Mizo thil tihah te tihian kan inchei chho zel a; House ah pawh hian hnam incheina a inchei loh chu a zahthlak tawh zawk a ni. Chutah chuan demand a sang 1091 mem mai a. Vawiinah hian Lunglei-a ka bial te pawh hma an sawn a, tiang chuan MLA hote nena tih ho dan tur te pawh kan ruahman a. Department te pawhin hma min lakpui turin vawiinah hian kan la rawn ngen dawn a. Tin, kan member zahawm tak NI. Baryl-i hi zo-thuam design mawi tak tak nen House-ah hian a rawn thu thin bawk a; kan tlar hi chu kan nalh a ni tih kha ka sawi duh a ni.

Tichuan, Commerce & Industries ah hian, Rahsi Veng-a market shed -cum-community hall saw Ni 30.9.2023 khan hawn a ni a. Mahse, a market saw a hnuailam a awng a, a railing te brick chhe tein an hung ve a. Pu Speaker, Lunglei ruah sur chu a khampei vek a ni an ti thin a, a dik a ni. Chutah chuan, furah hian kan buai em em mai a, miharsa te te nuho tan hian a buaithlak bik viau mai a. MLA fund atanga tih te pawh an han sawi a; mahse, department kan zawhin, department building a nilo a, khawih ve ngawt a theih si lova. Vawiinah hian kan Minister hnenah hian he House kaltlang hian, ka ngen duh a - a chhung lang thei, fura ruahtui dang thei si a min siamsak dan awm sela.

Vawiinah hian Pu Speaker, UNNATI lam te, PSU lam hmalakna te pawh sawi a chakawm hle a. Amaherawhchu, niminah pakhatna ka ni tawh a, a zawna lak chu ka duh bik lo e. Ka duh tawng a.

Demand kan sawiho, kan Minister leh kan Chief Minister te chan hi ka thlawp a, House ah hian pass ngei turin ka rawn dinpui a ni e. Ka lawm e.

**SPEAKER** : Tunah chuan Pu Jeje Lalpekhlua ilo sawm ang.

**PU JEJE LALPEKHLUA:** Pu Speaker, ka lawm e. Vawiina kan Chief Minister leh House Leader ni bawh Pu Lalduhoma leh kan Minister chhuanawm tak Pu R. Rodingiana te demand kan sawiho tur hi lawmawm ka ti hle a.

Pu Speaker, kan Deputy Speaker nena min kaihhruaina hnuaiyah thla khat dawn Budget Session kan nei ta a, hei vawiinah a tawp kan lo khar dawn ta reng mai a. Kan House Leader uapna hnuaiyah thlamuang takin hun kan hmang thei a a lawmawm hlein ka hria a. I veilam leh dinglama thu te duhsak bik nei lova min hruainaah te lawmawm ka ti a. Tun Budget Session chhungin Panel of Chairmen atan min han ruat te kha ka tawn loh tur a ni a, kha te kha a bik takin i chungah lawmthu kan sawi duh a. Tin Session kan neih chhung zawng hian lang lo lamah kan Officers te, Assembly Secretariat a thawk te, an thawkrim khawp mai, thil tul hrang hrangah an buai a, mutmu pawh tuah hman lovin helai hun tha kan neih zawk nan min hmuahpui thei te hi kan Commissioner leh Staff te chungah khan a bik takin lawmthu ka sawi duh a. Pu Speaker, a hmasa berah chuan –

**Demand No. 39 - Power & Electricity Department:**

Khawvel changkang chho zelah kan nitin khawsakna pawh current tello chuan a buai chho zel a. ZPM sawrkarna hnuaiyah power-a intodelh hi an ngai pawimawh em em a. Tin, a changtu Minister chhuanawm takin kawng hrang hrangin theihtawp a chhuah a. Kan hriat theuh angin Mizoram sawrkarin power leiba a lo neih nasat avangin harsatna kan tawh fo thin a. Heng pawh hi power leibate a hun takah kan tlakfel bakah a hun takah power leibate kan tlak nghal zel avangin kum tin kan chawibelh thin surcharge chu nuai 300 zetin a lo tlahniam ta a. Hei bakah hian a hun takah bill kan pek tak avangin bill min tih hniam sak rebate pawh cheng nuai 165. 69 zet a tling thei te pawh I lawmawm ka ti a ni.

Mizoram in power kan intodelh theihna turin tunah hian Tuivai, Tlawng leh Tuirini te khuah tumna hmalak mek a ni te hi lawmawm ka ti a. Sum tam tak seng lova Tuichang Luiyah Pump Storage Project-ah 52 MW siam chhuak thei tura buaipui a ni chho mek te pawh hi a hlu ka ti a. Tin, power leina atana sum tam tak kan hman thin hi tihbo a kan

intodelh theihna atana tuikhuah mai bakah solar energy thleng a hmalak a ni chho mek te hi a lawmawm ka ti a.

Pu Speaker, Hnanthial khawchhungah hian hun rei tak atang tawh hian current kan nei chhe thin em em a. Ruah a sur tawh chuan current hi a thim turah kan ngai tawp tawh mai a. Amaherawhchu, tunhnaiah P&E lama SDO te leh a thawhpuite thahnemngaihna avangin indaihlo chungin current kan nei pangngai ve zel tawh a. Hmanni lawkah pawh khan Serchhip Bukpui atanga power an lakna line khaihlak lo a ni 150 an kalpui theih lawman hun an hmang nghe nghe a. Pu Speaker, he House zahawm tak kaltlang hian P&E thawktute chungah lawmthu bial aiawhin ka sawi duh a.

Denlung khawdaiah tun hnaia kan lo hriat tawh angin, Session hmasa pawh khan ka lo sawi tawh a 10 MW siamtheihna tur solar plant tur ram te pawh kha tihfel a ni tawh a. Amaherawhchu, hei hi hmalak chhunzawmna a awm lova. A changtu Minister pawh khan hemi tihlawhtling tur a chak taka hma min lak sak turin ka ngen nghal duh bawk a.

Pu Speaker, hemi chungchang hi a pawimawh a. Ka sawi tur hi Hnanthial District tan chuan thil pawimawh tak mai, tunhna atanga kan lo dream thin, kan lo ngaihtuah ve thin kha a ni a. Hnanthial 132 sub-station hmun tur chungchangah pawh hian a khawtlang mipui kan buai a. Thil hrang hrangah a MZP te, YMA, NGO hrang hrang leh mipuite kan thawhhona a tha a. Hemi chungchangah hian a hmun te kan lai thei lawk lova.

Amaherawhchu, kan Chief Minister te, a changtu Minister te leh Forest Department changtu Minister ten theihtawp min chhuahpuina a zarah tunah hian a hmun tur chu laih fel a ni tawh a. Amaherawhchu, hemi 132 sub-station changtlung taka kan neih theihna tur hian tunah hian sum dah hi a tawk lova. A changtu Minister hnenah pawh hian ka thlen tawh a. He 132 sub-station Hnanthial mipuiin kan lo dream hi a kalzelna tur atan tihlawhtlin a nih theih ngeina tur atan hma min lak chhunzawm a, Hnanthial mipui hian kan chhawr ve vat theih tura hma min lakpui tur khan ka ngen nghal duh bawk a.

Tin, kan bialchhung Thingsaiah khuaah khian in leh lo te a pun ve nasat em avangin khaw kar leh veng kar inkarkik tak tak te a awm ve a. Hemi chungchangah hian electric extension tih a ngai khawp mai a. A changtu Minister hnenah pawh khan dilna hi a lut tam tawhin ka hria a Hemi chuangchangah pawh hian chak taka hma min laksak turin ka ngen nghal bawk a.

Tin, South Vanlaiphai khuaah khian 2028-ah Mizoram Baptist Mipa Pawl Inkhawmpui kan dawng dawn a. Hemi atan hian tuna kan current dinhmun hi a tha lo em em a. Hetiang khawmpui thleng tur chuan kan dinhmun a chaurau em em a. A changtu Minister hnenah pawh hian ka thlen tawh a, a ni pawh hian min ngaihpaawimawh sak em em a. Kan rawn la nawr zel dawn a, hemi atan hian transformer tha zawk leh lian zawk kan neih theihna turin hma min lo laksak tur khan ka ngen nghal duh bawk a.

Tin, South Vanlaiphai PHC-a damlo awm te pawh hian transformer chhiat avang hian hatsatna an tawk mek a tunah pawh hian. Hei hi inkhawmpui piah lamah khilai damlote tan hma min laksak tur khan ka han ngen bawk a.

**Demand No. 40 - Commerce & Industries Department:**

A changtu Minister leh department ten min duhsakna a zarah ti ila lawmthu te pawh han sawi nghal ka duh a. Tuipui D-ah lodge sak a nih theih nan action plan-ah te min lo telhsak niin ka hria a. Hei pawh hi a changtu Minister leh department hotute chungah pawh lawmthu ka sawi duh a.

Tin, Pu Speaker, South Tuipui bial hi mining lamah hian kan tha a. Tunah hian Mizoram a chhiah ah pawh hian a pe tam ber kan niin ka ring a. Amaherawhchu, tunah hian Tuipui D-ah sawn check gate mumal kan neilo tlat mai a, mi in te luahin tunah hian an duty thin a. Check gate hi mumal zawk te kan neih theih chuan sawrkarah pawh chhiah tam zawk kan chhunglut thei ang. Hemi kawngah hian hma min laksak a min hriatpui tur pawh khan ka ngen nghal a.

Pu Speaker, handloom-ah hian South Tuipui bialte hian potential kan nei tha khawp mai a. Kan bial khi handloom hmunpuia siam kan tum a. Tunah hian theihtawp kan chhuah mek zel a. Thenzawl ten an tih theih chuan engatinge kan theihloh bik ang tih kha kan rilruah a awm a. Tunah hian Samarth Scheme atangin Thingsai, Cherhlun leh Darzo khuaah puantah training kalpui niin khawtinah mi 30 in training an nei a. An puantah te pawh ka han kal khan min pe nghe nghe a.

Tin, tunah hian ZOHANDCO te nen thawkdun in kan bialchhung khaw sawmah subsidized project kalpui turin tunah hian hma kan la mek a. Mi 150 hnenah puanthui khawl pek a training pek tum a ni tih kha Pu Speaker, kan Minister hian min lo hriatsak se ka duh a.

Tin, Hnahthialah hian Loom Training Centre sana tur project, Social Welfare Department kaltlangin kan siam a. Tunah hian a sakna a rawn chhuak tep tawh a. Pu Speaker, he kan hmalakna hlawhtlin nan hian Social Welfare Department Minister, Pi Lalrinpuii min duhsakna vang liau liau a ni a. A chungah pawh khan lawmthu ka sawi duh a.

Tin, tunah hian ZOHANDCO te nen Darzo, Cherhlun leh Tarpho khuaah Handicraft Training kalpui turin hma kan la mek a. Hun reilote hnuah hna kan tan theih mai ka beisei a. Pu Speaker, kan Miniser pawhin hei him in lo hriatpui leh bawk sela tih kha ka sawi leh duh bawk a.

**Demand No. 9 - Finance Department:**

Pu Speaker, hun a reiloh nan kan Chief Minister demand hi a hrana sawi lovin a hlawmin ka rawn sawi mai ang a. A hmasa berah chuan, kan Chief Minister zahawm tak hi financial management thiam tak a ni a. Kan sawi tawh ang khan power bill pek tlai avangin sawrkarin sum a chawi teuh thin a. Amaherawhchu, kan Chief Minister hian pawisa pek ngei ngei ngai chu pek mai nachang a hria a. Ministry hmasa ten sum tam tak an chawi thin na ah khan bill pek that man rebate kan hlawh let ta hial zawk a ni.

Kum rei tak sawrkar hnathawk ten a hun mumal taka hlawh an lak theih tawh loh hnuah thla thar tirah hlawh lak a ni ziah tawh a. Hei hian chhungkaw tam takah hahdamna a thlen a. Fate school fee te, thil tam takah chhungkaw tan a awlsam phah a. Tin, ZPM sawrkarin kut hnawthawktute a ngaihsak zia kan hria a. Tunah hian Bana-kaih Policy leh CM - Special Package te pawh chak taka hmalak mek zel a ni a. Hei hian Mizoram mipuite

sawrkarin a ngaihtuah zia a lantir a, ram mipui tam zawk sawrkar zarah khaw eng hmuh beiseiin kan awm mek a. Dinchhuah pui tham eizawna mipuiten kan neih ngei ka beisei a.

**Demand No. 15 - Genenal Administration Department:**

Tin, sawrkar lama department hrang hrangin proposal an thawm te kan Chief Minister-in theihtawpin a buaipui nghal zel a. Hei hian department hrang hranga hmalakna a tichak a, a hlawhtlin phahna tam tak kan hmuh tur a awm thin a ni. Tin, kan file system muang thin lutuk hi office hrang hrangah hnathawh chak a harsat phah 1095ut e thin a. He kan harsatna sukianng tur hian e-office hman tum mek a ni a. Hei hian department hrang hranga hna a tichakin lehkhah hmanga hnathawh te a titlem dawn ta hle a. Kan Chief Minister hian department tin te review meeting neihpui a tum te hi ropui ka ti hle. Hei hian department hrang hrang leh mamawh te pawh a phuhruk ngei ka beisei a ni.

Kan Chief Minister leh kan sawrkar te hmalakna in Assam Rifles-te sawnchhuah an ni dawn tih kan hria a. Kan 1095ut e1095m em a. Vawiinah a takin kan hmu a. Helai hmun hi Pu Speaker, a vei awm ka ti a. A hmun hman dan turah sawn committee te pawh an la din dawn a. Amaherawhchu, vawiinah hian helai House Leader leh kan Chief Minister hi Mizo thalaite aiawhin he House zahawm tak kaltlang hian ka ngen duh a. Sawlai hmunah sawn Mizo thalaite tan hmun dah ve ngei tur khan ka ngen duh a. Eng emaw tihpui nikhua a lo awma Vanapa Hall leh Lammual tih hi a ni ringawt thin a. Hei aia hmun nuam leh rem, a hmun chei danglam chawp ngailo Mizo thalaite hian kan awt ve tawh 1095ut e a ni tih kha min hriatsak turin ka ngen duh a.

Pu Speaker, Hnahthial District lam tlem han sawi ve ka duh a. Hnahthialah hian kan officer leh department hrang hranga thawktute an tang 1095ut e a. District hmasawn turin theihtawp kan chhuah zel a. District mipuite kawng engkimah an in hawng 1095ut e a. Mipuite pawhin dawr nuam an ti hle a. Vawiinah hian Mizoram hmun hrang hranga kan officers te leh hnathawktute la ngen duh a. Mipui rawngbawltu pawimawh tak kan ni tih hria in min dawrtu mipuite hi dawr nuam leh biak nuam zawk ni turin theihtawp I chhuah tlang ang u tih kha ka sawi duh a. Kan hmehhriat sa leh keini aia officer lian te kan lo dawnawm a kan biak thin ang tho hian kan hmehhriat sa leh keini aia officer lian te kan dawnawm a kan biak thin ang tho hian kan hmehhriat te an nih piah lamah 1095ut e emaw lo kala, chinchang hre lo tam takt e a bikin thingtlang lam mite an lo kal chhangin kan hmehhriat te kan dawr ang tho a lo dawr turin vawiin ni ah hian House zahawm tak kaltlangin kan ngen duh che u a.

A tawp berah chuan, Mizoram in hma a sawn zel theih nan he House chhungah hian member zahawm tak tak te theih tawp chhuah ho zel turin ka sawm duh che u a. Tin, kan bial chhungah theuh theih tawp chhuah chhunzawm zel ila, bial tana hnathawh that kawngah te, hmasawna kawng hrang hrang ah te a tha zawngin in el ila kan ram hian hma a sawn zel ka beisei a ni.

Pu Speaker, kan Chief Minister leh House Leader ni bawk, Pu Lalduhoma leh kan Minister chhuanawm tak Pu F. Rodingliana te Demand hi ka pawmpui a, he House ah hian pass ngei nise tha ka ti e. Ka lawm e.

**SPEAKER** : Le, tu nge sawi leh ang le? Pu R. Rohmingliana, ilo sawm ang.

**PU R. ROHMINGLIANA:** Pu Speaker, ka lawm e.

Vawiin chu tun Budget Session-a ka thusawi hnunng ber tur pawh a ni maithei a. Pu Speaker, hei Pathian zarah budget session vawi hnih kan Mizoram rorelna sang berah kan han attend ve ta a, a tawpna ni kan thleng ve ta hi ka lawm takzet a. Budget Session hmasa zawk kan han attend ve takah khan 'first-timer' tih kha a ri ring em em a. Tichuan, tun tumah hian Pu Speaker, 'senior' tih a ri ring leh viauin ka hria a, keini tan chuan sawi tur kan nei lem lo khawp mai. Helam, I veilama mite atang phei chuan, hei Pi Prova nen phei chuan kan thu ngawi deuh tlawk tlawk em aw, te ka ti a. Amaherawhchu, Pu Speaker vawiin ah kan sawi duh chu, kan senior te kan entawn fo hi a tulin ka hria a. Kan lo zir ve a, he Mizoram rorelna sang ber in chhunga kan inhniaalna vang hian kan mipuite khawlai ah thisen an in chhuah ta em; heng tiang thil te hi kan la thlen tir zel dawn nge? Keini ho hi eng tiangin nge kan kal zel ang tih hi hriat thiam har ka ti khawp mai a.

Pu Speaker, Dan Bu kan neihah te pawh a inziak a, mahse, zawm hi a har a nih pawh ka ring a, a Dan siamtute pawh hian. Chuvang chuan, kan tlinlohna hrang hrangah te pawh Mizoram mipuite pawhin min en thiam se ka duh tak zet a. Mizoram hi kan vannei em em a; tun kan House ah ngei pawh hian sap rama piang hman te, India ram, Assam rama piang hman te, Mizoram a piang hman te kan awm a ni. Assam State hnuaia kan awmlaia piang kha chu Assam rama piang kan ni mai a, India Independence hma a piang kha chu saprama piang kan nim ai a, tih zawngin kan sawi deuh a nih chu. Chuvangin, kan State te pawh a la nuapang ti ila, kan sawi sual tampui lo ang a, chuvang chuan, keini a la nuapang zawk tena kan hriat thiam theih tur ang chite pawh hi han awm sela, a mimal anga han inbeih deuh rap rap vai ramah te chuan a tam, tv-a kan lo en ve ah te pawh; khang kha a tha ber em? Tuna kan member zahawm tak tak te zingah pawh kohhran-upa thiau pathum kan nei che u a, chutiang zingah chuan hetiang an thleng ta te hi pawi ka ti hle mai. Chu chu thuhma ang deuhin ka'n sawi ni sela.

**Demand No. 39 - Power & Electricity Department:**

Sawrkar liam ta atanga an lo tih tawh tun sawrkarin a chhunzawm, rooftop solar an han introduce chho ta zel mai hi a lawmawm ka ti a, hei hi Mizoram tan thil pawimawh tak a nih ka ringa. Hemi hmang hian Power & Electricity lamah hian eng emaw chen kan in daihlohna te pawh min phuhruk ka beisei a. Hei hi nasa leh zuala kal deuh deuh turin a sawrkar kengtu apiang ka duh hle a.

Pu Speaker, ka bial chhung tawite ka'n sawi lawk ang a. Lungsen ah power station a awm a. Heta tang hian an sem chhuak leh a, ka bial chhung tho Zawlpui lam kawngah te an sem phei a, ramhnuaiah a kal a ngai si a. Thing leh mau thliin a lo tih thluk te, a bana hnim a lo lawn chho ang te pa wh kha clear deuh fo angai mai a, mipui hnatlangin an kal fo mai a. Helai ah hian a thawktu indaih deuh zawka min dah sak theih ka'n beisei ve ngawt a; chutilo chuan power hmuh loh kan ngah hle mai.

**Demand No. 40 - Commerce & Industries Department:**

Pu Speaker, keini thingtlang lam bialtu chuan ka bialte kha kan rilru ah a lian lo thei lo a. Mistiri tha tak tak, thil siam thiam tak takte an awm a, heng ho hian a hmanrua a nei thin si lo a; a hmanrua a thlawna han pek emaw, subsidise emaw zawnga min tih sak theih chuan a lawmawm hle ang a.

**Demand No.1 - Legislative Assembly:**

Hei, hmanni lawkah kan thenawmah kangmei a chhuak a. Vawinah hian, Pu Speaker, nangmah kaltlangin kan Houseguard te chungah lawmthu kan sawi ve hrim hrim duh a; anni kha awmlo se kan kang chhe vek mai awm mang e ka ti a. Helaiiah chhun chawlh apiangin balloting kan ti thin a, question tur kan pawt thin a ni. Chutah chuan sawlam side-a kang deuh nil nial te kan va hmu a; anni Houseguard avanga kangpui tuar ta lo kan niin a lang a, a lawmawm ka ti a.

Tin, Pu Speaker, Mizoram rorelna sang bera AC hi a thalo tlat mai a, a hrehawm khawp mai a; kan zunchhuah vanga chhuak tam pawh kan nilo a nia; lu te a hai ber bur mai a. Chuvang chuan, heng te hi siam that vat han ni thei sela.

**Demand N0. 15 - General Administration Department:**

State pawnah kan Minister-te leh kan mipawimawh tak tak official-te meeting turin an kal thin a; a bik takin khung Shillong leh Guwahti ah. Shillong ang khuan driver pakhat chiah an nei a, motor 2 a awm a; kan minister kalte tan hian a hrehawm awm thin ka ti a. Tin, Guwahati angah te pawh hmanni ah an lo sawi a. Motor te khu a changkang vaklo a ni mai thei a; kan minister pakhat motor-a national flag intar te kha chhia an lo tihpui deuh a ni ang, an sawi ri te kha ka hria a. Chuvang chuan, khung te khu kan Mizoram hmel lanna ve a ni tih hriaa kan thuam chak deuh hlek a tul hlein ka hria. Khang kha ka rawn auchhuahpui ni sela.

**Demand No. 9 - Finance Department:**

Finance ah hian a hmasa bera kan sawi duh chu, tun budget pharh taka hi kumin chhunga kan dinhmun tur thlirna a nih angin, mipui pawhin ngai pawimawhin an lo en nasa tih pawh kan hria a. Amaherawhchu Pu Speaker, engatinge he budget bu hi a pan tak em em ni ka ti deuh a. A bu hi ka'n en thin a, engatinge chhutsual te hi a awm aw? Kumin chhung hi chuan kan sawrkar tan hian kan Budget Bu hi a pawimawh ber a ni lawm ni? Chuvang chuan, kan fimkhur deuh a tulin ka hria.

Hmanna general discussion-ah chhungkaw lam thil avangin ka rawn awm theilo a, paw ka ti a. Helai chhung han luhchilh pawh hi ka chak hle mai. Kan flagship program-- 'thlaithar lei' kan tih ber dah a nilo hi keini thingtlang bialtute chuan hriat thiam har kan ti; he budget-ah hian thlaithar leina pakhat mah dah a nilo. Kum 2023 - 24 flagship program MNF ah khan SEDP ah ₹595 crores dah a ni, tichuan 2024 - 25 ah hand-holding tan ₹200 crores dah a ni. Tichuan, hand-holding ah tho tun tumah hian crore 350 dah a ni a. Amaherawhchu, chumi hand-holding atang chuan thlaithar leina kan pawt leh dawn tihna a niin ka hria a. CM - Special package te a lo awm a. Tin, tunlaiiah college hrang hrangte an inel tir a, a tha ka ti. Hmanni ah pawh ka sawi tawh, innovation programme an ti a, student te thlangchhuakin thingtlangah te an kal tir a, a lawmawm ka ti. Khatiang neuh neuha in kal tir chuan thlai thar leina hi a awm tak meuh ang em, tih kha ka zawhna a ni a. Tin, Pu Speaker, tukin Question Hours ah tawite ka sawi hman a; ruang phurhna chungchangah pawh 5 crore dah a ni a, nikum lamah khatiang zat chiah kha budget ah dah a ni. Kum chanve hnulamah hman a ni a, kuminah hian 5 crore hi kan tla tak meuh ang em, tih hi ka rilrua zawhna lian tak awm a ni bawk a. Tin, Healthcare ah 50 crore chauh kan han dah te hi kan rilru tak takah hian healthcare hi a awm meuh em; a tawngkam ringawt hian em ni a awm, tih lai hi. Tin, kan budget bu han en neuh neuh hian social sector lam hi a tlahniam hlekin ka hria a. Hei hi mipui hne lam a ni si a, engnge a chhan ni ang aw, tih te ka ngaihtuah a. Tin, Pu Speaker, MLA fund te hi tun sorkarah nuai 50 laiin

in han tipung te hi a lawmawm ka ti a. Keini angah chuan MLA fund hi kan mamawh ngawih ngawih a ni. Inkhawmpui lian te a lo awm dawn a, kawng a chhiat pawhin MLA fund bawkin a ni kan nawr mam leh ni. Aizawl atanga an hriatloha kan hmanna hi thingtlang bialtu tan chuan a tam lutuk a ni, tih kha min hriat sak tulin ka hria a.

Tichuan, Pu Speaker, he budget-ah hian kan thawh chhuah ve tur crore ₹2216.33 a awm a ni. Hei hi engtiangin nge kan thawh chhuah ang? Kan House Leader zahawm takin a sawi thin a, 'sawhthing te pawh man to takin kan hralh' a ti a. Chumi rual chiah chuan, 'tlawm tein kan hralh' tih kha a awm bawk a. Man to tak te khan han hralh leh a; kut-hnathawktute hnen atangin man to tak, kg ah 50/- in kan lei sak a. Heng kan thawhchhuah turte hi man to takin hralh leh thei ila tha viau tur a ni a. Amaherawhchu, khami paih thla chiah khan, 'lawm te tein auction a ni' tih kha a awm leh bawk si a, khangte kha ka hrethiam chiah lo a.

Pu Speaker, Ways and Means advance ah tun budget ah hian nuai 3 che che dah a ni ta mai a. Hei hi enge a awmzia aw, ka ti a. Ways and means chu kan la a, kan pe leh a. Hei hi mipui hriatah ba titamtu mai a ni, chuvang chuan, i thup ang u, mipuiah kan ba a tam loh nan kan ti zawk nge, ka hrethiam chiah lova.

Revenue expenditure hniam ta viau tura kan ngaih hniam ta viau lo te hi tlem chuan tun budget ah hian mak han tih deuh lai ka nei a. Mipui thlanlal MP te, MLA te, AMC member-te, LMC councilor ang te chu mipuiin kan aiawh tura kan thlan takzet an ni a. AMC leh LMC te hlawh an han tipung hi chu a hriatthiamawm tak zetin ka hria.

Chutihrual chuan, Pu Speaker, party induhsakna niawm tak, hlawh leh facilities insiam sakna tur atana thil an kal tir tam ta lutuk hi, hengte hi a chhan engnge ni ang aw? Pu Speaker, i dinglamah MLA office neilote pawh an la awm a, khangte kha engatinge kan dah mai loha, party worker-te engatinge kan dah? Hei hian inrenchemna a kaw em, tih te pawh hi ka ngaihtuah fo thin a ni.

Pu Speaker, vawiina kan Demand sawi pahnih, kan Chief Minister zahawm tak leh Pu F. Rodinglana, kan P&E Minister chante hi pass ka remti e. Pu Speaker, ka lawm e.

**SPEAKER** : Member zahawm tak Pu K. Hrahmo ilo sawm ang.

**PU K. HRAHMO** : Pu Speaker, ka lawm e. Vawiin chu a tawpna a ni bawk a, thingtlang-pa lehkha thiamlo ang hriatthiam tur zawngin kan budget chungchang hi han sawi ve zawk ka duh a ni.

**Demand No. 9 - Finance Department:**

Kumina kan BE kan pass tak kha vaibelchhia ₹15,198/- a ni a, chu chu Mizoram mipui a te ber atanga a lian ber thlengina thla 12 chhunga kan va ei tur, kan sum neih a ni a, chu chu thla khatah vaibelchhia ₹1226/-, thlatin kan ei a ngai tihna a nih chu. Mahse, chutih laiin kan leiba BE budget estimate RE kha a chhuak tawh a. Tichuan, kan leiba diktak lo lang chu vaibelchhia ₹13,030/- a ni a, kan sum neih erawh chu vaibelchhia ₹15,198/- a ni. Kan leiba zawng zawng hi kan rul vek chuan, pawisa kan neih tur chu vaibelchhia ₹2,167/- chauh a ni dawn tihna a ni. Kan thla khat mamawh, kan ei tur sum chu ₹2,167/- a nih si chuan, thla khat leh a chanve vel chauh eitur kan nei tihna a ni a, a bak thla 10 leh chanve vel chu eitur kan nei dawn lo tihna ang a nih chu.

Chu chu engtin nge kan tih tak ang? Mizoram-a mi cheng, a te ber atanga lian berte hian chaw nghei ta ila, thla 10 leh chanve vel kan nghei theih chuan nakum, next year atangin ba nei lovin bul kan tan thei dawn tihna ang a ni a. Mahse, chu chu thil theih a ni si lova. A kawng awm chhun dang leh chu - sum min pe theitu hi tunge a nih tia thian tha insiama, kan leiba te min rulhpui tur kan zawn thiam hi a ngai hle a ni. Tuna kan leiba ka tih hi ZPM sorkara kan leiba chauh a nilo, tunhma atanga leiba inkhawl zel kha a ni a. Kan rulh si loh chuan, a inkhawl a inkhawl ang a, min daih loh tial tial dawn a ni. Chu chu kan dinhmun tur chu a ni a. Chuvangin, min pe theitu chu tunge tia kan leiba te kan rulh theih dan tur ngaihtuahna kha kei, ka rilrua lo lang a ni.

**Demand No. 39 - Power & Electricity Department:**

Pu Speaker, Power & Electricity lamah tlem han sawi vel awk ka duh a. Power & Electricity Minister hi a titha hle a, a portfolio-ah a tui a. Tichuan, a chungah lawmthu sawi tur ka nei a. Chhimlamah electric supply kan nei tha lo tih a hriatin meeting min neihpui a, a room ah a solve dan tur te kan sawiho a. Khatianga hma chak taka a lakna azarah eng lama kan harsatna pawh a ziaawm chho zel a ni tih ka sawi duh a. Nichina ka sawi ang khan, ani taimakna leh thahnemngaihna a zarah, Power & Electricity hi a hma kha chuan 'leiba khur' ka ti mai a. Mahse, ani a lo thu chiah a, kan ba zawng zawng a rul vek a, a hun takah power man a pek zel avangin tunah chuan kan profit ve ta a, a lawmawm hle a ni. Chuvangin, a chungah hian lawmthu ka sawinawn leh duh a ni e.

Thil pakhat pawh tih em em erawh ka nei a, ani hian min revive sak theih chuan kan lawmna a kim ang a. Hydel project, 'Kolodyne River phase-I' tih a ni a, a capacity hi 460 mW pechhuak thei tur a ni. Tender vek tawh niin contractor pawh thlanfel tawh a ni a. A man kha ₹2,895.20 crore a ni. A contract-tu tur NTPC (National Thermal Power Co-operation) pawhin riahchilhin an vil a; an zo mai dawn emaw kan tih laiin, kum 2020-ah an tawp ta thut mai a, a chhan erawh kan hre lova.

A power generate tur hi 460 mW kan tih tawh kha; Mizoram-ina 180 mW kan mamawh laiin 460 mW pechhuak thei tur a ni tih an fiah tawh a. Hei hi tih thar theih ni sela chuan power hi kan hmang seng dawnlo a ni. Helaia luite khuaha vah vah ai chuan helaiah hian concentrate law law ila; 180 mW vel kan hmang ang a 200 mW chuang kha, tute emaw sawi dan takin, chawm bawka, hawp bawkin power & electricity-ah kan awm theih ka ring a ni. Kan Minister zahawm tak hi helamah hian a tui bawka, Delhi-a a kal leh hunah NTPC te hi engvanga tawp thut nge annih, eng harsatna nge an neih tihte pawh min zirchian sak sela. Chutianga chuan, Kolodyne Hydel project hi min tihthar sak leh thei se tih kha ka ngenna a ni.

Pu Speaker, kan Minister zahawm takte pahnih, kan Chief Minister leh kan Power Minister te demand vawiina helaia a rawn pharh takte hi pass-pui a tha ka ti a, ka rawn thlawp ve a ni e. Pu Speaker, ka lawm e.

**SPEAKER** : Member zahawm tak Pu Ramthanmawia ilo sawm ang.

**PU RAMTHANMAWIA:** Pu Speaker, ka lawm e. Hun kan hmang rei tawh a, kan nguai angreng a, member-te pawh. Hot deuh a han sawi ka duh a, ka hot thei bik vak dawn lova Pu Speaker, mutchhuak lo tura han tih ka duh tehlu nen. Vawiinah kan chief minister

zahawm tak Pu Lalduhoma leh kan minister zahawm tak Pu F. Rodingliana te demand kan han sawiho dawn a. A hmasain –

**Demand No. 39 - Power & Electricity Department:**

Pu Speaker, han en ila, nikum aia BE tamna chu vaibelchhe 36 nuai 56 leh 63000 a ni a, a lawmawm khawp mai a, a chhan chu P&E Department hi PHE-te nen hian ka ngaihtuahnaah hian a awm thin a ni. Tui tel lovin kan awm theilo kan tih ang chiahin Electric Department awmlo hian kan khawsa thei tawh miahlo a ni thingtlangah pawh khawpuiah pawh.

Chuvangin, an pawimawh dan hi a nasaa an hah bawka, an tang bawka, a thim hlekin kan ang zui bawka, a thawktute hi ka ngaihtuah thina a te ber atanga officer lian ber thleng hianin wawiinah hian lawmthu Pu Speaker nangmah kaltlang hian ka sawi duh a ni, an thawhrimna hi engemaw chen ka hriatpui ve a. Kan bialahte officer fel tak tak te Champhaiah te an awm a, kan harsatna leh manganna te kan han thlen hian rang takin min han bawhzui saka, tin, Aizawl lamah officer lian zawkte entirnan transformer te chhe thut thut thei a ni a hengahte hianin rang takin min lo dawngsawnga hmanhmawh thei ang berin mipuite tana tawrhna a thlen rei lohna turin remchang min han siamsak zung zungte hi a lawmawm ka ti a, wawiinah hian an chungah lawmthu ka sawi a ni.

Pu Speaker, electric department-ah chuan a hniama thawkte hi risk sang ber an ni em aw, ka ti a. Tunhma atang tawh khanin ‘a bana lawn’ kan han tih ang chiho hi vanduaithlak takin nunna an chan zeuh zeuh a ni. Heng mite chungchang hi wawiinah hian engtingge kan minister hian ngaihtuahna a hman tih hi ka zawt duh a. Sorkar-hnathawk nghetlo thahnem tak an awm a, vanduaiana an tawh hian engtingge sorkar hian ralna te a siam em; life insurance te a tihsak em? Heng hi a pawimawhin ka hria. Hna a van avangin khatianga ban lawn thei te kha chu department-a kan officer ten an lo ruai a, an thawk mawlh mawlh a, an mahni zarah hian khaw tam tak thim reng turte kha kan en phah thei a, kut-ke berah heng ban lawnte hi kan hmang a ni.

Chuvangin, tuna thawk mekte pawh hi an indaihlo hlein ka ring a ka bialah pawh khaw hnih-thum khian ban lawn tur an neilo a, khaw pakhatin a va kep te pawh an awm a ni. Chutiangte chu anih avangin, heng ban lawn turte hi sorkar hian PE angin emaw lak theih nise; eng emaw vanduaiana an tawh pawha lukhawng nei thei se tih kha wawiinah hian ka’n sawilang duh a. Chutiang tur chuan department hian hmalakna te a nei em; vanduaiana an tawhin engtingge vanduai chhungten hamthatna an dawn thin, tih te kha min hrih theih chuan a lawmawm hle ang a. Pu Speaker, hei hi chu kan minister hian eng emaw ti tala lukhawng an neih theihna turin ruahmanna siam thei se tih kha kan sawi duh bawka.

Tin, Pu Speaker, kan bial lamah kan lut lawk ang a, term hmasa pawh khan ka sawi tawh a Khawbung atang khian kan bialah Samthangah a chawm khua engemaw zat a awm a, chulai fur leh thli tleh hlek hian electric kha an off zel mai a ni. A chhan chu khimi inkara mi insulator leh a hrui vang a ni an ti a, cheng tam vak pawh ngai lovin an sawi a, hei hi kan minister hnenah pawh hian kan sawi a, hma min laksak thei turah kan ngai a, lawmthu kan sawi sa teh ang.

Tin, Khawbung-ah hian hunrei tawh tak atang khan kan control room-a panel board hi phuahchawpin kan ti tawk tawka a, ‘a ut hmui rum rum a, a khu nasa thin’ te an ti a. A man te hi a lo to viau mai a, ka rin ai daihin, thlak te pawh hi thil namai chu a nilo ang a.

Amaherawhchu, a pawimawh si a. Hei hi s chiat chuan, chhak lam an thim vek dawn si avangin, Pu Speaker, hei hi min ngaihpawimawh sak se. Hna te pawh hi tan theih a nih chuan, a nghahhlelhawm hle tih kha Pu Speaker ka'n sawi duh a.

Tin, Pu Speaker, Champhai - Khuangleng, Khuangleng - Khawbung, Khawbung - Farkawn 33 kV line electric ban hi hmanlai atanga kan hman a ni a. Fur leh thli thawt apiang hian electric hrui te thing zar ten a lo delh a, harsatna kan tawh reng thin a ni. Hei hi lattice tower hmang te pawh hian project siamin RDSS scheme hnuaiiah te hian thlak theih dan a awmlo em ni, Pu Speaker? Tun leh tunah chuan harsa rih mahse, tuna lo ruahman lawka ngaihtuahna min lo hman sak turin, Pu Speaker ka'n ngen duh bawh a ni. Hei hi kan thlak thei a nih chuan, kan thim fo kha a ziaawmin ka ring a ni, Pu Speaker.

**Demand No. 40 - Commerce & Industries Department:**

Pu Speaker, vawiinni thlengin handloom, a bik takin puantaha eizawng hi Khawbung ah khian an tam khawp mai a. Nu-valai chuan kut a tah chi puan chei mawi tak tak hi an tah a, eizawn nan an hmang a ni. A thenin tanpuina an hmu a, a thenin an la hmu lova; hei hi survey-a min puih theih dan min ngaihtuah sak se tih kha ka'n ngen bawh a ni. (**Speaker:**Khawngaihin. Hei chhun chawlh hun a ni a; kan sawi zawh law law tir dawn em ni ang. (House-in sawizawm a remti a.) Aw le, sawi zawm rawh le.

**Demand No. 9 - Finance Department:**

Minute 5 ah chuan ka zo thei mai ang, Pu Speaker. Budget chungchangah khan kan sawi nual tawh a. Kan Finance Minister, kan Chief Minister pawhin budget pharhah pawh khan kan leiba crore ₹1,003.94-a tlakhniam thu a sawi a, mi thenkhat tan chuan hriatthiam loh theih deuh a ni a; kei pawhin kan leiba a tlakhniam turah khan ka lo ngai a. Mahse, a tak takah khan an ruahmanna atanga mi pakhatin ₹12,000/- leiba neiin a kum leha a hnathawhna tur ruahmanna tur a siamah ₹2,000/- hi puk belhin kumkhat chung hun a'n hmang ta a. Mahse ₹2,000/- a puk belha kha hman zawh a ngai lova, ₹1,000/- chauh kha a hmang ta si a; ₹14,000/- hmang lovin ₹13000/- a hmang ta a. ₹1000-a a tlakhniam avang khan a leiba kha a tlakhniam chu a ni hauh lo; ₹1000/- in a leiba a pung tho, ti ang deuhin he kan budget ah hi chuan kan sawi a. A takah chuan ₹948 crore hi kan leiba a punna niin a lang a ni, Pu Speaker.

Tin, Pu Speaker, kan hriat tak angin sorkar thar hian crore ₹12,082 a rochun a ni, leiba hi. Tichuan, crore ₹13,030-in a tak takah chuan a lo pung ta a; chumi a punna crore 948 chu kan ba, tih kha ka hmuh ve dan a ni, Pu Speaker. Hei hi kan CM zahawm takin 'a nilo' a tih chuan a rawn sawifiah turah ngai ila.

Tin, Pu Speaker, vawiin hi a tawpna tur a ni ta reng mai a, a lunglenthlak dawn viau mai a. Kan House boruak te pawh a changin kan han nui a, a changin kan han eng, emaw deuh thin a; inhaw tak tak kan ni lova. Heng te hi pawnlam hian inhaw viau turah te min lo ngai thei a. Amaherawhchu, ram leh hnam kan vei chuan, dik leh tha nia kan hriat hi kan aupui tur a ni a. A diklo chu a diklo, a dik chu a dik tih hi kan tanhmun ni zel se. He laia drama chan hi a tha ka ti lova kei chu. Chuvang chuan, pawnlam mithmuha lan mawi tum te pawh a tha lem lo, Pu Speaker. Kan thusawi ah Chiang ila, thutak sawi ila, belhchian dawl hi sawi zel ila chu chu ram leh hnam kan kaihhruaina tur atan hian a pawimawh. Hun kal zelah thang leh tharte'n keini ho hian engtin nge ro kan rel tih hi min la rawn thlir dawn a, kan hnu an la rawn chhui dawn. Chutah chuan, he ram leh hnam kan hruaina ah hian

entawntlak kan ni em, kan dikin kan rinawm em, tih te an la rawn chhui dawn a ni. Chuvang tak chuan vawiin a roreltu kan zavai hian entawntlak ni turin theihtawpin tan ila ang u.

Aw le, demand pahnih kan han sawi tak te, kan Minister leh kan Chief Minister zahawm tak tak te chan kha ka pawmpui a, ka thlawp e. Pu Speaker, hun min pek belh avangin ka lawm e.

**SPEAKER** : Aw le. Chhun chawlh kan hmang ang a, dar 2:00 PM ah kan lut khawm leh dawn nia.

*(Recess at 1:10 PM)*

**2:00 PM**

**SPEAKER** : Aw le. Pu Lalramliana Papua ilo sawm ang.

**PU LALRAMLIANA PAPUIA:** Pu Speaker, ka lawm e. Vawiina kan sawiho tur turah hian Pu F. Rodingliana demand atang hian ka'n tan ang a.

**Demand No. 18 - Printing & Stationery Department:**

Hei, Printing & Stationery hi nikum lam BE aiin kumin hi a tlahniam deuh ta nual a. Nikum lam aia sum ruahman a tlemna chhan hi engnge ni aw, tih te ka lo ngaihtuah ve a. Department Amalgamate chungchang te kha sawi a lo ni ve bawk nen, tin hei Salaries & Other Expenditures tih lamah cut down te a ni a, a awm viau tho e tih te chu min han ngaihtuah tir a.

Tin, department hmakhua han ngaihtuah chuan, heng pawh hi a hriatthiam awmin ka hria a. Printing & Stationery hi hei, Lunglei lam MLA kan ni a, ka bial chhung Lunglawn ah Printing & Stationery building lianpui a awm a, keini pawh kan la tet laia sak daih tawh a ni a. Amaherawhchu, a thawka te engtham vak an awm tawh lova, a hmunhma saw a ruak huai mai a. Department program leh duh duh anga hman atan an inenchhawk chhen mai a, ka rilru a lo na deuh thin a. He department hi sorkar tan pawh chei vul a ngai dawn a ni tih te ka rilru ah a awm a. Ka bial chhunga awm a nih a vangin kei pawhin mumal deuh hleka a thawktute nen la inkawm a tha in ka hria a, ruahmanna leh hmachhawp te ka nei ve a.

Tin, kan Printing & Stationery tihlu tu tur chu a sorkar bawk hi kan ni a. chuvang chuan, sorkar department hrang hrangte leh kan sorkar hotute pawhin an mamawh tul ang te, pawl thil ah emaw, thil dangte kan chei vul leh deuha kan hman tangkai hi a va tul em. A bik takin Lunglei-a kan office building te pawh saw, kan hmalam hunah eng ang pawhin lo awm chho dawn sela tuaihnuma tihchangtlun a tul hlein ka hria a ni.

**Demand No. 39 - Power & Electricity Department:**

He department ah hian hmalakna tam tak lo lang turah beisei ila. Kumin BE pawh nikum lam nena han khaikhinin ₹3,656/- lakh chuang zetin a pung a, chutah chuan beiseina pawh a sang a.

A hmasa a kan sawi duh chu, kan Power Minister Pu F. Rodingliana leh a department lam te chungah lawmthu kan sawi duh a. Chhim lam, nichina kan MLA ten an sawi ang khan problem tam tak, a bik takin fur ni khua ah kan nei thin a, chutah chuan min ngaihsak zia a lang chho zelin ka hria a. Eng emaw accidental leh khaihlak thil hi te awmlo theilo a ni

a. Amarawherawhchu, tunhmaa kan sawi, kan buaina tam tak thin kha tunah hian min solve sak tlat a ni, Electric Department hian. A bik takin Mizoram hmun hrang hrangah te pawh hmalakna duhawm tak tak sawitur a awm rualin, keini Chhimlam ho chu kan lawm hle a ni, kan P&E Department-in hma min laksakna ah hian.

Staff an indaih lo em em tih kan hria a. Keini Lunglei South bial hi khua 40 dawn nei kan ni a, thingtlang khua kan ngah em em a. Electric line buaipui ngai leh clear ngai a tam bawk si a, thawktu hi an indaih lo hle niin kan hria a. Kan bial chhungah pawh department-a thawk nghet si lo, amaherawhchu, an tel lova department khawsak hlei theih loh khawpa an mi chhawrte an awm a ni. Kum tam tak phuahchawpa lo chhawr, department mi ang maia chhawr tawh te hi an awm a. Thawk khat lai pawh khan kan Minister bulah pawh hian ka sawi a, 'hetiang department pawhin a tangkaipui leh a khua tana tangkai em em kum tam lo thawk tawhte hi chu Casual Labour-a lak hunah te pawh hian min hriatsak ve teh u aw' ka ti a. Amaherawhchu, post tam an la la thei lovin ka hria a.

Khangho kha chu mihring induhsakna satliah emaw, kan duhsak zawngte kan va tih ngawt ai kha chuan an tangkai sa a; thawk mek te hi chu pawh remchang a awm leh hunah department pawhin min hriatsak sela. Hengho hian casual labour kan lak leh hun tur an thlahlel ve em em a, a phu pawh an phu in ka hria a. Mualthuam South ah te, Tawipui North-I ah te, Tawipui North-II ah leh hmun dangah te pawh khatiang mi duhsak awm tak takte kha lo sawinawn a awm loh pawhin min ngaihsak turah ka ngai a, kan lo sawilawk a ni e.

Tin, Electric Department ah hian thingtlang bikah transformer puak t, chhia te, tekin a den thlak a ngai kan ngah em em mai a, fur ni khua te hian. Chuta kan buaina thin pakhat chu, (Assembly ah hian zawhna pawh ka siam hial tawhin ka hria) transformer thar thlak a ngaih hian a phurhna tur inngaihtuah a ngai thin a ni. VC ten pawisa an lo neih vak loh pheih chuan (kha, i veilama thingtlang bialtu thenkhatte pawh khan dik tih hmel deuhin min lo en a; a dik an tiin ka hria) a phurhna turah hian kan buai thin a ni. Khawtlangin pawisa thawkhawm te a ngai a, a tawpah MLA min pur leh a. Heng te hi department hian hemi kan budget sum ruahmanah khatiang phurhna senso tur te pawh dah tel zel thei ila a thain ka hria.

Hei, furkhua te kan hmachhawn leh dawn a, keini a chekhnawk bial tan chuan a rampum huap eng emaw thil lian tak kan sawiloh pawhin min lo hriatthiam kan beisei a; tiang te te kha kan problem a tling ve thin a. Tin, electric line la luh mumal lohna te kan nei a, hun eng emaw laia lut zawk si, a hnu ah enkawlzui loh avanga eng thei ta lo ka bial chhungah Hmunthar khua, Chawngte chhak lawkah a awm a, hengah hian electric line te pawh a la kal vekin ka hria a; tlem han ennawn hleka tih-en ve mai theih tur khaw te tak te a ni a. Khawngaih takin min lo chhinchhiah sak thei sela, kan Minister khan. A line awmsa te check-a han tih-en mai theih turah ka ngai deuh a.

#### **Dermand No. 40 - Commerce & Industries Department:**

Hei, kan budget pawh tlema zawng chuan a pung chhoh ve leh a, a lawmawm ka ti a. Commerce & Industries chungchanga ka sawi duh chu, kan Minister bulah pawh vawikhat chu ka sawi tawh a, Tlabung border trade ah khuan 'hman remchan hunah i la zuk zin dun ang hmiang' tiin ka lo sawm tawh a. Amaherawhchu, ani pawh a la remchang theilo deuh te pawh a ni mahna; remchangah chuan khu lampang khu kan ngaihven deuh te pawh a ngaiin ka hria a. Engkim kan hrevek a. 'Tlabung border trade' tih hi ministry tinah hian a inrik chhawknaw a rei ve tawh a, ngaihven a ngai a ni

Tin Industries chungchangah, kan ramah hian large scale, mega-industries ang te hi kei chu ka mitthla vak vak ngam rih lo a; small scale industries, Pu Gandhi a ngaihdan zul zui deuha ngaihdan nei ka ni a. village level-ah hian small scale-a kan intihchangtlun hi a tul hlein ka hria a. Chung kawngah chuan, ka rilrua ka lo ngaituah ve thin pakhat chu, kan ram dinhmun en a raw material kan neih ve ang chia kan din theih industry te hi focus bik ila; tan laka, te tak te level-a tanga lian deuh, employee pawh neih ngailo, level te tak te te atangin kan tan chho ang a. Khang raw material kan neih that tawk angah te kha chuan State pawn leh foreign atanga unfinished product lo la turte pawh kha khuahkhirin, tualchhunga kan industry te te an din chhuah ve theihna tur atana market kan siam hi a tulin ka hria a. A inthlung chho vek si a. Entirna pakhat - 'Ha hawlhna' kan tih ang chi mai mai, mau atanga kan siam te pawh hi tuna kan hman tam ber hi chu China lam atanga rawn kal ang chi te kha a ni a. Khatiang te te atanga heti laia kan intodelh theihna turin, pawnlama mi chawlut loha, tualchhunga mite an market a that chhohna thei tur hmakhua kan sahsak hi tul ka ti a, inchhawm nun chhoh hi a pawimawh hle ka ti a ni.

Aw le. Pu Speaker, awlsam tea mipui hriatthiam theih tura comment tlem, Finance chungchanga ka pek duh chu - hei, 'Welfare State' kan in ti a. Welfare State ah chuan 'mipui welfare kaihhnawih thil ngaihpawimawh a ni tur a ni' tih a ni a. Kan Finance changtu hian hemi kawngah hian ngaih dan fel tak leh tha tak a man fuhin ka hria a. Sum inrenchem a tul hunah chuan remchen taka a tih rualin, mipui welfare atana sum pekchhuah ngaiah chuan ip lovin, beisei piah lam thlengin a inphal thin hi lawmawm ka ti a. Entiran: Healthcare chungchangah leh sorkar-hnathawktuten regular-a an hlawh an lak theihna tura sum inphal kawngah te, heng te te hi keini mipui finance lam expert tak tak lo tan phei chuan kan finance management a that leh that loh kan lo tehna ve mai mai te a ni a. Regular taka sorkar-hnawthawkte'n hlawh kan han la thei ringawt te pawh hi, 'sum indaihlo' tih reng karah a lawmawm hlein ka hria a ni.

Heng kawnga kan Finance Minister hmalakna hi lawmawm ka ti a. Vawiina kan minister pahnih - Pu F. Rodingliana leh Pu Lalduhoma te demand hi House hian a pawmpui a thain ka hria a, kei pawhin ka thlawpna ka rawn sawilang a ni e. Ka lawm e.

**SPEAKER** : Member zahawm tak Pu Rasik Mohan Chakma ilo sawm ang.

**PU RASIK MOHAN CHAKMA:** Pu Speaker, ka lawm e. Hei, vawiina kan Minister zahawm tak Pu F. Rodingliana leh kan House leader, CM Pu Lalduhoma demand sawihonaah hian a hmasa berah chuan -

**Demand No. 48 - Power & Electricity Department:**

Ka bialah hian a village council 88 a awm a, sub-village nen chuan 94 a awm a. Henga khaw 24 te hi unelectrified an ni a, more than one-third a nih chu. Chuvangin, kan Minister hian a wind-up naah khan heng unelectrified village te pekna tur ruahmanna mumal a awm em? Awm ni se, khawi scheme atangin nge, engtikah nge a thawh tan theih ang tih te kha chiang deuhin min hrilh se ka duh a. Tin, Kamalanagar leh Borapansury-ah uncovered area, khaw khatah si khan a awm a; lehlamah current a awm a, lehlamah a awmlo a, neilo veng tan chuan a rilrunatthlak em em a. Khangah khan extension tih theih dan a awm thei?

Tin, thingtlang lam Damdep leh Parva-ah te hian kan engineer ten site engineer te kha 'nakinah hna awm hunah kan ngaihtuah ang che' tia eng eng emaw tiamin an chhawr

chhawng thin a. Mahse, an dah thei thin si lo a. Pu Papua sawi ang khan, nakin hna awm hunah chuan hmun dang ami nilo, a area ami emaw, a awm duh ngei te emaw kha lak dan awm hram sela. Kan engineer te pawh an hming lamin ‘he mite hi in chhawr em ni, engtin nge in chhawr dan’ tiin ka zawt a; ‘pawisa pek tur mumal pawh kan nei ngailo a, engtin tin emaw an pocket money zawngin thla tin kan pe thin’ an ti a ni. Khatiang sum tlemte beisei avanga thawk kha an ni a, an khawngaihthlak em em a. Eng emaw remchang a awm hunah anni ang kha ngaih pawimawh dan awm se.

**Demand No. 15 - General Administration:**

Hei hi nikumah pawh khan, ‘Kamalanagar hi town-a declare a ngai a ni’ ka ti a, engkim a criteria awm zawng zawng an fulfil vek a. Mahse, tun thlenga declare a la awm awm lo a. Khaw te takte te block headquarters te pawh town an ni a, keini Sub-Divisional thuthmun leh District Council headquarters meuh pawh town-ah declare kan la ni lo a. Nminah kan House leader zahawm takin ‘District Headquarters atan a phu a ni’ a ti a. District Headquarters nih phu si, town-a declare lova a awm hi chu, a ni theilo a ni. A tul ang zawng zawng kan furnished vek tawh a, kan dilnaah khan; a criteria zawng zawng kan fulfil vek a. Niminah niin ka hria a; UNDP khan ‘census town tur chuan Registrar Genral-in a declare a ngai’ tih a ni a. Khatianga declare dawn pawh khan Mizoram Sorkar atang bawkin proposal a kal a ngai si a; Delhi lam atanga an rawn tih thut kha a rinawm lova. Chuvang chuan, chutiang zawng chuan hma min laksak thei se tih hi ka ngenna a ni.

**Demand No. 14 - Planning & Programme Implementation:**

Pu Speaker, kan House Leader-in serious taka min ngaihtuhsak atana ka duh chu, Centrally Sponsor Scheme tam tak a awm a, NEC-ah pawh Focus Area Development atan fund te dah a ni a. Mi sincere nih pawh a ngailo, hming pahnih-khat pe ila, NEC hnuai a Backward Community Grant sum hmangin kan area hi develop theih a ni a. Ka hriat danah chuan, District Council area nilo Bungmun te pawh backward block a ni a. Hengah hian sector bik pawh a ngailo; sector zawng zawng a cover thei vek. Education, roads, social service engkim a cover thei a, medical thlengin a tih theih a ni. Hengah hian state sorkar sum hmang miah lovin sawlaih thingtlang mite’na kan mamawh infrastructure ang hi chu a din theih vek avangin, engvangin nge kan tih loh aw tih ka ngaihtuah thin a. Khawngaih takin hei hi serious taka min ngaihtuah sak turin ka ngen a ni.

Tin, Chakma Autonomous District Council tan tun financial year kal mekah hian project pahnih kan submit a, nichina ka sawi scheme hmang khan school building leh fisheries te, vawiin thlengin kan sorkar hian min la forward sak lo a ni. Shillong lam ka biak pawhin, ‘helama an rawn thawm chuan, khang kha chu pawisa awmsa a ni a, nangmahni tan anih avangin pek a harsa lo’ tiin min rawn hrilh a ni. Nimahsela, state sorkar hian tun thlengin min la forward sak lova. Tin, festival buatsaih nan NEC hian pawisa a neih tih kan hriat avangin, Biju celebrate-na tur nuai 10 lek project kan submit a, hei pawh hi vawiin thlengin min la forward sak lova. Hengte hi special deuhin kan House Leader hi tih takzetin ka ngen duh a ni.

Pu Speaker, tun sorkar hian hna chu kan thawk tha a, faktlak pawh a ni e. Mahse, ka hriatthiam loh pakhat chu, House-ah ngei pawh thudiklo min hrilh fo thin hi a ni. ‘CBI general consent kan pe ang’ tiin nasa takin kan sawi a, an sorkar hnu ah chuan an pe ngei; nimahsela, a hnu lawk, a karleh maiah withdraw a ni leh a, enge a awmzia ka hrethiam lo a ni. Kei chu, politician pawh ni ila hetiang thudik tawklo inhrilh hi chu ka thiam lova; midangin thudik tawklo min hrilh pawhin, engnge a awmzia ka ngaihtuah chhuak zo thin

lo a ni. Tin, hna thawk miah lova UC submit theih dan te, sorkar office kan chawlhanna te a rei ta a; District Council pawh ni se, hetiang thawk miah lova UC submit awm hi ka la hre ngailo, ka hriat leh thiamna a zim lutuk deuh nge. Chuvang chuan, khang te kha a tul a nih chuan chiang takin inhrilh law law ila. Mipui thlantlinte vek kan ni a, tumah kan inbum tak tak lo a ni.

Mizoram hi lekhathiam tam lamah a sang ber kan ni a, mipui pawh hi tumah kan bum tak tak lo; mahni inbum mai kan ni. Chuvang chuan, heng te hi morally wrong a ni a, a diklo a ni. Heng te hi i ching lovang u; 'i sim ang u' tih hi ka ngenna a ni e. Thudiklo hi inhrilh fo lo ila, hetiang chuan mipui moral pawh kan tichhe vek dawn; kan inrintawna te a ti chhe zo dawn. Mipuite hian min ngaisang sela, mipuite pawhin kan behaviour te, kan ngaihtuahna te pawh 'midang aain an tha e' tih rilru an put theihna turin i in-project thiam ang u, tih hi ka ngaihdan leh ka ngenna pawh a ni e.

Pu Speaker, engpawh ni sela, kan minister zahawm tak tak pahnih - kan House Leader demand leh kan mamawh em em electricity lam changtu Minister demand te hi a tha ka ti a, ka pawmpui e. Ka lawm e.

**SPEAKER** : Tunah chuan Member zahawm tak Pi Baryl Vanneihsangi ilo sawm ang.

**PI BARYL VANNEIHSANGI:** Pu Speaker, ka lawm e. Member zahawm tak Pu Rasika thahnemngaihna a tha khawp mai a, chutihruah chuan min hau na tawlh tawlh a kan nuhi a za tawlh tawlh deuh mai a. A demand-te erawh kha chu a tha em em mai a, kan ngaihtuah sak te pawh a tul ngeiin ka ring a ni.

**Demand No. 40 - Commerce & Industries Department:**

Pu Speaker, C&I te pawh ti mai ila, hun a rei loh nan. Helai ah hian hei C&I hnuai Handloom Textiles & Handicraft Wing zawk hi han sawi hmasak ka duh a. Tun Chapchar Kut te, nikum te leh kum hmasa te pawh a ni ang a, tin hun hrang hrangah te pawh kut kan hmanin handloom lam hi kan ti sawt hlein ka hria a. Mizote in support tawn nachang kan hria a, kan market lam te pawh a thain ka ring a ni.

Zawhna in bul ka'n tan ang a tun kut kan hmanah khan stall hawn chhung kha a rei angreng khawp mai a, khalaiah khan Handloom, Handicraft & Textiles lam khan an hlawkpui em tihte, tin an lakluh zat te pawh kha sawi theih anih chuan ka'n hre chak deuh a kha kha ka zawhna ni se la.

Pu Speaker, cultural dress tih te promote kawngah theihtawp kan chhuah ve thin a, amaherawhchu hetiang puan bih tur ang chauha siam hi chuan mipa tan pawh han hak reng leh han bih ve mai theih a nih loh avangin designer thiam tak tak mizo thalai tam takin an theihtawp an chhuah a. Tunah chuan in coat ah te, in shawl ah te, in muffler leh in kamis ah te a lo awm chho ta zel a, a hmuhnawm hle mai a. A bik takin ZPM sorkarna ah a theih anga tam hnam thuan, hnam ze lanna inbel tur tih te, Chapchar Kut pawh a kar ang a hak tur tih te a lo ni ta zel mai a, hetiang hian kan ram leh hnam thil pawimawh tak tak, hlu tak tak promote kawng a kan tang hi a lawmawm ka ti a.

Pu Speaker, mahni han insawi ve lawk ka duh a. Hei kum 10 vel a ni ve ta a, mipui hmaa chanvo neia kan din vena te. Chungah chuan kan theih ang tawkin kan hnam incheina, puana bih chi emaw kan designer ten an siam, an thui keima mawi tih zawng ni em em lo pawh ni mahse, 'designer-in a thiamna, theihna leh hnam puan a phona tur a nih chuan..' tiin lungawi takin kan lo ha a, thawh hona tha tak kan lo nei ve thin a. Tin, Best Tourism Village Award kan lak te, National Convention kan hman te leh mimal tan pawh a hun pawimawh tak tak, ram tana kan hun pawimawh kan tih te, 'India Today - Conclave' kan tih ah te pawh khan Mizo kutchhuak kher ha hian ka kal ve thin a. Hmun dang, khaw dang, ram dangah pawh hian kan puan kan neih te, kan tahchhuah te hian mawi tih a hlawh em em. Kan leina min zawt a, lei ve chak an tam a ni.

Tin, kan designer ah te pawh hian, kan rawngbawltute pawh hian min hriatpui ve hrim hrim ula ka'n duh chu, helai Mizoram chhungah mai a ni lova handloom, textile, handicrafts kan promote-na hi, India ah hian Fashion Week hrang hrangte a awm a, chungah te chuan an sawm a, designer tam tak an inlan a; international level kan thleng tawh a; a hming te pawhin sawi ila Pu Charlie-a te pawh an kal a. Tin, Pu Mawitea, 'Pu' chu a la ni chiah lo nain, zahna lantirman ka'n sawi ang a. Ani pawh hmanni lawkah Italy Milan ah a kal a, Mizo thuan, Mizote min pholangin chutiang chuan duai lo takin international level ah pawh an kal tawh a ni. Chu chu kan thleng thei tawh a. Khawvelah hian heng kan hnam thuan te hi Commerce & Industries hnuai handloom hmang hian thang kan chhuah thei dawn niin ka hria a. Chutah chuan thahnem ka ngai em em a; Mizo kutchhuak to deuh zawk; mahse, a tlawm zawkin hmun danga lei tur awm reng mahse mipuite tanpui nan leh an mahni tana inphochhuahna remchang a nih theihna turin platform kan neih ang te kan lo ti ve hram hram thin a. Chuvang chuan, tuna tang hian han uar leh zual thei ila, tih ka'n sawi duh a.

Tin, Pu Speaker, hand-holding lamah pawh khan an thlang hnem hlein ka hria a, puantah te, handloom lam te a tam a. Tin, kan bial lam Sailam ah te pawh tih tak zeta tia tanpuina dawng tlakte leh hmun hrang hrangah te pawh an awm a ni. Chungte pawh chuan an din chhuah theihna tur khawp hi lo dawng zel se ka'n duhsak a. Chu chu kan Minister hnenah pawh nangmah kaltlangin ka'n dil sak ni se.

Tin, Commerce Wing hnuai thoh hian, New Market kan sa a, a nghahhleah awm khawp mai a, kan revenue te pawh tlemin, hei hian a tisawt leh zual turah ka ngai a. Pu Speaker, ka lo ngaih pawimawh ve em em thin hi 'ruahmanna a awm em' tih zawh ka duh a, chu chu - tourist te kan nei a, an rawn kal a. Mizoram min rawn tlawhtu hi an thahnem khawp mai a. Chutah chuan kan lo chak em em thin chu, kan ramina thil a siamchhuah kan neih ang chi kha hawn tur an zawng thin a ni. Kha kha a leina, a phochhuahna hmun tur bik, ti mai teh ang; (ka hrethiam bik chiah lo a) center ang deuh te hian hmung dangah te chuan a awm thin a, khang kha awm ve tawh se kan duh khawp mai a. Tichuan, an duh tawkin Mizo kutchhuak thil siam kha an va leiin, an va bazaar tawh mai dawn a. Chutianga thawmhnaw kan phona mai piah lamah hian, kan ram thil siam phochhuahna tur hi hmalakna a awm em, tih te kha ka zawhna a ni a, hmalakna awm atan ka duh hle mai.

Tin, Directorate of Geology & Mining hi tawi te in sawi ka duh a. Ni kum lamah khan chhiat tawhna avangin an hlutna te kan hre thar ve hnuhnawh a ni a, an pawimawh hle mai a. Leilung hausakna kan teh leh kan entir chauh a ni lova, kan ram leilung hrim hrim zirchian a lo ngai nasa si a. Tin, fur a lo nih leh hunah chuan chhiat tawh thut theih a ni a,

eng eng emaw leilung han tawlh a han che thei tur a awm a, chung zirna kawngah chuan heng mithiam bikte hian min pui nasa hle mai a. Nakin lamah VC Dan a kan pass takah te pawh khan building regulation te pawh a awm a, khang kha rural area lamah te pawh kan mamawh dawn hle a. Kan Geologist te an mahni hnuaiyah thlamuang taka in leh lo te kan din theih na turin an pawimawhna te pawh hi hre thar leh in chhawmdawl an ngaihna lai te, tih changtlun an ngaihna laiah te pawh khan Minister te leh a department te pawhin inphalna thinlung nen, an mamawh ang an mahni ti hmasawn a lo pek zel kha a pawimawhin ka hria a ni.

**Demand No. 39 - Power & Electricity Department:**

Nichin lamah kan memberte'n an sawi tawh a, sawi tur/dil tur a tam khawp mai. A hmasain, a staff-te an hah zia hi! Keini, chuan power a awm lohin kan phun a, kan phun lungawi mai a; mahse, awmtir leh turin theih tawpin a sur a sa hnuaiyah zan rei leh zing kar sawi lovin an che chhuak thin a, an fakawm ka ti hle mai a. Tin, nimin lama kan ngaihthlak ang khan, Tlawng Lui khuah tum tak takna kha a awm avangin a changtu Minister chungah lawmthu ka sawi a. Ram tana rotling tur a ni a, kan nghakhlel takzet zet a ni.

Tin, kut hnathawktu chawikan kan ti ta sa sa a, huan thlai neih te a tha a; chutih rual chuan 'Zau' kan tih te hi a bawh tlak tak tak tur hi chuan power supply hi a ngai zel mai a ni. Chungte pawh chu dilna kan thlen ve thin a, bial dang dangte pawh kha an ni a; power supply neih hun kan nghakhlel takzet zet a. Hemi Mualkawi-Zau kan tih te, Serzawl-Zau kan tih te, Buhro-Zau kan tih te, chungah te pawh chuan dilna te a kal mek a. Department lam pawhin min enzui pui reng a, hengte pawh hi a hlawhtlin hun kan nghakhlel takzet tih kha Pu Speaker, ka'n sawilang leh duh a.

Chumai a ni lova, khaw thanglai nei kan ni a, khua thanna tur nei te pawh kan ni hlawm a. Chuvang chuan, extension lam te pawh a pawimawh chho dawn hle mai a. South III bialah chuan khaw lian pahnih - Sialsuk leh Samlukhai te pawh saw an thang nasa em em mai a. Anni pawh an indaihlohna kan hria a, a changtu Minister hnenah pawh VC te nen kan thlen tawh a, hengte pawh hi a chak thei ang berin min bawhzui sak se kan ti hle a ni.

Hlimen thlanmual bul transformer bulah hian run pakhat hi a ruak tawp mai a, hei hi P&E ta a ni a. Pu Speaker, nangmah kaltlangin department ten min lo hriatsak sela, 'luah loh run' chu a ram duh tih kan hriat vek kha. Chuvang chuan, hei hi site office ah te siam theih a ni em? Heti tawpa awm lo hian hman tangkai dan awm se kan ti hle mai.

**Demand No. 1- Legislative Assembly:**

Session tuang taka kan neih theihna chhan te an ni a, helaia Assembly staff-te an thawkrim em em a; keini chu a lang Sarah mi hmuh ah kan thu a ni mai a, a lang lo lam a phen , behind the screen-ah thawkrim tak takte leh Session tuang taka kan neih theihna chhan te anni a. Pu Speaker, nangmah leh i hote zawng zawng chungah lawmthu ka sawi a. Tin, Commissioner hmeichhia kumin ah hian kan nei a, a lawmawm hle mai a; vawikhatna a ni hial em aw ka hre chiah lo a; Pu Speaker, nangman i chian zawk ka ring a. A nih phei chuan, record te pawh a niang a. chutiang Commissioner kan han nei thei te hi a lawmawm ka ti a.

Tin, kan Finance Minister hnena ngen ka duh chu, kan ram rorelna in sang ber hi a hmel hmang kan hmu vek a, thawmthat a ngaih zia te pawh kan hria a. Amaherawhchu, chutih rualin hmun thar neih tumna te pawh a lo awm zel a. Engpawh chu ni se, a tha vek a, tuna

kan mamawh zawk hi sawi a ngai a; nakin lam kha chu hunin a hril turah ngai ila. Hei, repair tur tam tak kan nei a, Finance lam hi a thleng tawhin ka hria a. Kan duh zawk chu, tha takin khang hna proposal kan neihte kha thawh tur a nih chuan, PWD ah te, mithiam zawk kan tih te hian tha takin, rotlingin min siam sak se, min thawk sak se, tih hi kan duh takzet a. Chu chu House Committee member ka nihna ang pawhin ka'n sawi tel ni sela. Pu Speaker, ka zo tep e.

A tawp nan Finance Minister tha tak, chak tak kan nei a. A hmalakna in NSAP hnuai tanpuina pek thin te pawh tihpun a ni tih te kan lo sawilang tawh a. Anganwadi Workers leh helpers te lawmman atan State share tihpun te pawh kan hria a, tin; sorkar hnathawkten a a hun taka hlawh a lak chungchangah lawmthu sawina a ri mawlh mawlh a.

**Demand No. 9 - Finance Department:**

Tin, aikal tihtawpa, chumi hnuah Special Pension Scheme te pawh han duan leh a ni tih kan hria a. Chutiang chuan, ngaihtuahna thar tha tak tak mai kan ramin hma a sawn theihna tur a rawn nei thin a, a lawmawm khawp mai a. Department kan han dawr dawn a, nilengin, 'CM hovin review meeting an nei e' an ti a, keini pawhin kan nghak ve tlak tlak thin a. Khatiangah khan tih tak zeta tihna nen he ram hruai hna hi a thawk niin ka hria a. Pathianin vengin awmpui sela, hriselna tha pawh nei zel turah ngai ila. Keini pawhin kan ram hruaitu kan Chief Minister, kan Finance Minister ni bawh ang hian tih tak takna nen he ram rawngbawlna hna hi kan thawh a ngai tak zet zet a ni.

Engpawh nise Pu Speaker, harsa deuh mah se, dan anga kal hi ram leh hnam hmangaihna dik tak leh mipui rawngbawlna dik tak niin ka hria a. Chuvang chuan, tun Session-a kan hun tawpte a nih avangin, 'dik takin engkim hi ti zel ila; rel zel ila' tih kha, a tawp nan kan sawi ve duh a ni e.

Tichuan, ka rawngbawlpui zawng zawngte tluang taka an bial an enkawl theihna turin Pu Speaker, nangmah kaltlangin duhsakna ka hlan bawh a. Heng demand tha tak takte hi ka thlawp a ni tih ka sawi a ni. Ka lawm e.

**SPEAKER** : Tunah chuan, member zahawm tak Pu Ginzalala ilo sawm ang.

**PU H. GINZALALA:** Pu Speaker, hun min pek avangin ka lawm e. Hon'ble Chief Minister chan lamah kan tan hmasa mai ang a.

**Demand Nos. 11 & 15 - SAD, GAD:**

Hei, 'Administrative Reforms' tih te hi kan sawi thin a, a tul khawp mai. A bik takin kan unauten lo haw lo sela, Autonomous District Council lamte pawh hi reform tel hi an tul khawp a ni. Sum tam tak kumtin a luang lut a, amaherawhchu, hmasawanna tak tak a ni thin lo hi a challenging khawpin ka hria a. Kan ram chhunga thil thleng a nih avangin he House hian a ngaihpawimawh a hun tawh khawpin ka hria a; administrative expense leh salary tih velah hian budget 98% hi a kal ral a ni. Hei hi a serious khawpin ka hria a, kan ngaihtuah tlan hi a tul hlein ka hria a ni. Hetiang hi kan ramah hian a awm tur a nilo a, theih tawp kan chhuah tlan a ngai hle a ni.

Tin, kan ramah administrative efficiency a awm theihna turin district boundary te, constituency boundary te nena kal kawp deuh turte leh BDO, SDO engkim mai, hengho zawng zawng pawh hi ngaihtuah vat ni thei se rorelna chak zawkin a kal theih ka ring a ni. Tin, state level planning leh coordination-ah hian MLA-te tun aia an participate hi a ngai a ni. MLA te hian voice an neih a ngai, planning process-ah, a grass root level-ah thil hrechiangtu ber an ni a. Kan MLA-te an participate lo ka ti; tun aia kan participate leh zual theihna tur hian a system hi kan hriat ve erawh chu a ngai a ni. Chutianga kan titheilo a nih chuan, a democratic lo ka ti. Chuvangin, tun aia nasa zawkin kan MLA-te hi planning leh coordination-ah te an involve a ngai a ni.

Tin, kan ram in kan harsatna lian tak, a nihna tak takah chuan bureaucratic supremacy hi kan problem a tling a ni. Kan ram chauh pawh a nilo, hmun tinah hei hi a ni ve tho mai. Kan sorkar hnathawktute, a bik takin high level-a harsatna nasa tak awm hi kan address a ngai khawp mai. A bik takin kan official tlema a sang chinah hian 'ego' hi a nasa em em a ni; mahni inngaihpawimawhna, indah hlutna hi a nasa a. Hei hi kan ram administration-ah efficiency tithuanawptu, tihniamtu a ni tlat mai a ni. Hetiang zawnga kan kal tlana theih tawp kan chhuah tlan a ngai tak meuh meuh a ni, he House hian.

**Demand No. 9 - Finance Department:**

Finance lamah sawi tur ka ngah hle mai. Amaherawhchu, hei minute 4 a ni tep mai. Development kan kalpui danah hian priority kan pek a ngai; engnge kan direction hi kan chian a ngai a ni. Tunah hian All directions-in kan kal tawp mai a ni. Pressure awmna lamah hian kan kal a ni deuh ber mai. Democracy hi a that teh lul nen dis-advantage a lo nei tho mai; chumi advantage chu kan tuar thin a ni. Pressure group a awm reng mai kiltinah hian, kan duh ang pawhin kan kal hlei theilo. Pressure tamna lamah decision kan siam thin lai hi a dik lova. Chuvangin, tun aia direction nei leh zuala kan kal hi a tul ka ti a. Theih tawp chhuaha hmasawn zel turin he sorkar hi ka fuih duh a ni.

Kan sum hmanna hian economic-ah hian impact a nei em? 'Impact' ka tih awmzia chu, possitive impact a nei tha em? Positive impact a neihna lam lamah hian in priority kan pek a ngai a ni. Entirnan - building kan han sa leh-luah mai a, khang khan economic-ah hian impact a nei lemlo, tam tak chu; a zawng zawng ka ti miahlo. Amaherawhchu, kan economic atana impact nei zawng in decision kan siam chho zel hi a lawmawm ka ti khawp mai.

**Demand No. 40 - Commerce & Industries Department:**

Industries lamah kan lut teh ang. Hei, ka bial Champhai Vengsang-ah industry hmun tur tha deuh mai kan nei a, kan hotuten min ngaihpawimawh saka, a hlawhtlin theihna turin theih tawp min chhuah sak sela. Police ram te hleh thlak kan tum deuh a, kan it riau a ni tih hi ka'n sawi lang duh a ni; Commerce & Industries lam Minister pawhin min lo hriat sak sela. Tin, Hmunhmeltha-ah IIDC ram tha deuh kan nei a, kan la hmang tangkai lo hle a ni. Chu chu anih avangin, hman tangkai theih dan hi min zawnpui sela.

Tin, skill development lam hi Champhai-ah hian tih ngei ngei kan duh a ni. ITI building lam te pawh kan nei tha, IIDC pawh kan nei. Hengte hi hman tangkailoha a awm hi tha kan tilo a ni.

**Demand No. 30 - Power & Electricity Department:**

Power sector lamah hian mitin harsatna kan tawh nia ka hriat chu - NGO te, YMA te, MHIP te, MUP te, Sports club hrang hrangte, anni hian financial problem an neih hian MLA-te min beisei ve thin a ni. Chu chu a nih avangin, engtin nge system kan hriat ang aw, tih te hi ka ngaihtuah ve thin a ni. Tunah hian scheme tha deuh mai, solar power generation scheme kan nei a, rooftop te pawh kan ti a. Heng atang te pawh hian tihdan awm thei se.

*Entirnan:* Allotment te hi siam ila, 'VC tan kilowatts chuti zat' tih tein; a nih loh leh YMA tan, MHIP tan tihte pawh. Khatiang khan allotment te hi nei ila a tha awm mang e aw, ka ti a. Pu Speaker, ka bialah hian rawtna ka siam duh a ni tih hi kan Hon'ble Minister pawh hian min lo hriat sak sela. Tichuan, kilowatt 2-3 lek lek pawh lo ni se, khata energy generator atanga lo luta hi hetah NGO te pawh an lo intunnunna turte pawhin lo hmang se a tha awm mange aw, ka ti a.

Tin, Power Department hi kan sawi thin a, kan future a nih miau avangin; privatize hi a tul tawh a ni. Chutiang zawng chuan he sorkar pawh hian ngaihtuahna a sen hi a tul tawh khawpin ka hria a. Tin, Hnahlan Sub-station hi a hlui tawh khawp a, nimin piah lawk pawh khan a kang a ni, chu chu min lo hriat sak se. Selam power supply hi re-alignment a tul hle. Champhai atanga Selam te pawh hi rawtna ka rawn siam hi min lo hriatsak sela a tha awm mange. Tin, a theih chuan Kawlbem Hydel Project atangin Hnahlan tlangdungah hianin power lak luh theih se a thain ka ring a.

*(Hon. Dy. Speaker-in Chair a la a.)*

Aw le. Pu Dy Speaker, a concept chauh thil pakhat he House-ah hian sawilan ve hrim hrim duh ka nei a ni. Chu chu Tlawng Hydel Project khuah kan tum a, helamah Chhimtuipui Hydel Project khuah kan tum bawk a ni. Tuna ka sawi tum chu, a concept chauh a ni. Techno-economic feasibility report engmah a awm lova, khalam kan la sawi theilo; tin, socio-environment impact a nih dan te pawh ka sawi theilo; a concept chauh ka sawi duh a ni.

Tlawng hydel project tuna khuah kan tum te hi a aia sang zawkin tithei ila, tichuan, a li chho ang a. Lau Lui kan tih hi chuan Thenzawl thlen dawna kawng kual laiah Forest-in nursery an siamna hnuaiah a rawn li lut a ni. Chutiang chiah chuan, Chhimtuipui project hi lo ti thei bawk ila, a rawn li let ang a, chhimlam atangin hmarlam hawiin a rawn li ang a, Mat Lui-ah a rawn fin ang a, tuna ka sawi Thenzawl luh dawn kawngkual lai nursery hnuaiah a rawn li lut dawn a ni. Tichuan, he mite li hnih hi han cut ta ila meter 200-300 dawn lai te chu a ngai maithei a ni. Zirchianna a awm lova a concept chauh anih kha ka tih kha; khatianga kan tih theih chuan navigation hi tha lutukin a awm thei dawnin a lang a; mithiam zawkte'n han zir se. Tichuan, Aizawl atangin Chhimtuipui thlengin, Chakhei thlengin a li chho dawn a ni. International border-ah a li chho ang a, Burma nena kan inrina bawr km 400 bawr vel te chu navigation a awm thei a ni. Chu chu advantage pakhat a ni a.

Tin, a that lehna em em tur chu - rel lo luh te pawh kha kan duh lo maithei a, 'kan ram ril zawkah rel te lo lut palh ta se' tih ngaihdan neite pawh kan awm thin a, khangah te pawh khan, rel khan Lungleng bak kha a thleng chho thei dawn lo a ni. Ministry pawh vawikhat chu ka sawipui a, an ngaipawimawh khawp mai. A chhan chu, flood control atan a tha em em mai a ni. Kan rama lui lian ber pahnih Tlawng leh Chhimtuipui catchment area zawng

zawng kha a khawm dawn a, darkar khat ruah sur ringawt pawh hi megawatt eng emaw zat a ni thei dawn a. Indian territory-ah, Cachar area-ah tui lut miah lovin Bangladesh lamah hian kan divert daih thei dawn a ni. Khatiang a nih kha chuan, KMMTTP-ah khan an lut ang a, navigation Sitwe leh Paletwe lamah khanin tui tam zawk kan chhuah theih chuan, navigation a promote ang a.

Tin, a that lehna tur chu - Aizawl thlengin train a lo lut ang a, transhipment a awm ang a; lawngin a kal ang a, khata tang khan by-road in a kal leh ang a, chuta tang chuan inland-water transport-ah; chu chuan nasa takin employment a generate dawn a ni. Heng hi 'zirchian chi a ni ang em' tih hi mithiam zawkte'n lo ngaihtuah sela a tha in ka ring a. Heng zawng zawng hi a hlawhtling theih a nih chuan, mega-project tak tak a tling thei dawn a ni, tih kha thahnemngaihna kawngah ka'n sawi a. Amaherawhchu, environment leh social problem emaw, issue tam tak a awm dawn a ni tih chu sawilawk sa ni se.

Tichuan, kan Hon'ble member zahawm tak takte - Pu F. Rodingliana leh Hon'ble CM Pu Lalduhoma te Demand hi ka pawmpuiin, ka thlawp e. Pu Dy. Speaker, ka lawm e.

**DEPUTY SPEAKER:** Tunah Serlui bialtu Pu Lalrinsanga Ralte ilo sawm ang.

**PU LALRINSANGA RALTE:** Pu Dy. Speaker, ka lawm e. I thut huna sawi tumin ka nghak ve ngar ngar a, kan session tawp ni a lo ni ta a. Vawiini thlenga hlimtlang tak maia session kan han nei thei te hi a lawmawm hle a ni, tih kha a hmasain kan sawi duh a ni.

Kan Minister zahawmtak Pu F. Rodingliana leh kan House Leader leh kan CM zahawm takte Demand kan han sawiho leh thei dawn a ni a. A hmasa bera ka'n sawi duh chu Legislative Assembly hi a ni a.

**Demand No. 1 - Legislative Assembly:**

Pu Dy. Speaker, nang leh Speaker kaihhrainain 19<sup>th</sup> February, 2025 atang khan session kan han nei a; in kaihhraina a lawmawmin a nuam kan ti tlang hlein ka hria a. Session Hall chhungah han inhnial fiamna leh boruak tlema an han san deuh pawhin a zaizap thiam tak maiin ro in han rel thin a, a lawmawm takzet a ni. Tin, nang leh Speaker-in thahnem in ngaihtlanna ah Assembly House chhung a ni emaw, a pawn a ni emaw kan MLA-te an zahawmna te vawnhim leh ngaihpaawimawh chhohna te a nasa a, a lawmawm tak zetin ka hria.

Tin, kan MLA Hostel thumthatna turah in thahnemngaihna te a lawmawm tak zetin ka hria a. Tin, kan Legislative Assembly-a kan Secretary atanga a te ber thlengin an hahin an thawkrim takzet a. Zankhaw tairek thleng thleng leh tlaivar dawn dawna an thawh pawh hi a awm ka ring a. Heti tak maia tlin taka kan session chhung zawngin hna an han thawk te hi a lawmawm ka ti a, Assembly Secretariat te in inpeknaah hian lawmthu ka'n sawi duh a ni.

**Demand No. 15 - GAD:**

Kar hmasa lawk khan, kan hriat theuh angin kan CM zahawmtak sawmna kan dawng a, Pu Amit Shah lokal in AR ram inhlanna an han nei thei te kha a lawmawm tak zetin ka hria a. Kan sorkar ka fakna em em mai chu, khati khawpa MNF-in hma a lo lak tawhnaah 'MNF-in hmingthatna an la ang' tih ngaihtuahnaah pawh awm miah lova hemi chungchanga hma in han la leh in han bawhzui chho hi a lawmawm hi ka ti a.

Pu Dy. Speaker, Pu Laldenga sorkar lai, 1987 vel lai khan Assam Rifles insawnchhuahna tur hi tihfel chhoh a ni a. Tichuan, 1988 khan land lease hlan fel an ni a, theitawp chhuahin hma an han la chho a. Tichuan, sorkar te an han inthlak a, MNF an tlak leh hnua an rawn sorkar nawn leh khan an rawn bawhzui leh chat mai a. Chutah chuan Assam Rifles ramah ‘mimalin ram an lo nei a ni’ tih hriatchhuah a ni a; chu chu 2002 session-ah khan, ‘mimal ram neih phal a nilo’ tih Dan kha passed an ni leh ta a. Chutiang chuan hma an han la chho leh ta char char mai a.

Kum 2008 khan AR ho kha Zokhawsang rama an insawn theih nan a tul ang ang building etc. te sak tan a ni chho ta a ni. Kum 2018-ah MNF an rawn sorkar khan an beih chhunzawm leh ta a. Union Ministry of Home Affairs atangin 2009 May thla zawh hmaa insawn phei turin order kan han hmu leh ta a. Khatia mipui leh sorkar te pawh kan lawm viau tawh laiin, Pu Laldenga’n ‘Vai thusawi sawi chhawn chu dawt sawi a awl tawh’ a tih ang deuh kha a ni ang chu, anni lamin chhuanlam an han siam a, eng emaw neuh neuh kha an han sawinawi a; chutiang karah chuan MNF sorkar khan nasa takin an nawr chhunzawm a.

1<sup>st</sup> April, 2023-ah Pu Amit Shah-a Mizoram lo kal leh khan AR ram Zokhawsang-a an insawna tur kha min rawn hawnsak ta a ni. Tuna ZPM sorkarin sorkarna a rawn thlak leh hnu hian, nichina ka sawi tak ang khan kan CM zahawm takin ‘AR hi chu MNF kuthnu a ni; engkim an ti a ni; keini tan heng hi chu buaipui zui vak pawh a tullo; politic-ah hlawpuina engmah kan tel dawn chuang lo’ tih lam engmah awm lova hma a rawn la chhunzawm hi a lawmawm ka ti a ni.

**Demand No. 14 - Planning & Programme Implementation:**

Helaiah hian Pu Dy. Speaker, UQ ka nei a, 5<sup>th</sup> March khan chhan ka ni a. ‘Kan minister tinte’n an ministry enkawlna turah road map an nei em?’ tih ka zawt a, ‘Aw, nei e’ tiin min chhang a. ‘Road map an neih chuan, a copy min pe thei em?’ ka ti a, ‘confidential a ni a, pek theih a nilo’ tiin min chhang a ni. Pu Dy. Speaker, he House zahawmtak kaltlang hian he House member ka nihna angin zawhna ka pe a, ‘confidential’ tiin min chhang lawi a. Amaherawhchu, mimal pakhatin RTI-in a zawt a, hemi chhanna hi pek a ni leh si a; hei hi a fel lovin ka hria a. He House zahawmna hi a tibawrhbangin ka hria a ni. Tin he road map-a hi (ka hriat dan hi a dik em ka hre lova) tunah hian an buaipui mek chauh niin ka hria a. Road map RTI chhanna an lo pek tawh copy kha kan la dahtha a. Hmanniah social media ah ka lo hmu a, Vanglaini chanchinbu ah te ka zawhna a rawn chhuak a, ka zawhna chhuak Vanglaini ah te khan an rawn ziak a. Tin, social media ah kan hmu zui a, MLA kha chhan ka ni ve ta lo a, ‘confidential’ tia pek loh ka ni a. Mimal RTI zawhna ah a chhanna pek an ni ta si kha, a diklo hlein ka hria a ni.

**Demand No. 9 - Finance Department:**

He sorkar hi mikpui sorkar kan ni a, mipui, kut-hnawthawktute tana ding tlat kan ni a. ‘Kan sorkar ve hunah chuan mipui kut-hnawthawktute tan budget ah a hranin pawisa kan dah ang’ tih a ni a. ‘D-A-H’ kan ti a, kan sawi lar hle mai a, kut-hnawthawktute hmangaihtu kan ni kan inti thin a. Nikum Budget Session ah khan ‘ni thum chungin D-A-H kan ti thei e’ tiin, crore 10 kan dah a, a lawmawm khawp mai. Amaherawhchu, tun Budget ah hian Pu Dy. Speaker, kut-hnawthawktute pualin a hrana sum dah kan lo beisei laiin, wawiinniah hian a awm lova. Hand-holding atanga crore 350 hi inhman tawm vek tur anga dah a rawn ni hi a tha tho va. Amaherawhchu, ZPM kan lo beisei sang nge, kan lo insawi dan thin anga

kut-hnathawktute pual liau liaua a dah kha kan beisei kan lo hmu ta lo erawh hi chu rilru a damlo deuhin kan hria a ni.

Tin, Pu Dy. Speaker, nikum Session kan han neih khan MNF sorkar tlak dawn a SASCI hna kan thawha first installment kan han hmu a, second installment kha kan hmu thei ta lo a, Session ah pawh kan zawt a. Amaherawhchu, ‘hnathawh zoh loh te a ni a, keini sorkar chuan UC a dik lovin kan inpe ve lo ang’ tiin kan sawi a nih kha, Pu Dy. Speaker, quote a la awm vek ang a. Amaherawhchu, tun hnaiah sawi a rawn awm leh ta a, SASCI atanga kan sum hmuh estimate pawh a la awm lova, a thawktu tur department ah pawh pawisa la pelo, hnathawh pakhatmah a la awm silo UC pek hi a awm nia sawi a awm hi a fuh lo hlein ka hria a. Entirnan: Central Jail Committee-in kan han tlawh a. Central Jail sakna tur SASCI sum tam tak a awm tih pawh kan hria a. Mahse, hnathawh pakhatmah a la awm lo, tender pawh la nilo ah hian dan dik lovin UC kan lo inpe reng em tih hi wawiinniah ka zawt duh a. Khawngaihtakin kan House Leader hian Session hmasa ah khan, ‘keini chuan UC dik lo kan pe ve lovang’ a tiha kha, tunah hian a la ni reng em? Engmah thawh awmlo, hna la tender lovah UC inpek a awm reng em, tih hi ka zawhna a ni

**Demand No. 39 - Power & Electricity Department:**

Kan Minister a khawngaihthlak khawp mai a, tun ni hnih-khat chung hi a taksa lam bawrhsawmna avangin tlemin an chak lo deuh a, Pathian zarah a dam that leh thuai ka duhsak a ni. Tin, a department enkawl hi a hneh viauin ka hria a. A phur a, amah pawh a tui niin ka hria a. Chumi karah chuan P&E Department hi duhsak an ngai khawpin ka hria a, an tello hian Mizoram mipui kan khawsa hlei thei tawh lo a ni. Tunah hian staff indaihlohna avangin linesman pakhatin khaw hnih-thum te an enkawl a ngai a. Chutiang reng reng chuan harsatna hrang hrang hi an tawk ve a ni. Chuvang chuan, kan Finance Department lam pawh hian Power department lampang hi duhsak dan thiam ila a thain kan ring a.

Tin, Serlui B chungchang pawh ka sawifo thin a, wawiinniah tawite han sawi leh ka duh chu - kan Minister-in ngaihdan leh ruahmanna a lo neihte, thahnemngai taka, ‘engtin nge kan hman tangkai zawk ang; khutia awm tawp lovin a hlawk zawkin engtin nge kan hman theih ang tih ngaihtuahna a seng a, lawmawm ka ti a. Serlui B hian Mizoram tana hlawkna a rawn neih leh theihna tura ruahmanna siam hi a tul hlein kan hria a ni.

**Demand No. 18 - Printing & Stationery Department:**

He department hi te tak anga lang, mahse pawimawh em em, sorkar revenue lakluh theihna tur pawimawh tak department a niin ka hria a. Mizoram sorkara Printing & Stationery kan neih hi department zawng zawng hian kan dawr tha em tih hi wawiinniah ka zawhna a ni a. Tunah phei chuan I&PR nen chhunfin a rawn ni chho dawn a. Hemi kal chho zel turah pawh Printing & Stationery, department te tak hi department lian taka siam chhoha kan enkawl a ngai hle a ni.

Pu Dy. Speaker, wawiinniah kan sawiho kan Minister Pu F. Rodinglana leh kan Chief Minister Pu Lalduhoma te Demand hi tha ka ti a, ka thlawp thu ka rawn sawi a ni e. Ka lawm e.

**DEPUTY SPEAKER:** Pi Prova Chakma, West Tuipui Bialtu MLA ilo sawm ang.

**PI PROVA CHAKMA:** Pu Dy. Speaker, ka lawm e. Wawiin chu Mizo inthuanin ka inthuan a; a hming ka hre lo a, mi min present a ni. Wawiinniah hian Pu F. Rodinglana

leh kan CM zahawm tak Pu Lalduhoma te Demand sawihona kan nei a. Demand a ka ngaih pawimawh chauh ka sawi hman ang a.

**Demand No. 39 - Power & Electricity Department:**

CM Budget Speech ah ang khan transformer hlui thlakna tur kha crore 10 dah a ni a. Kan bialah hian transformer hlui repair ngai reng kan nei a. Hei hi repair reng ngai ai chuan a thar thlak lei theih ni se a tha ngawt ang a. Amaherawchu kan MLA zahawm tak takte rawn sawiah khan ‘transformer a tha tawh e’ an tih hnuah khan phur man kha tum a ngai lehzel thin a, a hautak khawp mai a. Chuvang chuan, a thar hlakin min han thlak sak thei sela kan ti khawp mai a.

Tin, nikum April 12, 2024 khan Masuri-a transformer chhia an rawn report a, a chhia pawh chu an submit tawh nghe nghe a. Hei, kum khat a ni dawn a, tun thleng hian transformer an repair pawh chu dawn let a la awmlo a, kha kha engnge a dinhmun hriat a chakawm khawp mai. Tin, ka biala Puankhai te, Devasora te, New Khojoysury te chawmtu transformer pawh repair reng ngai a ni a, tek vawi khat a tlak hian a chhe leh nghal mai thin a. Chuvang chuan, Power & Electricity Minister zahawm takina min han chhinchhiah sak sela, a thar min pe turin ka’n ngen bawk a ni.

Tin, Session ka din apianga ka sawi thin chu, ka bial chhunga unelectrified village te chungchang hi a ni a. Henga eng an neih theihlohna chhan ber chu, unauthorized village annih vang kha a ni a. Sorkar hmasaah te pawh khan lo pek an ni lo a. Mahse, tunah chuan authorized an ni tawh avangin hma min laksak theih dan a awm em? Helai Session Hall ah ngei pawh hian current awmloh hleka kan AC a function loh te pawh hian kan buai em em a. Ka bialah erawh chuan current tel lovin kumtluanin tiang khan an awm thin a. School naupang lehkha zir an buai a; mobile charge turin khawdangah te kal alo ngai a, an khawngaihthlak thin khawp mai a. Chuvangin, unelectrified village chunchangah hian hma min laksak turin ka ngen duh bawk a ni.

Tin, line extension tur Samuksury pawh hi vawi tam kan minister hnenah pawh lehkhain ka thlen tawh a, chhungkaw 35 niin ka hria a. Khang te kha tih theih dan a awm em? Tin, keimahni bial chauh nilo hmun dang pawh anih ka ring a, electric ban tuiek a tam a, chungte chu thlak theih dan a awm chuan a hma lamin tih ni se.

**Demand No. 9 - Finance Department:**

February Ni 19 atang khan kan demand te kan han sawi ve char char a, mahni constituency problem te kan thlen a. Khangte kha kan Chief Minister zahawmtakin, a lu ber a nihna angin Finance lamah hian khang zawng zawng kha min lo chhianchhiahsak tawhin ka ring a, khang kan demand-te kha a tahtawlin min han tihhlawhtlinsak thei se a lawmawm ngawt ang.

**Demand No. 1 - Legislative Assembly:**

Tunah hian Legislator Home-ah kan awm a. Room pahnih – Bachelor’s room pakhat leh family suite pakhat hi ka chang a. Keini bial hi chu mikhual ngah chi kan ni a, a bik takin keimah leh kan MLA zahawm tak Pu Nguna te hian mikhual kan ngah bik hle thin a. Khangho han riahtirna tur room kan neilo hi a buaithlak khawp mai a. Tuna Dining Room awl awm a, khangah khan room te min han siamsak se ka duh hle mai a.

Tuna kan luah lai mek hi dining room-cum-sitting room a ni mai a, ka bial mite an lo kal hian mi an khawngaihthlak ve hle thin a. Office tur, ka PA room tur emaw tal min siamsak theih chuan a lawmawm ngawt ang.

Nimin lama kan sawiho PWD leh Rural Development lamah te khan sawi tur tam tak ka nei a. Amaherawhchu, kan Finance Minister kutah awm vek a ni a. PWD Minister pawh khan ka bial a tlawh tur thu te a sawi a, a ziakin detail deuhin ka larawn pe ang a., kan CM zahawmtakin min pawmpuia hma min laksak theih chuan a lawmawm ngawt ang. Tichuan, vawiina Pu F. Rodinglana, Minister zahawm tak leh kan Chief Minister zahawmtak Demand zawngte tangkai taka hman anih theihnan duhsakna ka hlan a, pass ka remti bawka ni. Ka lawm e.

**DEPUTY SPEAKER:** A remchan lain sawi lawk ila. Pi Prova, room inluah theih kha pahnih nge pathum? (**Pi Prova Chakma:** Pahnih, Pu Dy. Speaker) Ni e. room khi a zau lutuk lova, room han inpek tam deuh te pawh kha kan la ngaihtuah turah ngai ila. Tunah Lunglei North bialtu MLA zahawm tak Pu V. Malsawmtluanga ilo sawm ang.

**PU V. MALSAWMTLUANGA:** Pu Dy. Speaker, ka lawm e. Kan Chief Minister zahawm tak Pu Lalduhoma leh kan Minister Pu F. Lalrodinglana te Demand sawi theia ka awm hi ka lawm a, hun min pek avangin lawmthu ka sawi hmasa a ni.

**Demand No. 18 - Printing & Stationery Department:**

Kan hriat angin hei hi department langsar lo tak, amaherawhchu Sorkarah chuan, a kila lung pawimawh tak a niin ka hria a. Hei, kan Minister-in theihtawp a chhuah a, Sorkar hmasa hun kal tawh te kan thlir phei chuan, a kumkhatnaah ruahmanna hrang hrang a chhawpchuak thei te hi a lawmawm hlein ka hria a.

Hei, tun 2024 - 25 ah hian zirilaibu nuai 637185 lai chhut a ni te, kumina zirilaibu chhut thar tur nuai 1060540 lai mai ruahmanna a awm chho te hi, 'Printing & Stationery Department hi an awm mai mai lova, hna an thawk a ni' tih a tilang chiang hlein ka hria. Hmalakna hrang hrangah Minister chungah lawmthu ka han sawi a ni.

Tin, Lunglei lama ka member-puite khan an sawilang thuak tawh a. Lunglei lamah sawn he depts. hian office lian tak mai, mahse a building te a far nasa a, a tlabal tawh hle mai a, thuam that a ngai hle a. A theih ang anga hma min laksak turin ka ngen a. Tun dinhmunah hian staff 20 vel awm ang a ni a, Establishment lamah 10, Printing lamah 10; 10 ve ve-in an inthen a; staff lam te pawh tichak kan ngai hle a ni.

Tin, kan off-set neih saw kum 10 chuang a lo ni ve ta a. Mizoram Sorkarin off-Set pathum a sem khan Aizawl-ah pahnih, Lunglei ah pakhat kha a ni a, chu chu kan la hmang ngar ngar a, a la kal ve hram hram a. Aizawl lama awm pahnihte hi chu hman a ni tawh lovin ka hria a. Tin, Aizawl lama khawl an hman tawh kha photo-copier Lunglei lamah kan la phei kha a ni a, hei hi tunah chuan a hman theih ta lova. A hma chuan depts. dang ten an dawr ve thin a, sum te thawkchhuak ve thin kha a ni a, Hei hi kan Minsiter khan min lo hriatsak se ka duh bawka ni.

**Demand No. 39 - Power & Electricity Department:**

Kan Minister leh Chief Minister an fakawm hlein ka hria a; a hun taka electric bill sorkarin an han pe thei te hi a ropui hlein ka hria a. Tin, Tlawng khuah tumna kalpui mek a ni te, solar power hmanga tam thei ang ber solar power siam chhuah tum a ni te hi, an chungah lawmthu he House zahawmtakah hian ka sawi a ni.

Tin, kan hriat angin Zau siamtute hian electric supply hi an mamawh em em mai a, Tlawng Zau hi Lunglei chawmtu berte zinga mi a ni a, ka bial chhunga awm a ni nghe nghe a. Tunah hian electric pawhluh ruahmanna min pawmpuina ah kan Minister chungah lawmthu ka sawi baw a Chutih rual chuan, zau hrang hrang la pawhluh ngai Nghasih-zau te, Melte-zau te pawh min lo hriat sak baw se ka duh baw a.

Tin, lawmthu Minister hnenah ka han sawi leh duh chu, ka bial chhunga khaw pathum chamwtu transformer hi thawkkhat lai khan a chhia a, a rang thei ang berin minrawn siamsak a; a then phe chu a thar minrawn pe nghe nghe kha a ni a, Pukpui, Serkawn leh Zote South te; amha leh department chungah lawmthu kan duh baw a. Chutihrual chuan, bial dang ang thoin ka bialah pawh MR linesman indaihlohna a nasa em em mai a, heng te pawh hi min lo hriat sak ve turin ka chah baw a ni.

**Demand No. 40 - Commerce & Industries Department:**

Kan loneitute eizawna ber chu, tlangram lo neih hi a ni a, shifting cultivation. Industry lamah hian ke tun aia nasa zawk hian pen ila. Tin, thangthar, a ngaihna hriate pawhin hetiang hawi zawng hian ke pen zel ta ila. Chu chuan tuna 'shifting cultivation' kan tih hi zawi zawiin a ti ziaawm theiin a rinawm a ni.

Tin, ka bial chhungah hian handloom lama hma la tam tak an awm a, Mualthuam North leh Kangmun South ringawt ah pawh hian khawl leh hmanraw hrang hrang 80 lai mai puantah te tan min han pe a; hengah te hian Minister chungah pawh lawmthu ka sawi baw a. Tin, NHDP hnuai cluster tunah department-in a kalpui mek a, kan Minister chungah lawmthu ka sawi baw a. Chutih rual chuan, department leh minister te pawhin tuna aia hmasawn zawka kan kal theihna turin min lo ngaihven reng thei se.

Tin, IIDC Industry hmun ka biala Bukpui-ah a awm a, hemi kaltlang hian NIELIT Institution industry hmunah saw-mills te a awm a, truck lian tak tak a lut thin a. Mahse, kawng intawm a ni tlat mai a, kawng siam that ngai tak mai a ni a. Tuna kan han chhut danah chuan, ₹33,86,000/- lakhs chuan thuam that theih niin a lang a. Heng te pawh hi kan Minister zawhawm takin min lo hriatsak ta se ka duh baw a ni.

**Demand No. 4 - Law & Judicial Department:**

Lunglei district hian hun rei tak atangin Court hmun tur ram te a lo en tawh a. Chutih rual chuan, beisei angin a rah hmuh tur a awmlo a ni, kan Sorkar tuk atangin. Kan Chief Minister hian min veipui em em a, theihtawp min chhuah sak a, tunah hian ram te tihfel ni tawhin, hmalak chhoh mek a ni dawn a. A hmun leh building tha tak kan han nei tur hi Lunglei mipuite aiawhin a chungah lawmthu ka sawi baw a. Tin, a Aizawl pawn lamah Cabinet meeting a vawikhatna atan Lunglei-ah minrawn nghahsak a, Lunglei mipuite kan lawm a. A takin min ngaihven a ni tih a chiang a. Kan ngai hluin kan lawm hle a ni.

**Planning & Programme Implementation:**

Hei, Planning hnuaiiah HPC (High Powered Committee) kan awm a, heng te pawh min ngaihven em em a, kan Chief Minister hian. Committee-in a kan thlen ang angte theihtawp min lo chhuahpui thin avangin a committee aiawh pawhin lawmthu ka sawi ve leh duh a. Tin, HPC kaltlang hian link road ringawt pawh, a kumkhatnaah hmun 18 chuangah kan lai bawk a. Chu chang a ni lova; chhim lama kan mamawh em em mai, transformer chhe siamna kan nei lova chhim lamah hian, chungah chuan Electric Department nen tangkawpin tunah hian hmalak chhoh mek a ni a, kan Chief Minister chungah lawmthu ka'n a. Kan hriat angin HPC area ah hian Village Council 88 leh Local Council 22 lai a awm a ni tih te kha ka'n sawilang bawk a ni.

Tin, Pu Dy. Speaker, Planning hnuaiiah hian CM - Inventor Challenge, Zopa-kut themthiamna hmanga thil siamchhuahna kan Chief Minister-in a ruahman hi a hlu hle mai a. Hetiang ngaihtuahna chang hria, a ngaihna hria CM kan nei hi a thlamuanthlak hle a ni. MLA-te heng Hand-holding scheme hnuaiiah hmalaknaah hian inelturte khan min ti a; keini bial lam pawh hemi challenge ah hian kan tang em em mai a. Ka bialah hian District pathum - Lunglei District, Hnahthial Distric leh Serchhip te a awm a, Lunglei district-a ka bial chhung atangin pakhatna leh pahnihna tunah hian kan hauh ve ve a. Tin, Hnahthial District-a ka bial chhung atang tho in pakhatna kan hauh bawk a ni. Engpawh ni se, Aizawl lama la inel leh turte an ni a.

Tin, Zo-hnahthlak unaute nena kan inpumkhatna kawngah theihtawp a chhuahna hi a ropui ka ti a. Kan hriat angin, Tuivai Bridge te pawh hawngin theihtawp an chhuah anih kha. Chu mai piah lamah chuan, kan Autonomous District Council-te a enhrang lo hle mai a, direct funding an neih theihna turin positive statement a siam hi a ropui hlein ka hria; Autonomous District kan unaute tan chuan thil hlu tak a ni.

**Demand No. 9 - Finance Department:**

Tin, kumin finance-a hi a speech atangin kan hria ang a; mipuite'n a kan hriatthiam theih turin langtlang takin leh kan sum leh pai dinhmun dik takin a rawn pharh hi a ropuiin, a hlu hle a. Kan Chief Minister hian dik takin ro a rel zel dawn a, theihtawp a chhuah dawn a ni tih a langchiang hlein ka hria. Hengte avang hian kan ramah Pathian ram a lo thlen ngei ka beisei bawk a ni.

Heng kan Minister zahawm tak tak Pu Lalduhoma, kan Chief Minister leh Pu F. Rodingliana, kan Minister te Demand hi pawmpui ngei ni se. Ka lawm e.

**DEPUTY SPEAKER:** Mamit Bialtu zahawm tak Pu H. Lalzirliana lo sawm ang.

**PU H. LALZIRLIANA:** Pu Dy. Speaker ka lawm e.

Vawin hi a tawp ni te a lo ni ta reng mai a, lunglen thlak dawn hlein kan hria a, kan Minister zahawm tak takte pahnih - Pu Marova leh kan CM, Finance Minister chanpualte kan han sawiho a ni a. A pakhatnaah chuan: -

**Demand No. 39 - Power & Electricity Department:**

Kan Minister zahawm tak hi thahnem a ngai hle a, power-a kan intodelh theihna turin a hun chhung tawiteah pawh hian hma a la nasa a, a fakawm ka ti. Power generation

chungchangah hydel project te, solar park te leh, hei sawi loh theih loh Aizawl khawpui chhung hian ka rilru hi a lo tihah ve em em thin a. Zinga han kal hian kan electric ban hnawk lutuk mai, a thlun theih theih kan thlung khawm emaw tih mai tur kha tunah chuan eng emaw chen fai deuh duak han hmuh te hi a nuam a, hmasawna ropui tak niin ka hria a. Tin, Street light te pawh zan lamah chuan a eng uar deuh tawh niin ka hria a, a lawmawm ka ti hle a ni.

Chuan ani pawhin a hriat sa, 132 kV line Bairabi - West Phaileng via Mamit hi kan buaipuina a rei tawh a, nasa takin ka lo aupui tawh thin a, ka aupui zel dawn bawk a. Harsatna neuh neuh kan tawk a, Covid leh thil hrang hrang avangtein hna duh angin a chak tawk thei lova, Covid hnua kan han beih chhoh viau hnua kan beisei piah lamin 'forest clearance atan chuti zah chu a ngai' an ti a, kan huphurh khawp a, crore ₹2 leh tih an rawn demand a, engtin tin emaw Sorkar hmasaah khan kan han clear chho ta a. Tichuan, kan clear zo ta emaw kan ti hnua, a Forest lam bawkin eng eng emaw, MPV leh demarcation te an ti a ₹189 lakhs an demand leh a ni. Chu chu kan harsatna chu a ni ta a; a tower te phei chu phun zawh vek tawh a ni a, a khawi emaw lai, a ban 4-5 inkar chu stringing a ngai tawhlo tluk a ni. Amaherawhchu, hemi kan clear hma hi chu sub-station a charge thei lova, a hman theih loh a ni. Hei hi tlumtea thlira kan thlir, khulai tlangdung chuan kan thanmawhbawk ni te pawha kan ngaih a ni.

Hei, fur kan thleng leh dawn a, kan huphurh em em a ni. Phaileng atangain 33 kV Dampui ngawah tunah hian a grid hlui, a ban pawh derthawng tak nena tun fur han face leh chu kan huphurh tawh a ni, dik tak chuan. Kan hnathawkte pawh an rim em em a, a bik takin P&E Division hnuaia staff-te an rim em em a, kan huphurh tlang a ni. Chuvangin hei hi minlo hriat sak sela. Chutih lai karah chuan, kan P&E Division hnuaia thawktu zawng zawngte vawiinah hian he House kaltlang hian an hnenah lawmthu kan sawi duh a. An hnathawh te fak tlak niin ka hria a, kan fak a ni. Chutih rual chuan, PHE lam te kan current hmuh that loh avangin kan pipeline hlui tawh bawk nen kan han siamthat lai leh, han pump thuai thuai kan chak thin laiin current awmlo a lo ni a; kan line chhiat avang te leh thil hrang hrang avangin anni pawhin harsatna tam tak an tawk a. Khulai khawpuiah chuan mipui hne ber department an lo ni bawk si a, insawifiah reng te a lo ngai a, an theihtawp an chhuah a ni. Nimina demand a kan sawi ang khan, AMRUT through a kan pawisa hmuhloh te kha min pe thei sela. Tunah hian department chuan tun fur thlen hmaa tihfel an duh avangin a pukin an bei nasa em em a ni. A bik takin P&E leh PHE, Mamit Division a thawktu zawng zawngte he House zahawm tak kaltlang hian an chungah lawmthu ka sawi a ni, Pu Dy. Speaker.

Tichuan, Rawpuichhip 33 kV line, Sihmui atanga West Phaileng kal hi an lo tapped a; hei hi 132 kV line direct-a a kal dawn chuan harsatna an tawk dawn avangin, West Phaileng lam atangin a let zawnga pek a ngai dawn a ni. An huphurh khawp mai a. Heng hi min lo hriatsak sela, department lam pawhin. Hei hi kan ngaipawimawh hle a ni.

Tin, Hmunpui khua 11 kV line hi Rawpuichhip atangin kawng hlui ah; thallai chuan hei hi a kal tlang theih naw naw a, furah erawh chuan an kal ngai lo. Ngaw thing leh mau a tam a, a line clear reng ngai a ni a, a grid lo hlui tawh bawk nen. Hetah hian choice pahnih kan nei a, pakhat chu - a kawng siamthat, a pahnihna chu – A line thlak. Lengpui atanga a kawng zawka kan thlak dawn chuan sum tam tak a ngai dawn a. A kawng hi Agri linkroad

emaw atanga kan thuan tha leh a nih chuan, kan power chawk luhna line a rintlak leh dawn a ni. Hei hi kan minister-in minlo hriatsak se ka duh a.

**Demand No. 15 - GAD:**

Lengpui Airport (hmannia kan Resolution kha) tuna kan kawng zawh tur chiah taka hi min hrilh theih chuan ka lawm hle ang a. Decision te siam a ni tawh a, engnge hma kan hmalakna tura kan tum chatna lai kha min hrilhfiah theih chuan a lawmawm hle ang a. Sorkar hmasaah khan Mamit ah circuit house kan sa ve a. Mamit hi khawpui ni ve angreng si, khawpui vaklo kan ni a; private hotel pawh kan nei lova. Tourist lodge lian vak lo kan nei ve a, chu ringawt chu kan mikhual dawnsawna a ni a. Chu pawh chu hmun dang anga capacity sang lo leh changkang vak lo a lo ni a. He kan circuit house approach road hi siamfel a ni tawh em? A building sak hrim hrim leh a fencing te chu zawh fel tawh a ni a, hawn theih mai ni tawh te pawhin kan hria a. Hei hi khawngaih takin GAD changtu kan Chief Minister hian min lo hriatsak se; hei hi a rang lama min hawnsak kan duh a. Tin, Guwahati Mizoram House hmunhma thar kan neih kha, eng hmalakna nge awm tawh; engtikah nge kan sak theih ang tih te kha ka'n hre duh a.

**Demand No.12 - Planning & Programme Implementation:**

Tichuan, kan Hand-holding policy hi, a khawnpuiah hian sum hi a tam khawp mai a, a punna ringawt pawh BE to BE ah hian 16.55% a a ni a. Tin, Planning & Programme Implementation ah pheih chuan a pung hle a, a punna ringawt BE to BE ah hian 293% a ni. Hnathawh kan tum hle ni ah ka'n ngai a, a lawmawmah ngai ta ila. Chutiang chuan, hei, kan Hand-holding policy ah hian crore 350 dah a ni a. Kan sawi ang khan heng hi kawng hrang hranga hman tur, 'CM-Support' kan ti nge, khata semna tur te, loan la hote han tanpuina tur te, thlaithar leina tur te pawh han ni zel turah kan ngai a. Hei D-A-H hi kan thian ten sawi ang khan, a hmasaa D-A-H kan han tih ang taka kuthnathawktute ta tur kha a lang lo riau mai a. Hei hi han tihbelha, a hranpa taka han dah theih dan te kha a awm em? Chu chu ZPM sorkara mipuite kan inngahna, 'E! anni nge nge; an rawn sorkar dawn a' tia an lo thlir ber, tunhma atangin kan CM ber pawhin a lo aupui tawh a ni a. D-A-H, keimahni kuthnathawktute tan ngeia dah hran bika kha Zoram mipui, thingtlang kuthnathawk ten vawiina an thlir a ni. Hemi D-A-H lai tak a awm ta lo hi a hrilhhaithlak deuh a ni.

A tawp bera ka'n sawi duh chu - he ram rorelnaah hian, Let the truth prevails; Dikna hian rorel sela. Tawngkam thiam avang te emaw, 'engpawh sawi ila mipuite hian engah tak tak hian an ngai chuanglo' tih vang emaw, kan Zoram mipuite hi kan bum theih te an tam zawk annih avanga thudik thuantling tawklo hmang hian he ram rorelna hi kalpui lo ila ka duh hle a, chu chu kan Pathian thu pawhin min kawhnmuh a ni a. "Rorelna dik chu lui angin luang se la, felna chu luipui kang ngailo angin luang rawh se" tih te, 'hemi te ho hian an ka-in mi chawimawi a, an thilung erawh chuan mi hlat si a' tih te hi a thlen dikloh nan; heng kan UC chungchangah te. SASCI part I kan hman hman tak loh lapse kan han tih fo te kha uiawm kan ti khawp mai a. Keini bialah chuan sem rual a ngai a, pakhata han hlawm hlawk theih kha a nilo a. Tunah hian standing MLA nih ve si chuan khawi emaw pakhatan khan kan SASCI hmuh kha hmang ta hlawk ila, kan hman ve lohna khuate khan min dem rawn luai luai mai dawn a ni. Vawinah hian opposition MLA kan lo ni hlauh te hi kan vanneihna niin ka hria a.

Hei kan CM-in min duhsak a. Tin kan bial hi tunah hian mi pathumin kan vil mek a, kei a bialtu MLA ka ni a. Pu TBC-a hi ruling lam atanga rawn bialtu a ni a. ZPM lama candidate tling ve ta chiah lo Pu Zorempuia khan phur tak hian a vilpui ve bawk a. Tihian, kan thum rawn a, sorkar pawh hian min ngaihtuah a. Tunah pawh hian duhsakna te pawh kan dawng a, kan lawm em em a ni.

Engpawh ni sela, vawiina kan demand sawi hi keipawhin ka thlawp a, Zoram hma a sawn nan leh mipuite pawhin hamthatna an lo hmuh ngei theih nan pass turin ka rawn thlawp a ni e. Ka lawm e.

**DEPUTY SPEAKER:** Session a rei tawh bawk a, kan chau tlang deuh tawh nge kan phurlo deuh riau hian ka hria a. Kan Opposition Leader kan koh tawh mai dawn nge? Aw le. Tuirial Bialtu MLA zahawm tak Pu K. Laldawngliana ilo sawm ang.

**PU K. LALDAWNGLIANA:** Pu Dy. Speaker, vawiinah kan Chief Minister zahawm tak Pu Lalduhoma leh kan Minister zahawm tak Pu F. Rodingliana te demand sawina hun tha tak mai kan nei hi a lawmawm ka ti hle a ni. Kan Session Budget, Session ni hnuhnung ber a lo ni ta reng mai a; Pathian min kaihhrainaah lawmthu ka sawi a. Kan Speaker te, kan Dy. Speaker te leh kan Staff ten zei taka min kaihhraina ah lawmthu ka'n sawi tel nghal bawk a ni.

**Demand No. 9 - Finance Department:**

Kan ram sum leh pai inenkawl dan tur tun budget hi a ni bawk a. Kum 2025-2026 Mizoram Budget kan passed tak kha ₹15,198.76 crore a ni a, nikum aia a tamna hi crore 786.64 a ni. Kan Budget pumpui a tanga han chhut hian Revenue Expenditure tur hi 82.05% a ni a; a tam khawp mai a, kan inenkawlna senso tur hi. Hmasawna hnathawhna tur Capital Expenditure hi 17.49% a ni a, leiba tlingkhawm hi 2025-26 BE ah hian crore ₹13,999/- a ni a. GSDP ah 38.98%. Chutih rual chuan, Supplementary Demand for Grant 2024-25 hi a tam ber tum a ni a, crore ₹3,512.33 lai a ni. Inremchem deuh chu kan ngai. Intodelh lam chu a la hla riau mai a, khairual deuha finance minister pawhin a enkawl zui a tul hlein ka hria.

CM chanpual bik pheih chu a tam fal khawp mai; a tul a ni ang. 'Kan puk ve dawn lo' tih chi ringawt kha a lo ni lo deuh a. Hei December, 2023 – January, 2025 kha ka'n chhut a, Central lam a tanga puk theihna atanga an puk zawng zawng ringawt pawh hi crore ₹2410.26 a ni. Hei hi mipui min dahkhamna a ni ve mai em tih kha ka rilru ah a awm deuhlek a ni. Pu Dy. Speaker hei rampum kan inenkawlna leh kan rilru sukthlek kha ka'n ngaihtuah vang vang a; diktak chuan, 'Wine leh Beer hi 'Zu' a nilo; kan regulate dawn' kan han ti nghal ringawt mai te kha, ka rilru hi a la dam theilo a; House Leader berin a sawi kha a ni a. Ka ngaihdan deuh chuan, 'KS an nilo, Call girl ringawt a ni' tih angah ka ngai deuh a ni keichuan. Wine leh Beer, zu thlah-zalenna tur kan ni ta sa sa a, hetiang anih chuan, zu thalo in thin te tan khan Wine leh Beer hi a tha ta nge; 'chumi thlakna tur' tih lai kha ka rilruah a awm deuh hlek a. Keini piangthar tawh, kohhran leh Zoram thalaite hi chuan zu lampang hi chu duhlo ila, 'Pathian ram a lo thlen theihna atan ruihtheih thil hi chu i do zel ang u' tih hi ka'n sawi leh hram duh a. Kan tunlai lo deuh min ti anih pawhin paw ka tilo; kei chu Pathian tan rinawm taka awm hi ka duh tawp mai tih kha ka sawi lang tel duh a ni.

Pu Dy. Speaker, kan Leader zahawm takin a wind-up ah min lo chhang se, ka zawhna chu hei hi a ni a – Pakhatna: Ruihtheih thil ti ten an tih tawh loh nan eng tianga hmalak nge kan tum? Pahnihna: Sorkar hriatpuina in Mizoram-ah ruihtheih thil ban phakah a awm dawn ta si a. A la tilo thangtharte hian an tih loh nan engtin nge tan lak kan tum tih te hi a wind-up hunah min chhang se ka duh hle mai, Pu Dy. Speaker .

Pu Dy. Speaker, lawmawm em em mai chu - Assam Rifles hi kan buaipui rei a. Sorkar hmasain rei tak an lo buaipui kha tun sorkarin bawhzui zelin, tunah a hlawhtlinna kan lo hmu hi a lawmawm ka ti hle a ni.

Lengpui Airport chungchang kha, Pu Dy. Speaker, Indian Air Force kuta pek mai tawh tur kha tunah hian engtin nge ni zel ka hre lova. Hei hi uluk lehzualin Zoram mipuite duhdan hre reng chungin kalpui zel a thain ka hria a ni. Tin, kan sorkar hian loan pung awm lo leh kan sorkar guarantor-a a tanna tur kha, tumah puk emaw, dil emaw an awm lo nge? Kan kalpui loh chhan hi min hrilh theih chuan a lawmawm ngawt ang.

**Demand No. 11 - SAD:**

SAD hi, tunhma atang khan sorkar motor maintenance leh repair a tam thei khawp mai a. Ka eizawna lam ve a nih avangin kan buaipui ve nasa khawp mai a. Congress sorkar lai khan, ‘min dawr ula, chuti zat chuan kan kan paih hniam thla thei ang’ kan ti a, a tla thla tawp a ni. Kum hmasaah khan RE-ah khan ₹160 lakhs chuang dah a ni a, tun tum hian inrenchemna kalpui vang nge ₹74 lakhs bawr vel lekah a han tlathla hi, inrenchemna rilru an pu a, tha ka ti hle a ni.

**Demand No. 39 - Power & Electricity Department:**

Hei hi kan mamawh khawp mai a. Tute pawh nitin maia current a awm that loh chuan kan buai vek mai a nih hi, engkimah. Amaherawhchu, mahni bial sawi dawn ila. Keini ah pawh Kawnpui-Lungdai inkar line hi a rei tawh khawp mai a, siamthat a ngai tawh khawp mai. Power hi kan intodelh a ngai a.

Kan Minister hi a fakloh theihloh a, a hriat zawng leh a tui zawng a ni bawk a. A theih ang tawkin power ah kan intodelhna turin hydel project a buaipui hi a ropui ka ti a. A hlawhtlin ngei theihna turin duhsakna ka hlan a. Chutih rual erawh chuan, Prepaid Smart-meter system hmanga pawisa pekna kan sawi thina kha engnge a thlen chin; kan la tifel tawk lo em; hma kan la la tawk lo nge ka hre lova. Nakinah min chhan theih chuan a lawmawm ngawt ang. Power ah kan intodelh lova, kan intodelhna tura tangkai em em Vankal Solar Plant - 20 mW te, Tlungvel Solar Plant - 2 mW te bakah mimal leh kohhran te pawhin rooftop-solar plant kan han uar te hi a lawmawm ka ti khawp mai a. Hei hi power lamah hma kan sawn theih nan leh kan intodelh theihna turin uar taka kalpui a tul hle mai.

**Demand No. 40 - Commerce & Industries Department:**

Ram changkangah chuan he department hi a lian khawp mai a, keini ramah chuan department te ang deuhin a lang a. Hetah hian hma kan sawn a pawimawh em em a, small-scale industries bak kan nei mumal lova. Hemi kawngah hian kan ram kan intodelhna tur, chhiah kan pekna tur leh kan hmasawna tur kawng a nih avangin, he department hi a pawimawh hle a. Chumi atana Industrial Growth Centre Luangmual-ah allotment 70 vel pek tawhah khan, a ti ve miah lo unit 17 vel an han cancel hi a ropui ka ti lutuk a; chu mai

a nilo, 27 vel enfiah mek a la ni zui a. Tunah hian unit pangngai tak 54 vel deuh chauhin an run a ni. Hetah hian tan kan lak a ngai a ni.

Tin, Commerce & Industries Department hnuai corporation ho MKVIB te, ZIDCO te, ZOHANDCO te leh MAMCO te chairman hran an han ruat a, MLA ni lovin. Tianga an han ti ta sa sa, sum senna ni viau mah se, a nih tur anga hmang tangkaia hma la zel turin kan Minister hian theihtawpin hma lo la chhonzawm se a thain ka hria a ni. Tin, Bazar hmunpuia building sak hi, heta eizawng chhungkua a sang telin harsatna an tawk kha a ni a. Hei hi engnge a thlen chin aw? A satute lamah completion hun hi August 2025 thleng extend niin ka hria a. Hemi hun chhung hi chuan sa zo tawh sela, chutiang tur chuan kan Minister leh department hotute pawhin ngaihtuahna lo seng se ka duh bawk a ni.

**Demand No. 18 - Printing & Stationery Department:**

Hei hi department te ni si, pawimawh em em a ni a. Inthlanna tur thilah pawh an rintlak a. MP, VC leh Local Council te inthlana ballot paper leh document pawimawh confidential thlengin an chhu thin a ni. Hei department hi ngaihsak deuh hlek an ngaiin ka hria a; an budget te hi an tlahniam zel a. Department hrang hrangin kan dawr a nih phei chuan revenue luhna tur department a nih avangin, Pu Dy. Speaker, kan Finance Minister leh Minister dangte pawh hian hei hi an lo ngaipawimawh ka duh a. A chhan chu, pawisa lo lut leh tur awmna a ni. Staff an indaihloh pawhin, staff han pek belh hi a pawilo, hetiangah chuan; a aia tam pawisa a lo lut belh dawn a ni.

Heng kan Chief Minister Pu Lalduhoma leh kan Minister zahawm tak Pu F. Rodingliana demand te hi tha ka ti a, pass ngei atan ka pawmpui e. Ka lawm e

**DEPUTY SPEAKER:** Pu TBC Lalvenchhunga ilo sawm ang.

**PU TBC LALVENCHHUNGA:** Pu Dy. Speaker, thla khat zet Budget Session kan thut khawm hnuah wawiina ni hnunung berah kan Finance Minister leh kan Minister zahawm tak Pu F. Rodingliana te demand sawi huna han sawi loh ringawt kha chu a uihawm bawk si a.

P&E bikah hian kan Minister hmalakna hrang hrang leh hnathawhna tur tam tham a awm tih chu a lang a. Commerce & Industries-ah erawh chuan kalphung tharah hian hei aia lian budget neih theih thuai hi a chakawm hlein ka hria. Eizawna siama hna tau titet theitu tur kan department a zuih tawlh tawlh mai a, department pahnih amalgamate hnuah pawh. Hei hi chu tan lak a ngai hlein a lang a.

Ka sawi tum loh deuh mai thil pakhat ka rilrua awm chu - heng kan sum demand, mipui tana kan pass mai turte hmanna lam hian ka rilrua luaa a. A nihna tur angin hman a ni em; eng tiangin nge hman a nih; a hman dik kawngah discipline kan nei tha em tih laite hi rilruah a awm a.

‘Kan Chief Minister chanpual a tam’ tih te kha a han ri deuh nawk nawk a, a dikna chen pawh a awm ang a. Amaherawhchu, kan han en thuak thuak chuan, Finance-ah te phei chuan crore 4033-ah crore 2200 chuang chu pension-te hnena kal chhuak leh tur a ni a, crore 1300 chuang kha chu kan leiba puk belh tur kha a ni leh mai a. A bak a awm chuang lem lo a ni. Chutiang bawkin Planning-ah te pawh crore 400 chuang a awmah MLA fund

crore 80 leh hand-holding sum crore 350 paih chuan, a chuang bang a awm lem hlei lo a. Chutiang vel chu kan budget dinhmun hi a la ni a.

Fiscal phase hi a tlem em em mai a, hmasawna hna han thawhna tur ai chuan, kan inrelbawlna tur kan pass hi a ni deuh ber mai a. Chuta han belh ka duh chu, politics kan khel a, Assembly House ah kan sawi a; kan tan a na tlang a. Amaherawhchu, Assembly House pawn lama vil zui hi kan hna a ni tel a ni tih hi kan theihnghilh ka hlau thin a. Kan en ve vek a, kan sum neih te kan han thlir a; department ah te kan han zawt a. Kan hna hi a la muang em em mai a, kum khata kan budget a tlem tehlul nen. Chu pawh kan hmang zo hleitheh lova; a huna hman tur, a huna tih dan tur pawh kan ti hleitheh lo a. A sum awmna tur lai hi chu kan chuh chak hlawm khawp mai a. A thlawna kan hmuh theihna tur deuh nia kan hriatah chuan, ‘Minister chak, a department chak’ tiin kan sawi thin a. Amaherawhchu, kan saorkar kalphung hi implementation-ah hi chuan kan la fail tlangin ka hria a. Kan project reng reng mai kum 10 tel te a han tangkhang a, crore 4-5 man lek pawh kum 5 chhunga zawh hleih theih kan nei mang lo a, kawng laih tawrh te hi chu kan ti thei viau. A bak kan project reng reng sum enkawl zui hautak lutuk lai tura hi ka rilruah a awm a, kan ngaihdan erawh a ni vek kher lo mai thei a.

Sawi phawng phawng deuh ka ni a; ka pa hian, ‘Politics chu ti lo mai rawh, engmah i thleng lo ang,’ min ti a; hei MLA lai te chu kan thleng ve a, hei aia sang te chu kan thleng kher lo ang a; kan daih reng kher ang em chu ka hre chuang lo a. Amaherawhchu, ram rorelna sang berah kan thu ve a, ngaihdan nei te kan ni a, thil tha te kan sawi thin. Amaherawhchu, mahni tanghma haina kawngah te, mahni tana thil kan tihna kawngah te hi chuan, ‘mipui hi an lang tawh ngailo’ tih hi ka hmuh dan deuh a ni a. Chutiang chiahin, politician-te leh sorkar hnathawkte pawh kan niin ka hria a. Sawi hrehawm pawh ka ti viau mai a, MLA pawh hi ka ni lo tep a. Inthlan dawnah khan ka candidate leh lo tep a, chutiang vel chu ka ni a. Mahni ngaihdan han sawi ching hi kan ni deuh bawk a. Chung kawngah chuan kan duh lo leh tha lo nia kan hriat thin te dona kawng awmah hian a hminga han dodal hi kan thiam ve lo khawp mai a, a tak thleng chi hi ka ni a, ka sawi lang mai bawk a.

Mipui hmaa mipui tanghma ngai em em leh an tana thawk nia kan inngaihnaah mahni senso a ngaih ve hunah hian kan harsatna sawi lan hi kan ching em em mai a. Mipuiin min bawm nasat zia te, sum leh paia kan harsat zia te, MLA dinhmun te hi chu hre sa vek, keini aia senior leh hre zawkte vek an ni. Amaherawhchu, mahni hamthatna tur a awm chinah hi chuan pawh kan sa lo tlang deuh ni hian ka hria a. Kawngkhar min khar hnana, rorelna pindana kan awm chinah hi chuan kan inkawmngelh tlang a, kan titi a rual tlang em em a, mipui hmaah va inchal tauhin va i ti ve thin mah ila, kan rilru tak takah hi chuan ‘he dinhmun, rorelna ka chelh theih chung hi chu a tawk mai lo em ni’, tih ngaihdan kan nei em aw, kan ti a.

Vawiinniah heng sum zozai, crore sang-sing tel pass tura kan inruahmannaah pawh hian ka bialah tlem a zawng a awm ve chuan, ‘Mizoram-in hma a sawn pui dawn em’ tih lam ai mah hian, ‘engnge kan facilities, engnge kan pay & perks, eng hi nge kan hlawhchamna eng hi nge kan thuneihna awm ve’ tih lamah hian kan buai ni hian ka hre deuh thin a. Chu chu vawiin nia sawi ka tum pawh ka sawi hlei thei lo a, rilru kap deuh tu a awm a. Ram leh hnam keini aia hmangaih tak taktu hruaitu kal tawhte an ni thin a. Amaherawhchu, famkim lo kan tih vangin theihtawp chhuahin ke kan pen ve a. Mahni inphatin leh mahni neih chan ral raih huam nia insawi vek kan nih rual hian, kan inchannate leh kan neihloh

zia leh kan harsatna te hi kan sawi vung nasa thin em em mai a. Mipuite ai chuan mahni hi kan lo in hmangaih thin emaw ni chu aw, ka ti a.

Kum 40 liam taa MLA kan neih tawh zingah, MLA nih hma aia hausaa chhuak lo hi ka la hrelo reng reng a; ka hre sual a nih chuan thuhnan ni sela. Chuti chung chuan kan insenso nasat zia hi kan tlangaupui nasa ber ziah a. Vawiinniah ngei pawh social media ah te, pawh lam atangin kan thalai ten min en a, chung an sawi ah chuan, ‘mahni facilities tipung’ tih te, a pawilo tih chin pawh kan nei ang rorelnaah chuan. Amaherawhchu, heng kan tihnaah hian lungruak taka pass pet pet nia han inpuhna te a awm leh a. Heng kan sum hman tur zozai hian, vawiinnia Planning & Programme Implementation ah crore 2 theuh MLA te; crore 80 hi hmasawna tling pha a ni. Kum 5 chhungin Mizoram power-a intodelh theihna tur khawp siam pha a ni. Amaherawhchu, a tam, mahni kut thala hman theih lai kha kan duh tlat a, chu chu kan pawisalo tlang vek a ni. Mipui hnena luanglut tura kha, ‘a luan luhna chu khawi atang pawhin ni se’ tih ai chuan, ‘ka thuneihna hnuai atangin ni se, kei hian a hlawkna tel ila’, tih hi kan ngaihtuah dan a ni em aw ka ti a.

Vawiinnia heng bill kan pass zozai tur te hi a tlem chhe lo a ni. Chung zinga 80% chu sorkar mi-chhawr, keini tiamin kan hlawh leh a behbawmah a kal ral leh dawn a ni; uiawm tak mai a ni. Chumi chhui zui chu kan hna ni zui turah pawh ka ngai a. Kan thawhnaah heti zozai sum hi, a taka nuai 1 pawh la hmu lote kan ni a; keini te phei chu a sum fai phei chuan kan la khawih ngai loh thil te a ni A vaibelchhia tel kan sawi ve thin a, cheng vaibelchhe sing 15,980 teh meuh mai vawiin niah pass a ni dawn a. Chutih rual chuan, vawiinnia kan khel demand pahnih belkhawm zatve dawn hawh lawh crore 6000 chuang a ni. Hneg tam tham tak mai kan han pass a, kan mamawhte kan sawi a, tawk kan ti viau thei a.

Amaherawhchu, he Bill pass a nih atanga heng sum a hmanna te hi mipui hmaah lang tlanga kan tlangzarh ngam loh chuan, awmzia a nei chuang lo tih hi ka rilruah a awm lian em em mai a. Hei avang hian, kan lo tiam tawh angin, kei bikah phei chuan ka bial chhunga MLA fund hmanna mai nilovin, department zawng zawng hi quarterly-in ka rawn dil kual thin a. Ka bial chhunga hna awm zawng zawng, a thawktute leh a implementing agency te hi website leh mobile apps ah, RTI chhawn ve ngai tawh lovin physical leh financial progress zawng zawng nen ka tarlang vek thin a ni. Chu lang tlang leh rinngam, inngah ngamna (accountable) sorkar siam a nih theihna tur atan chuan vawiin nia heng Finance Department te, Planning & Programme Implementation te, Secretariat Administration, Finance, Vigilance, Law & Judicial, Council of Ministers, Governor, Legislative Assembly, kan Chief Minister zahawmtak Department chan pual te leh Printing & Stationery, Power & Electricity, Commerce & Industries, Pu F.Rodingliana kan Minister zahawm tak te Demand hi a nihna tur ang taka hman a niha, tha taka hman a nih theihna turin ka thlawp tih ka rawn dinchhuahpui a ni e. Ka lawm e.

**DEPUTY SPEAKER:** Hachhek Bialtu zahawmtak Pu Robert Romawia Royte ilo sawm ang.

**PU ROBERT ROMAWIA ROYTE:** Pu Dy. Speaker ka lawm e. Nichina sawi ang khan, Assembly kan thu rei tawh a, ‘mahni seat-a thulo an awm thin’ tih te pawh kha, TV lama lo thlirtute pawhin an ti thin a ni awm e; mahse, thut reng hi hriselna te a inchen lo a. Tin, tih tur kan neih dan te a inchen lo a. Tuna i dinglama thute an ruak duak pawh hi an hriatthiamawm khawp maiin ka hria a ni. Engpawh nise, kan awm khawmna thin room

lam atang pawh khan a lo hmuh theih vek tho a. Heta kan awm lo emaw kan tih pawh hian, kan thiante thusawi pawh hi kan lo share ve a, kan lo en ve thin tih te pawh hi mipuite pawh hian hria sela a tha awm e a.

**Demand No. 1 - Legislativ Assembly:**

Hei, term hmasa lamah pawh session ah hian ka tel ve tawh thin a; Mizoram Legislative Assembly-a kan thawktute hi an chhuanawm thlawtin ka hria a. Ruling lama kan awm laia Minister te kan nih khan Assembly Committee hrang hrangah te kan lo tel lova. Tunah Opposition lamah kan han awma MLA te kan han nih chuan, Assembly Committee chi hrang hrangah te ka'n han tel ve a. Assembly-a thawktute chungah khan lawmthu ka sawi ve tlat duh a. A chhan chu, an smart a, an chhuanawmin ka hria a. Zan rei tak tak thleng kan awm thin a, kan haw hnuah tihfel ngai tam tak a awm thin a. Keimah tak phe chu nizan dar 12 velah ka lehkhaw pawimawh ka theihngilh avangin kan la buai zak zak a. Thawktute chungah lawmthu ka sawi rualin, vawin hi kan Commissioner & Secretary, Pi Vanlalthantlingi (Matlingi) hi a hun hnuhnung lam a ni ve tawh a. Kan Session tawp niah hian farewell thu sawi ka duh a. Hmeichhia Commissioner & Secretary hmasa ber a ni a, tlin takin a thawk a. Amah hi kan lo hre lo mai thei a, keimah pawhin ka hriat chian a ni a. Pu RC Khuma, VIP Tailoring fanu a ni a. Tun thla tawpa pension mai tur a ni a; kan Session leh hunah min ho tawh lo turah te pawh ngai ila. Superannuation pension-a la valai tak sia a chhuak thei tur hi ka lawmpui a, duhsakna ka hlan a ni.

**Demand No. 5 - Vigilance Department:**

CBI general consent hi hi kan sawi kan sawi a, ka thiam ang angin a literature awm angte pawh ka zir Chiang ve a. Mizoram sorkarin order pahnih CBI chungchangah ZPM sorkar hnuah a chhuah pawh hi ka'n dah dun vel thin a, ka'n spell chawp a, a thute kan entawn vel a; CBI officer ka thiante ka'n rawn bawk a. Mizoram sorkarin general consent kan pek hmasak zawk kha chu a general khawp mai a, criminal law thar neuh neuh a rawn chhuan avanga an tihdanglamah kha chuan a general ta lo a ni. Khatah kha chuan Mizoram sorkar chhunga awmte kha chu CBI-in, Mizoram sorkarin a phalsak loh chuan, 'a chhui thei lovang' tih kha a ni a. General consent kha engtiang chiahin nge CBI lam te hian an hrilhfiaha, engtin nge an tih, tih kha ka zawt Chiang leh a. General consent a nih chuan state sorkar phalna lak ngai lovin direct in kan chhui thin. Chutiang chu pek hmasak zawk kha a ni a, tuna an han tihdanglam tak hnu hi chuan 'tertia consent' kan tih ang chi a ni e, an ti a.

Ka sawi tum tak zawk erawh chu Pu Dy. Speaker, general consent inpek hi a tha em aw, tih zawk lam kha a ni a. Kan ZPM unauten 'general consent kan pe ang, corruption duh duha an chhui theihna tur' an tih kha, an chakpui leh mitena an ngaihazawn chhan te pawh niin a lang a. An pe reng mai a, mahse an sut leh rang khawp mai; an tidanglam leh rang khawp mai a. Sut-pumhlum chu a ni chiah lo a. Mahse, a general lai kha chu a ni ta lo niin a lang a.

Assembly question ah khan, "Mizoram sorkar hnathawk hi CBI-in chhui dawn ta se, Mizoram sorkar phalna a ngai em, direct in an rawn chhui thei mai em ni?" tih ka zawt a, ka zawhna hi chhuak loah a tang a. Mahse, UQ-a leha, a chhanna chu awm tho turah ngai ila. Mizoram sorkar phalna kha CBI khan an lak a ngaih dawn chuan, 'general consent' kan tih ang chi kha chu, 'consent an tih kha, a ni chiah lo a ni', tih kha a Chiang maiin ka hria a. General consent han pek puk puk hi, kan mi leh sate leh kan rama in chhui ngai chungchanga vaiho thunehtir tam lutuk hi a fuh lo mai thei. Chuvang chuan, an han thlak danglam leh pawh hi a tha zawk phian mai thei e.

**Demand No. 9 - Finance Department:**

A dawt lehah chuan, Finance Department ah sum kan dah tam khawp mai a. A amount lam kha chu karawn sawi lo ang a. Kan Chief Minister zahawm takin, finance minister a nih angin engtiang zawngin nge he sorkar hi a enkawl dawn tih chu, a chiangin ka hria a, a that zawkna pawh a awm mai thei e. Chutih mek lai erawh chuan, helama an thut lai khan sorkar hmasa lam kha, 'A khawnpuia dah tam lutuk, financial dictator' te kha kan ti thin deuhin ka hria a. Hei hian sorkar hmasa thatzia te kha hmuin an rawn zir ve ta nge, tih te kha ngaihtuahna ah a awm a.

**Demand No. 14 - Planning & Programme Implementation:**

Chutih mek lai chuan, Planning Department ah hian thil a lut lian sawt khawp mai a. Project lian tak tak a'n lut thar a. Entirnan: Article 2751 te, tribal affairs hi project lian awmna hmun a ni a. Tin, PMJVK te pawh DC&MA ina a chan thin kha, 'a thawk tha em mai, churang chuan lak sak teh ang', an tihna ber nge maw ni dawn, planning lamah a let leh ta a. Engpawh nise, a tha zawk dawn a nih hi tih te pawh ka ngaihdan a ni deuh tho mai a. Ka sawi tum zawk erawh chu, planning hi a lian ta riau mai a, kan intihchak ve te pawh a ngai ang, tih kha ka sawi tum zawk chu a ni e.

A dawt lehah chuan, utilization certificate chungchang hi hmanni atang khan a ri, a ri tawh a. MNF hian utilization certificate hi particular deuhna riau kan nei a, rilru zau tak pu chung si hian. Sorkar thar a lo pian khan, 2023 leh 2024 press conference ah te pawh MNF sorkar kal ta khan SASCI part-I chungchanga kan Chief Minister zahawm tak, Finance Minister ni bawk statement te kha a video te pawh hi a la awm vek mai a; khangah khan work order inpek sa, sum te pawh tam tak contractor te kaltlanga sorkar ina a lo hman tawhna project ang chi ah khan UC kha pek a nilo a. SASCI-a Mizoram sorkar chan tur 2<sup>nd</sup> Installment ₹23331 lakhs kha a lapse ta vek kha a ni a. A chhan chu, kha kha UC neih loh chuan an lak chhuah thei lo tih kan hria a. 1<sup>st</sup> Installment sum kha June, Ni 11 2024, (financial year tawp hnu fe) ah khan SMA ah a chhuah chauh avang khan UC han pek te pawh kha a remchang chiah lo pawh a ni mai thei a.

Tender pawh la tender loh, 'full UC (kan ti dawn nge ni) pek a awm e' tih te a lo awm a. Hengah hian eng emaw palh te a thlen ka hlau deuh a. Tin, kan official-te hian sorkarin thutlukna an siam te hi tuar lo sela, tih hi ka ngaihdan a ni fo a. Churang chuan, nakinah penalty te emaw, adjust ngai thil eng emaw kha a awm palh ka hlau khawp mai a. SASCI part-I (additional) hmuh duh hrim hrim vanga UC hi innawr beh luiha in sign tir te hi a ni ang em aw, tih te thil awm thei a ni a.

Kawng lehlamah chuan central sorkar a thil phal a, SASCI te chu loan a nih avangin 'kan pechhuak thei mai che u alawm' han intih te pawh a awm fo a ni a. Mahse, state dangte an fimkhur ang thoa fimkhur ve zel kha a tha khawp mai a. Finance khan tuar lo mah ila, a implementing department khan an tuar palh a hlauhawm deuhin ka hria a; nakum lamah SASCI sum lian zawk te pawh a la awm zel turah ngai ila. Hengah hian official-te tuar tur khawp, sum hmanna la awm miah loah hian UC te kan lo submit tawh em, on going works leh work done against UC te peih te kan nih loh phei chuan, state thenkhat chuan on going leh work done portion tam tak awm tawhnahte project kha an thlang a, UC pek kha a awl deuh a. Khatiang ni lovah khan kan official duhawm tak tak, smart tak takte hi eng emaw zawngin kan tuartir palh ka hlau deuh a, chu chu kan sawi ri bawka a ni.

Aw le, Pu Dy. Speaker, vawiinah hian budget hraw tak mai pahnih kan pass tur hi a lawmawmin ka hria a. Pu Marova kan Power Minister chanvo pawh hi sawi ve ka chak khawp mai a, mahse, sawina hun a awm tawh lovah ngai mai ila. Ani pawh duhsakna ka hlan a. Tin, kan Chief Minister zahawm tak pawh hi duhsakna hlan chungin an demand te kha pass ka remti e. Ka lawm e.

**DEPUTY SPEAKER:** Tu nge sawi leh ang le? Tunah Lawngtlai East Bialtu, MLA zahawm tak Dr. Lorrain Lalpekliaana Chinzah ilo sawm ang.

**DR. LORRAIN LALPEKLIANA CHINZAH:** Pu Dy. Speaker, hei vawiinah 2025 kuma budget session-a kan ni hnuhnung bera kan Hon'ble Chief Minister Pu Lalduhoma leh Minister duhawm tak Pu F. Rodingliana demand-te sawiho theihna hun kan nei hi a lawmawm ka ti a. Heta sawina hun tha tak min pek avangin, a hmasain i chungah lawmthu ka sawi a ni.

Tun Session hi Ni 30 hun kan hman a, amaherawhchu kan thut ni tak chu ni sawm-pali chhung a ni a. Hemiah hian min hruaitu Pathian chungah leh, kan Speaker leh Dy. Speaker chungah pawh vawiinah hian lawmthu ka sawi a ni. Kum rei tak sorkar hnathawkten hlawn a hun taka an lak tawh loh hnuin kan Chief Minister Pu Lalduhoma hmalaknain a hun taka hlawn lak a ni te hi lawmawm ka ti a, hei hian sorkar-hnathawkte chhungkuaah thlamuanna leh hahdamna nasa tak a pein ka hria a ni.

Tin, Bana-kaih policy leh CM - special package pawh chak taka hmalak mek a ni a, hei hian ram mipuite sorkarin a ngaihpawimawh zia a tilang chiang hlein ka hria. Department hrang hrangten hmalakna chak zawk an neih theih nan leh harsatnate a ranglama sutkian anih theih nan, kan Chief Minister kaihhruaina hnuaiha a concerned minister-te leh department officials te nen meeting neih a ni thin tih kan hmu a; hei hian nasa takin sorkar hmalaknaah pawh a tichak ngei dawnin ka hria a, lawmawm ka ti a. Tin, tun kan sorkarah hian E-office kalpui tumin hmalakna chak takin a kal mek a. Biometric attendance te, KAI App te hnam a ni a, hei hian nasa takin efficiency a siam a, mipuit office dawr turin official an awm loh avanga harsatna an tawhte pawh a sukiang nasa a, a lawmawm hlein ka hria a ni.

Tin, tar-hlawh leh rualbanlote-hlawh mi pakhatat ₹1000/- zela tihpun a ni te, Anganwadi workers leh helpers te hlawn tipung tura ruahmanna a awm te hi a lawmawm hlein ka hria a. Tin, kan Chief Minister hmalaknain Assam Rifles insawn chhuahna thuthlung 23<sup>rd</sup> October, 2024 ah khan ziah a ni a, 15<sup>th</sup> March, 2025 khan Union Home Minister lo kalin ram inhlanna neih fel a ni bawka. He thilah hian thil chiang em em chu, central ministry hian kan Chief Minister an ringgam zia a lantir chiang hlein ka hria a, a lawmawm ka ti hle a ni.

Tin, NHIDCL 306/06 compensation tang avanga hna chawlh reng tawh pawh kan chief minister hmalaknain double compensation an pe a, hna chhonzawm a ni leh ta a. He issue hi thil buaithlak tak a ni a, ministry hmasate pawhin theihtawp an chhuah a. Amaherawhchu, khang hunlai khan tihfel theih a nilo a ni. Chuvangin, kan Chief Minister hi fak a phu hlein ka hria a. Pu Dy. Speaker, ka bial chhungah pawh hetiang issue lian tak, KMMTTP road compension-ah harsatna kan tawka mek a. He kawng hi siam zawh tawh ang a ni a, mahse High Court-in genuine land-owner mi 138 a identified ten vawin thlenga compensation an la dawng theilo hi pawka ti hle a. Kan Chief Minister zahawm tak hian

a hma thei ang bera heng mi 138 ten compensation an lak theih nan theihtawp min chhuahpui turin leh, he House-ah hian Pu Dy. Speaker min react sak turin ka ngen a ni.

Tin, SASCI hnuaiiah sum tam tak kan Chief Minister hmalaknain kan dawng a. Tin, Lawngtlai District chhungah hian agriculture link road leh road communication-ah te hemi hnuaiiah hian min ngaihpawimawh sak turin ka ngen duh bawk a.

Tin, Chin issue, unification atan kan Chief Minister-in theihtawp a chhuah a, he issue hi keini concerned anih deuh avangin, vawiinah hian kan chief minister chungah a bik takin lawmthu ka sawi duh a. Chumi anih rual chuan, a tawp min thlenpui turin ka ngen bawk a ni.

Tin, sorkar hnathawk indaihlohna phuhru turin department hrang hrangah hna lak chhoh zel a ni hi lawmawm ka ti a, hei hian a tha zawngin nghawng a neih ngei ka beisei a. Chutih rual chuan, district administration lamah staff indaihlohna a nasat avangin hna duh angin a chaklo thin erawh a pawl ka ti a. District level-a sorkar hnathawk hrang hrangte thumchaka official-te pawh a tul ang a min dah belh sak zel turin vawiinah hian kan chief minister pawh ka ngen duh bawk a ni.

Tin, kan chief minister leh kan power minister hmalaknain electric bill ba rull a ni a, a hun taka power leina kan pek avangin February, 2025 thlenga rebate kan hmuh tawh hi 165.69 lakhs a ni hi lawmawm ka ti hle a ni. Chutih rualin, chhimlam power chhe lutuk, ruah sur leh thli tleh apianga thim thin pawh kan minister hmalaknain hma kan sawn ve zel hi a lawmawm ka ti a. Tin, staff indaihlohna leh voltage problem erawh kan harsatna lian tak a ni. Consumer an pun ve zel avangin kan transformer ten kan mamawh khawp min pechhuak thei tawh lova, kan electric hrui a lo hlui tawh bawk nen, tiang chuan harsatna lian tak kan tawk a ni. Heng hi kan minister-in min hriat saka kan transformer leh kan electric hrui hluite pawh min thlak sak turin ka ngen duh bawk a.

Pu Dy. Speaker, ka bialchhunga Sentetfiak khua kan tihah transformer a fuh loh avangin kang mei a chhuak thelh fo mai a, hei hi SDO min bialtu bakah kan minister pawh ka hrih tawh a. He transformer hi a bul hnai teah sawnna tur ram tha tak a awm a, hei hi kan minister-in min sawn sak thei ang em tih, he House kaltlang hian ka zawt duh a.

Tin, Kolodyne Hydrel Project hi megawatt tam tak siama Mizoram mamawh mai piallamah kan hralhchhuah theih khawp siam thei tura project tha a ni a; he project hi thawh leh tumna a awm em tih ka zawt bawk a. Tin, Lawngtlai 132 kV sub-station hi siam mek a ni a, hei hi Lawngtlai District mipuiten hman thuai kan thlahlel em em a ni. Engtikah nge zawh a nih theih ang tih leh, a zawh hun tur min hrih thei bawk se. Tin, Chawnhu - Bungtlang South 33 kV level-a thlunzawm turin km 15 vel a la ngai a, eng chen nge hmalak a nih tawh tih leh, a hlawhtlin theih nana chak zawka hma min laksak turin ka ngen bawk a ni.

Tin, Pu Dy. Speaker, kan sorkar hnuaiiah Printing & Stationery Department-ah pawh hmasawna hrang hrang kan hmu a procurement te re-tender system fare taka kalpui a ni hi a lawmawm ka ti a.

Tin, stationery stock pawh a theih ang anga maintain niin non-availability certificate pekchhuah thin pawh a tlahniam ta hle in ka hria a a lawmawm hle a ni. Chu bakah, centralised items rate sang lutuk thin pawh revised niin, department ten man tlawm zawkin

stationery items an lei thei tawh a. Hei hian department hrang hrangte OE pawh nasa takin a tihniam dawn a, a lawmawm ka ti hle. Tin, department ten P&S kaltlang lova duh duh a thil an tih thin regulate niin, no objection certificate pekchhuah thin pawh tih tawp a ni tawh niin ka hria a. Printing leh a kaihnawih thil reng reng P&S kaltlanga tih zel tawh niin, department ten 2% royalty sorkarah an chhung zel tawh a, hei hian sorkar sum luang ral tur nasa takin a veng a, a lawmawm hlein ka hria.

Aw le. Pu Speaker, kan Hon'ble Chief Minister Pu Lalduhoma leh Minister Pu Rodingliana te demand hi tha ka ti a, pass ngei ni se tiin ka thlawp e. Ka lawm e.

**DEPUTY SPEAKER:** Siaha bialtu MLA zahawmtak Dr. K. Beichhua ilo sawm ang u.

**DR. K. BEICHHUA :** Pu Dy. Speaker ka lawm e. Kan khawmpui kan tiak tawh mai dawn a; kan session chhunga boruak tha tak karah Speaker leh nangma kaihhruaina ropui ka ti a, in chungah lawmthu a hmasain ka sawi a.

Tin, kan Opp. Leader a entawntlak hlein ka hria a, Session chhungin boruak thalo hriat tur awm lova tuang taka session kan han hmang zo tur hi a lawmawm ka ti a, Pathian hnenah lawmthu ka sawi a. Tin, ka member-puite zawng zawng chungah lawmthu ka sawi ni bawk se.

**Demand No. 18 - Printing & Stationery:**

Pu Dy. Speaker, he department pawimawh tak mai hi a nihna anga kan hman chuan revenue generate thei, sorkar pawhina a chhawr em em tur department a nih laiin, tun sorkar leh a hma sorkarah pawh kan beisei angin performance a tha lova. Tunah phei chuan hei Information & Public Relations nena chhun fin turte a lo ni a, chutiang a nih takah chuan, department hian a hrana Controller a neih hi engtia kalpui zel tur nge, I&PR nena chhun fin an nih takah hian, tih hi kan Minister-in min hrilhfiah thei se. Tin, Object Heads of Account 49 - Other revenue expenditure 2024-2025, RE leh 2025-2026 BE khaikhin hian a tlakhniamna hi a sang hle mai a, hei hi engnge a chhan tih min hrilhfiah bawk se.

**Demand No. 39 - Power & Electricity Department:**

Pu Dy. Speaker, vawiin hi a tawp ni a ni tawh avangin ka bial lam ka sawi ve ang a. Assembly Session ah hian zawhna vawi tam ka siam tawh a, chhanna pawh vawi tam ka dawng tawh a ni. Kan bial Siaha District hi chhim lam MLA zahawm tak takte pawhin an lo sawi tawh angin, 33 kV Sub-Station nei kan ni a. Tunah demand te a lo sang chho ve zel a, mihring kan pung chho ve zel a; power kan neih lah a pung bawk silo a, a chhe tual tual mai bawk si a. Tin, kan powerline te pawh a chhe em em mai a. Chuvang chuan, current kan neih leh neih loh hi a inzat ti tih a, uar deuh hleka sawi chuan. Chutiang a nih lai chuan, hei kan hriat angin 132 kV hi district hqrs. zawng zawngin an nei deuh vek tawh a, Lawngtlai leh Hnahthial pawh tunah hian kalpui mek a nih laiin keiin erawh chuan kan la nei lo a, a lungchhiat thlak hlein ka hria. Tunlai IT khawvel ah power tel lovin engmah a tih theih tawh bawk si lova. Hengah hian kan Minister-in chak zawkin hma min lak sak thei se. Tin, a mipuite pawhin kan nghahhlel em em, a department lamah pawh 'pawisa a awm e' tih pawh la awm lo; Tisopi ho hian ram tha deuh mai an lo pe tawh a ni. A department lam hian sum la awm lo chung chungin an hmanhmawh, nghakhlel lutukin a ram te tifaiin tikhan an hnatlang a. He thilah hian kan House Leader, Finance Minister pawh hian min chhinchhiah sak se; heng power leh tui te hi chu revenue generate tur a ni a, SASCI sum hmanna tur dik tak a niin ka hria a. 132 kV line hi vawiinah hian SASCI

atangin siam ta ilar, kum 50 chhunga a sum generate tur hi a tam viau dawn a ni. Chuvang chuan, kan House Leader hian, henga tana funding source kan neilo a nih pawhin, SASCI atang hian engatinge min tihsak mai loh aw? Chhim tawp a awm kan ni si a, special consideration min pe thei se kan va han lawm dawn em.

Tin, Kolodyne Stage-II project, a capacity 460 megawatts, crore 2985.20 man, MoU NTPC nen 2008-a signed tawh kha, 2020 ah cancel a ni a. A chhan sawi dawn ilar, tam tak sawi tur a awm a ni a. Mahse, cancel a nih dan hi thil ho tak mai a ni a, kan sawi hman lo ang a. Hei hi engatinge kan tharthawh leh mai loh, power generate tura luite kan bawh kan bawh ai chuan? Hetah hian beihpui thlak ta ilar, kan ram economy atan pawh thil ropui tak a ni dawn si a. Chuvang chuan, he sorkar hian a theih hram chuan hei hi min ngaih pawimawh sak se a tha hle mai, Pu Dy. Speaker.

**Demand No. 40 - Commerce & Industries Department:**

Commerce & Industries ah hian Pu Dy. Speaker, kan pachhia a, kan PSU neih angte pawh sick-unit ah an chang vek tawh a. Hengah hian kan moral hi kan thlak a tulin ka hria. A PSU anga enkawl hian mahni ta anga enkawl lovin leh a neitu rilru kan put loh avangin vawiina kan PSU tam tak te hi sick-unit dinhmunah an awm niin ka hria a ni. Helai hian kalphung thar-sorkar hian theihtawp chhuahin tan han la leh sauh sauh se. Tin, Major Head 2851-a minor head 102, sub-head 11 hi tun sorkar kal mek policy – Hand-holding nen hian inzawmna a nei em? A nei anih chuan, engmah dah a ni si lova, helai hi kan Minister hian min hrilhfi ah thei se a lawmawm hle ang.

**Demand No. 1 - Legislative Assembly:**

Kan Legislative Assembly ah hian hi sawi tur tam tak a awm a, pakhatnaah chuan - kan budget session neih lai leh kan lo neih tawhah te pawh Pathian zarah kan performance a tha a ni. Central lam pawhin min fak. He kan ethics leh etiquette te hi kan vawn nun zela, zahawm taka kan siam zel hi a pawimawh hlein ka hria a, chu chu thang leh thar lo la awm turte tan pawh keini hi a mawhphurtu kan ni tih hi kan theihngihl lo a tha a. Helai manner tha tak hi kan keep-up chhoh zel hi a pawimawh hlein ka hria a.

Tin, state dang Legislator Home leh keini kan dinhmun hi ka tehkhin thin a, Pu Dy. Speaker a, zialo deuh hlek a ni. Tuna Legislator Home-a awm Pu Nguna, Pi Prova leh keini, tin, member dang dangte pawh, kan hlauhthawn em em chu, power supply hlui tawh lutuk hi, engtik zanah emaw chuan kan hriat loh hian a puak durh anga, kan darh vek ang tih te kan hlau khawp mai. Hei hi en uluk a ngai hlein ka hria a. Tin, MLA Hostel kan nei a helai Khatlaah hian; khung te pawh khu State dang MLA Hostel te nen a inthlau lutuk. Renovation hi uar ilar, a thar a theihloh pawhin. Tha taka kan renovate chuan khung te khu building tha tak a ni a, mikhual thlen nan pawha zahpuiawm lo hian i maintain teh ang u.

Tin, Assembly-a thawktu official-te leh kan Speaker hovin ka fak duh che u a. Thih hnua infak mawi hi chu a tangkailo, Pu Dy. Speaker, i damlai hian kan fak teh ang che. Kan Staff-te efficiency hi ka ngaihtuah thin a, a ropui ka ti a ni. An taima; an efficiency tha. Chuvangin, vawiinah hian lawmthu ka sawi duh a ni.

**Demand No. 4 - Law & Judicial Department:**

RE 2025-26 leh 2024-25 inanlohna hi a tam hle a, helai hi a changtu hian min hrilhfi ah thei se. Major Head 2014, sub-Head 09 - Victims of Crime Compensation Scheme tih hian engchen

nge a huama, a dawng thei chin hi tute nge tih kha khawngaih takin min hrilhfiah ta se. Tin, Mizoram Judicial Transfer & Posting hi Mizoram sorkar khawih emaw, a thuneihna a ni em, tih lai pawh hi Pu Dy. Speaker, min hrilhfiah theih chuan a lawmawm hle ang a.

**Demand No. 5 – Vigilance Department:**

‘CBI general consent pek/pek loh’ tih chungchang hi Mizoram mipuiten chiang taka kan hriat theih nan kan House Leader-in vawiinah hian chiang taka a sawifiah hi ka phut deuh bawk a ni.

**Demand No. 9 - Finance Department:**

Kan budget-ah general discussion pawh kan nei tawh a. Pu Dy. Speaker, pawimawh bera ka hriat chu, Fiscal Responsibility, Fiscal Management leh Fiscal Discipline te hi kan kenkawh dan a that chuan, minimum governnance hi maximum government-ah a siam theih a ni. Chuvang chuan, tun kan sorkar, kalphung-thar hi ‘a performance tha/a chhia’ ti turin, a la naupang rih a. Leiba rulhna kawngah sorkarin hma nasa takin a la a, lei ba te pawh a rul nasa a, a a lawmawm a. Tin, State rethei tak kan ni a, kan revenue engmah tham a nih loh zia kan hre vek a. Chuvangin, nichina ka rawn sawi Fiscal Responsibility, Fiscal Management leh Discipline te pawimawh zia a hretute kan ni a, beiseina sang tak nen kan thlir a ni.

**Demand No. 5 - GAD:**

Pu Dy, Speaker, Assam Rifles insawn chungchangah hian ‘keimahni tih a ni; anmahni tih a nilo’ tia Salutar, kan party pahnihte hian kan tum a; chulai ah chuan kan buai a ni. Vawiina lawmthu kan sawina tur zawk chu Central Sorkar khu a ni lo em ni? Min petu hnenah lawmthu kan sawi tur a ni dawn lawm ni, Pu Dy. Speaker? Chuvang chuan, BJP MLA pahnihte hnenah hian lawmthu hi awm se tih hi ka rawn sawi duh bawk a ni, Pu Dy. Speaker.

Tin, Airport chungchangah Pu Dy. Speaker tawi tein. Chhim lam Airport kan sawi thin a, Congress hunlai khan aerial survey neitute zinga pakhat ka ni a. New Laty tlangpui saw kan va en a ni. A hnu ah MNF sorkar chhung khan preliminary survey a hmunah khan kar hnih neih a ni a, chutah pawh chuan ka zuk tel ve leh a. Chuta preliminary report-ah chuan, ‘land filling a la ngai a, a apron tur hi a zim deuh e’ tih a ni. Chulai chu Ministry lam ka zuk biakah chuan, “final survey lo nei ula, a format pawh hetiang thlap hian State-in lo fill-up se, lo ti rawh u” tih kha a ni a. A kengkawhtu tur chu AAI emaw, Defence lam pawh ni rawh se, a enga pawh chu a tha ang a. Act East Policy-a Airport proposal lo awm hi, chhimlam hi kan state-kawtchhuah diktak a ni dawn vang a ni a; a thlang laawkah lawng chawlhna a awm dawn bawk a. Tin, tourist attraction a tan a bul pawh tourist circuit a ni. Chutah chuan, kan sorkar hian chhimlama Airport a tih hian, hmundang te pawh tha kan ti vek. Mahse, Airport hi hmun khat atanga pakhat dang siam leh tur hian a air distance-ah prescription a awm a.

Entirnan: Kawmzawl te, Saitluk te, Mampui te saw Air distance ah hian a hnai lutuk a ni. Tuna New Laty, Airport a tana kan propose hi chu air distance-ah pawh a tling zan a ni. Tin, a hmun pawh pawh a tha a, plateau ang deuh a ni a. Chuvang chuan, kan House Leader, GAD changtu hian hei hi rilruah min lo neih sak ta se, final survey hi nei thei ta ila. Autonomous District in kalkawng a tawp thlang an siam vek a, final survey min neih theih sak ta se tih kha Pu Dy. Speaker, ka ngenna a ni bawk e.

Aw le. Vawiina kan Demand sawiho, kan Minister zahawm tak Pu F. Rodingliana leh kan Chief Minister zahawm tak Pu Lalduhoma te chan hi tha ka ti a, ka support e. Pu Dy. Speaker, ka lawm e.

**DEPUTY SPEAKER:** Nichin Legislator Home chungchang an sawi kha, khi, in hmu ve vek tho ang a. Khawih mek a ni a, electric leh current te pawh kha. Tichuan, nakinah kan House Leader pawhin an la rawn sawi ang a. MLA House te pawh tha deuh kan nei dawnin ka hria. Lo inti hrisel phawt mai rawh. Tunah chuan, Dampa bialtu MLA zahawm tak Pu Lalrintluanga Sailo ilo sawm ang.

**PU LALRINTLUANGA SAILO:** Pu Dy. Speaker, ka lawm e. Pu Dy. Speaker, vawiina kan Minister leh kan CM zahawmtakte demand ka sawi hmam thil pawimawh tak. Tun mai ah khan helaiah Common Recess ah thiltih kan nei a, lawmthu sawina ka'n nei duh a.

Hei nimina ka sawi ang khan, kan thenawmah hian Peace Accord Association, PAMRA Office chu engmah chuh hman lovin an document zawng zawng a kang fai vek mai a. Nimin lamah khilai ah a ralna te pawh ka han neihpui tawh thu he House ah hian ka sawi a. Chu ka sawi chu chak taka min bawhzui sakin, kan House Leader, kan Chief Minister zahawm takin niminah helai ah hian thu a puang a, chu a thu puan chu tisa ah lo chang ta a.

Tun hunah hian kan Chief Minister zahawm takin kan DM&R Minister, kan Home Minister ni bawh kaltlangin ₹5,00,000/- in PAMRA kang tuarte tanpuina tunah khan kan hlan a ni a, ka lawm tak zet zet a ni. 'Thih leh ruam khatah, dam leh tlang khatah' tiin kum sawm tel he ram avanga kan mawhpurh-puitute, kut beng a kan awm laia min tanpuitute hi kan theihngilh lo ang tih hi rawn sawi teh' an ti a. Chutihruah chuan, kan Chief Minister-in a Relief Fund atanga a la tih ngai miah loh ₹1,00,000/- pek a tum bawh a, kan lawm tak zet zet a. Chutihruah chuan, Lunglei West bialtu zahawm tak Pu T. Lalhlipua'n kang an tuar bakah an computer te a lo kang chhia a ni tih a hriat vel leh computer set a lo pe bawh a. Nimina ka sawi ang khan, Hrangturzo bialtu zahawm tak Pu Lalmuanpuia Punte pawhin ₹50,000/- a lo pe bawh a. Tin, Pu K. Laldawngliana Tuirial bialtuin ₹10,000/- a lo hlan bawh a ni a. Heng zawng zawng in thatna hi Pathianin a let tam takin a rul ang che u tih ka ring a, 'Mi khawngaih thei takte chu an eng a thawl e, khawngaih an la hlawn dawn si a', tih kha, in chungah Pathianin he Bible chang hi tidik ngei se, tih hi ka tawngtaina a ni. Mak tak maia in mi-khawngaihna te, 'thinlung a tuiral tak zet a ni' tih ka'n sawi duh a.

An document collect leh hi thil tih mai mai a ni lo a. Kan sawi ang khan, kan Members, kan thawhpui thinte hi a ral lam zel kha an ni a, mi 800 dawn lo hawngah 500 an awm tawh lova, kan thi chho zel a ni a. Chutihruah chuan, thlalak leh document hrang hrangte collect leh tur hian chhim tawp hmar tawp, chhak leh thlang tawp kalkual te a ngai a. Khang atana a harsatna an tawh te hre reng chung a kan CM leh Home Minister te, ka'n han tarlan tak he House zahawm taka ram rawng ka bawlpui ten min khawngaihna an lantir hi ropui ka ti takzet a ni.

Aw le. Pu Dy. Speaker, vawiina kan demand ah hian han sawi duh te ka nei ve a.

**Demand No. 40 - Commerce & Industries Department:**

Helai hi Commerce & Industries chan a nih rualin, GAD kaihnawih te pawh a ni a. Mizoram Peace Accord-a la tihhlawhtlin loh kan neih zinga pawimawh tak mai border trade chungchangah hian, Sorkar hmasain theihtawp an lo chhuah a, hei hi a implement tu tak tur chu kan accord sign-pui tur Central India sorkar a ni a. Amaherawhchu, harsatna tamtak kum 40 dawn kan lo kalpui tawh a, nikum hmasa maiah khan Bangladesh border trade chungchang hi sawiho niin, kei ngei pawh khatih laia Trade & Commerce Minister, Dr. R. Lalthangliana te nen Bangladesh-a an Sr. Cabinet Minister, Dipu Munshi te nen Silsury, ka bial chhungah te kalin, Bangladesh, a ral lehlam panga development lo kal zawng zawng kan en ho vek a. Chungah chuan Bangladesh khuan remna kan nei tirha ramhnuai veka kha an rawn develop a, Mizoram ri, ka bial ral lehlam chiahah double-lane kawng black top-in a lo thleng vek tawh a, keini lam hian hma kan la la tam lo hle mai a. Heng hi kan House Leader pawh a tui zawng a niin ka hria a.

Hengah hian Bangladesh Minister Pu Munshi-a phei chuan ‘thil dang zawng zawng aia Bangladesh ina kan neih loha chu stone (lung) hi a ni’ a ti a, ka hma ngeiah pawh a sawi a. An kawng siam te pawh hi ka enpui vek a, an lungte pawh Meghalaya leh Jharkhand lama kan lak a ni thu leh, tuna mamawh leh demand lian ber tur pawh lung a nih thu te a sawi a. Chung zawng zawng ka’n ngaihtuahin leh, vawiin nia kan thlatharte kan dispose-na tur border trade hi kan nei a nih chuan, khulam vek khu a ni a. Vawiin nia kan sorkar pawh hian sawhthing a lei tam zawk hi chu (ka rin danin Kolkata leh Tripura lamah an kalpui a nih pawhin) Bangladesh ah tho kalin, Mosolman country dangah heta tanga hralh chhuah leh tur te a ni thin a. Chuvang chuan, heng kan Accord-a la implement loha hi he sorkar kaltlangin chak taka hma lak ni se tiin, thil tamtak zingah chu chu han sawi ve ka duh a.

Tin, Industrial Growth Center Luangmual-ah din a ni a, term tam tak Luangmual-ah ka lo VC tawh a, hei kan House Leader pawhin a hrechiang ang a. Khulai Industrial Growth Center, 1999-a kan sorkar kal ta ina a lo dina khu tihbawrhban a niin, amaherawhchu, tun sorkarah hian a kawng te concrete-in nasa takin hna a thawk mek a ni a. Hengah hianin a mamawhtu ten an mamawh ang ngeia hman tangkai ni se ka duh hle a ni. Chutihrual chuan, allotment tamtak lo pek tawh hman tangkai siloh, nichinah kan Industries minister rawn sawi, khang te kha dan ang taka action lak ni se ka duh khawp mai.

Tin, Geology & Mining hi ka ngai pawimawh em em a. Anni hian manpower an ngah lo hle mai a. Chuti chungin vawiinah full-fledged deptt. an lo ni ta hial hi a ropui ka ti a, tihchak zel pawh an mamawh hle a ni. Khawvel thang zelah in te kan sakin engineer te kan hman hmaa a geology hretute an nih avangin, hei hi kan ngai pawimawh a tul a. Khawvel thiamna lo sang zelah kan himna atana pawimawh em em leh mithiam awmkhawmna te a ni tih hi ka tarlang tel duh a,

Chutihrual chuan, Pu Dy. Speaker, kan sorkar hi thil tam takah helai i veilam atang te pawhin kan han fak a. Amaherawhchu, vawiina lawmthu te ka han sawi rualin, kan Bible-a kan hmuh ang deuh a ni a, “Nimahsela, demna che ka nei. I hmangaihna hmasa i bansan tak avangin” tih thu erawh hi chu sawiloh theih loh a ni a. A chhan chu, SASCI chungchangah te pawh sorkar kan han inthlak a, kei pawh tunhma atanga kum 30 chuang contractor class-I te kan ni ve a, utilization certificate an pek dan te kan lo hre ve tawh thin a ni. Amaherawhchu, dan piah lamah kan official te hrem tawh theihna turah kan innawr lui mah mah em aw, tih te hi ka ngaihtuahnaah a awm a ni. Chutihrual chuan, vawiinah

hian ka lawmna ber erawh chu, Pu Dy. Speaker, (bell kha i hmet ngun viau tawh nachungin) ringtu kalkhawm kan nih rual rualin, kan Pathian leh a kohhran te pawh sawi loa zu-zawrh duhloh lama ka awm hi lawmthu ka sawi a ni. Ka kristianna political conviction hi lak hran theihloha ka ngaih tlat avangin, ‘beer hi chu chatuanin zu a ni’, tih ka sawi dawn a ni. Ding lamah pawh khan term lehah ka thu mai thei; ‘wine pawh hi zu a ni’ tih ka hrilhfiah dan hi a ni kumkhua dawn a ni. Chuvang chuan, khatiang duhloh zawnga ka awm hi vawiin niah hian Halleluiah pek chi hialah ka ngai a ni.

**Demand No. 39 - Power & Electricity Department:**

Kan Minister hian a rualpui deuhah min lo ngai ve ringawt mai a, Recess room-ah a sawi a. A fate leh ka fate hi Shillong-ah lehkha kan zirtir thin a, kan inzui kan inzui thin a, rin aiin a tuina zawngte a ni bawka a, hma a la chak viau mai a, a lawmawm ka ti a. Chutihruah chuan, keini nichina Mamit bialtu zahawmtak Er. Pu Zira’n a sawi ang khan, khulaia 132 kV-ah khuan harsatna namen lo kan nei a, a Minister pawhin a hria a; hei hi kan House Leader pawhin min hriatpui se ka duh a. A chhan chu, 132 kV line- hi Bairabi - Marpara via Mamit a ni a, ka bial chhungah hian sub-station pawh din a ni a, 11 kV te nen. Hei hi border-a kan outpost zawng zawng ina an hman tur te a ni a, helaiah hian thui tak ka lo inrawlh tawh a, Pu Dy. Speaker. Congress sorkar hmasa hunlaia an rawn tih khan kei MLA tla hlim kha ka ni a, kum 2008 ah khan. Khatih lai khan a hmun an rawn zawng a, kan mite’n an duhna ang takin Thorang bial lam Marpara South-a dah tum an ni a, sub-station kha. Mahse, kan bridge a chak tawkhlo avangin kan official ten, ‘helai hi bial tur lamah hian free land min pek theih chuan kan dah mai a va tul awm ve?’ tia min rawlruk avanga chak taka hma kan lo lakna te a ni a. Chutah chuan nasa takin an inbun tawh a. Amaherawhchu, Forest Deptt. lamah harsatna tunah hian kan nei mek a ni a. Heng hi hmanna kan House Leader leh kan Forest Minister pawhina hma chak taka an lakna tur chi a ni a, ram mipuite’n kan tawrh phah hle tih kha ka han sawi duh a.

Chutihruah chuan, kan electric lampang hotupa pawh khan min support hlein ka hria a; khawvel letliam lampang thleng pawha hre thei kha a ni a. Chuvang chuan, vawiiinniah hian kan duhloh dan te min duhlohpuitu ah te pawh ka’n ngai a. Amaherawhchu, mihring kan in ang lova; dik nia kan hriat pawhin, nihna leh chanvo, sahrang tha kan hum tlat hian ‘diklo’ kan ti mai thin a ni.

A tawp khar nan chuan, he sorkar a kan hotupa ber nen hian politics-ah inbei thin mah ila, hmangaihna tak taka min hmangaihna te, a taka miharsate tanpuia a luang chhuak thin hi chu ka fak khawp mai. Hmana mi kha la niin leh a hmangaihna hmasa kha bansan lo phei sela chu, chawimawi tlak a ni.

Awle. Pu Deputy Speaker, heng kan Minister zahawm tak tak Pu F. Rodinglana leh Pu Lalduhoma, kan Chief Minister zahawm tak te demand hi he House-ah hian pass ngei turin ka’n support a ni e. Ka lawm e.

**DEPUTY SPEAKER:** Tunah chuan, Lawngtlai West bialtu zahawm tak Pu C. Ngunlianchnunga ilo sawm ang u.

**PU C. NGUNLIANCHUNGA:** Pu Dy. Speaker, ka lawm e. Legislative Department te, nangmah leh Speaker chungah lawmthu sawina kan ngaitla theuh tawh a, ka rawn thual nawn ve kher lo mai ang a. ‘Kan lawm a ni’ tih erawh kha chu min hriatsak la.

Kan ngaihthlak tak ang khan, session kan nei ngawrh hle mai a, vawiin hi a tawpni a ni a. Vawiin chu kan khar dan a inanglo deuh dawn em ni aw, ka ti a. Engti pawha kan lo inti a nih pawhin, kum khat hnuah kan inhmuh leh dawn emaw a ni ang a, helai House-ah hian. Thla ruk hnuah a ni zawk e. Ni hnih-thum vel lek emaw kha a liam ang a.

**Demand No. 39 - Power & Electricity Department:**

Zawhna ka zawh a chhuak lo chiah chiah a; midang zawhna atangin ka zawhbelh ang ka ti a, a chhuak lo leh chiah chiah a, ka zawt theilo a. Hei vawiinah helai ah hun a ti hek deuh dawn a, pawl ka ti a, nimahsela a pawimawh si a ni.

Lawngtlai East bialtu khan a sawi tawh a. Keini chhim lama awmte saw Khawiva atanga chhim lam line pekna, hei tun chu thal a ni a, harsatna kan nei lem lova. Nikum lamah te, kum hmasa lamah te ruah a sur a, thli a'n tleh deuh phei chuan kan thim ngei ngei a, kar khat te, a chang chuan kar hnih dawn dawn te; ruahin min tibuai nasa em em mai a ni. Helai House-ah hian nikum session-ah te pawh khan ka'n lo sawi tawh a.

Pu Deputy Speaker, kan Minister hian hma a lo la tawh mai thei a; a lo la lalo a nih pawhin, hei hi ruah tlak leh hmam uluk deuha min enzui sak a pawimawh khawp mai. Keini Lawngtlai District chauh ni lovin, Siaha District-te, Chawngte lam te pawh kan nihna chen a awm ve thei awm a. A pawimawh takzet a ni.

Tin, kan Minister hi a ti tha khawp a, chhimlam MLA-te min ko khawm a, a hovin meeting te pawh kan nei a. Khatah khan Lungsen atanga Chawngte 33 kV line kal kha Bungtlang South, kan bialah a lut phei a. Tun hmaa harsatna kan neihna thinah 33 kV line a kal khan nasa takin hmasawna kan hmu a. hei hi Congress hunlaia hma lo lak kha a takin kan chang a, a lawmawm kan ti a.

Chutihruah chuan, kha nen khan 132 kV Lawngtlai bula Chawnhu nen thlunzawm ni sela, heilai Khawiva atanga Lunglei, Tawipui tlangdung lo kala kha furah lo chhia pawh nise, Chawngte lam atangin Bungtlang South kha, kan meeting laia department lamin an sawi dan chuan, 2 crore vl lek pekbelh khan thleng thei mai tur ang khan an sawi a. Tichuan, Lawngtlai a thlen tawh chuan, Lawngtlai atangin Siaha kha a pe chho ve leh nghal thei dawn a. Kha kha keini lam tan chuan a pawimawh em em a ni tih kha Pu Dy. Speaker, vawiina kan Minister pawhin min ngaihtuah zui sak ka duh em em a ni.

Tin, hetah pawh hian ka sawi ve fo mai, sorkar hmasa atang tawh pawh khan. A bikin keini thingtlang bial ho hian current line kan pe a, chutah chuan thawktu mumal an awm lo a ni. Mi an in-volunteer a, line lo samfai tura job card hman te leh eng emaw house connection lo pek ve te, khangah khan voluntary-te hian an thawk tawp mai thin a, khaw eng emaw zatah. Khang kha PE anga a kal theilo a nih pawhin, MR em em a nih loh pawhin eng emaw zangnadawmna thla khata cheng 4000-5000/- tal emawa saimrem dan awm thei se kan duh hle a ni. Kan bialah hian hetiang mihring/hnathawk kha eng emaw zat an awm a, chu chu a pawimawh ka ti khawp mai, Pu Dy. Speaker.

Tin, West Phaileng 132 kV transmission line-ina a paltlang hi compensation te kha pek kim a ni tawh em? Pek kim ni lo ta se, engtikah nge pek kim theih a nih ang aw? Kha kha min react sak theih chuan a lawmawm ang a. Tin, engtikah nge khu line khu commission theih a nih ang tih te pawh.

**Demand No. 9 - Finance Department:**

Vawiina kan House Leader zahawm tak hi helam, i veilama kan thut ho laiin sorkar hmasa budget session-a a zawhna kha ka bengah a ri va va thin a. Khatah khan, (Sorkar hmasa pawh kha zep tur a awmlo) Finance-ah khan sum kha a tam thin a, department dang ngaihtuahin. Chuta kan House Leader-in a zawhna ka la hriatreng chu, “Vawiin ah hian kan Finance Minister hi kan zawh duh chu, hetiang khawnpui siam hi tha ber niin i hria em?” a tih kha a zawhna a ni a. Tichuan, kan han kal a, hei sorkar thar a lo piang a, vawiinah budget session vawi hnihna (9th Legislative Assembly-ah) kan han nei chho a ni a. Chutah chuan budget bu ka han en a, nikum aia a punna hi a let a tling lek lek a ni.

Chung chu a ni chho ta hi, hetah Adviser to Chief Minister (Finance) khan, ‘pension te, leiba rullhna tur te henglaiah hian a awm a’ a tih kha, a dikin ka ring a. Chutihruah chuan, tun hma khan pensioners ho kha kan lo pe lo ta nge, nikum aiin kuminah heti em ema a han pung chho ta mai hi, engnge ni a chhan? Finance-ah sorkar hmasa ah khan ‘khawnpui’ tih kha a lar khawp mai a, tunah hian kha khawnpui ai khan a khawnpui ta zawk em? ‘Financial dictator a ni’ tih kha a tawng duhthawh deuh phei chuan kan han sawi kha a ni a; ‘A pa-in hlei hlei a hawn’ tih te kha kan ang ta em aw kan sum han dah danah hian. Hei hi kan Finance Minister pawhin min sawifiah sak se ka duh khawp mai.

Tin, PMJVK hi tun hma chuan Social Welfare-ah a awm a, chuta tang chuan sorkar hmasa khan DC&MA-ah sawn a ni a. Tunah hian Planning-ah sawn chhoh a ni leh a. Chutiang chuan, Article 275 (1) te pawh Social Welfare atangin Art & Culture-ah han sawn zet a ni a, notification te pawh kan hmu a. Tichuan, a hnu lawk, hmannah khan ‘Planning-ah dah a ni leh ta a ni’ tih kha kan Finance Minister, kan House Leader hnen atangin kan ngaithla kha a ni a. Khanglaia kha, kan House Leader sawi danah khan, “Planning-a kan dah hian kan zavaiin kan inban tawm thei ang a; tichuan, tunah pawh minister hrang hrangte an mamawhrawn siam turin kan ti a, project te pawh anrawn siam sang sang e” a tih kha, minister dangin an chanlai khan an ti theilo em ni, kha kalkawnga kha? Planning ho kha thawktu indaihloh nen, khang zawng zawng Central sponsor scheme-a an han chhunfina kha, miten ‘Financial Dictator’ an lo tih thina kha, vawiinah hian a tak ram a thleng a ni zawk lo maw, tih laia kha Pu Dy. Speaker.

Social Welfare-ah a ni emaw, DC&MA-ah a ni emaw minister-te kha vawiin nia kan House Leader hian khatiang khawih tlakah a ngai ta lo em ni, tih te pawhin a ngaihtuah theih a; a ngailo em chu a nih ka ring lo a. Khang sum bawm, sum awm theihna deuh han control tum vek duhna mai awm anga han lang te hi, Pu Deputy Speaker, a fuh ber em aw tih ka’n ngaihtuah a ni.

Tin, tun kalphung-thar sorkarin ‘sawhthing kan lei vek dawn a ni’ an tih te, kan House Leader atang te pawhin kan hria a. Chutih rual chuan, thingtlang mite an mangang khawp mai. ‘February Ni 20 atangin lei tan tur’ tih a nih avangin an lo cho lawk a, an lo dah a; vawiin ah March, Ni 20 kan han thleng chho a, thla khat a lo ni ta a, lei a la awm mumal lo niin a lang a. ‘Kan sawhthing zawng zawng a chhe vek dawn; nikuma kan hnathawh rah engmah lovah a chang dawn a ni’ tiin, tih keini opposition MLA ve mai mai te pawh ‘khawngaih takin min lo zawh chian sak teh’ anrawn ti lawm lawm a ni. Reilo te ah thingtlang black-top loh kawngah phei chuan lirthei te pawh an kal leh lo maithei a, ruah an tla ang a, chutah han phurh luhna leh buaipuina tur pawh kha an mangang hle a ni, tih

kha. Khami chungchang kha kan House Leader hian chiang fek fawkin min han sawi sak thei se ka duh a.

Tin, budget kan siam dan reng reng hi a mak ka ti a, mithiam zawk phe chu an ni a. Mizoram ah hian department 48 awm niin ka lo hre ve a, department 18 ah hian sum, nikum BE phalo an awm a. Chung chu Revenue Expenditure tih tlem, lan tlem lutuk kan hlau a, capital ah 17. vel kan dah a, 82. vela kha Revenue Expenditure ah dah a ni a. Tichuan, Pu Dy. Speaker, nakum Supplementary Demand-ah hian hlauh indaihlohna te leh he budget-a nikum kan phaklohna zawng zawng hi loh theihloha pek te pawh tam tak a ngaih leh a rinawm a ni. Chutiang chuan, hand-holding ah te pawh crore 350 dah a ni a, kha kha align department-ah khan sector location kha siam mai awm a ni a. Chuti ni lova, helai khawnpuia dah va dil zel ngai mai kha, kan Finance Minister pawh hi a rim lutuk zawk lo ang maw?

Hei, budget session vawi hnih kan neihna a ni a, kan Chief Minister zahawm tak hi, ‘amah, amah’ ti deuh zel a han ni ta hi. Sum bawmah khan sum a tam tlat avangin, helai kan kal chhoh dan hi a dik hlel deuh em, nge ni, a lo tha fe zawk? (**Dy. Speaker:** I zo thei dawn tawh em aw?) Khata tang khan control theih kan ni deuh dawn em ni, tih te Pu Dy. Speaker, ka sawi duh a ni a.

Hei tun tum kan Session hi Pathian leh kan bial mipuite zarah helaiah hian kum 10 chuang kan lo thu ve tawh a; tun tum session ang reng renga thu chiangkuang lo deuh ri tam hi a awm em aw, ka ti a, Pu Dy. Speaker. Indian Air Force hnena land lease pek chungchangah te. Niminah pawh khan Revenue Department concerned Minister hnenah ‘sorkarin lease a pek hi a hralh nge a hawh tir’ tih te kha ka zawt a, hawh tir a nih thu te kan hria a. Mahse, helai House-ah hian hralh a nih thu leh cancel a nihloh thu te kan House Leader atangin kan ngaithla a. Mahse, member dang atangin August, 2019-ah cancel a nih thu te kan ngaithla leh a.

Tin, MYC Dan kan siam chungchangah audit person awm miah lo anga kan ngaihthlakah, a minister ngeiin a department windup-na ah vawi hnih lai audit a lo nih dan te a sawi a. Tin, thil ho te, sawhthing .... (**Dy. Speaker:** Duh tawk tawh ang u, hun a tawp tawh.) Ka zo tep; a tawpna tur a nih tawh dawn. Sawhthing mesh-bag te pawh kan House Leader-in ‘a thlawna kan pek vek a ni’ a ti a; pek annih loh thu te kan dawng reng a, ‘chumi bag zat chu kan lei’ a ti kha a ni a.

Chutiang chuan, SASCI chungchangah pawh 1<sup>st</sup> installment part-I (2024-2025) te pawh hna la tan miah loh UC pek anga helai House-a sawi te a awm leh a. Tin, ‘kan puk ve dawn lo’ tih a sawi te, ‘smuggling thla khat chhungin kan tireh ang’ tih a sawi te, a video clip te pawh a awm tia sawi te; a video te chu an thawn zui a ni awm e.

Engpawh ni se, Pu Dy. Speaker, a tawpna a tana ka sawi duh chu, he House, kan ram rorelnaah hian thudik i sawi ang u. Kan lo hresual palh a nih chuan, chu chu thuhnan ni rawh se, mihring chu famkim kan awm lo. He House hi Zoram mipuiin min thlir a. Thudik hi sawi ila, chutah chuan kan lo tih te, kan lo tihfuh loh te pawh a awm ang; tih sual pawh kan lo nei ang, Pu Dy. Speaker.

Tichuan, kan Minister zahawm tak Pu F. Rodingliana leh kan Finance Minister Demand te he House-ah hian ka thlawp e, lungawi lutuk chiah lo deuhin.

**DEPUTY SPEAKER:** Pu Nguna hi chu a sawi rei thei a, bell han hmeh rei te pawh a ngai a.

Kan Opp. Leader kan ko tawh mai dawn em ni ang? Ani nen hian kan thu dun thin a, kan nu hian a lo thlir thin a, “Ani hi chuan a ziak mawlh mawlh thin a, nang hi chu i thu reng mai thin a” a ti a. ‘E, nu-i i hre chiang lo a nih kha; ziah sa hi a rawn keng teuh a, a sawi tur hi a nauten an rawn sawi khalh a, an rawn sawi khalh kha a thaichhe mawlh mawlh reng a. Eng emaw a happening deuh han sawi tur hi a zawng leh thin a, a ngaihtuah a, a ziak chawp leh thin a; a buai thin teh a sin. Kei hi chu muthlu loa ngawi renga ka lo thut hian, thu tha tak sawi ka ni’ ka ti a.

Tunah Opp. Leader thusawi turin ilo sawm ang.

**PU LALCHHANDAMA RALTE, OPP. LEADER:** Pu Dy. Speaker, thla khat chhung kan han thu dun a, i thut lai ngeia thusawi ka chak thu kha ka sawi a, hei kan beiseina kha a thleng dik ta a; bell tih rik hun tur chungchang te pawh kan sawi kha.

Hei, February Ni 19-ah kan tan a. Pathian hruainaa Session tluang taka kan neih theih avangin Pathian chungah lawmthu ka sawi hmasa a. Tin, ka House member-pui zawng zawngte rim taka ram tan ro kan han relho thei te, ngaihdan inanglo na na na chu han inhnial chang te awm bawh mahse, Common Recess Room-ah hlim takin, tumah inhuat zuina awm lova kan han inkawm bawrh bawrh thei te a lawmawm ka ti a. He Assembly Secretariat-a thawktu zawng zawngte rim takin, Session kan neih theihna nana a thim a var thlu lova thawktute, sorkar department hrang hrang atanga he Session a hlawhtlin theihna tura min lo tawiauma, a tul ang ang min lo pe thin tute leh, inzavaia hnenah a hmasain lawmthu ka sawi a ni.

Pu Dy. Speaker, a thlun phelh ang deuh zar zara tih ka’n tum ang a.

**Demand No.18 - Printing & Stationery:**

Hmanah pawh ka sawi tawh a, kan department ho zingah hian, a kila lung tangkai, langsar silo, heng kan Session lai te pawh hian kan paper mamawh zawng zawngte, kan budget bu leh tul zawng zawng, Govt. gazette leh notification pawimawh zawng zawng buaipuitute an ni a. Chutih rual chuan, sorkarin ruahmanna thar a han siam a, April Ni 1 atangin tunhma lama a lo kawppui thin I&PR nen an sawikhawm leh dawn a ni a. Hemi kawngah hian a changtu Minister ka chah duh chu - department hrang kha department khatah an han awm dawn a. Tun hmain lo awmho thin mahse, indang ve uk tawh an lo ni a, an lo inchhuang hrang ve tawh si a; ngaihdan leh tihdan a hrang tawh ang a. A thawktute’n sorkar tha tak, good governance a kal theihna tur leh thawhhona tha an neih theihna turin sawikhawm annih dawnah pawh boruak tha siampui turin kan Minister tawn tawnte ka ngen duh a ni.

**Demand No. 39 - Power & Electricity Department:**

Power Department hi an thawk tha khawp mai a, theih tawp an chhuah chho tih pawh kan hria a. Amaherawhchu, mipui-chewing gum deuh hi chu kan awm vein ka hria, department zingah hian. Electric Department te, Health te, Education te, a bik takin theih ang tawkin

han bein han ti thin mahse, eng emaw thil tha kan han ti a, lawmthu min han hrilh thin a. Amaherawhchu, zan hnih-khat an thim hlek hi chuan tower te lungin kan deng leh sawk sawk thin a. Hetiang hian kan ramah electricity mamawhna a lian a. Kan Minister hnena ka zawhna chhannaah khan, hydel project thenkhat pawh tun financial year chhoa bul han tan tum thuak thuak tumna pawh awmin ka hria a. Chuvang chuan, a bik takin Aizawl South-III pawhin, Tlawng a ni emaw, Tuivai a ni emaw, Tuirial emaw, heng kan han sawi thinte hi engtikah nge bul kan tan theih dawn?

Tin, Chhimtuipui-a power generate tur hi a lian si a, kan ram kan kan future-ah a pawimawh si a. Heng lamah hian eng emaw tun hma atanga survey thin te kha kan tuai thar tha leh deuh em; Engtin nge kan kalpui dawn tih te min sawi sak theih chuan.

Han sawi loh theihloh chu, ka bial lampang hi session hmasa khan ka sawi a. October thla hian YMA khawmpui lian kan thleng dawn a. Chutah chuan furpui kan hmachhawn chho dawn a. Keini kan bial lam khi fur hi kan dawl zolo a ni. Thli leh ruah a lo chet tawh hi chuan kan thim hi a ni ringawt mai a. Chungah chuan ram pum khawmpui kan dawn turah harsatna a thlenlohna turin department-ah hian inruahmanna kan nei tha tawh em, tih te pawh ka han zawt tel duh a.

**Demand No. 40 - Commerce and Industries Department:**

Major Head 2435 hnuaiah khan Head of Account, Minor Head 101-ah 'Agriculture Marketing' tih kha a lo tel ve nawlh mai a. Allocation of Business Rules-ah Agriculture hnuaiah khan 'Mizoram Agriculture Marketing Board' tih kha a awm bawk si a. Khalai kha a inkawlkah theih em? Hma kan lakna turah Allocation of business-ah khan agriculture a awm bawk si a. Helaiah hian engnge tih kha ka zawt tel duh bawk a.

Tin, Industrial Estate te pawh kan nei a, Pu Dy. Speaker, kan industrial estate ram hi tukina paper a rawn present-ah khan, tihlawhtling chiahlo thenkhat hmingte pawh kan hmu a. Industries Department-in emaw, sorkarin emaw ram pek ni silo industrial estate chung siah hian inkhuar ve tlat engzat nge la awm? Chungah chuan sorkar ram kha humhalh turin engtin nge hma kan lak dawn?

Tunlai kan thalai zingah helam pangah mahni kutkawiha intun nun tum, industry lampanga tui tak takte an awm chho tan mek a. Chungte tan chuan ram awm ta se, ram pek tur plot hi kan la nei reng em, tih kha min hrilh theih chuan, ka hre duh khawp mai.

**Demand No. 1 - Legislative Assembly:**

Kan Chief Minister chan, Legislative hi, hmanni khan kan sawi tawh a. Kan Assembly session neih nikhuaah hian Aizawl traffic kan tibuai nasa a, mipui tanah roreltute leh min tawiawmtute, kan kal velnaah kan khawsak a tibuai khawp mai. Engtin nge kan hun lo kal leh turah Assembly House tha zawk, changtlung zawk, hmun fianrial zawkah kan neih theih ang, tih hi ka thinsungah a la lian em em a. Chu chu ruahmanna kan neih thu te pawh kan House Leader-in a sawi tawh a, veipuih kan neih tul ka ti khawp mai.

Chutih rual chuan, democracy lungphum pathum - Legislative, Executive leh Judiciary kan neihah hian kan House Leader-in nakina min rawn react atan - Ram roreltu, dan siamtute awmna legislative supremacy hi democracy-ah chuan a awm thin a ni. Amaherawhchu, wawiinniah hian Legislative Assembly leh a huangchhungah hi chuan, hei judiciary hi chuanin sorkar, GAD emaw Finance-in emaw O.M an chhuah pawhin an

mahniin a hranpain an rectify a, order an siam ve thin a. Vawiin niah hian eng nga ti nge kan Assembly te in toto-a sorkar order hi zawm ve tura kan ngaih lek lekna, legislative supremacy hi kan vawng nung dawn lo em ni?

Chuvangin, engtin pawh ti se kan tana tha tur a nih chuan order kha kan Speaker hovin Commissioner Secretary ten a tul angin an tive mai tur a ni a. Sorkar department dangten a hranpaa an va chungtlak tur a ni lo. Autonomy hrang nei kan ni tih hi. Chuvangin, chulai te chu kan House Leader pawhin a rawn react tul ka ti khawp mai.

Demand No. 2 leh 3-na, Governor leh Council of Minister kha chu ti hian kan sawitel vekah ngai mai ta ila.

Demand No. 4-na, Law & Judicial hi department pawimawh, a kila lung tangkai kan tih loh theihloh, mihring tam viau chu an nilo. A dik tak chuanin Mizoram Law & Judicial kan tih kan state ina a enkawl chhungah hi chuan an pawimawh em em a. Kan sorkarte thurawn tha, dan hnuaiyah kan kal theihna tura min petu an ni a. Kan dan siam, kan bill emaw tin, service rules emaw thawktu hi an indaih tawklo em aw tih ka ngaihtuah a. Tin, dan kan siam tur, house-a kan pharh turte pawh hi anmahni hnena kan pek hianin kan nawr hmanhmawh thin si a, department dang zawng zawng tepawh hi inbuatsaih tha deuh ila, Law Department mihring tlem zawkte hianin him zawk tha zawka ngaihtuahna an sen theihna tur a tan hun tha zawkte mihring tam zawk kan pek te pawh hi a tha hle tih kha anniah khan kan sawi leh mai ang e.

**Demand No. 8 - Vigilance Department:**

Hetah hian sawi uar duh deuh ka nei. Lok Ayukta hi kan thum chak a tul a, anmahni hnuaiyah ngei investigating branch hi kan neih a tulin ka hria a ni. Vawiinah hian ACB te an la ring a; ACB chu sorkar hnuaiyah awm a nih avangin eng emaw posting & transfer-a investigation kal lai, case an khawih lain kan sawn nawlh nawlh fo a, case pending a tam phahin ka hria a. Lok Ayukta tichaka, hrem ngai hrem tur chuan Lok Ayukta hnuaiyah hian investigation branch mumal tak hi kan neih a tul ka ti a ni.

Tin, kan Lok Ayukta hian a hranpain building hmun hma pawh nei lovin mi building te luah a ni a. Zahawm zawk leh rorelna dik tundin a nih theihna tur, Chief Minister thlenga hrem thei tura huaisen an nih theihna turin helaiah hian ruahmanna kan siam a tul ka ti hle mai.

**Demand No. 9 – Finance Department:**

Kumin hi Year of consolidation-ah kan puang a, sum inrenchema, insawh ngheta, insum a ngaihna laia insum tur kan tih lai hian, result mak deuh mai, crore 948.5 vel kan ba ve tlat tho mai a, tun sorkar kum chung hian. Kumin kum kal chho turah hian kan ba tur te nen han en chuan, ZPM sorkar kaihhruai kumhni chhung hian crore 2000 vel leiba kan tlin dawn niin a hriat a ni. Kan Chief Minister, kan Finance minister khan presentation a neihah khan sum crore 1003 vel ang a sawi kha chu, kan budget bu ah kan leiba chu chiang taka tarlan a nih avangin, thudik mipui hian an hriat a tulin ka hria a, chu chu ka sawi duh a. Vawiiniah kan fimkhur ngai ta ni a ka hriatna chu, sum leh pai, SASCI leh thil dangte a lo kal a, kan sum bawmah hian engzat tak tak nge a nihna turah a project base-ah hian awm? Vawiiniah hian hman kual theih a nih avang hian a tul tulah hian kan ti kual a, nakin lawkah bill te pek tur awm selangin kan sorkar treasury hi a Hausa viau lo mai ang em le? Chulai chu check and balance-a kan kal tul ka ti khawp mai a.

Finance leh Planning te Chief Minister kutah a awm a, chutah chuan nichin khan Member zahawm tak Lawngtlai West MLA khan a sawi tawh a. Vawiinah hian rualkhai zawka kan kalna tur tiin kan House Leader, kan Chief Minister hian a sawi a. Minority Affairs te, Tribal Affairs te, sum awm tamna Planning leh Finance te Chief Minister office lama enkawl turin a dah chho a. Hei hi tangkai zawka kan en ngai tia rawtna kan neih duh chu, mihring awmte kan hria a. Planning te, Finance tea thawktu mithiam tak tak an ni. Amaherawhchu, project engkim en tur in technical knowledge nei technical mi, Planning-ah hian EE, SE chin chunglam tal hi an awm loh chuan kil dang dang atangin project te rawn kal pui dawn mahse vawiinniah hian khilailah khian hun puma thawk tur kan neih loh chuan ruahmanna, kan dreams kha a chhia ang tih ka hlau a.

Ka ngaihtuahnaa awm ve mai mai chu, hetia an han pawt khawm vak vak mai hi, sorkar tuma an inzawrh lai khan, ‘Chief Minister chuan portfolio a nei ve lovang’, an han ti a. Mahse, loh theih lohvin CM portfolio-awm hi chu a awm a, vawiinniah chuan a intlar dul mai a. ‘Sawi loh ang zela awm hi chu kan va inhmeh em aw’ tih hi chu thinlungah a lian khawp mai (**Dy. Speaker** : i sawi tawp thei dawn tawh em aw?) Ram tan a tangkai dawn a ni, insum takin.

Pu Dy. Speaker, hmunphiah leh sawhthing lei chungchang hi tawi tea ka’n sawi duh chu, kan House Leader hian House-ah sawiin ‘kan lei dawn’ a ti a, a lawmawm a. Mahse, kan lei dawn kan tihah hian kan farmers te hi vawiinah hian an buai khawp mai. Hrangturzo atang te, Tuikum bial atang te pawhin tukin zingah min rawn bia a, kan cho lawk teuh tawh a, mahse a lei nawn leh hi a awm har lutuk a. Engtikah nge sorkarin a rawn lei leh dawn? tiin min rawn phone a. ‘Sorkarin kan lei vek dawn’ an ti a, thu, tisa ah a chang bawk si lova; chu tak chu. Engtikah nge kan lei dawn? ‘Kan lei vek dawn’ tih ringawt hi a ni lo a ni. Kuthnathawktute an faten vawiinah hian an sikul luhna tur leh admission tihna tur te an mamawh tawh tih hi ka sawi duh a ni.

#### **Demand No. 9 - GAD:**

Lengpui Airport chungchangah kan House Leader khan hmannia Delhi-a a zuk kal lo hawin a sawi te, tin, Union Home Minister-in, ‘Civil Aviation Minister te nen kan sawiho leh ang a, AAI te nena thawhho dan emaw kawng dang kan zawng dawn a nia, a ti a’ tia a rawn sawia, Union Home Minister khan a lo rawt zawk nia a sawi te kha ka lawm khawp mai a. He House-a kan sawihona hi a positive zawngin a kal turah ka’n ngai a. Kan ram leh hnam kal zel turah i veilama miten Pu Dy. Speaker, khalam hawi zawnga kan House Leader pawhin ngaihtuahna a hmanh kha lawmawm ka ti a, lawmthu ka sawi leh a ni. Lo hmet hrih lo mai rawh aw, Pu Dy. Speaker, kan thut dun char char kha.

Ram rorelnaah ‘Pathian lal ram thleng rawh se’ kan ti a, a zahawm; a ropui. ‘Sorkar hmasain an ti a, kan ti ve lovang’ kan tih, UC lem chungchang hi tawi te ka sawi duh. Sum leh pai kan hmuh duh avanga danglam bik tur nia insawi sorkarin vawiinniah UC lem kan han siam avang hian reiloteah hian official ten an tuar a hlauhawm a. Chutiang kawngah chuan he sorkar hi in ennawn se, dik takin i ti ngam ang u. Bawhzui chak ila, kan thawh chak chuan UC siam ila. Vawiinniah hian a lema tih a dawnkhawm thur thur leh hausa deuh anga insawi hi, ‘a dik em’ tih hi ka zawhna a ni.

A tawpna atan chuan, Assam Rifles insawnchhuah chungchang kha, tawi tein. Vawiin niah hian kan state politics-ah pawh kum 35 chung zet politician tam takin an lo buaipuia an

lo um thin kha, ZPM sorkarna hnuaiiah an insawnychhuahna tur hmawr kan han bawk dawn ta a, lawmawm ka ti khawp mai a. Lam chhuah ngei ngei ka'n duh chu, state-a CM hmasa ber Pu Laldenga, hetiang atana bul tantu, ram te min lo tih sak hmasatu, Zokhawsang lampang min lo tihfel sak hmasa tu hi, kan hnenah awm tawh lo mahse sawi hi a tulin ka hria a ni. Pu Zoramthanga, Ex-CM, he House-ah hun rei tak awm tawh, Assam Rifles chhuahna tura order pawimawh zawng zawng tichhuaktu, Zokhawsang luahna tur atana engkim lo tifel hmasatu kha vawiinia hian sawi a tul a. Amaherawhchu, ZPM sorkarna hnuaiiah Pathianin an chhuahna tur hun a siam a, engkim hi Pathian ruat a ni.

Chuvang chuan, vawiinia kan CM te thleng hian chawimawi an phu ka ti a, an chungah lawmthu ka sawi a. Politics-a inchirhthehna leh thildang sawi vakna chi a nilo; vawiinia ka ngaih pawimawh em em chu, Pu Dy. Speaker, kan House Leader ten an enzui tul a awmin ka hria a. Chu chu, hmanni khan kan GAD Secretary leh DG Assam Rifles ten ram map an inhlan a, kha ram map an inhlan kha an enchiang tawh em; boundary description te kha mumal takin rintlak a ni em, tih te hi ka'n zawt duh a. A chhan chu, Assam Rifles ram luah zawng zawng hi eng pass hnuaih nge a lo awm reng, tih hi ngaihtuahna min neih tir a. Assam gazette hi tunah hian ka kawl a, Assam Gazzette, 8th October, 1952 chhuak hi an rinchhan hi a la ni em le? Khata ram a sawi leh vawiina Assam Rifles ram a sawi hi a dik em? AS Barkataki, Dy. Commissioner, Lushai Hill in map a siam te kha vawiinia hian AR ram map min pek chhungah hian civil miin ram an nei em; an neilo em; kan map inpek kha kan lawm em em rual khan engnge a dinhmun dik tak, tih kan House Leader pawh hianin a en tawh em ka hre lova. Theih pheih chu nise, kan House Leader hian hei hi chu kan zavaia kan thawhtlanna a ni a, a mimal ang pawhin ram kan inhlanna map copy kha ka duh khawp mai; min pek theih chuan ka'n dil tel nghal bawk a ni.

Pu Dy. Speaker, Assam Rifles ram kan inhlan chungchang hian boruak a tha zawngin siam ila, MOA, Home Department siam leh GAD siam hi 'a tha zawk/a tha lo zawk' in tih te kha a rem lo a. A tha zawk leh thalo zawk chu reilo teah kan analyze dawn; vawiinia pawh sawi ka chak lutuk. Tuna kan MOA kha a tha em; a hmasa zawk kha a thaw zawk em, tih te pawh kha sawi ka chak lutuk, mahse mi indemna hun a nilo. Vawiina ram hnuk kan sawilaia indem indem kha a tul loh avangin fimkhur a tul a. Chutiang kawngah chuan sorkar pawh a tul ang zela kan thawhpui hi a tha ka ti a ni.

Vawiinah kan House Leader zahawmtak leh kan Minister Pu F. Rodinglana demand te hi he House hian lungrual taka kan pass ka duhin, ka rawn thlawp e. Ka lawm e.

**DEPUTY SPEAKER:** Kan tawp dawn emaw tih hunah hian kan tawp hleithei thin lova. Tunah dar 5:30 PM a ni a, kan hun tiam ang khan 5:30 PM hi chawlh kha ni a. Tunah kan House Leader-in a la sawi lova. Kan House Leader-in sawi tul a tih te sawi turin ilo sawm ang.

**PU LALDUHOMA, CHIEF MINISTER:** Pu Dy. Speaker, sawi rei ka tum lova, kan Minister Pu Marova demand-ah khan tlem han sawi ve ka duh lawk a ni mai a, hun chu kan adjust thei turah ngai ta ila.

**Demand No. 40 - Commerce & Industries:**

Commerce & Industry-ah hian ka ngaih pawimawh em em chu 'innovation' hi a ni a. Innovation challenge te kan siam a, lawmman te pawh kan siam a. Chutah chuan zopa-

irawm atanga keimahni thil siamthiam ve ang chite hi ngaihsan thiam hi a tha kan ti a. Amaherawhchu, ‘zo siam i ngaisang ang u’, kan han tih rual rual hian, heng puan leh parda te pawh kan han lei a, kan han thlak a zo siamin. Amaherawhchu, a to hlawm lutuk a, a hek khawp mai. Chuvang chuan, kan rama thil siamchhuah te hi man man deuh hleka a siamtute pawhin tih dan ngaihtuah a tha hlein ka hria a.

Tin, Dampa bialtu zahawmtak Pu Lalrintluanga hnen atangin, zo-siam chu a ni lo na a, maua siam mawza pahnih present ka dawng a, ka lawm khawp mai a. Keini putu hi kan lo inzui nasa tawh a, pakhatin revolver, pakhatin pistol kan han pai teh tawh tawh hi chuan buaina siam tur hi a zawn hian kan zawng hi a ni deuh ber mai a. Bukvannei-ah khuan zankhat chu buaina a awm a, zuk chhuk teh ka ti a, paho zan thla eng hnuaiyah daipawna an ko khawm mai chu, ka tlak phah dawp tawh mai a, kan rum dun khawp mai a. Ani nen hian kan lo inzui nasa tawh a, inngaina deuh mai kan ni a; kha kha mipui hian an hrethiam lo mai thei a.

Tin, a sawi Silsury, Bangladesh lamina tourist centre-a an rawn hman tak khu kan border trade centre-a hman kan duh a. Amaherawhchu, kawng kan han lai dawn a, ‘Dampa sanctuary buffer zone hnuaiyah a awm’ an rawn ti tlat mai a, forest hovin... *(interruption)*

**PU LALRINTLUANGA SAILO:** Pu Speaker, ka tibuai lam ni lovin, kan House Leader pawh kha a zu kal tawh a, khulai land khu enchiang ila; kan PWD minister pawh kha a remchan huna zinah ka lo sawm a. Khulai khu private land vek a ni a, forest land hi pakhat mah a awmlo tawp tih chu assurance ka pe ngam e.

**PU LALDUHOMA, CHIEF MINISTER:** Forest ram ni lovin, sanctuary atang khan boruak melah a buffer zone chhungah a awm an ti a ni. A hma zawnga min complaint lo khan min complaint thar ta a. Kan fight kan fight a, tunah chuan kan fight hlawhtling tawh e. Kan buaina kha kan chingfel tawh a, pawisa pawh kan dah fel tawh a. Chuvangin, khulai kawtchhuah pawimawh tak khu Silchar lama buai pawha chakkhai kan lakluhna tur pawimawh tak a la ni thuai dawn a ni.

Tin, power lamah hian pawisa kan hmuh reng reng hi tangkai tak hian hmang thin ila chu tun kan dinhmun hi kan thlen ka ring lova. **(Deputy Speaker:** Kan hun tiam 5:30 PM a ri tawh a, kan sawi tlang tir law law dawn em ni ang? (House-in sawi tlang tir a remti a.) Awle. Sawi zo law law rawh le.)

**Demand No. 39 - Power & Electricity:**

Tunhma khan RGGVY-a pawisa tam tham tak lo chhuak kha kan thatpui lo a, kan tichingpen a ni, a dik chiah chuan. 80% vel kha material component a ni a, hna an thawh hma hauhin kha bill kha pek an ni a. A hnu ah khan an thawk tha duh ta lova, terminate kha an chak ta zek zek a. Vawiina kan member tam zawk hian in hre pha kher lo ang a, khanglai hun kha. Khatihlai khan PAC chairman ka ni a, kan buaipui ber a ni. A paw ka ti em em a, ka ui a. Chubakah Power Department hi Mizoram-ah department upa tak a ni a, kum khatah mega watt 1 pawh chawh rualin a tichhuak ngailo a ni, tuna kan dinhmun kan en hian.

Chubakah, tunhmaa power project kan tih kha kan commission atanga kum reilo te te ah hmantlakloh, abandoned project 9 vel ka nei a. Khang kha sum sen thlawna vek a ni a, a

pawi khawp mai. Tin, Bairabi Thermal Project ngei pawh tikhuan zan khat pawh chhi ngam lovin a tawl zui a. Heng hi plan awm mumal lo, research hmang lova kan lo kal mawp mawp avang leh pawisa awm ang ang kan ban huam huam avanga thil lo thleng a ni a, a pawh khawp mai. Tunah hian smart metre kan introduce dawn a, a nghahhlehawm ka ti a. Bill dik lo tih vel a awm tawh dawn lova, kan in a bill endiktu a rawn kal reng kha a ngai tawh dawn lova, manpower kan save teuh dawn a ni.

Tin, kan Project hluihlawn tawh hnu leh Serlui B thlengin min upgrade sak duh company an awm a, “a sum inbuaipui a ngai lo ang, kan tum vek ang; kan siam zawh chuan chuti zat chu a free-in in dawng ang a, a bak chu in lei ve ang” an ti a. A dik chiah chuan pheichham kan man a ni ringawt. Hengte hi kan sawi nawi a, party thenkhatin press conference-te hial an ko kha a pawh ka ti a. Khatianga min tihsak tur kha hmun dangah kan hmu dawn em ni? Niminah pawh kan ngaithla tawh a, kan Serlui B project hlauhawm tawh zia te, siamthat a huphurhawm tawh zia t; khati chungah la tih hram hram kan tum chuan, eng emaw rilru dang kan pu tihna a ni; ram hmangaihna a ni tawhlo. Heng hi huai taka kan pal a hun ka ti. Tin, Tuirini te pawh tunah hian New Development Bank atangin pawisa kan puk dawn a, 80% central-in min tumsak dawn a, 20% chauh kan rulh a ngai dawn a ni. Heng te pawh hi a lawmawm khawp mai a, vanneihna ropui tak kan dawng a ni.

Tin, rebate hmu thei khawpa kan thawk hi, Power & Electricity Department-a thawktute zawng zawng thawhrim rah a ni a, an zavaia chungah lawmthu ka sawi duh a ni. Tunhma khan Pu Zualthaua khan, “Opposition leh ruling hriat hranna chu, current a lo thima, ‘Eu’ an tih chuan, opposition an ni a, an ngawih hmak hi chuan ruling an ni” a ti thin a. Tin, drone kan mamawh khawp mai. Cable zamna turin an han ti tan a, a video te ka lo en a. Drone atanga kan zam theih chuan muala chhuka, chhoha, thing kih ngai tawh lo leh ban phun teuh ngai tawh lo khan a kal mai dawn a, a eco-friendly em em mai a; chu chu a tam zawk kan mamawhin ka hria a. Hemi chungchangah hian department pawh rawn insum lo se ka duh a.

**Demand No. 18 - Printing & Stationery:**

Kan Opposition Leader khan Printing and Stationery te I&PR nena tihkawp kha, ‘tihkawp’ a tih khan, thil danglam vak a awm dawnlo, an thutna ngaiyah vek an thu dawn a, engmah buai a awmlo. Finance leh Taxation pawh pakhtah kan dahkhawm a, an awm ngai thapin an awm. Chutiang zelin LAD leh RD-te pawh pakhtah an awm ang a, an thutna an sawn dawn chuang lo; an function ngaiin an function dawn. Hetia tih hi kan duhna chhan chu, Secretariat level-ah manpower kan save thei dawnin kan hria a ni.

Awle. Ka department chan ho kha chu ka react dawn lova, hun a chep tawh bawk a. Ka Demand hi pass-pui ka rawn ngen bawk a ni e. Ka lawm e.

**DEPUTY SPEAKER:** Kan chawlh hun a lo thleng tawh a, kan chawl ang a, 6:30 PM-ah kan thukhawm leh dawn nia.

*(Recess at 5:34 PM)*

**6:30 PM**

**SPEAKER** : Aw le. Tunah chuan, kan Minister zahawm tak Pu F. Rodingliana'n kan sawihona te windup-a, sawifiah ngai a tihte rawn sawifiahin leh a demand te House-ah pass rawn dil nghal turin ilo sawm ang u.

**PU F. RODINGLIANA, MINISTER:** Pu Speaker, Governor of Mizoram recommendation leh i phalnain, heng ka demand-te: -

Demand No.	Department	Amount in ₹
18	Printing & Stationery	12,45,23,000.00
39	Power & Electricity	98,08,59,000.00
40	Commerce & Industry	60,77,42,000.00
<b>TOTAL</b>		<b>10,53,31,24,000.00</b>

te hi kum 2025-26 chhunga heng ka department chante inrelbawl nana hman atan he House zahawm takah hian ka rawn submit a, pass ka rawn dil a.

Pu Speaker, lawmthu sawia bul han tan ka duh a. Kan tum leh duh vang pawh ni lovin ram rorelna in sang berah Pathian khawngaihna leh mipuite duhsakna zarah hei vawi hnih lai mai budget ka'n han pharh ve a, kan zeiloh zia chu a hriat a. Pu Speaker, 'dai ngai loh ram dai' tih takah mahni duh lam hawi zawng zawnga ram vak, kawng bo au chiam chiamna hmun a nih loh thu te, i ding leh veia thute'n indem leh deu mai lovin, 'khati zawng khan aw' min han ti a, waviin ni thlenga duhsakna aw kan han ngaithla hi a Pathianthu, a lawmawm ka ti a. Hei hi hmangaihna aw a ni tih ka hriatin ka lawm hle mai a.

Pu Speaker, wawiinniah he hun kan hmang dawn tih hriaa hmun hrang hranga min tawngtaipuitute leh beiseina dang nei miah lova kan ramah Pathian rorelna he in sanga a lo thlen theihna tura chaw nghei-tlaivara tawngtaite an awm tih kan hria a, ka lawm em em mai a. An niin an beisei ang ngei hian wawiinniah he ram rorelna in sanga kan Member zahawm tak takte hian tawngtai mite duthusam leh suangtuahna hi kan hriatpui atan a hmasain ka'n sawi duh a.

**Demand No. 18 - Printing & Stationery Department:**

Kum 1966 khan Assam Sorkara DC enkawlina hnuaiyah awmin, kum 1972-a Mizoram UT kan nihin DC enkawlina hnuaiyah tho Information Department hnuaiyah wing pakhat anga awmin, 1980 khan directorate-ah hlankai a ni a. Tunah hian thawktu post hi 270 awm mekin, post ruak hi 169 a awm a. Kan indaihlo ve ang reng khawp mai a. Tunah hian Sorkar confidential leh Sorkar pawipang zawng zawng hi kan khawih vek avang hian Sorkarin year of consideration a puang chungin, nikum chhung khan thawktu 5 lai min lak belh sak hi kan lawm em em mai a.

CM hoa review meeting kan neih khan kan harsatnate kan thlen a. Digital Printing Press (black and white) lei phalna min pek mai bakah kum 10 chuang lai mai stationery item hlui tak tak tawh tihngaihna kan hriat loh tiral tura hmalak phalna min pe hi kan lawm em em mai a, kan CM chungah pawh waviin hian lawmthu ka sawi nawn leh a.

Pu Speaker, theihtawp chhuahin hma kan la a. He department hi a pawimawh hle mai a, department hrang hrangte'n min dawr a. Tunah hian Sorkar office 58-in min dawr tawhin,

nikum chhung khan crore 2 min pe a, crore 1 chu zirlaibu buaipui nan kan hmang a, a dang chu Sorkar pawipang tih nan kan hmang a ni. Nikum chhung khan 132 lakhs hmuin, Sorkar zemah kan chhung thei a ni. Sorkar dan dinglai angin Pu Speaker, tunkumah pawh hian tam zawka min dawr turin kan han ngen a. Tunah chuan Sorkar mamawh a tam thei ang ber phuhru turin kan inruahmanin, kan kawl kim ve hle tawh a ni. Tin, decentralization leh centralization te pawh zawmin, tunah chuan kan item te pawh awm tawh lovin min consent lutuk tawh a. Hemi avang hian Hand-holding hnuai a Mizo thar, Mizo siamchhuah leh zokutchhuakte pawh kan office ah leh kan mamawh hrang hrangah min phuhruk thei tawh dawn a ni.

Tin, Pu Speaker he department kan chan atang hian thil lawmawm em em mai pakhat chu, nikum atang khan zirlaibu khawih tannin, nikumah zirlaibu nuai 6 chuang kan chhu a; tun kumah hian Sorkarin kan kutah a dah leh a. Zirlaibu kan chhut dawn hian Education Minister nen hian kan sawi dun a. Kan naupangte hian an zirlaibu atang hian rilru thar an neih theih nan tiin, hei vawinni hian ka'n lekchhuak duh a, Pu Speaker, i phalnain; hei, a kawm te hi kan laminate thlap a ni. A chhunga paper hi a hma chuan chanchinbu ang a ni a, tunah chuan a var tha, 'virgin' an tih ang chi hi kan hmang a ni. Private school nen hian a lem chuang lo reng reng; hei hi private school a ni a. Chuvangin, kan naupangte pawh private school ang thoa rilru an put theihna tur hi zirlaibu atanga tan tha kan ti a; Education Department te nen kan sawi tlang a.

Tunah hian zirlaibu hi truck trip 10 chuang a lo thleng tawh a, a hun taka pek theih kan inbeisei a ni. Kuminah hian digital printer leh khawl hrang hrang neih kan tum a, chuta tan chuan Sorkarah kan thlen a, tun kum chhung pawh hian hmalak theih ngei kan inbeisei a. Hei hi kan neihtheih chuan Sorkarah revenue tamzawk kan chhunluh theih kan beisei a ni. Tin, kan ram Luangmual a mi pawh depot atana siam kan tum a, hei hi Sorkar Department-te pawhin an hman tangkai theih ngei kan beisei a ni. Tin, kan hmanrua leh kan hmunhma te hi chulmam a nilo viau mai a, kumthar lamah leh tun kum atang te pawh hian hengah hian hmathar lak kan tum a ni.

#### **Demand 40 - Commerce & Industries Department:**

He department hi directorate puitling a nihna a rei tawh viau mai a, chuti chung chuan Mizoram Industry hi kan la thang lo viau mai a, hmasawn a har a. A chhan chu, kan ram awmna tein a zirlo pawh a ni mai thei a, Industry hi Directorate of Commerce & Industries leh Directorate of Geology & Mining nen a inkawp a. Tunah hianin hemi hnuai hian industrial development wing te, handloom te, textile te leh commerce wing te an awm a. Heng bakah hian PSU kan tih - ZIDCO, MIFCO, MAMCO, ZOHANDCO leh KVI te hi Industry Department hnuai hian tun Sorkar hian tangkai taka hmangin, Sorkar tan pawh hlawkna tamtak kan hmu tawh a ni.

Pu Speaker, ram hmasawna tur hian industry hi a pawimawh em em mai a, tlangram lo neih bansan tur pawhin industry hi a bul niin kan hria a. Sorkarna kan lak hma atangin ZPM chuan permanent cultivation nei tur hian tan lak ngai kan ti a, chumi tur chuan industry policy tihthat te ngai kan ti a. Kan industry policy leh permanent shifting inzawm dan tur te kan ngaihtuah a, kan sawi thin a. Chu chu a taka hman turin industrial policy te tunah hian kan ennawn mek a ni.

Pu Speaker ka'n sawi duh pakhat chu, Mizote hi industry ah hian kan harhna a rei tawh khawp mai a, kan pi leh pute khan industry ah an lo thang harh hma viau mai a. Anmahni kutchhuakin puan bu te lo siamin, herawt te nen tuna kan incheina puan chei leh thil hrang hrang mawi tak tak hi an lo design chhuak a. Hengah hian tunlai kan thalaite harhchhuakin design mawi tak takte an lo tichhuak hi lawmawm ka ti khawp mai a. Pu Speaker, helai hmuna kan thut hma atanga industry leh power hi eizawna atana kan lo hman a nih avangin, vawiinah pawh hian kan tui lutuk ang tih chu ka hlau khawp mai a. Tunah hian, 'heti lai hi chu aw' tia kan lo sawi thin han chul mam theia ka awm hi ka lawm hle mai a.

Pu Speaker, industry a than dawn chuan, power-a hmasawn a ngai a, power man tha taka pe tur chuan industry hi a than a ngai bawka ni. Power leh industry hi nupa ang deuh an ni a, inchawmtawn a ngai a. Industry leh power hi chu kaihkawp tlat a ngaih avangin, theihtawpin hma kan la a. Hemi tur pawh hian industry neitute leh power hotute nen pawh joint meeting te nei tawhin, tuna industry neitute harsatna lian tak mai chu sutkian a lo ni ta a. Industry neitute'n power connection an lak dawnin, entrepreneurs te ruaiin leh anmahni duh zawngte approve a nih chuan, an lei thei tawh dawn a, hei hi industry-a bung thar niin ka hria a, a lawmawm hlein ka hria a ni.

Tin, industry hmasawn tak tak tur chuan policy a pawimawh a. ZPM hian policy kan duan lai atangin Mizoram Preferential Purchase Rule, 1994 hi kan ngai pawimawh em em mai a. Kum rei tak chung a bu keu lohin a awm a, hei hi kan ram thanna tur a ni tih kan hria a, kan policy kan duan lai atangin kan enngun a. Pu Speaker, hei, cyclostyle a chhut a la ni a. Kan sorkar hnu hian hma kan la nghal a, tunah chuan kan ram nen inmil turin 'The Mizoram Procurement Purchase Policy' tiin, MSME, 2025 tiin kan siamrem ta a. Hei hian a ken tel chu, Mizoram-a tharchhuah te hi L1 a nih chuan, 12% pawhin lo sang se hna kha a hmu dawn a ni. Chu chu kan entrepreneurs te tan a tha em em a ni tih kan sawi duh a. Hei hi sorkarin priority kan pek ngei ngei a ngai a. Pu Speaker, hei bakah hian hemi in a ken tel pakhat chu, Mizote thil siam, MSME kutchhuak a nih chuan department reng reng hian an thil lei turah 25% hi an la ngei ngei tur a ni a, hei hi dan angin tunah chuan kan lo hmang tawh a. A hmam dan angin kan nei tawh a; amaherawhchu, a bu hi kum 20 chuang keuloh a nih avangin kan hmang mumal lova, tunah chuan kan exercise-in, hman ngei ngei a ngai tawh dawn tih nangmah kaltlangin ka sawi duh a.

Pu Speaker, hei bakah hian, Industrial Policy, 1989 atanga kan neih tawh vawi tam tak ennawn chu industry neitute tan a funkim loh avangin, sorkarna kan chelh atang khan kan ennawn leh a, Mizoram Industrial Policy, 2025 chu tunah chuan hman theihin a lo awm ta a ni. Hei hi kum 20 chung budget head-a awm ngailo a nih avngin, industry neitute tan a luhai thlak em em mai a, kan sorkar ni atang khan budget head ah kan dah a. Tunah industry neitu mi 29-in cheng 111,00,000 an dawng tawh a, kan lawmpui hle a ni. Hei hi sorkarin Investment Policy, 2024 kan duante nena inthlunzawm turin tunah hian hma lak mek a ni.

Pu Speaker, Mizoram-ah hian industrial estate hmun 14 ah a awm mek a. Heng zingah hian Industrial Estate Zuangtui, Maumual, Lengte, Lunglei Pukpui leh Lawngtlai ah te hian mi 1962-in regular takin eizawna nan an hmang a. Heng an thil siamchhuah atang hian mi tam takin sumdawn nana hmang chhawng lehin, kan ramin a hlawkpui hle a ni.

Pu Speaker, thil mak deuh mai chu, Luangmual bik hi han sawi ta i la. Phalna neia hma la chu mi 53 an ni a, phalna neilo ram luah ve tawp hi mi 89 an awm bawka a. Mi 53 atang

hian a zatvein hma an la a, a zatve hian hma an la lo a. Heng phalna neilo tehi dapchhuaka hma la turin kan Revenue Minister te nen June Ni 4 khan meeting kan nei a. Tin, Law Department hote nen meeting kan neihah chuan, mi engemaw zat phalna nei nia insawite an awm tih kan hmuchhuak a ni. Tin, phalna nei nia kan hriatte pawh kan han enchiang a, phalna an neih kha alo diklo a ni tih kan hmuchhuak a. Tunah hian phalna nei, hma la lo mi 10 kan cancel tawh a, allotment kan pek mi 20 chuang cancel leh turin hma kan la mek a ni. Hemi bawhzui tur hian kan sorkar Ukil-te leh department hrang hrangte nen joint-meeting neiin, an dan bawhchhiat te leh an hmalakna, min rawn chhui letna tur te kan hrilhriat tawh a ni. Hemi bawhzui tur hianin Revenue Department leh Industry Department aiawhte joint committee din a ni a. Kan Industrial Estate Lengte leh Luangmual te hi kan sum awm ang angin tuanah hian infrastructure development kalpui mek niin, PCC flooring kan kalpui a.

Tin, Luangmual bik hi power dedicated line pek tumin ma kan la mek bawh a ni. Tin, Lengte pawh power supply tha zawk pek tura hma lak mek a ni a. Lengte-ah hian unit 29 hnenah allotment pek niin, unit 15 tunah hian an function mek a. Heng function-te pawh hi an duh dan danin an lo invalh avangin department chuan uluk zawka enin, an trade allotment te pawh siamrem turin tunah hian hma kan la mek a ni.

Pu Speaker, thil mak duh mai dang leh chu, kan House Leader, kan Chief Minister bialah hian Industrial Estate awm angin record a awm a, develop turin hma lak kan han tum a, a hmun kan hmu zo reng reng lo mai a. A ram zau zawng hi Lammual let 14 vel a ni a, a ram kan hmu zo lo hi a mak khawp mai a. Chu mai chu ni lovin, Bilkhawthlir-ah pawh ram nei angin record-ah chuan a awm a, amaherawhchu, development ti turin a hmun kan hmu zolo bawh a ni. A hmaa 14 nei anga inziak kha, vawinniah he House ka'n hrilh duh chu, Industrial Estate ram 12 chauh kan nei ta a ni.

Pu Speaker, kan rama Industry neitute'n harsatna lian tak an tawh thin chu, transportation hi a ni a, hengah te pawh hian theihtawp chhuahin tih dan tur kan ngaihtuah a. Tunah hian Pu Speaker, manufacturing unit hi 147 awmin, heng atang hianin mi 2000 chuangin eizawna atan an hmang a chuta tanga an thil siam chhuah atang hian mi 7000 velin la chhawngin eizawna atan an hmang a. Tunah hianin ka thalaite entrepreneurs lamah an harh thar nasa hle mai a, chung pui tur chuan Hand-holding lam atangin dilna kan hmuh tawh chinah mi 100 telin hma rawn lak an tum hi kan lawm hle a ni.

Commerce Wing: Pu Speaker, Commerce Wing bikah hian - Bazar 157 awmin, direct-a kan enkawl chu 21 a ni a. Heng atang hian nikum chhung khanin Sorkar zemah ₹113 lakhs kan chhung a. Tin, Vaivakawn Bazar SASCI sumin sak kan tum mek a, hei bakah hian Commerce Building Peter Street ami hi sak that kan tum bawh a. Hei hi Pu Speaker, ka'n sawi zau deuh duh a. Thingtlang leh hmun hrang hrangah mahnia thil lo siam ve dawr luah tur nei lote an awm a. Chapchar Kut-ah te pawh khan khang hote pawh kha an rawn inzuar chhuak a, a lawmawm khawp mai a. Khatiang ho tan khan a kar khat ang chi te, ni 2-3 ang chi tea luah hawh tura tih a ni a. Chungte chu tunah hian hma lak tum a ni.

Tin, nichina kan Opp. Leader-in a rawn sawi kha, Commerce Wing hnuaiah hian kut hnathawk tu ten thlaithar hralhna kawngah puihna tur kawng 'The Mizoram Agriculture Product Prohibition Movement Amendment Order, 1999' tlawh chhanin state dang atanga Mizoram a thlaithar kan lakluh zat market dinmun thlir chung a bithliah tura hmalak a ni

a. A chhan chu, dawhfawh, zikhlum kan tharte aia tlawm zawk phai lam atanga lo kal a awm thin a. Hengah hian kan kut-hnathawktute'n harsatna an neih thin avangin, tunah chuan dan dinglai angin hengte pawh hi ruahmanna kalpui tum a ni tih kha Pu Speaker, ka sawi duh bawka a ni.

Handloom Wing: Tin, Pu Speaker, Handloom Wing bikah hian, tunlai hian hmasawmna tam tak a awm a, a lawmawm ka ti a. Kan han chhut a, kan Mizo hmeichhiate hi tunah hian nuai 7 vel an awm a; lawmawm deuh mai chu, kan chhut danin nuai 7 te hian puan an bih deuh theuh angin kan ngai a, puan hi pahnih-pathum an nei a, nuai 25 mamawh ang deuhah kan inngaih avangin, a market a tha hle a. Kan lawmna em em chu. kan Mizo-hmeichhiate hian puan bih hi dan angah kan nei ta a, kan hunpuiah chuan puan bihlo an awm ta mang lo hi kan lawm a. Hei hian demand a ti sang em em a ni. Kan hmeichhiate pawh hei hi uar deuh deuh turin kan inchah a ni. Pu Speaker, tun Chapchar Kut kha, nichinah khan zawhna a awm a. Exhibition neihna ah khan stall hrang hrang atanga sum kan hmuh, keimahni lo chhut dan chuan, ₹126 lakhs lai mai khangrawn inzuar te khan an inhralh a ni tih kan hria a. Henga an hralh tam ber chu kan traditional dress hi a ni tih ka sawi duh a.

Pu Speaker, Mizoram sorkarin kartin Nilaini apianga pisa kainaah hnam-incheina inbel tura order a chhuah avangin handloom inhralh hi a pun phah em em mai a. Tin, Pu Speaker, handloom neitute'n tuna min beisei chu, he kalphung-thar sorkarah hian ni 2 puan a nih chuan tuna kan inhralh hi a letin a pung dawn a, hei hi khawngaihtakin min lo sawi sak rawh an ti a, vawiinah hian handloom neitute aiawhin ka han sawi sak a ni e.

Handloom hi tunah hian mi 12 kan han zirchiang a, heng mi 12 a lian deuh deuh kan han thlan chhuah atang hian hnathawk nghet hi 1293 an nei a. Anni hian Mizoram hmun hrang hrangah mi singkhat chuang hnenah puantahna leh hmanrua an sem chhuak a. Chung chuanin 3000-5000 te in puan pakhat an tah a. Handloom hi tunah chuan industry lian tak a ni tih ka sawi duh a Pu Speaker.

Pu Speaker, UNNATI ah central sorkarin crore 453 lai min pe a. Central sorkar hi a in hawng viau mai a. Amaherawhchu, hei hi bank nena in tie-up tlat a nih avangin tunah hian mi paruk chauhin registration an la ti thei a. Hei hi kan bank lam te pawh an in hawn deuh hlek a ngai kan ti a. Kan Chief Minister kan ngen a, a niin Mizoram a bank awm zawng zawngte koh khawmin a deposit chauh um lovin kan ram kan entrepreneurs te tana in hawng turin a ti a. Hei hi kan lawm khawp mai a.

Central-in industry-a Northeast Development atan special package a rawn pek reng reng hi bank nena in tie-up vek tur a nih avang hian kan bank neitute hi an pawimawh em em mai a. Chuvang chuan, helaia kan CM kan ngenna pawh hi min bawhzui zel turin vawiinah hian ka ngen duh a.

Geology & Mining: Pu Speaker, Geology & Mining hi mi paruk laiin an sawi a. A pawimawh tawh khawp mai a tunah chuan. Engkim ti dawn ila anmahni hi kan bultanna a ni vek tawh a, leilung hausakna haichhuaktu an ni a, tunah chuan. Kum 2025 pawh khan cheng nuai 696 chuang an hmu a, heng bakah hian lung leh balu atangin nuai 45 lai sokar zemah an chhung a. Tin, Geology & Mining tih changtlunna atan National Mineral Explorer Trust atangin leilung hausakna zawn chhuahna tur leh thil dang tul atan ₹488 lakhs min rawn pe hi kan lawm hle a. Hei bakah hian NEC atangin Mizoram a check gate

hrang hrang tih changtlunna tur leh online hmang mining list leh permit dilna tur te, gate hrang hranga application data siamna tur te, royalty leh online hmanga payment tihna tur ₹469 lakhs minrawn pe hi kan lawm hle bawka ni.

Tin, DM&R atangin leilung zirchianna geo-technical investigation hrang hrang tihna tur khawl changkang ber ber lei kan duh chu kan dilna te min tih hlawhtlin sakin, ₹137 lakhs GEM portal kaltlangin tunah hian kan order meka ni. Pu Speaker, Rotlang West, Lunglei District ah tunah hian lungalh thei (coal) zawn hna thawh meka ni a, hei bakah hianin Thingmun Block ah drilling tih leh tura hmabak a ni.

**Demand No.39 - Power & Electricity Department:**

Power tello chuan tunlaih kan awm thei tawh lo a, au awmna te, insukna te, engkim atan hian kan hmang tawh a. Mizoram-ah electric hmanni hi a rei tawh ang reng khawp mai a, Mizoram electric hi kum 1961 khan Assam Electricity Board enkawlna hnuaiiah Jorhat electric division in min enkawl in sector officer foremen pakhat enkawlna hnuaiiah awmin kum 31 chhung lai mai head of department ah a ram leilung fa kan awm lo a, hei vang hi a ni maithei India rama state ten an mahni puala tuikhuah lian tak tak an neih laiin, kan ramah tuikhuahna tur potential 3665 megawatt a awm laiin tunah keimahni pualin 38.55 megawatt chauh kan nei a. March thla a keimahni thar chhuah chu chauh rualin 3 megawatt chauh a ni.

Pu Speaker, Electric Department hi kum 1975 khan PWD atangin kan indang a, kan indan khan internal wiring hi min lo indan tel miah lo mai a, a hunlai kha chuan a awm viau a ni maithei. Hei Pu Speaker, hmanni khan chhiat kan han tawka, zing atangin kan Chief Engineer te nen helaiiah kan harsat hlauin an phu luai luai a. Theihtawp chhuahin transformer atangin kan han buai a. A chhung kan han lut a, ‘helai chin bak hi chu in khawih theilo, PWD chan a ni’, an ti tlat mai a, a buaithlak khawp mai a, Electric Department kan nih chuan a transformer atanga plug thleng hi chu kan khawih hi a awmin ka hria a. Tunlai hian hei department-ah thing leh mau in nawh lai niin kan hria a, Pu Speaker, nangmah kaltlang hian, he thil 1987-a min indan loh kha PWD hian min indan turin ka ngen duh a ni. A chhan chu, khatih hun lai kha chuan JE/SE pawh nilo, SDO-in min indan a. Tunah chuan E-in-C kan nei ve tawh bawka, kan chan hi a mawi hmel riauin ka hria a, ram pawhin a hlawkpuiin ka ring a. Chuvang chuan, vawiina kan session hi hman tangkai ka’n tum a ni e.

Pu Speaker, ZPM chuan power-a intodelh hi a ngai pawimawh em em mai a. A chhan chu, kan ramin sum a hailuh theihna tur leh vaibelchhe tel kum tina a luang ral hi kan save theihna tur niin kan hria a. Hei hi kan ram development-a kan hman theih chuan kan ram tan malsawmna a nih kan beisei bawka. Department-a kan luh tirh khan action plan kan siama, power-a intodelh hi priority ah kan dah a. Chung atan chuan tuikhuahah hma kan la nghal chat a, theihtawp kan chhuah a. A hlawhtlinna te pawh kan hmu nghalin, Tuivai te a BPI kan en a, central ah kan thlen a. Tuivai hi a tirah chuan megawatt 210 a ni a, Manipur a chim dawn avangin harsatna tawka theiah kan inngaih a, BPI siamthat central ah kan dil a, anni pawhin minrawn phal a. Chu mai chu nilovin, BPI siamthatna tur atan crore ₹20,30,000 chuang lai mai pawisa minrawn pe a, chumi hmang chuan hma kan han la a. A BPI siam turin Ernst & Young young minrawn thlan sak a, anni nen hian kan inbia a. Thla 18 chhunga zo turin central chuan minrawn ti a. Kan Chief Minister hian a rei deuh hlek lo maw a tih avangin an han indawr nawn leh a, harsatna hrang hrangte an han sawi

a. Chutah chuan kan department lam atangin, ‘kan tih theih zawng zawng kan ti ang’, kan ti a. Tichuan, thla 6 chhungin zo turin kan inrem thei ta a. Tunah hian a BPI draft chu rawn peihin, he an BPI draft ah hian 210 mW atangin 113 mW ah a rawn titla ta a, heti hi chuan Manipur a chim dawn lo a ni. Heta lawmawm e mem mai chu, khawiah pawh khuah tir ila, nungchate harsatna an tawh loh nan 20 mW kha a luan ngaia a luan rengna tura tih a ni a, chutiang tur chuan hma an rawn la a. Hei hi a BPI hi kan approve theih chuan Tuivai pawh hi hma lak theih tur a ni a.

Pu Speaker, thil lawmawm em em chu, Tuirini hi kan sorkar hmasaten hma lo lak tawh an pamtul kha a ni a, kan sorkar hian theihtawpin hma kan la a. Nikum August thla khan sorkarin hmalak phalna min rawn pe a, kan bawhzui char char a. Kei pawhin Central Minister ka zu hmuin, Minister hrang hrangte kan zu dawr a. Tun, Ni 13 khan Tuirini khuah phalna chu min rawn pe ta a, a lawmawm hle a ni. Hei hi kan state ta tur liau liau a ni a, 24 mW a ni. Chumai chu ni lovin, nimin piah lawk khan a finance-tu tur te pawhin min finance tur thu an rawn hrilh a, kan Secretary pawh hi rawn kal turin an ti a. Mahse, vawiin niah helaiah awm a ngaih avangin a la kal thla lova, hemi kan tih zawh hi chuan a kal thla vat ang a. A rang thei ang bera khuah kan tum a, tun kum hi chuan a lungphum te pawh kan phum hman kan inbeisei a ni.

Tin, hei bakah hian, Tlawng Lui hi a khuah san zawng 120 m a ni a, a chim chin tur area hi 946 kms a ni a. Tuikhuah hi kan chhawr tangkai em em dawn a. A Pump house hi lei hnuaia phum lova surface tur anih avangin, a power house anga chhuak ringawt a pawh hi an sawi dan chuan, Dihmunzawl pawh gravity in a va pha dawn a ni; tuna Pu Nite-a te buai buaina hi an buai tawh dawn lo a ni, hemi kan khuah theih chuan. Chumi mai chu ni lovin, sangha khawi nan te leh tourist attraction atan te pawh a tha dawn viau a ni te pawhin an sawi a. Hei hi, lawmawm leh deuh mai chu, tuna e-flow an chan atang hian consultancy-in hna kan lo thawk leh ang e, an rawn ti a, hei pawh hi ngaihtuahnaah kan la hmang leh turah kan ngai.

Pu Speaker, tuikhuah hi mi thenkhatin tul lo lek lekin an sawi a. Power kan mamawhna a san zel chuan, kan power source tuna company hrang hrang atanga kan lei hi tun atanga kum 4-5 ah chuan kan quota hi kan ei zo dawn a ni. A chhan chu, kum 2020 - 2025 chhunga kan power chu, 2020 ah 132 mW kan hmang a, tun kum January thlaa kan mamawh san lai ber khan 165.33 mW a ni. Kum 3 chhunga kan mamawh a thanna hi 33 mW a ni a, hei hi sang tak a ni. Chuvang chuan, pawisa pawh nei ila India ramah company hrang hrangin tunah chuan lei tur kan inchuh tawh avangin harsatna kan tawk dawn tho tho a. Chuvang chuan, keini chauh hi tunah chuan tuikhuah tur nei tha kan ni tawh a, pump storage ah phei chuanin India rama pump storage nei tha ber kan ni a. Hmannia Power Ministers Conference-a min hrilh dan chuan 15000 mW chuang potential kan nei a ni. Chuvang chuan, helama tan kan lak hi a ngai a, kan state source of income tha tak a nih hi ka beisei a. Tunah hian kan power leina, sorkarina Mizoram a lo thlennaa kan chawi hi a tariff dik tak regulation commission chhut dan chuan, 11.61/unit a seng a ni. Heng te anih avangin, keimahni puala tuikhuah hi chu kan neih mak mawh a ni.

Pu Speaker, tuikhuah hi keimahni pual pawhin kan lo buaipui ve tawh a 2005 khan Tuiphal khi kan lo buaipui ve tawh a; khatih laia kan Chief Minister pawh khanin phalna min pe a, khuap leh turin min ti a. Khi khi khuap thei ila chu ₹6/- tling lovin sorkarah kan hralh thei dawn a. Tin, khawchhak lam tan chuan transmission loss miah lovin cheng ₹6/- tling lovin

kan hralh thei ang a, sorkar tan chuan a hlawk hle turah ka ngai a. Hetiang hi midangte pawhin hma la thei se kan ti hle a ni.

Pu Speaker, kan sorkar hian power-a intodelh turin kawng hrang hrangin hian hma kan la a, pump storage hi kan buaipui nasa khawp mai a. Tunah hian Tuichang Lui 53 mW survey leh investigation kan ti mek a, hei hi kan hlawhtlin chuanin sum tlem te sengin megawatt tam deuh kan tharchhuak thei dawn a ni. Pu Speaker, hei hi kan sawifiah deuh hlek duh a. Tuichang hi 3 meters lekin kan khuap ang a, Vankal bulah kan pump chho ang a, chu chu awih dana kha meter 500 chuangin a khawh thla dawn a. Chu chuan 52 mW a pechhuak dawn a ni. Khilamah meter 10 chauh kan khuah dawn avangin ram a heh lo a, environmental tan pawh a hek lo a, ram pawh a tichhe tlem dawn a ni. Kan Chief Minister pawhin hei hi min phurpui khawp mai a. ‘hei hi chu kan ram tan a tha ang; a dang inhmuh leh tawh em’, te a rawn ti deuh reng a, kan Engineer te pawhin khuah tur pali-panga an hual tawh a. Hei hi kan tih theih chuan, kan source of income tha tak turah kan ngai a. Hemi tur hian hmanni khan kan Engineer panga kan tir a, India rama pump storage neite zu zirchiang turin. An rawn hlawhtlin chuan keimahni pualin DPR te pawh kan siam thei turah kan ngai a, hei hi kan department ang pawn kan phur hle a ni.

Pu Speaker, Mizoram ah hianin nikum March thla thleng khan consumer 293238 kan awm a, hemi chawm tur hian distribution transformer 3426 awmin, private 1022 an awm bawk a, a bak zawng 2404 hi sorkar enkawl a ni. Heng transformer 54% te chu overload an ni a chung zinga 375 hi overload mai nilovin, puak mai thei a ni; 50% aia a san hian overload kan ti a, chu chu kan dinhmun a ni a. Chung zinga a load na zual te chu nikum chhung khan 49 kan thlak thei tawk a; hetiang zela kan kal chuan kum sarikh chhungin a puak mai thei pawh hi kan thlak thei chauh dawn tihna a ni. Vawiinnia ka’n sawi duh chu, a theih nge theih loh ka hre lova, Pi Rinpuii’na MLA-te pawisa min thawh tir ang khan, kan MLA te hian nuai 5 theuh thawh ila, a bak zawng tum ila, eng emaw zat chu kan bialah theuh hian 500 kVA kan rawn pe che u ang a, tichuan a ziaawm deuh mai lo ang maw tih te ka ngaihtuah a; transformer kan neih theih dan tur hi kan ngaihtuah nasa khawp mai a. Hei hi Pu Speaker, a theih leh theih loh min lo zirsak turin ka’n ngen duh bawk che a ni. Hemi chawm tur hian transformer kan mamawh viau a ni.

Pu Speaker, kumin hi P&E Department hian transformer kan lei tam ber tum a la ni a, kan lawm khawp mai a. Kan indan tirh atang khan kum khata kan lei tam ber niin kan hria a, hei hi achievement ropui takah kan ngai a ni. Pu Speaker, Aizawl khawpui chhung bikah hianin sub-station 9 leh a power transformer 34 a awm a, heng zinga 90% hi a overload tawh a. Power transformer siam chhung ringawt pawh hi ni 90 vel a ni a. Chuvang chuan, kan House Leader hi finance minister a nihna angin min ngaihtuahpui kan han ngen nghal a. Hei hi sorkar anga mualpho theihna thil a nih avangin kan zavaia hriatah ka’n sawi duh a.

Pu Speaker, heng zingah hian Chawnpui transformer te, Mualpui transformer leh Tlangnuam transformer te hi engtiklai pawha chhe thei reng dinhmunah a ding a ni tih hi House ka’n hrilh duh bawk a. ZPM sorkarah hian current hi chhe ta thut anga ngaihna hi a awm lian ang reng a, nikum hmasa thla ruk chhung, June – December, 2023 khan minute 5 chhung power khaih lak a awm a, 2023 khan wawi 4793 khailak a awm a. Kan sorkar hnu June - December, 2024 khan wawi 3725 a awm ve thung a, hetah hian hmasawna hnathawh avangin wawi 195 load-shedding a awm a. Hei hi Aizawl khawpui chhunga ‘hruidum kaih’ kan ti mai a, ABC cable a ni a. Kan sorkar hnua current a thim zah chu wawi

1000 chuang a ni. A belhkhawma hi minute 12816 a ni a, a ni zawng chuan ni 9 ang a nih chu; chu chu darkar 213 leh minutes 6 a nih chu. Kan sorkar-ah hian a thim ta thut thinah inngai a, Magic thiam ang deuha 'awm rawh se' tia ti eng mai thei turah te min ngai niin ka hria a. Chuvang chuan, kan thim tlem zawk tih ka sawi duh a ni. Pu Speaker, tumah hi indem tur chuang kan awm lova.

Sawi tak ang khan kan power mamawhna hi tun kum 5 chhung khan 45 mW velin a thang a. Kan hmanruate a than siloh avangin loh theihloh a ni tih kan hriat a thain ka hria a. Aizawl khawpui chhung bikah hian current mumal zawka a awm theihna turin department hian hun rei tawh tak atangin ruahmanna kan lo nei tawh a. AR ramchhungah leh Capital Complex ah sawn 33 sub station a awm ngei ngei a ngai kan ti a. A chhan chu, tuna kan sub-station awmna hi dai pawn hlir a ni a, chuvang chuan 11 kV line hi a kal thui lutuk a, duh angin power supply kan inpe tha thei lova. Hei hi kan khawl thilte leh kan computer ten a tawrh a vangin, tunah chuan AR an chhuak ta bawk a, helai hmunah hian Sub-Station kan inbun theih ngei ka beisei a ni.

Pu Speaker, Chhimlam kha, tawng mawi lo nilo se, anmahni pawhin 'min hlamchhiah bik' an ti a. Tun sorkar thar hi chuan kan hlamchhiah lo che u a nia; in tan hian hna kan thawk nasa khawp mai. Ni 19, ka office tan Ni atang khan kan thawk char char a. Chawnhu a lar khawp mai a, Chawnhu - Khawiva kha thla thum chhung a chhia kan zawng a, hmun 102 ah a dish a lo chhia tih hmuhchhuah a ni a, mit a hmuh theih si loh khan a then te chu a lo chhia a. Ruahtuiin a nan hlum kha a lo ni chiah a, ruah an tlak hlek khan a khi ah tui a lut a, earthing a lo pe a, chu chuan a lo ti trip thin a ni. Chu chu tunah hian a thlak hna kan thawk a, hmun hrang hranga thingte kan pawt khawm a, current a thim a ngaih thin avanga damdawi-ina thawktute an buai lohna tur te kan ngaihtuah bawk a. Chutiang chuan hma lain, tunah hian 68% thlak tawh a ni a. Theihtawp kan chhuah a ni tih min lo hriatpui ula. Hemi chhunga current thim avanga harsatna in tawhah thupha kan han chawi nghal a ni. Chawnhu 132 kV line-a polymer dish tuna a thar kan thlak hi 82% kan zo tawh a; tin, a hrui te pawh kan thlak a ni. Tin, Sub-Station 5 kan siam belh dawn bawk a, kan duhsak viau che u a ni. ZPM sorkarah hi chuan opposition in vannei mah mah zawk a ni.

Pu Speaker, kan sorkar hian kuthnathawktute a ngaipawimawh khawp mai a, nichin pawh khan an rawn sawi a. Zau 67-a farmers 2600 te eng kan pe tawh a, kan kuthnathawktute pawhin an hmang tangkai hle a. Hei hi sorkar ang chuan kan chan nasa khawp mai; mi 16 lekte an awm a, 15 km hla ah te kan pe a ni. Khami ransmission te kha a tam em em mai a, power bill hi an la chawi lo a ni. Chuvang chuan, kan hloh hi hlepah kan chhiar rih a. Power bill nichina kan hmuh te pawh kha kan hlep a la ni zel a ni.

Pu Speaker, power-a intodelh tur hian kan sorkar tuk atangin hma kan la nghal a, sorkar building hrang hranga solar plate hman tangkai vak lova awm tawh te hi kan kan sorkar hma atanga Policy Drafting Committee-in kan lo chhiar tawh a ni a. Sorkar office-a hman mang loha awm solar plate hi 17,300 chuangte hi kan sorkar khan CM ah lehkha kan thehluat a, Ni 13 December-a Council of Ministers thutkhawm hmasa ber chuan sorkar office chunga solar plate leh a kaihhnawih zawng zawng Power Department kutah a dah vek tawh a. Heta atang hian 3 mW power siamchhuahna tur atan hma kan la mek a. Heng atan hian sorkarin pawisa min pe tawh a, heta tang hian sorkar pawhin sum eng emaw zat kan hmuh theih kan beisei a ni.

Tin, Thenzawl-ah hian 10 mW tun kar chhung hian technical commission neih tum a ni a. Heng hi Pu Speaker, kan sawi duh chu, he sorkar kan chelh tirh atang khan kan hmachhawp reng reng hi a hun hmain kan zo zel a, hei pawh hi a hun tiam hmain hawng hman turah kan inbeisei a, a lawmawm kan ti a. State ta tur liau liau a ni bawk a. Tin, Sumsuih 5 mW pawh kan ti leh mek a ni. Pu Speaker, Central sorkar hmalakna PM-Surya Ghar Muft Bijli Yojana hnuai ah roof-top solar hmalak mek a ni a, he scheme ah hian Central sorkarin 60% minrawn tum a, State dang zawng zawngin an tih ve loh kan sorkar hianin 25% kan tumsak a, hei hi Central Minister pawh a lawm khawp mai a, State dangte pawh hei hi ti ve turin power ministers conference ah pawh khan a fuih a ni. Hmahruaitu kan nih hi kan lawm a, hei hi Zoram mipuite pawhin kan hman tangkai ka duh a ni. Hetiang subsidy hi a la awm ngai reng reng lova, Central in 60% arawn tum a, keinin 25% a nih chuan, mipui chawit tur a tlem hle a. Heng atang hian tunah hian dilna 648 lo lut tawhin, chungami 122 an install tawh a, Sorkarin mi 75 hnenah pawisa kan pe chhuak tawh a ni.

Pu Speaker, Aizawl khawpui chhunga hrui hnawk lutuk, kan ngaimawh em em hi tuna kan sorkar hnuah hian hma kan han la a, Smart City pawisa te RDSS sum te nen tunah hian 11kV, 115 kms daih turah 6.2% hna kan zo tawh a. LT line 575.24 km siamthat turah 42% zawh a ni tawh bawk a. Hei hian hmasawna arawn keng tel a, bakah smart metre hman tura hmalakna tur pawh hei hian thuitak arawn keng tel bawk a ni. Tin arawn ken tel dang chu, ban tuiek thina kha tuiek thei tawh lo a; he ban hi tunlaia ban-var kan hmuh thin hi organized ban a ni a. Hei, kan sorkar hnu hian in hma kan han la a, a ban size a dik a, a height a dik bawk a, a weight hi a dik vak lova. Chuvang chuan, wawihni kan buk tir a; a ban er thin pawh kha a awm tawh lo ang, kan sorkar hnu hian; a buk a dik tawh a ni. A then chu 10 kg tein a lo dik lova, tunah chuan a ban pawh a rit tawh a ni. Sorkar tharah chuan thil hi a ritnalh zel tawh a ni.

Mizoramina Power Supply semdarhna a tana 133 kV sub-station pawimawh tak tak 3 - Luangmual, Zungtui leh Sihmui te hi thlunzawm niin, Ni 8.3.2025 khan kan hawng thei ta a. Hei vang hian power lakluhna double source kan neih tak avang hian, Inrinni tin deuhthawa thim thin kha tunah chuan a thim kan beisei tawh lova. Pu Speaker, Mizoram pumpui hi double source nei turin hma kan la a, tunah hian hna 1/3 kan zo tawh a, kum 2-3 ah chuan khawilai line pawh lo chhia se, helam atangin kan kal tir dawn a. Tunhnaia cyclone Remal-ah pawh khan hei hi kan chhawr viau a ni. Cyclone Remal vanga power supply khaihlah kha kan hria a. Aizawl khawpui chhungah ringawt pawh hmun 1214-ah thingtlu leh leimanin avangin kawngte a chhia a, emergency meeting te kan han ko a. Kan department hotute ka zawt a, 'hetah hian eng hun chhungin nge an zawh theih ang' ka ti a. 'Sir, chak takin thawk ila, karhni chhungin kan zo thei ang' an ti a. 'E he!' ka ti a ni. khami chhunga whatsapp vela min han kap tur kha a huphurhawm ka ti khawp mai a. Amaherawhchu ruahmanna kan han siam a, theitawpin hma kan han la a.

Pu Speaker, heta lawmawm em em mai chu, kan thawktute an fakawm ka ti a, nihni leh zan khatah kan zo vek a nih chu! Heta thawktute inpekzia hi lawmawm ka ti a, pawisa a hman mai theih si lova, sorkar pawisa. Thil lei te leh zanah sawhchiar te siam a ngai a; zan dar 12-ah te banah an la lawn a nih chu, ruahsur karah! Hei hi Zoram mipuite pawhin min hriatpui thain ka hria a. Tower ban ringawt pawh hmun sarh-ah a hman theih loh leh hmun thum velah a tlu chhia a awm a, chu chu thla khat tling lo ah Zoram hmun hrang hrangah supply a pangngaiin kan pe leh thei vek a; hei hi kan department-a thawktute inpekna vang a ni tih ka hriatin ka lawm hle a ni. Heng zawng zawngah hianin engmah harsatna awm

lova, ruah sur hnuaiiah chhun leh zana kan thawhna kara hriselna min petu kan Pathian chungah pawh lawmthu ka sawi a ni.

Pu Speaker, consumer-te hi kan tan a ngai khawp mai a, consumer supply chungchangah hian connected load hi kan bawhchhe nasa hlawm em em mai a, heng siamtha tur hian department pawhin hma kan la mek a. Chung zingah connected load hmang sual nasa berte chu sawi a hrehawm ang reng khawp mai a, Biak-in an ni a. Biak-in 259-te hian an connected load aia a let 40-a sang hmangin dan an bawhchhia a ni. A chhan chu Biak-in kan sa a, kan sa lian zel a, kan sound system a lo tam zel a; a thenin AC te, lift te kan ti a, light te kan ti tam zel a, a tira connected load ang khan a then chu kan bill a.

Tunah hian Pu Speaker, kan current bill hi a lo tam dawn a ni; chu chu kan hriat lawk a ngai. A diktak kan chawi tawh dawn a ni. Tunah chuan a diktak kan chawi lova, connected load a tira mi ang kha a ni a. Kei ngei pawh ka lo bawhchhe nasa khawp mai a, AC kan lei a. AC kan lei dawn te hian department-ah in report vek a ngai, connected load kha tihpun zel a ngai a. Chuvang chuan, heta awmho pawh hian kan bawh chhiat vek ka ring a ni. Chu chu vawiin atang hian dan angin kan kal tawh dawn a. Kan electric bill a lo pung a nih pawhin, kan electric bill a pung a, a multiply factor a pung ni lovin; ‘kan hman man a diktak kan chawi a ni’ tih kha mipuiin kan hriat a ngai a ni. Helaiiah hi chuan ZPM min mawhpuh thei lo ang tih kan sawi duh a ni.

Pu Speaker, ‘ZPM sorkar-in bill kan tipung lo ang’ kan tih kha vawiin ni thlengin kan la kalpui a, a lawmawm hlein ka hria a ni. Chu mai ni lovin, ZPM-in kan sawi ang khan, bill kan pek dik avang te, bill kan pek dik in a a rawn ken tel power trading kan ti a, chung zawng zawng avang chuan tunah hian nikum leh tun March thla, February thleng khan sorkar zemah crore 9.42 kan chhung a, a lawmawm khawp mai. Heng kan hman diklo avang te pawh hian kan la hlep thei a ni.

Pu Speaker, smart metre hi Power Ministers Conference-ah kan zuk kal atang khan State dangin an hlawhchhamna kha kan zuk hrechhuak a. Manipur leh State hrang hrangin an hlawhchhamna kha, an software leh an metre inmil loh vang a ni a. A man tlawm an lei a, chu chu a billing software nen a lo inmil lo a, khang kha an harsatna tawh a ni a. Kan State ah pawh an rawn tichhin tawh a, 900 an rawn tichhin a, chu chu kan billing software nen a inmil lo a. China siam hi an lo hmang tlangpui a, China software leh India software hi a inmil lo a, hengte pawh hi inmil turin tunah chuan kan ti a ni.

Chhimtuipui chungchang zawhna kha a awm a. Kan sorkar tirh atangin Chhimtuipui saw hma kan la nghal a, ka it a, keini pawhin. Amaherawhchu, lo khuah tumtu hmasate khan a variable lo an lo ti a, kha kha chhan a har khawp mai a. Tun Ni 1 khan central-a power minister-in a tih theih loh thu min hrilh a. Prime Minister-in North East tana Special Package ₹4000 crore min rawn pek atang khan hma kan la a, Central PSU te nen pawh kan inbia a. Anni pawhim power ministry lam an zu dawr a, anni min hrilh dan chuan, NTPC ho khan an company finance tu tur an hmuh loh vang niin an hria a; chu chu official a ni chiah lova. Chuvang chuan, a reliable lo an ti a. Amaherawhchu, CWC a survey tute kha chuan variable an ti a ni. Chu chu thil awm dan a ni a, theih tawpin hma kan la a ni, tih ka han sawi duh a ni.

Tin, Chhim lam kha tuna in sawi zawng zawng pawh kha kan rawn ti dawn a, amaherawhchu, kan House Leader pawh ka hrilh tawh a; BJP hi an phakar ang reng khawp a, (ka'n tiang e). Kan rawn thawk ang a, a thawktu tur kan rawn intum ang an ti a, PSU kha an rawn intum nghal dawn a. Kan Chief Minister hi ka'n rawn a, 'A paw lo e; sum kan harsa bawk si a, GST tal kan chan chuan' a ti a, a GST tal kan chang dawn a. Bungtlang South leh a dangte pawh kha 132 kV power line-a tih an rawn tum a ni.

A tawp berah chuan, kan zavaia kan tan tlana he ram tana kan nawr tlan chuan, kan ram hi reilote ah Pathian malsawmna dawngin, State dang awh kan nih hi a taka hmang chhuak turin theih tawp chhuah turin kan insawmin ka'n ngen che u a ni.

Session hi vawikhatmah heta kan thut hma hian ka la en lova, chuvang te pawh chuan inhriatthiamna ka ngen a. Pu Speaker, heng ka Demand-te: -

Demand No.	Department	Amount in ₹
18	Printing & Stationery	12,45,23,000.00
39	Power & Electricity	98,08,59,000.00
40	Commerce & Industry	60,77,42,000.00
<b>TOTAL</b>		<b>10,53,31,24,000.00</b>

te hi he House zahawm takah hian min pass pui turin ka rawn ngen e, Pu Speaker.

**SPEAKER** : Aw le. Minister zahawm tak Pu F. Rodingliana'n heng a Demand-te –

Demand No.	Department	Amount in ₹
18	Printing & Stationery	12,45,23,000.00
39	Power & Electricity	98,08,59,000.00
40	Commerce & Industry	60,77,42,000.00
<b>TOTAL</b>		<b>10,53,31,24,000.00</b>

House zahawm takah pass a rawn dil ta a. Remtiin, 'Remti' ti u la; Remti lo kan awm chuan 'Remtilo' ti u la. (House-in pass a remti a.)

Minister zahawm tak Pu F. Rodingliana demand chu House-in lungual takin a pass ta a ni. (**Pu F. Rodingliana, Minister:** Pu Speaker, ka lawm e.)

Tunah chuan kan Chief Minister zahawmin kan sawihona te kha windup-a sawifiah rawn sawifiahin, a demand te House-ah pass rawn dil nghal turin ilo sawm ang u.

**PU LALDUHOMA, CHIEF MINISTER:** Pu Speaker, Assam Rifles te tena kan indawra 'hei bak chu kan tawlh theilo' an tih apiang hian, 'kan Power Minister kan ruai ang a, in line a cut-off leh mai tur a nia', kan ti a, An hlau thei khawp mai. Zanin hi a tawpna tur tak zet a ni a. Mizo upa chuan, 'A tawpah tih tawk a awm' an ti a, tawi vaklo turah khan ngai phawt ilangin. Kan memberte zawhna chhan hmasak tul thenkhat kan chhang hmasa ang a, a bak chu a department kan luh pah tein ka chhang zel ang a.

A bul tan nan chuan, Pu RM Chakma, MLA zahawm tak zawhna - North Eastern Council Scheme hnuaiia focus development component chhunga backward block, grant leh backward community grant atang te hian CADC huamchhungah engatinge hma kan lak

loh? A tih kha, a chhanna chu - Union Cabinet-in January, 2020 khan NEC budget pumpui atangin 30% hi focus area development-a dah turin a pawm a. CADC area hi hemi component atanga project hmu tha berte zinga mi a ni. A hnuai mite hi CADC area-a project kal lai mekte an ni e –

- 1) Raising area expansion, hei hi a amount chu ka sawilo mai ang e. Tunah hian NEC atangin nuai 58.51
- 2) Construction of school building under CADC, Kalamanager a ni a. Hei pawh hi 100% a zawh tawh a ni a. NEC hian fund a release zo vek tawh a ni.
- 3) Providing pre-services of RD Block a ni leh a, hei hi nuai 455 niin, physical achievement hi 100% a ni. Hei hi Lawngtlai DC in a execute a ni.

Tin, hei bakah hian NEC in central agency component atangin ‘Construction and upgradation of Girls Hostel at Kalamagar’ nuai 160 man hi NPCCL hnenah Ni 26.3.2022 khan a sanction baw a ni.

Tin, a sawi leh dang - Kumin chhunga CADC-in Planning Department-a project pahnih submit tun thlenga la forward loh te kha engnge a chhan, a ti a. Planning Department-in a hnuai proposal te hi tun financial year chhungin kan dawng a. Uluk taka proposal hi exam thin a ni a. NEC project submit, monitor leh completion-ah te mumal takin standard operating procedure anga kalpui a ni. Development of Fish Farm with Fishery based integrated system at CADC, nuai 432, CADC Planning & Development Officer-in Planning Department-ah a thawn a, Ni 6, August 2024 hian CADC hnenah SOP hman lai anga an administrative department hi DC&MA Rule, 2 a rawn submit tur leh Fisheries Department vetting la turin kan hriattir a, chhanna tun thlengin kan la hmulo. Kan MLA zahawm takin sikul building submit anga a sawi erawh hi Planning Department-in kan hriatpuilo a ni.

Tin, Biju festival chungchang Pi Prova-i pawh khan recess lai khan a sawi a. Hemi proposal Celebration of Biju FAestival at Borapansuri, nuai 30 hi Ni 30.5.2023 ah khan NEC ah Planning Department-in kan thawn tawh a, NEC atangin chhan letna kan la hmulo a ni. CM CADC- in Ni 22.8.24 khan Chakma Biju Festival at Borapansuri tih nuai 10 man a lo submit leh a. Hei pawh hi administrative kaltlang lova lo submit leh a ni a. Planning Department-in Ni 20.9.2024 khan DC&MA ah lehkha thawnin, CADC-in proposal an lo submit thu kan lo hrih a. Tin, he Biju festival hi Ministry of Tourism funded a nih leh nih loh thu kan zawt a, DC&MA-in Ministry of Tourism atangin fund a nih loh thu min lo hrih a. Mizoram sorkarin festival leh event proposal kan thehluh tam tawh avangin, tun financial year atan chuan bawhzui a ni ta lo a ni.

Tin, Pu R. Rohmingliana, MLA, Thorang Bialtu sawi kha - State pawnah Minister, MLA leh official-te meeting-in kan kal fo a, Gauhati Mizoram House-ah te motor a tha tawh lo; Shillong Mizoram House-ah driver pakhat chauh a awm, a tih kha, motor lei tur hi sorkar hmasa khan May, 2023-ah khan alo remti tawh a. Tichuan, September, 2024-ah khan Finance Department-in a sanction thei chauh a. A chhan chu, Covid avanga delay a ni a. GEM kaltlang lova lei an rawn dil a, Finance department-in chu chu a phalsak thei lova. Tichuan, tunah hian an la lei thei lo a ni. Shillong Mizoram House hian driver post 2 a nei

rih a, driver pakhat hi voluntary retirement-a a chhuah hnu ah a post pawh abolish nghan a ni. Chuvangin driver pakhat chauh kan nei rih a, Finance department-in driver pahnih hi outsourcing kaltlanga rawih phalna a pe tawh a ni.

Tin, Pu RM Chakma zawhna bawk – ‘Kamalanagar hi Civil Sub-division Hqrs. a ni a, census-town atan tun thleng hian declare a la ni lova’ tih kha, census town-a puan anih theihna turin C&DC leh CADC Lawngtlai hian sorkarah rawtna an lo thlen tawh thin a. Census town ni tur chuan Registrar General of India lamin criteria mumal tak a nei a, chungte chu - mihring cheng zat 5000 aia tlemlo; mipa hnathawk thei 75-100 aia tlemlo non-agriculture lama thawk; tin, population density sq. km-ah mi 400 zel emaw a aia tlem lo a ni tur a ni, tih te a ni a. A chung a criteria atang hian Kamalanagar hian census town ni turin a tlingzo em tih hi Director of Census operator hnenah zawh a ni a. GAD atanga a chhanna kan dawnah chuan, Lawngtlai District chhungah a chung a criteria anga census town atana puan theih tur an awm rih lo a ni.

Tin, Pu H. Lalzirliana zawhna Mamit Circuit House chungchang kha, a building sak zawh tawh a ni a, a panna mumal tak leh a chhunga mikhual thlen theih turin bungrua a la awm kimchang lova. Tin, mikhual dawng sawnga Circuit House enkawl tur staff an awm lo bawk a, tun dinhmunah function hun tur hriat a nilo. Gauhati-ah House thar sak tumna a awm em, tih kha, tun dinhmunah chuan sak tumna a awm rih lo a ni.

Tin, Pu K. Beichhua zawhna - Chhim lamah New Latawh Airport dinna tur hi aerial survey leh preliminary survey neih tawh a ni a. Airport dinna atan final survey min neih sak theih ang em, tih a ni a. PWD hnen atanga Assembly question chhanna kan hmuh ang chuan, airport atana New Latawh aerial survey leh preliminary survey hi Ni 10.1.2020 atanga Ni 23.3.2020 chhung khan neih a ni a, feasibility survey report pawh hemi kum vek hian submit a ni. “Cutting leh filling a tam lutuk dawn avang te, tlangpawng a awm vang te leh terminal building sakna tur hmun duh anga zau a awm theih dawn loh avang tein airport siam rem lo tura ngaih a ni”, tih a ni. A hrim hrimin, a va endiktute hi Pu Pawchhua te an ni a, han pawm mai chi chu a nih hmel loh; survey that leh te pawh a tha ang e.

Tin, RS-a khan, road map kan minister-te’n an nei em; a then kan pe a, a then confidential an ti a” a ti a. A then hi kan pe a, a then kan ti confidential a ni. A chhan chu, policy bu pawh pahnih kan nei a, pakhat chu kan tlangzarh kha a ni a, pakhat chu mi tlem te chauhin kan kawh a ni. A chhan chu, kan tih tum zawng zawng hi kan puan lawk chuan, thenkhat hian an duh dawn lo a ni. A tha si a, tih kan tum si a kan puang lawk duh lo, tih thut kan duh a ni. Chuvang chuan, confidential leh confidential lo lai kha a awm a ni.

Tin, Legislature Home chungchang kha kan sawi nual a, hei hi chu kan Assembly House Committee thu a ni a. Hetah hi chuan kan Dy. Speaker hi a thu viau a ni. Chuvang chuan, anni kutah ka dah ang a. Tin, MLA House hi kan sa tha dawn hrim hrim a, chutah chuan room nuam tak tak a awm tawh dawn a; Dy. Speaker quarter pawh tha tak a awm dawn a ni. Chu chu kalpui kan tum dan a ni a.

Tin, Opposition Leader khan legislature supremacy humhalh a tul zia chungchang a sawi a. Ni e, sorkar pakhata peng hrang theuh kan ni a. Amaherawhchu, kan Legislature Party sanctity te, supremacy te hi chu kan humhalh tlang theuh turah kan ngai dawn nia.

MPSC atang hian tan ila. Tun dinhmunah MPSC-ah hian Chairman leh member pahnih bakah Secretary hovin thawktu 86-an awm mek a. SASCI hmangin exam hall thar tur sakna dil a ni a, ₹10.92 crore kan hmu thei dawnin kan hria a, kan lawm hle a ni.

MPSC hian 2024-2025 chhung hian promotion, confirmation leh regularization atan DPC vawi 252 thuin, post 570 atan recommendation a tifel tawh a. Service confirmation atan DPC vawi 14 thut a ni tawh bawk a, post 125 atan recommendation a thawn tawh bawk. Direct Recruitment bikah group A leh B tan advertisement vawi 14 a tichhuak tawh a, heng atanga personal interview neih tawh zat chu vawi 12 a ni.

MSSSB-in a khawih thin group B (Non-Gazette) post bik atan pawh advertisement tum 14 tihchhuah a ni a, heng atang hian exam vawi 9 conduct tawh a ni a, personal interview tum 3 neih a ni tawh bawk. Interview neih tum a ruahmanna awm tawh 1 leh interview neih theih nana written result tihchhuah theih hnaivai 2 a awm a. Sorkar hna thawk mek ten an service confirmation emaw atana tangkai departmental examination a buatsaih sak thin a, gazetted post atan examination vawi 5 leh non-gazetted atan vawi 2 tun sorkar kum chhung hian buatsaih a ni tawh.

Sorkar hnathawkte kaisanna tura exam neih thin, Limited Departmental Examination, gazetted post tan vawi 8 an buatsaihah result vawi 8 tihchhuah a ni tawh a, non-gazetted post atan examination vawi 19 neih tawh te result pawh tihchhuah vek a ni tawh bawk. UPSC-in Mizoram chhunga examination a buatsaih hrang hrangah MPSC hian exam conduct hna a thawh sak thin a. Financial Year, 2024-2025 chhung hian UPSC aiawhin exam vawi 8 a buatsaih tawh a ni.

A chung a tarlan bakah khian MPSC hian mizo language proficiency test vawi 2 tun financial kal mekah hian a buatsaih tawh a, Sorkar department hrang hrang 3 atanga examination leh tul dang conduct sak tura ngenna chu a tih hlawhtlin sak mek bawk.

MCS examination 2024 written result hi March thla chhung ngeia tihchhuah tum a ni a, final result tihchhuah har a nih chhante chu - Chhan eng emaw avangin pawl pakhatin MPSC-a thawktute pisa kai thei lovin an siam a, personal interview leh examination neih tura ruahmanna awm sa thenkhat khaihlak zovin, hei hian thil dangah nghawng a nei chho ta zel a, kum 2023 main examination neih hun aia thla 3 dawna tlai ah kum 2024-ah khan main examination neih theih chauh a ni. Exam zawh fel a niha, evaluation neih chhoh lai leh hunpui, krismas leh kumthar a innang chho a, hei hian Mizoram chhung leh pawn lama endik hna thawktute tuan a timuang nasa hle a ni.

Mizoram Sorkar ruahmanna angin MCS Combined Examination timeline schedule pawh pawhfan a ni ta a, schedule hman lai mek ang chuan March-April hi main examination result tarchhuah hun tur a ni ta a, April - May-ah engkim zawh fel vek tur a ni. He schedule ang hian kalpui ngei theih kan tum a, May thla kai kher ngai lovin April thla chhung hian medical examination leh personal interview pawh neih fel tir vek theih beisei a ni. He result hian financial year 25-26 thara MCS Combined Recruitment tih leh tur a nawr tlai phah lem lo tura ngaih a ni.

Junior Grade-a Mizoram Forest Service written result pawh March, 2025 chhung ngeia ti chhuak hman tura buatsaih mek a ni a. He result tihchhuah har a nih chhan tlangpui chu 1-

naah candidate te chhanna endik hna, evaluation kalpui a nih mek laiin Committee on Petitions duhdan angin MPSC chuan chawlhlan rih tura hriattirna ni 25.06.2024 khan a dawng a, Committee on Petition-in he examination-a answer papers te endik hna chhunzawm leh tura MPSC a tihna chu DP&AR kaltlangin ni 29.10.2024-ah dawn leh chauh a ni.

Hemi bawhzui hian MPSC chuan Ni 12.11.2024 khan Notification a tichhuak a, ni 140 chhung zet chu MPSC hi hna thawk thei lova siam a ni a, hei hian result chhuah hun a ti khawtlai lo thei lo a ni.

MPSC-in MSSSB atangin hna lakna tur proposal 19 a chhawm a. Heng zingah hian post 4 chu MSSSB-in a kawllai Sorkar approval lo thi hman tawh a awm avangin revalidate a ngai ta a. MSSSB atanga post chi hrang hrang 19 lak chhawn atang hian MPSC-in post 12 exam a conduct tawh a ni. MSSSB hunlai kha chuan multiple choice questions, negative marking awm lovin exam kalpui thin a ni a, khawll hmanga en zung zung theih a nih avangin result pawh a chhuak rang viau bawk. MPSC erawh chuan negative marking awm si lova, MCQ ringawta candidate te exam tir hi a him lovin a hria a; chutih rualin result tihchhuah hma a duh bawk si avangin MCQ chungchangah hian mipuite biakrawnna a buatsaih a. Correspondence atanga zaa 70 zetin MCQ with negative marking an duh avangin hemi chungchang hi Sorkarah thlen niin, Sorkar thu ngaihchan mek a ni.

Mi tam takin MSSSB kha chak zawk leh rintlak zawk angin an ngai emaw a tih theih, a dik reng em i han en teh ang. 1-na MSSSB khan direct recruitment hna lak tura an hnena thleng proposal 4 lai an kawll hlum a ni chungte chu Home, Sainik Welfare & Settlement hnuai Head Assistant te, Health & Family Welfare hnuai Psychiatric Nurse leh Psychiatric Worker te, Animal Husbandry & Veterinary hnuai Laboratory Technician te a ni.

Kum 2021-22 chhung khan MPSC-in advertisement 7 a tihchhuah laiin, MSSSB-in 5 a tichhuak. 2022-23-ah chuan MPSC-in advertisement 12 a tihchhuah theih laiin, MSSSB erawh chuan 5 chauh a tichhuak thung. Kum 2023-24-ah phei chuan tum 31 lai MPSC-in advertisement a tihchhuah laiin MSSSB chuan hemi chhung hian vawi 9 a tichhuak chauh a ni. MSSSB atanga MPSC-in a chhawm zui tak, Sub-Inspector under Excise & Narcotics leh AA&AO under Finance Department hna lak kalpuinaah khan. MSSSB syllabus lo tarlan tawh leh exam neih dan tur lo awm tawh ruahman nen mil a, recruitment kalpui a nih avangin Excise SI hna atana written examination atanga thlahnih tling lovah interview result puan a ni a, he hna laknaah pawh hian exam neih atanga thlahnih leh ni 9 chhungin final result tarchhuah hman a ni bawk, Sorkarin MPSC thuam chakna atana thawktu thar a lak tawh dan leh lak mek dan hetiang a ni. Lak fel tawh Assistant 2, UDC 1, written result nghah mek leh interview hmabak lak fel tep tawh Assistant 1, UDC 2, LDC 5, Group D 5, tun financial year kal mek thleng hian MPSC chuan examination hrang hrang a conduct atangin Head of Account fee-ah Nuai 86 sing 2 sang 9 zali sawmkua leh 800 hundred other receipt atangin Nuai 3 leh sang 7 zakua sawmriat panga Sorkar revenue ah pawisa a chhunglut tawh a ni.

Khang kha MPSC chungchangah chuan duhtawh ila. Vigilance ah han kal ila zawhna kha a awm nual mai a, CBI general consent pek chungchangah khan Member pakhat mai nilovin kan zawt nual a, vawi hnih consent hi kan pe a ni. Sorkar hmasa lam ten an pe duhlova kan hre vek a keini erawh chuan mipui hnena kan in tiam angin kan pe ang kan ti

a, 2023 kum tawpah Sorkarna kan chelh tan a, kan chelh atanga reilo teah khan December thla la la khan CBI general concent hi kan pe nghal a ni.

Chumi hnuah chuan, Criminal Law 3 India Sorkarin arawn tichhuak thar leh ta a, he Criminal Law chungchangah hian hmanni ah pawh khan Union Home Minister nen Guwahati panin kan chuang thla dun a nih kha. Hemi chungchanga hmalakna sawikhawmna kan nei a ni. Hemi Criminal Law 3 a lo awm hian, hemi hnuaiyah hian consent pek nawn leh a ngai a ni. Session hmasaah pawh khan kan sawi tawh a, kan hriat duhloh zawng hi chu kan hre duh chuang tlat lo mai a, sawi pawh hi a phurawm loh ang reng, kan inzawt nawn tawh em lovang chu heihi chu, tichuanin, a pek nawn leh dan tur pawh duh duh a ziah a thiang lova, form fill up tur a ni mai a, a awmsa thlap a ni, chu chu kan fill up a, tichuanin 27.06.2024 ah khan an phut angin kan thawn thla leh ta a, tichuan CBI consent te pe duh lo te kan inti a, a pe a a sut leh te kan inti a, chutiang lam a nilova pek nawn leh dan thar hnuaiyah angaih avangin State zawng zawngin CBI consent pe chuan chhunhan leh comma, full stop in ang vekin kan pe a ni. Engmah tihdan danglam a awm chuang lo, amaherawh chu hei hian Mizoram chhunga, kan State chhung theuh a, Central Sorkar leh Central PSU hnuaiya thawk leh thubuai an neih chuan chumi kaihhnawih a lo in hnamhnawih tualchhung mi a huap a ni.

Kan State Sorkar hnuaiya mi a huap thiang lo, huap tir pawh tum ila tuman kan huap tir thei lo tuman thu neihna kan neilo, a theih loh. Tin, chu chu thil awmdan a ni mai a, inpuhna tur a awm chuang lova kan huap tir thei lova keini pawhin. Chuvang chuanin keimahni ram chhung a mi hi chu kan Sorkarin a duh chuan a hum thei a, a duh chuan a chhuitir thei a, Mizoram Sorkar hnuaiya hna thawkte chungah chuan thu a nei a ni. Tichuan a building hi nichin ah khanin Lok Ayukta kha han sawi chho ta ila. A building turin Lok Ayukta building thar tur hi MINECO ah Integrated Office Complex, chu chu tunah hian pawisa ruahman a ni tawh a, tahchuanin an sak zawh hunah dah kan tum a, tin, investigating staff leh prosecuting agency a hranga neih an duh a. Amaherawhchu, kan la pe thei hrihlo a ni, sum te a harsa a.

Tin, Pu Speaker, hemi chungchangah hian hei Information Commission te, MPSC te, Lok Ayukta kan han tih ang chi, tunah Human Right Commission te kan han ti leh ang a, tiang chi reng reng statutory body ah hian sorkar dinglaiin an duh duhin a thawktu tur hotu tur an dah ngai lova. Opposition Leader emaw Opposition Group Leader emaw anrawn thin a ni. Kan Cm hmasa Pu Hawla pawh khan minrawn ziah a, tin, Pu Zorama pawh khan minrawn ziah thil dangah chuan. Lok Ayukta-ah hi chuan minrawn duh ta miahlo a ni. Tichuan, tuna an term tawp dawn tepah khan member pakhat an appoint thar a. Tin, Chairman, kha kumthar March thlaa hun tawp tur kha a hma kum October thla velah khan an buaipui a. Chairman tura an ruat kha keini min ko ve duh silo a. Khatih lai sorkara Adviser to Chief Minister nilai, party ah pawh nihna pawimawh tak chelh lai kha anih avangin.

Lok Ayukta te hi chu mi neutral awmna tura ngaih a ni a, party pakhat pawimawhna tak nei, kei nen phei chuan vawihnih ngawt inkhing tawh kan nia. Khatiang Lok Ayukta Chairman a han dah kha an zinga member pakhatin a pawm thei ta lova, tichuan a tlang ta lo a ni. A tlang tak loh avang khan kan sorkar tharin Chairman tur kan ngaihtuah a ngai a. Chairman tur mai bakah member pakhat i lak belh ang kan ti a. Tichuan Chairman leh member pahnih neiin tunah kan siam a. Chairman lakna ah te, member lakna ah te kan

Opposition Leader hi vawikhatmah kan koh hmaih ve ngailo a, lungrual takin kan ti thap thap zel a ni.

Tunah hian corruption case hi Lok Ayukta ah hian case 74 register a ni a,, chutah chuan enquiry complete tawh hi case 46 a ni a, pending hi 14 a ni. Full investigation atana refer hi 26 a ni a, convict hi 4 an nei tawh a.

Tichuan, Pu RM Chakma phei kha chuan a hresual ve angreng khawp mai a. (Kha, a chhuak ta a ni maw?) Consent pe duhlo, mahni leh mahni inbum chingte kha min ti deuh vak mai a. Mahni leh mahni inbum kha tu zawk hi nge ni dawn ta ni? I sim lovang u te kha a ti leh nghal a, kan khaw pa min ti hre rum rum mai a. A fapa an hau tak tak mai chu, ‘I sim leh ang em?’ te a’n ti thin a.

Tichuan, sorkar hmasaah khan Lok Ayukta hian CBI hnena thlen turin case 2 a lo pe tawh a, CBI chhui turin. CBI te chuan Mizoram sorkar hnenah chhui phalna an dil a, Mizoram sorkarin a pahnihin a lo hnawl sak a ni. Tichuan keini ah hian mi pathum chhui phalna min rawn dil a kan pe tawh a ni. Kha kha Vigilance chungchang ni se la.

Dr. K. Beichhua khan Law & Judicial chungchangah khan RE leh BE chungchang kha a rawn zawt a, tiang hi thil awmzia a ni –

Supreme Court-in Second National Judicial Pay Commission recommendation a pawmpui angin, Judicial Officer ten allowances hrang hrang dawn thar an nei a. Ni 01.01.2016 atanga effective niin, Ni 20.8.2024 ral hma ngeiin arear zawng zawng nen pek fel vek turin Supreme Court in thupek a siam a ni. Budget estimate-a awmsa in a daihloh avangin additional fund dil belh a ni a, hei hian revised estimate a ti sang ta a ni. Hei bakah CSS on Development Draft Judicial Infrastructure Facilities for Judiciary hnuaiyah hian 2024-2025 atan budget chu ₹967 lakh a ni a. Chutih laiin, Central atangin ₹1553 lakh dawn a ni bawk a, khang khan a figure a ti sang ta a. Kan Judicial-a thawkte hi pay structure hran nei an ni a, tikhan an rawn revise ta a. An revise mai ni lovin, 2016 atang khan arear kan pe ta a ni keini hian; chu chuan pawisa min sen tir tam ta viau a ni.

*Law & Judicial:* Law & Judicial chungchangah hian pawimawh zual tlem chauh kan lawr ang a. Directorate hran a nei ve lova, Directorate hna hnen an kawp tel vek a. Tin New Secretariat Building II, Basement Floor-ah hian Library changtlung tak mai an nei a, Member-te pawh hian hei hi chhawr-tangkai tum ila a tha ang. Hetah hian printed collection lehkhabu, journal 20000 chuang - e-journals 200 leh a dang tam tak an nei a ni. Heta dan kan pass tawh te an niin fel takin an lo kawl thlap a, The Mizoram Code te an ti chhuak a. Tunah hian volume 11 thleng an chhuah tawh a, 12-na an print leh tep tawh a. Tin danbu a buatsaih hrang hrang te tha taka kawlin, Officer leh staff-te tan tangkai taka an lo hman turin a sem chhuak thin a, Library atang hian, a sem chhuak teuh tawh a ni.

Tichuan, Aizawl District ah hian MINECO, Khatla Aizawl District Court hi a awm a. Judicial quarters pawh awmin, Judicial Officers ten an luah mek a ni. Lunglei-ah kan MLA zahawmtak Pu MST-an a sawi ang khan, District Court building, Lunglei sakna atan Rahsi veng Lunglei ah ram 6325 square metre pek a ni a. He hna hi sum a awm hunah thawh tan theih tur a beisei a ni a, GAD atangin order tihchhuah a ni tawh a. Judicial quarters hi Pukpui ah a awm bawk a ni.

Lawngtlai District ah hian Judicial quarters a awm a, sak mek a ni bawk a. Court building sakna turah hian ram kan nei a, kan la sa dawn a ni. Siaha District ah hian Judicial quarters kan nei a, court building pawh sak zawh fel trep a ni. Kolasib District ah court building a awm a, Fast track court tur sak mek a ni, Judicial quarters a hlui leh sak zawh hlim a awm bawk. Serchhip District ah hian court building leh judicial quarters a awm a. Mamit district ah hian court building leh judicial quarters a awm bawk a, Champhai District ah hian court building tur sak tan a ni tawh a, Judicial quarters sak a la ngaia, a sakna tur ram pawh kan nei fel tawh a ni. District thar pathum Hnahthial, Saitual leh Khawzawlah te hian court building sak nan ram kan la nei lova court hmun tur ram zawn mek zel a ni. Hnahthial district ah hian judicial quarters tur ram Thiltlangah neih fel tawh a ni. Kha kha Law & Judicial-ah chuan duhtawk leh mai i la.

*Planning & Programme Implementation:* MLA Local Area Development Scheme kha crore 80 kan dah a, kum hmasa lamah crore 60 a ni a. Tihian crore 80 bawk tunah hianin kan dah leh ta a. Tichuan, MLA mal tan nuai 200 theuh a awm leh dawn a. Tin, High Powered Committee, Lunglei hnuaiah Minor Civil Electrical Work atan 7 crore dah leh a ni a. Hei pawh hi tunhmaa 5 crores dah thin kha nikum 2024-25 atang khan 7 crore ah tihpun a ni. HPC Lunglei huam chhunga hmasawna hnathawh cheng vaibelchhe 2 a pung hian rah tha a chhuah hle dawn in kan hria a, a lawmawm kan ti hle a ni.

Scheme hrang hrang hnuaiah hnathawh te endiktu Mizoram State Project Monitoring Committee te enkawl na atan nuai 78 hman a ni a Aanni hi an hah hle a ni. Tunah phei chuan online monitoring an kalpui dawn tawh a ni. Tin, kan Flagship Programme enkawltu Mizoram State Policy Coordination Committee enkawl nan nuai 25 dah a ni bawk a. Mizoram Startup Mission enkawl na atan nuai 67.81 dah a ni bawk a. MSUM hian banakaih hnuaiah training te an pe bawk a. Planning Department-a cell pawimawh tak a ni. Tin, Monitoring of Sustainable Development Goals atan nuai 15.40 dah a ni a. SDG atana UN Resolution tihlawhtling tura kalpui mek hi ram 193 khawvelah hian an awm a. Niti Ayog-in India ram state hrang hrang ranking a tih chhuah thar berah Mizoram hi 13-na kan tling ve a ni. A lawmawm khawp mai.

*Directorate of Economic and Statistics:* Kum 2017-2018 khan vawiin thlengin survey mumal taka neih a ni a. Industrial Unit 370 survey atangin unit 209 te chu an lo tawp ti tih tawh a. Hei hian kan industry-ah a than loh zia, a hnungtawlh zawnga kan kal nasat zia a ti Chiang hle a ni. 370 ah 209 an thi tawh a ni. Unit 161 te chu mumal taka kalpui, data pawh lak tlak an ni. Chung data hmang chuan State IIP hi chhut thin a ni. IIP hi industry lama Mizoram dinhmun ti Chiang tu statistic rintlak a ni a. Industry Sector hnuaiah GSDP chhut nan leh Development Plan siamna atan a tangkai em em a ni. Kum 5 danah Ministry of Agriculture te, Farmers Welfare kaihhraina hnuaiah Agriculture Census neih thin a ni a. Agriculture lama kan dinhmun tih chianna a ni a, a tangkai hle. Phase 1 of 11th Agriculture Census, 2021-2022-a a landan in khaw 864, AMC area tello in, chutah chuan mi 84349 ten hectare 142900-a zau ah hma an la a ni. Compilation of Price Indices and Measurement on Inflation, thil man lakhawm in official ten survey an nei thin a. Minimum wages leh thil man pun dan chhutna atan hman thin a ni. Khawpui market 16 atangin item 270-ah price data lakkhawm thin a ni a. Chu chu Consumer Price Index chhutna atan hman a ni. Eitur lam chi 20 atangin Wholesale Price Index chhut a ni a. Eitur lam chi item 136 leh eitur lam chi nilo 189 atangin Retail Price Index chhut a ni bawk.

Civil Registration: Kum 2024 chhungin nau dama piang 29612, nau thi saa piang 82 leh mitthi 8683 register a ni. 1st February 2025 atangin birth certificate leh death certificate te digitalized certificate pek vek an ni.

Directorate of Science and Technology: Hemi hnuaiiah hian Weather data, ruahtui tla zat, humidity, temperature etc rintlak zawk a awm theih nan Khawzawlah Automated Weather Station bun a ni a. Hmundangah pawh bun tura hmalak zel a ni.

Large scale mapping of WRC potential area, NEC hnuaiiah Mizoram chhunga leileta siam theih tur ram leh siam mek te Geospatial Techniques hmangin chhinchhiah a ni a. He project-in a tum chu buh leh bal tam zawk thar chhuah theihna tur ram tih chian a ni a. Tun thla chhung hian zawh hman kan tum a. Kan tum a, engzat chiah nge buh leh bal chin nan a tan a hman tlak ram kan neih, a zau lam tun thla ah kan hre thei dawn a nih chu. Satellite Integrated Landslide, Assessment Alert System, hei hi kan rama leimin duhna hmun te ti chianga kan lo in rin lawk theihna tur a ruahhman a a ni.

Tin, Lidar Survey of Landslide prone area within Aizawl City a awm leh a, May 2024 atangin tan a ni a, a tum chu Aizawl khawchhung atangin Melthum Hlimen leh Hunthar Veng leimin duhna hmuna cheng te, leimin laka an lo inrin lawk theih nan leh an in ven thiam theih na atana GIS hmang hmalakna ni. Champhai, Khawzawl leh Serchhip District a tomato chingtuten hlawk zawka an thar theihna tur te, Champhai, Siaha leh Serchhip District a zikhlum chingtuten hlawk zawka an thar theihna tur te, Kolasib leh Mamit District a dragon fruit chingtuten hlawkzawka an thar theihna turin science thiamna hmangin hma lak a ni a. An thla tharte an seng huna tangkai zawk an ram hman tangkai dan tur pawh ngaihtuah a ni. A tui mi leh naupang te vansang lam chanchin chiang zawk an zir theihna turin Mizoram Science Centre Beraw Tlangah Digital Planetarium dah a ni a, tangkai taka hman a ni. Ministry of Culture, Government of India atanga sum hmuh ₹3.98 crore hmangin Mizoram Science Centre Beraw tlang pawh tih changtlun a tih tunlai zel a ni. Lunglei Science Centre 2023 a hawn pawh tih changtlun zel a ni. ₹5,90,000 hmangin Mizoram Science Centre Beraw tlangah Space Lab din tura hmalak mek a ni a, zirlai ten an chawr tangkai hle tura ngaih a ni a, hei hi Mizorama hmasa ber tura ngaih a ni. Hemi atan hian District Skill Committee Aizawl, Mizoram Science Centre leh Vyomikas Pvt. Limited Uttar Pradesh ten MoU an sign ang.

*Hand-holding:* Hand-holding ah han lut ila. Hei kan hand-holding ah hian chi 2 a awm tih kan hria a, loan component a awm a. GIA component, CM - Special Package kan tih kha a awm a. Loan component atang hian partner bank pathum kan nei a, chungte chu SBI te, MRB te leh MCAB te an ni a, an ni nen hian agreement kan sign a. An ni nen hian inthlan laia kan au hla ang ngeiin hemi hnuaiia loan la tur te hian interest free in loan an la dawn a, tichuan nakin ah harsatna an tawh pawhin sawrkar hi guarantor ah kan intiam ang ngeiin kan tang mek a ni.

Tin, line department 15 kan nei a, tah chuanin loan dilna lut tawh zawng zawng hi 11437 a ni a, chuta tang chuan a loan component tur atan hian 517 lak phawt a ni, approve phawt a ni a, tichuan chuta tanga loan lak belhkhawm tur chu vbc 60 nuai 90 sing 8 sang 9748 a ni dawn a, tichuan mi pakhat zelin chawh rualin nuai 11 sing 7 sang 8123 la ang zel dawn a ni. Tin, dilna dawngnem zual chu Commerce & Industry Department te an ni hian 4842 an dawnga a, AH & Vety Department hian 3647, Horti Department in 1105, chuan dilna

theh lut hnem zual district chu Aizawl, Champhai leh Lawngtlai te an ni. Tichuanin tunah hianin dilna 11437 atang hian 517 hi pilot atan thlan chhuah phawt a ni a, hei hi bank ah thawn fel vek a ni tawh a ni. District wise te te a awm zat hi chu ka sawilo mai anga, department wise pawh hi ka sawilo mai ang e.

Tichuan, hand-holding atan 75% in kan ti pung a, crore 350 kan han dah kha a ni a, hei hi 'D-A-H kha a ni em', tih kha a ni a, 'A ni' tih kha kan hriat sa avangin chhan kher pawh a ngai awm lo e, kha kha chu. A ni vel vek mai a ni. Marketing Board atan hianin kan sen tawh zawng hi ₹42 chuang kan seng tawh a. Buhhum lei nan hian quintal 1457.63 kan lei tawh a. Tichuan, kan sum hmanral tawh chu nuaih sawmli pathum singsarih sanghni h zariat sawmkua (43,72,890) a ni a. Sawhthing leina tura sum kan pek chhuah hi vaibelchhe 38 leh tlem a ni a. Tichuan, District Agriculture Marketing Committee atanga sawhthing kan lei tawh dan hi district wise-in ka nei a, a tawi nan sawi lo mai ila. Sawhthing kan lei tawh zawng chu qtl 58,847 a ni. Buffer stock point atanga hralh chhuah tawh zat chu ni 19 thleng khan qtl 48,040 a ni a. Sawhthing hralhna atang hian pawisa tlem kan hmu let ve tawh a, ₹2,84,78,394/- kan hmu let ve tawh a, a tlem bem bawm hle a ni. Kan sen erawh chu tam tak a ni.

Tin, hmunphiah ro hi certificate of origin pek chhuah tawh hi qtl 31,385 a ni a, empanelled green grass buyer ten an lei tawh zat chu qtl 8536 a ni a. non-empanel buyer ten an lei zat chu qtl 26,457 a ni a, ZOHANDCO in a lei tawh zat hi qtl 4,000 a ni a. Hmunphiah ro lei tawh zawng zawng hi qtl 38,993 a ni. Tin, hmunphiah ro leina atana ZOHANDCO-a pawisa kan pek hi crore 6.73 kan pe tawh a ni. Kan hriat ang khan, kan sawi fo angin kuminah hmunphiah rate a tlahniam a. Tin, a ro lei tur a ni a, a ro nghak hman lovin a hringin an hralh a. Tin, graded tur a ni a, grade A leh B-a then tur a ni a, an then lo bawk a. Kha kha an ti hlei thei lova kan farmer ten hian, tichuan, inremsiamin an theih ang angin an dek ral ve a. Tah kha chuan an zalenna a ni a, kan khap chuang lova, anmahni mimal remhriata an lo indawr a nih chuan kan inrawlh lova, support price pawh kan pe chuang lova. Society kaltlanga an hming kan neihte chiah, kan chhinchhiah te, keimahni tihdan, kan system hnuai tit e chauh tana ding kha kan ni a. Amaherawhchu, zalenna kan pe a, keini leina aia to zawka a hralhna an hria a nih chuan kan duhsak zawk a, khatiang khan zalenna kan pe a ni.

Tichuan, tunah hian kan farmer ten tihro an harsat a, grading an harsat bawk takah chuan a grade lo hian, a pawlhsawp hian kg ah `80 in, a vai hian I lei mai ang u, kan ti a. Tuna empanelled buyer tena an lei bak leh mimala an hralh bak, a la chuang zawng chu kan lei vek dawn a. Tichuan, ZOHANDCO ah kan pe ang a, anni'n an lo process ang a, an hralh leh hunah a man min rul vel eh dawn a ni.

Tin, sawhthing pawh tunah hian dawrtu kan hmu ve tan a. kg ah 20 ten min rawn dawr a, kan hralh lo thei lo. A then chu 25 te a nia, a tha pawlah 27 te a nia. Siaha leh Lawngtlai lamah phei chuan dawrtu kan la nei chhe khawp mai a. A chhiat mai dawn avangin dawrtu kan nei h ang ang hi hralh zel phawt ilangin, a bak chu sorkarin kan tum zel mai ang a. Kan hralhna a tlem leh kan chawi hnem a nim ai a. Farmers te tana ding kan nia, eng ang pawh kha lo ni se, anni chuan kg ah 50 kha an ak haw dawn hrim hrim. Kha kha kan dinna a ni. Chuvang chuan, tunah kan kudam te a khah tawh avangin a dang kan la thei lova, tihngaihna a awm hrih lova, hei hi chu min lo hrethiam turin kan ngen a. Khatia dawrtu kan han nei h a, kudam a lo ruah apiang khan khami area bika SCC tena secondary

collection center-a a enkawltu atana kan dah ten kudam a lo ruah veleh, a chheh vela an huam chhung amite hnenah a tahtawlin an chawh tir leh ang a, an hralh leh ang a, an chawh tir leh ang a. Tunah hian Delhi velah pawh ₹30/- vel a la ni tlat mai a, kan seng tam dawn lo thei lova. Amaherawhchu, thlathar lamahte chuan a sang chho ve tawh turah kan ngai a, a hralhna lam a kalchak loh avangin a dahna lam kan neih loh avangin kan farmer-te pawhin min hrethiam turah kan beisei a. Chuti chung chung chuan East-I politic group-a T. Manga'n a rawn post phei hi chu "Ka pu, sawhthing ka ching tam vaklo nain cheng nuai 3 chuang ka lei ve ta, congress hunlaia NLUP leh MNF hunlaia SEDP ai chuan ka hlawk fe tawh" a rawn ti a ni, ve tlat maia na. Tin, reliance hian kg-ah 80 in min leisak char chara an ni chuan kumtluanin an lei dawn a. Kolkota-ah hmun 131-ah tunah khuan an hralh mek a, 'Mizoram Sawhthing' tih an tar vah tawh a, Mumbai-ah khawpui dang zawng zawngah an ti ang a Sapthei te pawh an ti vek dawn a ni. Ka sawi fo thin chu kuminah hian Sawhthing rate te, Hmunphiah rate te a lo tlahniam ta a ZPM hi sorkar ta lo ila engtinngan an awm ang tih hi ka ngaihtuah thin a ni, an chesual nasa dawn hle mai, a chhiat ber Kumah pawh kg ah 50 an han la dawn tho tho mai hi chu kan lawm ve hle a ni.

Finance-a sum dinhmun kha, 'A khawnpui' kha in rawn ti a, khawnpui kan nei ve lova. Finance-a kan dinhmun hi kan inpuh chhe deuh riau khan ka hria a, sawichian deuh a thain ka ring a. Pensioner-te kan pekchhuah tur hi crore 2250 a ni a, a point hi chu ka sawilo mai ang SASCI tuna kan pekchhuah tur hi 750 crore a ni a, department hrang hranga ta tur NABARD Loan hi 75 crore a ni a, chu pawh chu department-in an insem leh vek dawn a counter part funding ah hian crore 250 SMS-a kan pek tur a ni a, medical treatment ah hian crore 100 a ni a, state roads atan crore 70 a ni a, health care atan hian crore 50 kan dah a, SIDBI atang hian loan crore 30 kan la dawn a, chu chu department hrang hrangin an insem leh dawn a ni. UIDF atang hian crore 30 bawk, chu pawh chu pekchhuah leh vek tur a ni. Tin, EAP atang hian crore 26 a ni a, chu pawh chu finance department-in naia khat pawh chan tur an neilo pek chhuah leh vek tur a ni. State priority programme-ah 20 crore a ni a, social infrastructure and services ah hian crore 15 tunah hian a tling khawm tawh a, chu chu PWD-ah kawnglaih nan kan pe ang a, health department-ah damlo kan nan te an lo hmang ang a, chuan education tih changkan nante an hmang ang a kan pechhuak leh vek dawn a ni, kan la dawn kim loh avangin, kum a la tawp loh avangin kan lo kawl lawk mai mai a ni. NCDC atangin crore 5 a ni a, khatiang te te khan khatianga department dang ta finance in tuna kan kawl hi 3936.09 crore a ni, hemi hi in paih chuan finance-a sum awm chu tlemte chauh a bang tawh a ni. Tunah hian Taxation Department nen kan in fin ve tawh a, kan hautak ve tawh a hlawh lamah ringawt pawh.

Tin, Sawhthing bag kha, 'a thlawnin kan pe' an ti a; chumi khuaah chuan an lei' an ti a, an lei ang chu mimal nen vai nen te an la indawr a, vai bag kha an lo lei a ni mai a, chu chu an zalenna a ni. Sorkar nena kan indawrnaah chuan a thlawnin kan pe kan ti a ni. Chuvang chuan, sorkar leh vai kha min lo thliar hrang hram hram tawh teh u.

Tin, UC chungchang kha kan sawi viau mai a. Central jail sakna tur UC hi 'zawha hmam in thelut a ni' an ti a, ka hriatpui miah lo mai a, hei hi. Engpawh nise, SASCI-ah te pawh consolidated UC hi an demand kher kher tawh mai a. Chumi awmzia chu – department 10-in SASCI lo khawih ta ila, department 9-in UC peih tawh mahse, department 1 in a la pek theihloh chuan an nghak thin a ni. Pakhat a tlai khan kan vai tlai thin a. Chuvang chuan, nghah ngai bik department nilo turin kan infuih ngat ngat a, kan ti rang thei sawt khawp mai a. Chutiang te chu a ni tawh a. Tin, 'First come, First serve' tih te, kum khat chhunga

zawh tur te a lo ni a a khawtlai theih lova SASCI -ah hianin. Chungah chuan UC te kan theh lut zung zung thin a. Amaherawhchu, kan thawk chak tih an hriat chuan, 2<sup>nd</sup> installment kan hmuh leh thuai min duhsaktute an lo awm thei, Ministry lamah. Chuvang chuan, UC kha la zo chiah lo mah ula rawn theh lut mai rawh u, tih te pawh hi sorkar hmasaa an tih ang deuh khan an la ching niin ka hria. Kha kha chu, anmahni berin an rawn tih kha chuan, an lo ti dawklak tawh a a ni ber a; an pawh tih loh chuan ava tha ve kan ti ve mai... (*Interruption*)

**PU LALCHHANDAMA RALTE, OPP. LEADER:** Pu Speaker, kan House Leader nia tuna a sawi kha, ‘ka hre miah lo’ a ti a. “SASCI Part I-ah khan cheng khat mah la hman lohna, thawk zo tawh angin UC an pe a, kan ti ve lo ang” tih kha a nih avang a ni a; an sawi loh ang zela an awm hi kan sawi duh vang deuh a ni a. Sawiloh ang zela awm thin ZPM nih an tlin khawp mai kan ti anih chu.

**PU LALDUHOMA, CHIEF MINISTER:** Aw, Lal Isua pawh khan, “*In thilung luhlul avang hianin a ni, inmakna lehkha an pek che u ni*”, a tih kha maw. Thil lo kal soal tawh lutuk hi chu tih ve loh theih loh te pawh a awm ve a. In chhung khu kan phiah fai dawn chuan, a khuin min bawh ve deuh te hi a ngai a nia.

Pu Dawngtea leh Pu Rintluanga a awm lo tlat mai A; Wine bawh kha in rawn sawi leh a. Vawiina ka department ah hian wine hi a tel lem lo; mahse in rawn zep lut leh a, tihian a bul hi in rawn tan ziah mai si a. ‘Wine hi zu ka ti tho tho dawn’ a ti a, Dampa MLA khan. A ti tho tho a nih chuan, kum 17 chhung khan an lo zuar tawh a, engatinge khatih chhung khan ‘Zu’ a lo tih loh? Helaiyah hian sorkar press release ka nei tlat pek a; hei hi Pu Dawngtea thusawi lai a ni a Champhai Grapes Growers Society, Grape-wine Rules lawmna buatsaih ni, Pu Beichhua hi Chief Guest a ni nghe nghe a; hei an thusawi lai thlalak ka nei a, an lang Chiang khawp mai; an hmel pawh a tha khawp mai. E khai! Chiang tak a ni, heta Pu Dawngtea thusawi an rawn sawi dan phei chu Pu Speaker, tawite hi ka’n chhiar chhuak ang e, i remtihnain. Hetiang hian a sawi a ni –

“He hun hmanpuitu Commerce Industrial Development Board Vice Chairman, Pu K. Laldawngliana chuan grape chingtute hmalakna chu a lo hriat tawh thin thu leh phurawm a tih thu sawiin, ‘Grape Wine Rules’ thar nei tura tanrualna chu fakawm a ti a. Mizoram pumin an lawmpui thu sawiin, an kal zelna turah sorkarin theihtawp a chhuah zel dawn thu a sawi a. Ram hmangaihna tak tak a taka thawhchhuah duh leh hlemhletna um lote pen chhuaka ram tana thawhchhuah a tul thu a sawi a, Tlangsam Grape Growers Society te hnenah lawmpuina pawisa fai a hlan nghal bawh,” tih a ni a. A, i tang tlang dial dial tawh ang u, tun chinah chuan. Kan lo thuhmun e.

Tichuan, Pu Speaker, sawi leh sawi hnu, tuna kan sorkarina Central atanga kan dawn leh tur kan dawn tlaina chhante eng eng emaw hi, a dik chiah chuan kan hunah hi chuan kan thawk tha a ni; kan official-te pawh hi hau ngai an awm lo; an taima a ni. Mahse thil hlui hian min tibuai a, hei hi chu a sawi leh loh theihloh thin a. Entirnan – PMJVK pawh hi cheng khat mah kan la dawng thei lo a ni tunah hian. A chhan chu PMJVK ah ringawt pawh hian on going project 58 zawh loh a la awm tlat mai a ni. 36 an zo tawh a, tunah hian khami an thawh ang zel a a hluia pawisa la dawn tur hi crore 158.25 kan la nei a. Tichuan, thildang chu sawi lovin PMJVK ringawt atang hian hei darthlalangah a hman theih mai ang a. Hei pawh hi anmahni hian an rawn sawichhuak hmasa zel a. JE 4 an nei a, an hming

te pawh kan sawi law law teh ang. Pu JH Lalhmachhuana hian project 17 a enkawl a crore 148 man, Pu Lalramthara hian crore 178 man project 27 a enkawl a ni. Engtin nge khatiang te chuan an supervise theih ang le? Chuvang chuan, an zo thei lova, a lehpek kan dawng thei lo a ni, keini hian.

Vawiin thlenga hetiang harsatna kan tawh chhan hi sorkar hmasa thil kha a ni a. Hei hi mipuiin min hriatpui ka duh ve a ni, tin, tute nge a Contractor kan tih chuan hei ka nei vek mai, a ngai leh ngai vek an ni. Tunah hian keini hian rawn theh lut ve tawh rawh u an ti a, project 258 kan theh lut a. Nimin khan Delhi ah an ngaihtuah a, heta kan theh lut hrim hrim hi chu Crore 1800 lai a ni a. Amaherawhchu, kan hmu vek ang kan tihna a ni vek lo; eng angin nge min rawn tihsak dawn kan hre phak lova. Hetiang hi kan harsatna tawh a ni a, chuvang chuan heng hian min han tin san phawt mai selangin kum tharah hi chuan kan thawh chak ve deuh te pawh kan beisei a ni. Monitoring Committee te nen hna thar hi chu thawhchhiat kan awih dawn lo a ni.

Tin, helai ah hian distressed project kan nei leh a, ‘distressed project’ an tih chu - project tawngtawl i ti mai ang, kalpuingaihna a awm tawh lo a ni a, chungte chu - Hostel Building of ANM Zemabawk - crore ₹12 chuang; Construction of Government Building (Mizoram pumpuiah) - crore ₹22; Samlukhai Water Supply Scheme Solar pumping - crore 7 leh, Construction of Lawngtlai by-pass Road; Construction of Longpuigat; Scheme of NEC tih te a ni a. Hengte hi tunah hian distressed project-ah puan ani ta ringawt mai a ni.

Tichuan, kan leiba tam zat kha kan inzawt a, kumin hrim hrim, kumkhat chhungin kan leiba kan rul nasa em em a. Kan hria a vaibelchhe sang chuangin kan lei ba kan tihnam a. Amaherawhchu, tun chho zelah hian kan lei ba chu, ‘a va sang ve’ an ti a, a chhan chu SASCI kan dawn that vang a ni. SASCI ah ringawt hian (a part te te chu ka sawi lovang a) crore 1264.68 kan dawng tawh a ni, Pu Speaker. Mizoram hian a dawn tam ber kum a la ni; tiang zat kan dawng ngai lo reng reng a, kan lawm khawp mai. Kan sorkar-hnathawkte an tang a, an chungah kan lawm. Tunah hian dawn leh mai beisei crore 367.05 kan nei mek bawk a ni. Hetah hian project 93 kan buaipui mek a, heng hi a rang thei ang ber a thawh zawha, tha taka tih thuai thuai kan tum a ni.

Tichuan, Finance-ah hian kan bat sa crore ₹13,584 chhawm kha a ni hrim hrim a, kha khanin a daih rei ve a ni a. Chuti chung chuan, kuminah hian crore ₹1,003/-in kumkhat chhungin kan leiba kan ti tlahnam a. Chuti khawpa kan leiba kan tihnam chung chuan, Economic tehfung pawimawh General Services te, Economic Services te, Capital Expenditure ah te, Revenue Surplus ah te, kum hmasa kan khum vek tho a ni. Leiba kan ti hnam chungin hmasawna hna thawhna atan a hma aia kan dah tam thei tho hi thil mak tak a ni a. Social service-ah chiah a hma kan phak lo; chu chu kan sawi tawh a, ‘Samagra vang a ni’ tih kha a ni a.

Tin, pension hi Sorkar hmasa khan kum 5 chhungin mi 974 case a tifel hman a, keini chuan reilo te chhungin pension mi 7000 chuang kan ti fel tawh a. Tunah hian pension zawng zawng kan clear fai vek; pakhatmah pending a awm lo. Amaherawhchu, a la tura signature rawn pe lo te erawh chu a awm ang; chu mite tih loh, a lo kal chu kan pe fai vek. Chutiangan, GPF pawh kan clear vek a ni. Tin, hemi chhung hian vawikhatmah kan overdraft lo, Pu Speaker. Kan Sorkar tirh khan ni 10 chuang kan han overdraft tehreng a, a hrehawm ka ti khawp mai. Sorkar ve leha overdraft han chhawm ngawt mai kha; kan

tang tauh tauh a ni. Tichuan, kan overdraft ngai tawh miah lovin Sorkar-hnathawk hlawh a hunah kan pe thei a, kan kawngpui a tha sawt em em a, buhfai, tui, eng pangngai takin kan inpe thei a, GSDP dik kan hmang tawh bawk a. Tichuan, RBI-a sum fai kan neih zat hi, vawina kan neih zat chu crore ₹1280.79 a ni. A tha ve thawkhat hleah kan ngai a ni.

Tichuan Pu Speaker, 16th Finance Commission hi kum 5 kan awm leh tur huna kan inngahna te a ni a. Helaiiah an lo kal a, kan lo inkawm a. An Chairman-in lehkha min thawn a, Mizo mipuite hnenah lo puang turin min duh a, i rem tihnain kan chhiar chhuak ang e -

“I hope this letter finds you in good health. I wish to extend my sincere gratitude to you and your government for the exceptional hospitality extended to the 16<sup>th</sup> Finance Commission during our recent visit to Mizoram. The presentation on State Finances was both insightful and valuable for our work. The thoughtful suggestion from your team particularly on the fiscal challenges and opportunity ahead will play a crucial role in shaping our recommendations. I was particularly moved by the warmth and generosity extended to us by your esteemed office, the Ministers, senior officials and all the staff involved in the arrangement. The meticulous attention to detail ensures that our visit was both comfortable and productive allowing us to focus us on the important work at hand. Please convey my thanks to all those involve including the people of Mizoram whose warmth made our stay truly special. I look forward to continue collaboration with your government to address aspiration of Mizoram. Thank you once again, for your gracious hospitality and support.’

a rawn ti a ni. Lehkha lawmawm tak a ni. Hei hian min ti thlamuang khawp mai.

*Healthcare:* Mizoram-in healthcare kha Bank pawisa puk chhawpin kan han bei ve kha a ni a. A tirah kan lawm viau a, a tawpah chuan crore 4 vel kan ba ral ta kha a ni a; hospital tam tak hi hlauhthawnnain an khat a ni. Crore 4 chuang bat ral a nih bakah, bill tang a rei thei lutuk a, hospital naupang deuh te phei chuan, ‘hlawh pek reng te a ngai a, hemi chhung hian kan collapse hman a ni an ti a ni. Chuvang chuan, tuna ZPM ina Mizoram Universal Health Care Scheme a siam hi mi tupawhina ngaihngam taka an lo hman theihna turin nasa takin kan inbuatsaih a. Damlo engzah nge kan neih ang tih hi Covid vanglai, kan nat tam lai ber figure kha base ah kan hmang a, chu chu damlo dangin kan la puntir leh a ni. Tichuan, a senso kha a uar thei ang berin kan chhut a, kan sum hmuh tur lampang hi a fet thei ang berin kan chhut thung a. Chutia kan han tih tawn chuan, ‘damloh runpui deuh kum pawh lo thleng se kan che chhe lo ang; kan sum hmuh tur hian a daih tawk a ni’ tih hi kan mi thiamte hmuh dan a ni a.

Chumai a ni lova, Hospital-ah khan pawisa, a bill pek zat zat vawiin-ah hian kan intiam a; ni 30 chhunga kan pe lo a nih chuan a pung chawi pawh kan intiam a ni. Chuti khawp chuan kan inring tawk (i ti mai ang). Tin, kan sorkar hian engemaw hriat lawk loh thilah harsatna lo tawk ta thut sela emaw, sum leh paiah lo tla chhe ta rup mai sela, chutah pawh kan chet chhiat loha kan damlo ten an tawrh loh nan bank-in kan mamawh zat a pung awm lova min puktir an la intiam leh zel a ni. Chuvang chuan, a chhiat berah pawh khan ‘an che chhe tak tak lo ng tih hi kan ring a ni. Vawiinah hianin crore ₹13.50 kan la ba a, niminah khan crore ₹14 kan released a, vawiin ah hian bill ba zawng zawng kan clear vek.

Chutiang chu a ni a. Kan sorkar tirha bill ba a tam dan leh vawiina kan in clear chhoh dan atang pawh hian Zoram mipuite hian min ring ngam se kan duh khawp mai. Tichuan, hei chi hnih-thum kan lo nei thin a, AB-PM-JAY kan ti a, chu chu ration card eng leh a pawl

ho, Golden Card nei ho kha anni mai a. Khangho kha in register hran a ngai tawh lo a, cheng nuai 5, an dam lohin an la dawng ang a, pawisa engmah chawi a ngailo. Card eng leh card pawl, BPL te anni. Tichuan, Sorkar hnathawk PE leh MR-te (**Speaker:** Nuai 5 thleng tihna a ni maw?) Aw, nuai 5 thleng; nuai 5 thleng an la thei. Tichuan pensioner's te pawh; sorkar hnathawk kha chu limit a awm lova, an bill ang zat zat kha a ni mai a. Pensioner's te hian thlatina an hlawh zat khan nuai 12 chin thleng la thei te, nuai 5 chin thleng la thei te an awm dawn a. A pawimawh lai ber ka'n han sawi duh lai chu, 'mipui ta tur' tihlai hi a ni. Mipui, hemi kan healthcare scheme-a lut tur chu, ration card var nei ho kha an ni. Inziah luh hun chung hi thla 3 kan ti a. March atangin tih kha, a inziak ah khan a awm a; March a ral dawn a, kha kha chu department-in lo siamrem ula. April atangin kan tan a ngai, April, May, June, khami thla thum chung kha inziah luh 1171 ell ov hawng ang a. Chumi hnuah thla khat kan hawng leh ang a, chu erawh chu late fee chawi a ni tawh ang. Tichuan, kan dam lohin pawisa ah a ngai reng reng lo; cashless tur a ni tawh tih kha hria ila. Tuna kan thlak thleng tur healthcare scheme kal mekah hian ₹2,00,000/- thleng la turin ₹2000/- kan chawi a ni. Tunah chuan ₹5,00,000/- thleng la turin ₹2500/- kan chawi thung dawn a, ₹500/-a kan chawi tam hlek khan kan bill theih zat erawh chu a let aiin a tam dawn tihna a ni. Chuvang chuan, kan private hospital zawng zawng pawh hemiah hian rawn in register vek turin, empanel-a rawn awm vek turin kan sawm a, hlauthawng lo turin kan chah duh a. Tin, mipuite pawh rawn inziak lut turin kan duh a.

Hei, MLA-te lu tihaitu, chu kan bial mite an damlo a, kan hnenah an lo kal a, an harsatna thu an rawn sawi a, 'healthcare-ah in 1171 ell o' kan ti a, 'awm lo' an ti thin a ni. A mamawh mawh hi an awm lo leh a, ngaihsak loah hian an tang thin a; an mamawh hunah a inziah luh theih tawh thin si lova, chu chu a pawl 1171ell a ni. Chuvang chuan, tun atang hi chuan inziak lut turin mipuite kan insawm tak meuh a ni.

Tin, thil lawmawm tak mai Pu Speaker, puan tur ka nei a. Hei kan Education Minister leh a thawhpuite tanlakna a zarah ziah leh chhiar thiam lo kha thiamtir tumin volunteer teacher mi 292-an ruai a. Chung mite chuan an ha ti char char a. Tunah hian ziah leh chhiar thiam hmeichhia 97%, mipa 99.2% belhkhawmin Mizoram ah ziah leh chhiar thiam 98.02% kan lo awm ta a, India ramah kan sang ber ta a ni. A lawmawm khawp mai a, Minister leh a thawhpuite chungah lawmthu kan sawi takzet a ni. Nagaland-in min dawt a, Kerela pathumna an ni ta a. Hei hi sang bera puan kan la ni chiah lova, puan tura ruahman kan ni a; an rawn puang tep tih kha ka'n sawi duh a ni.

Aw le, Pu Speaker, kalphung-thar kan ti a, hei department hrang hrangte review meeting kan neihpui a. Industrial Policy thar kan duanpui a, investment policy thar kan nei tawh a. Damdawi man tlawm mipuiten an lei thin sorkar hmasaa tihtawp kha kan ti thar leh a, kan Health minister ho in. Tin, Rules leh Bill tam tak tunah hian amend niin, kan siam tawh a, Recruitment Rules ringawt pawh hi thahnem 1171ell kan siam tawh a. Mizo hmun hrang hranga awmte thlamuang taka an awm theihna turin Diaspora Cell, Chief Minister office-ah kan hawng a. Tin, State Institute for Transformation, a thluak bur ber, 'Think Tank' kan din tawh baw k a. MPLAN - 'Mizoram Analytics for Monitoring Scheme & Projects' kan ti a, kan project hrang hrang, department hrang hrangte ta lo endiktu tur a ni a, chu chuan dashboard a nei tawh baw k a. SDG – 'Sustainable Development Goal' kan ti a, chutah chuan dashboard kan nei tawh baw k a. Chief Minister pawhin a office atangin department hrang hrang live in ka rawn kawm thei tawh dawn che u a ni.

Tin, Service Review Committee-te kan din baw k a. Tin, Pathian ram a lo thlen theihna tura kan hmalakna hi eng emaw zat a awm tawh baw k a. Pakhatnaah chuan - Aikal kan tihreh hi a ni. Diklohna tih boa, diktaka thil tih, hei hian kan thlarau nun a siamtha a, chhungril, moral reformation a keng tel a ni. Tin, Biometric Attendance kan siam a, kan mistiri, kan in saa kan rawihte hi lo kal tlai se kan duh miah lo ang; haw hma thin se kan duh miah lo ang; hlawh kan pek avangin. Sorkar-hnathawk hi mipuiten pawisain min ruai a, a hunah kan thleng tur a ni a, a 1172ell ova 1172 kan haw tur a nilo. Hei pawh hi moral reformation ropui tak, Pathian ram chikhat a ni hrim hrim tawh. Tichuan, Mipui Aw kan din baw k a, a duh apiangin an rawn complain-na tur. Right to Public Service te kan tipung a, sem-policy sawi rik a ni tawh lova, thawhrim chu chu kan au hla a ni a, GSDP dik kan lo hmang ta baw k a. Tin, Integrity Pact kan 1172ell ov a, chhungkhat laina hnai reng reng hna inpek awih tawh loh kha a ni tawp mai a ni. Hengte hi Pathian ram a thlen nan a ni.

Tin, 'project reng rengin SoP fel tak a nei tur a ni' kan ti a, project hluihlawn 1172ell ov tur, bill laka hawisan leh 1172ell ov tur ang chi a awm leh hi kan duh lo. Tin, Minister-in a department -ah contract emaw, supply hna emaw a awma, hnathawktu tur vaipa contractor nen agreement an siam tlang a, contractor hlawk hlawihna tur faulty agreement tam lutuk hian kan sum hi a tihek a. Contractor-te hian paw i an sawi thei lo tluk a ni a, 'court-ah han khing dawn ila, kan hneh dawn chuang lo' tih a ni vek, kan agreement hi a chhiat em avangin. Contractor te nena inthural ching kan nih avangin, heng hi a awm tawh lohna turin faulty agreement reng reng kan hmuh chuan action kan la ang kan ti. Chu chu a ni lawm ni Pathian Ram chu, chubak a 1172ell o ni? Project monitoring kan nei a, tunah hian an endik char char a, 'zo-siam i ngaisang ang' kan ti a, petrol leh diesel ah cess kan han la a. A chhan chu, petrol thun apiangin 'kawng siam hnatlangah hian ka tel ve a ni' tih hi inhria se kan duh; diesel thun apiangin, 'zirlai ka tanpui a ni; damlo ka kan a ni' tih inhria se kan duh; kha khan neitu thinlung a pe a ni.

Tichuan, wawiinah hian card var neitute pawh ka ngen duh a, Card eng leh card pawla awm ka ngen duh a. Kha kha in awmna tur a nilo; mi thenkhat kha chu card vara awm tur inni. Pathianin khawsak tha deuh hlekin a siam che u a, card varah insawn rawh u; nangni aia rethei zawk tan kian rawh u. Chung chu a ni tih kan tum. Dikna tun din kan duh a ni. Mi tam takin an card te an surrender tawh a; 'ka insawn chho dawn a; khawngge, ka aiah ka thenawmpa, ka aia rethei zawk hi lut the se', an ti a. Heng hi midang tana malsawmna kan nihna vek a ni. Bukna a dik mek a, buhfai hralh bang a tham ral tawh lova, pawisa tam tak kan safe a, CBI general consent vawi hnih ngawt kan pe a, Chief Minister relief fund-ah mi tam takin ui lovin pawisa in rawn thawh a, kan lawm a. A transparent a; tu hnen atangin nge kan hmuha, tu hnenah nge kan pek, hmet ula, in hmet chhuak thei vek.

Tin, ruihhlo dotu, a committee-a kum hnih chung lo committee ngai reng reng tawh lo kha, wawiinah chuan core committee-in ngawrh takin hma kan la mek a, Zofate inpumkhatna lamah thui tak ke kan pen a; chutiangin, austerity measures te pawh kan la la chho zel a. Work order 1172ell ova hnathawh reng reng hi he sorkar-ah hian a awm ve tur a nilo, kan ti a ni. Heng zawng zawng hi kan rama Pathian ram a lo zau zelna tura kan tih a ni.

A tawp berah chuan Pu Speaker, kan beisei phak loh hi kan tawng chho a. Kan aupui ngam miah loh 4-lane compensation land-owner pek baw k, Forest Department pek baw k kha dan kalh ni si, mahse, kan pek loh chuan Forest Department-in 'clearance kan pe dawnlo che u' an ti si; land owner lamin, 'min pek loh chuan in chek dawnlo reng reng' an ti baw k

si. Chuvangin, kan kawngpui laih theih lohin a awm reng a. Central-ah Minister hovin kan zuk meeting a, inthlahrung takin tawngtai chungin he committee hi kan attend a. India rama la thleng ngai reng renglo Land owner pe bawkw, Forest Department pe bawkin tunah chuan ka mite an insem mar mar tawh a ni, compensation hi. Heng te hi kan tihtheih a ni lova, Pathian min awmpuina a ni tih kan hria a ni.

Tichuan, Lengpui Airport te pawh, kan tum loh ramah thliin min lenchho dawn niin kan hria a. Kan lo beidawn tawhna AAI te pawh Home Minister-in, 'keimahin hma ka la ang, nang nen, Aviation Minister nen; kan pathumin kan thu tlang anga kan sawi fel ang' a ti tlat a ni. Chung chu a ni a, hengah te pawh hian kan beisei loh thil kan tawng chho dawn niin kan hria a.

Tin, rigid pavement kan tiha kawng kan han siam reng rengah hian, paver khawl luh theihna chinah chuan BC vekin kan siam tawh a. ZPM sorkarna hnuiaia kawng hi chu a tlo bik dawn ta vek a ni, tunah hianin. Chu aia tlo lehzual rigid pavement-a tih kan dil a, Home Minister pawh ka hrilh a; tin, MoRTH Minister pawh kan la sawipui leh ang a, heng te pawh hi min phalsak leh mai hi kan beisei a.

Tin, kan lo sawi rik ngam ngai hauh loh, Territorial Army company 2, hmeichhe leh mipa company kan nei leh mai dawnin kan hria a; mizo hlang batallion puitlingah nakinah kan la siam ang.

Tin, Thenzawl-a Lau Lui min veipui a; saw saw kan khuap ang a, dil mawi takah kan siam dawn; Peace City kan din dawn. Vawinah hian helaia ka sawi ngam ngai hauh loh kha ka sawi ngam ta - Mizoram hi India rama state ralmuang ber a nih angin, Thenzawl khawpuiah Peace City din turin Prime Minister ka sawipui a, Home Minister ka sawipui a, mi hrang hrang ka sawipui a. Tunah hian MOHUA atangin DPR siamna tur crore 10 min pe dawn ta a, a lawmawm khawp mai.

Tichuan, Assam Rifles sawm te hi kan sawi ngam ngai hauh loh a ni a, hei hi a hmawr bawkw nan kan hmang ang a. 1978, kum 38 kal ta ah khan, khati laia kan Chief Minister, Pu Laldenga hmalakna a ni a. Civil nen kan intibuai a, civil mi pakhat kah hlum a ni. Khata tang khan, 'chhuak rawh se', tih kha a lo ni tan ta a; kan kal kawng hi a thuiin a hautak khawp mai. Tichuan, sorkar hmasa hunah Zokhawsang-ah hmun te pein an lo develop a, hma tam tak an lo la a, an fakawm kan ti a ni. Amaherawhchu, engatinge an chhuah theih si loh kan tih chuan, an ram retain tur leh chhuahsan turah hian hauh chin an nei tlat a, chutah chuan kan sorkar hmasate nen an inrem theilo a ni. Draft MoU chu a awm a, mahse kei ngei pawhin draft MoU thlir turin meeting ka ko tawh a, ka Chair a, lehlamah Mizoram sorkar, lehlamah Assam Rifles ho, kan inhial ringawt mai a ni. Hmasawna kan nei lo. Chuta tang chuan, 'tih dan i thlak ang' kan ti a, Home Minister-ah, Defence Minister-ah, Army Chief-ah, an DC-ah 'mimal inkawmngeihnain sut kuak i tum ang' kan ti a, tichuan, hma kan han la a. 'Chite church area leh Babutlang hi chu kan chhuahsan thei' an ti mai; an harsat lo. Lammual area kan han ti leh a, 'Aw le' an ti leh a, sikul area-ah an tang leh tlat a. Kan han innawr chho leh a, chutah an han phal leh a. Chutah, quarters guard leh a chung tlang saw, 'Saw saw chu engtik lai maha chhuahsan kan tumloh a ni; tunhma atangin hei hi chu chhuahsan kan tum lo,' an ti a, kan tang ta viau mai a.

Mahselangin, “Kan inremna chin leh kan inremlohna chin hi Home Minister-ah i thehlut mai ang; keini pahnih hi chu kan tawp ta a nih hi,” ka ti a. Mahse, khatia ka tih apiang khan, “Ni lo e, inbe leh ang,” an ti ziah a ni. Home Ministry-a thlen kha an hlau tlat. A chhan chu, a hnuah min hrilh leh a, Home Minister khan, “Chief Minister duh dan lo han zawm rawh u,” a lo tih tlat vang a lo ni a. Chuvangin, a bul tumtu chu Home Minister a ni a, amah vang hi a ni ber a ni. Tichuan, “Quarter Guard tlang chu kan chhuahsan ang e; maherawhchu, company khat kan la retain ang,” an ti a. Tuna an damdawiin mualah sawn, ‘tah sawn kan awm ang’ an la ti leh a ni. Chu chu kan innawr kan innawr a, kan han nawr chhuak leh a. Chutah chuan, War Memorial leh Mandir-ah an la tang leh a, kan han innawr leh a. ‘Aw le’ an ti a; tichuan, “i sign tawh mai ang.” ka ti a. GAD-a kan Commissioner Pu Madina te, ka OSD Pu Johnathana te an tangkai em em a. Hemi chinah hian kan suak bak leh ang tih kan hlau a, sign tawh mai kan duh a ni. Amaherawhchu, Pu Johnathana hian, “Loch House hi chan tumin ka’n try leh ang e; ila beidawng lo ang,” a ti a. Tichuan, chaweiah te kan han insawm zak zak a. Loch House atang chuan kan umchhuak lehthei hram ta a, a lawmawm tak zet a ni.

Tichuan, AR duh dan ni lovin, kan duh dan zel khan an tawlh a, tun hi kan lo thleng ta a ni. Sawmi an sector headquarters saw chu engtiklai maha chhuahsan an tum loh hrim hrim kha a ni a. Chuvangin, kan Union Home Minister te, Lt. General Lakhera te leh kan GAD Commissioner Pu Madina te, kan OSD Pu Johnathana te hemi chungchangah hian mi hriat miah lovin an hah hle a, an tangkai ru hle a ni.

Tin, PWD, PHE, P&E, Revenue Department, Home Department te an fakawm hle mai. ‘Assam Rifles-in chhuanlam an siam kan hlau a, in tih tur lo va ti vek rawh u’ kan ti a; ‘kawng siam a tul chuan, siam rawh u, eng pawh a tul chuan pe rawh u’ kan inti a, chhuanlam an neih lohna turin kan department-te hian kan tih ve tura an tih zawng zawng kha, ‘hei hi, hei hi’ an tih chuan, ‘aw, aw,’ kan ti vat vat mai a ni; an chhuah loh kan hlau lutuk. Amaherawhchu, ‘eng inpe tam lutuk; tui in pe tam lutuk’ te kan inti leh ta a. Eng te hi inpek tam lutuk theih a ni lo; an chhit bak bill an chawi dawn lo. Tui pawh an hman bak bill an chawi dawn lo; kha kha a ni a. Chuvang chuan, P&E-a transformer saw ‘khutah Mualpui-ah dah lovin, kan compound chhungah dah rawh u’ an ti a, kan duh lo a ni. Chu pawh chu kan tang thei ta a, chhuanlam tur nei lovin kan siam zel a. Transformer chhiate pawh ‘min repair sak rawh u’ an ti leh zel a, ‘aw le’ kan ti a, kan repair sak a.

Tin, encroachment a la awm nual a ni, sawlaih sawn. Chu chu ‘a mawh kan phur a nge’ kan ti a, keimahni ram anih angin. Tin, “kawngpui a siam sak a; a chhiat pawhin an maintain leh dawn,” te min ti leh zel a. Kawngpui kan maintain tur saw Assam Rifles kawng a nilo; kan farmer te feh kawng tur a ni. Saw saw a hranpa liau liaua kan dil chhuah a ni. A chhan chu, helai an chankah tibuai lo turin an ram helin alignment kan siam thar a, kawng lo awm tawh sa tlem ringin. Tichuan, saw saw chu Assam Rifles kalna tur nilo, kan mite kalna tur a nih avangin, kan tihsak ang a. A chhiat pawhin kan siam that sak ang. Chu chu kan tih tur a ni. Tin, ‘building an lei dawn’ min ti. Mi building tha lai a thlawnin kan chhuh ngawt thei hleinem! Keini pawh chhuak ila, a thlawnin kan pe ngawt duh dawn em ni? ‘A depreciated value-in kan lei ang’ kan ti a ni; a depreciated value chu a tlawm dawn lutuk. Khangte lo sawisel zel tur kha a nilo.

Tin, ‘inremlohna a awm chuan Home Secretary-in thutawp a nei ang’ kan ti a, Home Ministry-ah kan tlu lut a ni. Inremlohna kan neih chuan, keini pahnih chuan kan sawifel dawn lo; a tawpa min remtu tur chu Home Ministry a ni. Kha kha kan ziak lang mai a ni. Tichuan, MNF sorkar khan thu tak kut a lo thlak tawh a, Congress lampang erawh chuan kut an thlak ka hre ve meuh lova. An rawn tih ber chu, an hotupa pakhat hian a rawn ti ve vak zel a; a tawngkam pangngai - ‘dawt muhlum’, ‘dawt ngial ngan’ sawiah te tun tunah pawh min rawn puh leh a. Khabak kha chu an rawn tih em em pawh ka hrelo.

Hetiang hian tehkhin thu sawi ta ila - MNF sorkarin telna an nei a, ZPM sorkar pawhin telna kan nei a ni. Nupa kum 37 inneiin, fa lo nei thei lo ta sela, inthenin pasal dang nei ta sela, pasal dang a neih kumah khan fa hring ta mai si sela, a pasal pahnihna khan, ‘min neih hma kum 37 an inneih chhung pawh khan ka tel ve a ni’ zuk ti se, tuman an pawm lo ang ti rawh u. Chutiang bawkin a pasal hmasa khan ‘e, kan inthen hnua fa i neihnaah pawh hian ka inrawlh ve a ni’ ti se, thubuai lian tak a awm ang.

Chuvang chuan, MNF tih chin a awm a, ZPM tih chin a awm a, an tih theih loh chin kha keiniin kan ti ta a ni. .... (*Interruption*)

**PU LALCHHANDAMA RALTE, OPP. LEADER:** Pu Speaker, khawngaihin. Kan House Leader sawi kha, map kha kan inpe taw ta a. Lo zirchian deuhte a awm em? Assam Rifles ram hian LSC nge, pass engnge an neih dan? Assam sorkar 1952 gazette, ram map mai kha a ni em? Tin, a copy kha min pe ve thei em?

**PU LALDUHOMA, CHIEF MINISTER:** Pe thei e; kha chu thuruk a ni lova, kan inpe thei ang. Amaherawhchu, (ka’n sawi mai ang a) a vai hian joint survey kan nei vek a ni; chhuahsan tur pawh, chhuahsan loh tur pawh survey kan nei vek a, survey hmasa behchhanin, tichuan kan record vek a ni. Tunlai thiamna hmangin survey hi tih a ni a. Khatla ami saw an ram pass-in a area a sawi chin aia zau deuh a lo ni a; mahse, a chuang saw a sir ze ze a ni a, chu chu hmun khata min hlawm sak a, Chief Minister bangla leh office dah len hram tumin tunah hian hma kan la leh a ni. Kan hlawhtling dawn nge dawn lo kan hre lova. Hmun 2 kan identify a, ‘in phal zawk zawk’ kan ti a, acre 1 leh tlem a ni. Chief Minister office khita a awm daih khi indawr a buaithlak lutuk a, chu erawh chu la sawiri ring vak lo ila, kan thei dawn nge dawn lo kha a la hriat loh a. An ram bak a ni a, an ram bak kha chu an claim thei lova. An claim theih loh laite kha a tung ze ze zawng kha chuan kan hmang tangkai dawn chuang si lo a ni. Chuvang chuan, ‘area khatah min baw sak teh u’ kan la ti leh mek a nih chu. Chu chu thil awm dan a ni.

Tichuan, an ram chhuahsan hman dan tur ngaihtuahtu tur committee kan din a, party tinte kan tel vek ang a, a tel awm chi a stake-holder pawimawh awm chin chu kan tel vek turah kan ngai a ni. Chutiang chu kan inbuatsaih dan a ni a. Heng zawng zawng hi inthlan lai pawha ‘kan sorkar chuan heng hi kan ti ang’ tia kan aurik ngam hauh loh, amaherawhchu kan sorkar hnua kan beisei piahlam ram, Pathian malsawmna zara kan thlen a ni a, kan lawm em em a ni.

Aw le, tichuan Pu Speaker, ka duh tawk ang a.

**PU ROBERT ROMAWIA ROYTE:** Pu Speaker, thil pakhat lek. Hei kan House Leader thusawi kha ngaihthlak a nuam khawp mai a, ropui ka ti hle mai. PMJVK-a

hnathawh zawh tawhna bill tam tak pek loh hi engtikah nge an pek theih ang, tih leh, Central Sorkar sum rawn release tawh sa, bill bat rei lutk avanga 7% interest an rawn thin kha, an la ba reng em ni? Chungte chu sum a thara kan hmuh harna chhan te hi a ni thei ang em, tihte kha ka'n zawt teh ang.

**PU LALDUHOMA, CHIEF MINISTER:** Pu Speaker, nangmah kaltlangin amah ka'n ngen ang a - A naute kha lo thawhtir thuai thuai sela a ni mai. Kan zavai hian kan ram siamna turin kan tangkai tawn vek a, opposition tel loin keiniho ngawt hi ni ila kan kal sual mai ang. Chuvang chuan, min veng hneh tha khawpin ka hria a; kan ram tan kan tangkai vek a ni. He kan Session chung hian keimah chauh pawh ni lovin, kan zavai aiawh hian ka'n tawng ang a; lo inhliam emaw, lo intihnat deuh kan neih pawhin, kan inngaidam tawn theuh dawn nia. Kei pawhin a tulna apiangah in mi ngaihdam ka dil e.

Tichuan Pu Speaker, Governor of Mizoram recommendation leh i phalnain heng ka demand-te: -

Demand No.	Department	Amount in ₹
1	Legislative Assembly	39,46,70,000.00
2	Governor	30,80,000.00
3	Council of Ministers	8,42,67,000.00
4	Law & Judicial	69,94,78,000.00
5	Vigilance	81,50,000
9	Finance	40,33,43,32,000.00
11	Secretariat Administration	1,36,55,11,000.00
14	Planning & Programme Implementation	4,73,759,000.00
15	General Administration	1,06,17,000.00
<b>TOTAL</b>		<b>48,75,90,14,000.00</b>

A vaiin crore ₹48,75,90,14,000 te hi kum 2025-26 chhunga heng ka department chante inrelbawlnaa hman atan he House zahawm takah hian ka rawn submit a, ka rawn move nghal a, pass turin ka rawn ngen nghal bawk e. Ka lawm e.

**SPEAKER** : Pass kha kan indil tawhin ka hria a, kan pass ta chiah lo em ni kha Pu Ngun? Bill vawihnihna kan ti mai dawn em ni?

Tunah chuan, Chief Minister zahawm tak Pu Lalduhoma'n a demand-te: -

Demand No.	Department	Amount in ₹
1	Legislative Assembly	39,46,70,000.00
2	Governor	30,80,000.00
3	Council of Ministers	8,42,67,000.00
4	Law & Judicial	69,94,78,000.00
5	Vigilance	81,50,000
9	Finance	40,33,43,32,000.00
11	Secretariat Administration	1,36,55,11,000.00
14	Planning & Programme Implementation	4,73,759,000.00
15	General Administration	1,06,17,000.00
<b>TOTAL</b>		<b>48,75,90,14,000.00</b>

A vaiin crore ₹48,75,90,14,000 chu House-ah pass a rawn dil ta a. Remti apiangin, ‘remti’ ti ula; remtilo kan awm chuan, ‘remtilo’ ti ula. (House-in pass a remti a.)

A lawmawm e. Chief Minsiter zahawm tak Pu Lalduhoma demand chu House-in lungrual takin a pass ta a ni. **(Pu Lalduhoma, Chief Minister:** Pu Speaker, ka lawm e)

Aw le. Tikhan, financial business chu kan zo ta a. Tunah Legislative Business-ah kan kal ang.

### **LEGISLATIVE BUSINESS**

**SPEAKER** : Kum 2025-26 chhung chhunga Minister ten an Demand chante an enkawlina tur Demand for Grants kan vote tak zawng zawng leh SARS hnuaiia sum hman turte hman anih theih nan bill kan pass a la ngai a. Tunah kan Chief Minister zahawm tak Finance Department changtu Pu Lalduhoma’n ‘The Mizoram Appropriation (Demand for Grants 2025-2026) Bill, 2025’ chu House ah introduce phalna rawn dil turin i sawm ang u.

**PU LALDUHOMA, CHIEF MINISTER:** Pu Speaker, i phalna leh he House remtihain, ‘The Mizoram Appropriation (Demand for Grants 2025-2026) Bill, 2025’ hi he House zahawm takah hian introduce phalna ka rawn dil e.

**SPEAKER** : Kan remti em? Aw le; han introduce se la.

**PU LALDUHOMA, CHIEF MINISTER:** Pu Speaker, i phalna leh he House remtihain, ‘The Mizoram Appropriation (Demand for Grants 2025-2026) Bill, 2025’ hi he House zahawm takah hian ka rawn introduce e.  
(*Chair thu angin a copy te sem a ni a.*)

**SPEAKER** : Aw le. Chief Minister zahawm tak kan sawm leh ang a. ‘The Mizoram Appropriation (Demand for Grants 2025-2026) Bill, 2025’ House-a introduce tak chu rawn move-a, pass dil nghal turin i sawm ang u.

**PU LALDUHOMA, CHIEF MINISTER:** Pu Speaker, i phalna leh he House remtihain ‘The Mizoram Appropriation (Demand for Grants 2025-2026) Bill, 2025’ hi he House zahawm takah hian ka rawn move a.

Pu Speaker, Governor of Mizoram-in a recommendation leh, i phalna leh he House zahawm tak remtihain heng Demand Nos.1- 49: -

**Voted amount - ₹1,38,35,42,60,000/-** (*Cheng vaibelchhia singkhat sangthum zariat sawmthum panga, nuai sawmli pahnih sing ruk*) leh,

**Charged amount - ₹13,63,33,94,000/-** (*Cheng vaibelchhe sangkhat zathum sawmruk pathum, nuai sawmthum pathum sing kua sang li*)

**Total - ₹15,90,87,60,000/-** (*Cheng vaibelchhia singkhat sangnga za sawmkua pariat nuai sawmsarih paruk*)

te hi he House hian min pass pui turin ka rawn ngen e.

**SPEAKER** : Aw le. Appropriation Bill hi sawiho a ni ngailo a. Kan Chief Minister zahawm takin pass a rawn dil nghal bawk a, kan buk nghal mai ang a.

‘The Mizoram Appropriation (Demand for Grants 2025-2026) Bill, 2025’ chu pass remti apiangin ‘remti’ ti ula; remti lo kan awm chuan ‘remti lo’ ti ula.

(House-in pass a remti a.)

Aw le. Kum 2025-2026 chhunga sorkar sum mamawh - ₹15,90,87,60,000/- (Cheng vaibelchhia singkhat sangnga za sawmkua pariat nuai sawmsarih paruk) te hi hman theihna tur bill - ‘The Mizoram Appropriation (Demand for Grants 2025-2026) Bill, 2025’ chu House-in lungruak takin a pass ta a ni. (**Pu Lalduhoma, Chief Minister:** Pu Speaker, ka lawm e.

**SPEAKER** : Aw le. Tunah chuan, tawp lam kan hnaih dawn ang a. Kan Budget Session chhung zawnga kan business – Summary of Business ka’n tarlang ang a.

### **SUMMARY OF BUSINESS TRANSACTED DURING BUDGET SESSION (w.e.f. 19.2.2025 – 20.3.2025)**

Tun tum Session hi Ninth Legislative Assembly a Session vawi 4-na niin, Budget Session a ni bawk a. Business Advisory Committee thukhawmin a rel angin, Session hian ni 30 chhung awhin vawi 14 thu tura duan a nih angin vawinah tluang takin kan hun tawp kan lo thleng ta a. A tlangpuia tun Session chhunga kan hnathawhte chu hetiang hian han tarlang ila -

1. **Governor’s Address:** Kan Governor zahawm takin Session tan niah House a rawn address a, he a thusawia Motion of Thanks Pu T. Lalhlimpuia rawn put luh, Pu Jeje Lalpekhlua’n a rawn thlawp chu Ni 21.2.2025 ah sawiho anih hnuin lungruak takin kan pawm a ni.
2. **Panel of Chairmen:** A hnuiaia member-te hi Panel of Chairmen atan ruat anni:
  1. Pu C. Ngunlianchunga,
  2. Pu Robert Romawia Royte,
  3. Pu Lalramliana Papuia,
  4. Pu Jeje Lalpekhlua,
3. **Obituary:** Dr. Manmohan Singh, former Prime Minister chu House-ah sunna neih a ni a. Pu Lalduhoma, House Leader-in a chanchin tawi sawina leh sunna thu a sawi hnuah Pu Lalchhandama Ralte, Opp. Leader, Dr. K. Beichhua leh Pu C. Ngunlianchunga ten sunna thu an sawi bawk a. Hemi zawhah hian sunna entirnan ngawi renga minute khat din a ni.
4. **Questions:** Tun tuma zawhna kan dawn dan chu hetiang hi a ni –
 

Starred Questions:

1) Zawhna lut zat	- 933
2) Zawhna admit zat	- 931
3) Zawhna reject zat	- 2
4) Withdrawn by Member	- 1
5) List of Business a dah zat	- 240
6) House a chhan zat	- 55
7) House a chhan hman loh	- 185

Unstarred Questions:

- |                        |       |
|------------------------|-------|
| 1) Zawnha lut zat      | - 105 |
| 2) Zawnha admit zat    | - 97  |
| 3) Zawnha reject zat   | - 7   |
| 4) Withdrawn by Member | - 1   |

5. **Presentation of Budget:** Pu Lalduhoma, Hon. Chief Minister chuan hengte hi House-ah a present a: -
- 1) The Annual Budget for the Year, 2025-2026 with allied papers.
  - 2) Supplementary Demand for Grants, 2024-2025.
6. **Presentation of Reports:** Tun Session ah hian House ah Report 10 (sawm) present a ni a, chungte chu –
1. The Fourth Report of the Business Advisory Committee
  2. The First Report of the Committee on Estimates (2024-2026)
  3. The Second Report of the Committee on Petitions (2024-2026)
  4. The First Report of the Subject Committee V (2024-2025)
  5. The First Report of the Committee on Paper Laid on the Table
  6. The Fourth Report of the Public Accounts Committee (2024-2026)
  7. The Fifth Report of the Public Accounts Committee (2024-2026)
  8. The Third Report of the House Committee
  9. The Twelfth Report of the Committee on Government Assurances
  10. The Thirteenth Report of the Committee on Government Assurances
7. **Resolutions:** Kan Budget Session ah hian Official Resolution 2 (pahnih) leh Private Members' Resolution 85 (sawmriat panga) alo lut a, a vai hian admit vek ani.
- (a) **Official Resolution:** Pu Lalthansanga, Minister, Environment, Forests & Climate Change Department hnen atanga lo lut leh Pu B. Lalchhanzova, Minister, Land Revenue & Settlement Department hnen atanga lo lutte chu House-in lungruat takin a pawm a ni.
  - (b) **Private Members' Resolution:** Private Members' Resolution 85 zinga pakhat Pu K. Laldawngliana hnen atanga lo lut - *'Mizoram Sorkarin Lengpui Airport, Indian Airforce kuta hlan/hralh tuma hma a la mek hi tha ka ti lova, titawp rawh se'* tih hi sawiho anih hnuah hnawl a ni.
8. **Laying of Papers:** Paper 19 (sawm pakua) lay a ni a, chungte chu -
- i) Annual Report of the Office of the State Commissioner for Persons with Disabilities, Mizoram for the year 2022-2023 and 2023-2024.
  - ii) The Annual Report of Mizoram KVI Board for the year 2017- 2018, 2018-2019, 2019-2020, 2020-2021, 2021-2022 and 2022-2023.
  - iii) Mizoram Ease of Doing Business Rules, 2023.
  - iv) Mizoram State Higher Education Council Rules, 2024.
  - v) The Annual Reports of Mizoram State Commission for Protection of Child Rights (MSCPCR) for the year 2023-24.
  - vi) Economic Survey of Mizoram 2024-2025.
  - vii) Notifications Issued under the Mizoram Provincialization and Upgradation of various categories of Schools.
  - viii) Fifth Annual Report of Mizoram Lokayukta.

- ix) MIC Annual Report 2023-2024.
- x) Mizoram Electricity Regulatory Commission (Threshold limit for Intra-State Competitive Bidding for the State of Mizoram).
- xi) Mizoram Electricity Regulatory Commission (Fuel & Power Purchase Cost Adjustment) Regulations, 2024.
- xii) Mizoram Electricity Regulatory Commission (Compliance Audit)
- xiii) Regulations, 2024.
- xiv) The Mizoram Electricity Regulatory Commission (Renewable Purchase Obligation and its Compliance) Regulations, 2024.
- xv) Report of the Director of Local Fund Audit on the Accounts of Local Authority 2021-2022, 2022-2023 & 2023-2024.
- xvi) Finance Accounts 2023-2024 Volume – I in respect of Government of Mizoram.
- xvii) Finance Accounts 2023-2024 Volume-II in respect of Government of Mizoram Appropriation Accounts 2023-2024 in respect of Government of Mizoram.
- xviii) The Mizoram Electricity Regulatory Commission adoption of the Joint Electricity Regulatory Commission for Manipur and Mizoram (Standard of Performance for Distribution and Transmission Licensees) Regulations, 2014, Order 2024, (First Amendment) Regulations, 2024.
- xix) Statement of correction on the reply to Starred Question No. 777 which was transferred to Unstarred Question No. 155 regarding Industrial Growth Centre, Luangmual chungchang.

9. **Government Bills:** Tun Session ah hian Government bill 12 (sawmpahnih) a lut a, pass vek a ni. A hnuai mi hi tun Session chung a Bill pass tak te chu a ni: -

- i) The Mizoram Urban & Regional Development Bill, 2025.
- ii) The Mizoram Goods and Services Tax (First Amendment) Bill, 2025.
- iii) The Mizoram Private Placement Agencies (Regulations) Bill, 2025.
- iv) The Mizoram State University Bill, 2025.
- v) The Mizoram Exhibition of Films on Television Screen through Video Cassette Players (Repeal) Bill, 2025.
- vi) The Mizoram Youth Commission Bill, 2025.
- vii) The Mizoram (Village Councils) Bill, 2025.
- viii) The Mizoram (Pension for Members of the Defunct Mizo District Council and of the Defunct Pawi-Lakher Regional Council) (Amendment) Bill, 2025.
- ix) The Mizoram Appropriation (Supplementary Demand for Grants 2024-2025) Bill, 2024.
- x) The Mizoram Liquor (Prohibition) Amendment Bill, 2025.
- xi) The Mizoram Salaries, Allowances and Pension of Members of the Legislative Assembly (Amendment) Bill, 2025.
- xii) The Mizoram Appropriation (Demand for Grants 2025-26) Bill, 2025.

10. **Notice by a Member:** Pu Robert Romawia Royte MLA hnen atangin ‘Phuldungsei khuaa mi 85 Ration Card paihsak an neih leh theih nana rawtna’ tih kan Dan 335-na hmanga House-a sawi a dilna chu phalsak anih angin, minute 5 chhung a sawi a ni.

11. **Financial Business:** Supplementary Demands for Grants 2024-2025 hi ni 5.3.2025 khan sawiho niin lungual takin pass a ni a. Demand for Grants 2025-2026 hi ni 12.3.2025 atanga sawiho tan niin nitin Minister pahnih demand sawiin pass zel a ni a.

Vawiin ni 20.3.2025 hi kan duanlawk anga demand sawi ni hnunung ber leh kan session tawp ni a ni a. Kan hriat tak ang khan lungrual takin vawiin a demand kan sawi ho pawh kan pass a ni. Minister hrang hrang ten an department enkawlina atana an Demand te chu member ten thahnemngai takin kan sawiho a, member zawng zawngte hnenah pawh lawmthu ka sawi a ni.

Kan Session hun tawp kan lo thleng ta reng mai, Session tuang taka min kaihruaitu Pathian hnenah lawmthu awm sela.

Kan MLA ten taima tak leh dawhthei takin ro kan rel hi a lawmawm a, ka dinglam leh ka veilama mite pawh kan inbuatsaihna a tha tih a hriat hle mai a. Ngaihdan inmillio deuhah pawh indawhtawna a lo lang leh thei thin hi a ropui ngawt mai. Thahnemngaih luat avanga han rik deuh laih chang te chu awm ve bawk mahse, inhriatthiamna nena kan inngaithla zui leh mai te hi parliamentary tha zia a ni a; tin, a Mizo zia em em bawk a ni. Rorelna a thu kan inchuhna lamah tawng duhthawh deuh te pawh kan lo awm palh thei a, heng te hi member te inkarah chuan rorelna in chhungah bak kan pelh tir ngai loh kha hre reng ila. Tin, hetiang a kan han inchal-tauh bap bap thin te hi Mizoram leh mipui te hmangaihna vang a ni tih kha mipuite pawhin min lo hriat sak turin ka rawn ngen bawk a ni. India ram pum ang pawha rorelna ina tawngkam leh nungchang mawi lanchhuahna House kan nih thin kha i chhawm nung zel ang u.

Kan hriat angin, Ni 17.3.2025 zinga Treasury Bazar kang kha kan tuar ve nual a, Kan Fire Department te leh kan House Guard duty-te chungah lawmthu ka sawi a. P&E leh PWD lam CE & EE leh official ten theitawp an chhuah ho a, mutmu pawh tuah hleithe i lovin min vil rawt reng a. Security lamah kan police-te inthununna fel tak nena roreltute venghimitute chungah lawmthu ka sawi bawk a. A bik takin, tun tum chu Marshal hi kan lam ri teh ang. Marshal hi thlaktu nei ve lo a ni a, mutthluk te pawh awl tak tur a ni a; chuti chung chuan harhvang takin a duty a hlen thin a, a lawmawm hle a ni.

Health Minister zahawm tak Pi Rinpuii leh a pawlte - Health Department lama doctor leh thawktu dangte'n min thutchilh tlat reng a, free clinic te neiin kan zavaiin kan in checkup-in ka hria a, buai tak tak vek kan nih avanga inentir tura kal vel ngai lova helaia min rawn thutchilh thei te kha a lawmawm em mai a, an hnenah lawmthu ka sawi bawk a ni. Kan PWD Minister kha a inentir ve ta em kha? Injection tur khan an um zak zak an ti deuh khan ka hria a. Ka hmu chiah lova.

Press mi - All India Radio, Doordarshan, LPS leh Zonet, BSNL te leh Media, Journalism lama mipui hriat tura House rorelna min lo puanzar sak thin tute chungah lawmthu ka sawi a ni. Information Technology lo thang zelah kan Session te hi Youtube lama lo thlir tute hi an thahnem tawh hle mai a. Session chhunga memberte chet dan leh an nungchang video clip te, an thusawi thilung dek bik lai te kan tarlang dawn anih pawhin, nungchang mawi lai leh entawntlak tak tak awm te hi pu darh tam turin ka ngen che u a, chu chu hnam ang pawha kan mawina tur a ni e.

Awle. Kan Assembly Secretariat lam han sawi ve leh lawk ila. Kan Commissioner & Secretary Pi Vanlalthantlingi hi Assembly-a hmeichhe Commissioner hmasa ber leh awmchhun a ni a. Kan member zahawm tak Pu R. Rohmingliana khan a zawt deuhin ka hria a. Ani hi thla thar lamah chuan pensioner a ni ve tawh mai dawn a. Chutiang bawkin

kan thawhpui dangte pawh retire tur hi an awm nual a ni. An hma hunah hun hlimawm tak hmang turin duhsakna ka hlan a ni. Assembly Secretariat a thawktu zawng zawngte, a thim a var thlu lova tun kan Session te tluang taka kan neih theihloh hlaua vir buai em em mai, mutmu pawh tuah mang lo te, in zavai chungah lawmthu ka sawi a.

Tin, official-te hnena ngen duh ka nei a. Session lehah chuan kan official te hnena ngenna ka han siam duh chu, minor error leh typo-mistake nia ngaih theih thlak thleng ngai a awm nual mai a, tun tumah hian. Legislature leh Executive te hi inan lohna hlek lai kan nei a. Hetia minor emaw, minor lo pawh nise document thlak thleng dawn chuan kalphung paltlang tur a tam em em a, in buai phah hle a, Assembly Secretariat pawh kan buai phah em em a ni. Session leh atang chuan tihsual awmlo thei ang bera kalpui tura inpuahchah hram turin kan insawm nghal a ni.

Tin, hei tun Session chu thilpek kan dawn tam ber tum a ni ang em aw, Pu Beichhua? Kan Vety Minister Pu Sawivunga hmalaknain artui plate kan dawng a, lawmthu ka sawina a nia. Tin, kan House Leader Pu Lalduhoma hnen atangin a bial chhunga mi ngat zikhlum, hmarcha, bawkbawn etc. kan dawng vekin ka ring a. Tin, MIFCO atangin Pu Lalthazuala Royte, MIFCO Chairman hmalaknain vawinahn khan bag kan dawng hlawmin ka ring a, a chhung kha ka la en miah lo a, MIFCO product eng eng emaw a nih ka ring a, sausage, meat ball tih vel a awm a ni ang. Tin, Prof. Lalnilawma hnen atangin a bial chhunga mi tho balhla kan dawng bawka, a lawmawm tak zet zet a ni.

Thil kan lo tih phelh palh awm thei a ni a, thil tih fel loh deuh te, chungah chuan kan thil tih fel loh deuh te, kan hnufumnaah te thupha ka chawi bawka ni. Tin, thil sawi fo a rem lo a heta tangin, thil pakhat chauh a tawp nan - Moral reformation sawi ve thin tu ka ni a, kha kan House Leader-in a sawi a, Pu B. Chhanzova'n a sawi a, Pi Baryl Vanneihsangin a sawi a, Pu C. Ngunlianchunga'n a sawi a; moral reformation hi rorelna-in atangin tan tur niah ka ngai a, chuvangin thu tam ka sawi lo ang a. Kan zavaiin, Zoram mipuite ngen kan duh ve pakhat leh ka nghahlelh chu - kan cubic lung a tlin hun te, kan chartin-in inchi 3X4 a tlin a, kan thingphek te a tlin ve hun te hi ka nghak hlel hle a ni tih kha, a tlangkawmnan ka'n sawi ang e.

Aw le. Tunah chuan kan tih tur kan zo ta a; in hma hunte hriselna tha nena hmang turin duhsakna ka hlan a che u.

The House is adjourned *Sine die*. (9:36 PM)